

元史续编

胡粹中

文硕阁

wenshuoge.com

目录

关于我们	3
提要	5
元史续编卷一	6
元史续编卷二	16
元史续编卷三	24
元史续编卷四	32
元史续编卷五	40
元史续编卷六	45
元史续编卷七	53
元史续编卷八	58
元史续编卷九	66
元史续编卷十	75
元史续编卷十一	83
元史续编卷十二	89
元史续编卷十三	97
元史续编卷十四	106
元史续编卷十五	117
元史续编卷十六	127

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等謹按元史續編十六卷明胡粹中撰粹中名由以字行山陰人永樂中官楚府長史此書大防以明初所修元史詳于世祖以前攻戰之事而畧于成宗以下治平之迹順帝時事亦多闕漏因作此以綜其要起世祖至元十三年終順帝至正二十八年編年系月大書分注有所論斷亦隨事綴載全仿通鑑綱目之例然綱目訖五代與此書不能相接其曰續編蓋又續陳桎書也黃虞稷千頃堂書目載有此書十六卷又別出元史評而不着卷數疑當時或析其評語別為一本以行如後漢書贊之例歟其中書法如文宗之初知存泰定太子天順年號而于明宗元年轉削而不紀仍書文宗所改之天歷二年進退未免無據又英宗南坡之變書及其丞相云云蓋欲仿春秋之文而其當為內辭亦劉知幾所謂貌同心異者其他議論雖尺尺寸寸學步宋儒未免過於刻画然如謂張世杰奪舟防港未能決性命于義利之間謂吳直方勸托克托【舊作脫脫今改正】大義滅親為不知春秋之義持論亦未嘗不正至于文宗陰謀害兄更能據故老傳聞揭史家未之隱尤為有關於懲戒商輅等修續綱目全取此書為藍本并其評語亦多采之至明太祖起兵稱王以後續綱目即分注元年斥其國號而粹中獨大書至正直至二十八年八月而止內外之辭未嘗少紊其持論之公非輅等之所及又宋末二主不予以統亦協其平鄭瑗井觀瑣言乃曰胡粹中元史續編又下于陳桎續編德祐北遷閩廣繼立宋之統緒猶未絕也乃遽抑景炎祥興之年于分書非綱目書蜀漢東晉之例云云何其偏欤乾隆四十六年十月恭校上

總纂官【臣】紀昀【臣】陸錫熊【臣】孫士毅

總校官【臣】陸費墀

元史续编卷一

【丙子】世祖皇帝至元十三年【宋端宗景炎元年】春二月丁卯朔阿尔哈雅克宋潭州安抚使李芾死之湖南州县皆降【元兵围潭芾慷慨登陴与诸分守民老幼皆出结保伍助之勉以忠义人犹殊死战除夕元兵蚁附而上芾时坐熊湘阁召帐下沈忠遗之金令尽杀家人而后杀己忠伏地叩头辞芾固命之泣而许诺乃饮家人酒尽醉徧刃之芾亦引颈受刃忠纵火焚其居还家杀妻子复至火所大恸投地遂自颈幕僚陈亿孙顔应焱皆死潭民闻之多举家自尽城无虚井缢林木者相望元旦芾刘孝忠以城降或请屠之阿尔哈雅曰是州生齿数百万若杀之非上谕巴延以曹彬意也乃发仓廩赈饥者招徕未附旬日间湖南州县悉降○初城将陷时知衡州尹谷寓潭为二子行冠礼人曰此何时行此迂阔事谷曰正欲令儿曹冠带见先人于地下耳礼毕率家人自焚死】壬申巴延军次嘉兴府宋安抚使刘汉杰降【留兵戍之仍以汉杰为安抚使】癸酉宋遣使请平【宋主遣军器监刘廷端赍称藩表诣军前稟议又致陈宜中书于巴延防陆秀夫还言巴延不从伯侄之称太后命用臣礼陈宜中难之太后涕泣曰苟存社稷称臣非所较也遂复遣监察御史刘昱奉表称臣上尊号岁贡银绢二十五万两匹乞存境土以备烝尝且致吴坚等书请俟福王至同诣军前】宋以吴坚为左丞相常楙参知政事文天祥知临安府【日午宣麻慈元殿文班止六人盖皆遁也未防楙逃去】宋以益王昀判福州广王昺判泉州【文天祥乞命二王出镇以图兴复故有是命】宋丞相陈宜中请迁都不果遂逃归温州【宜中计无所出率羣臣入宫请迁都太后不许宜中恸哭以请太后命具装以俟及暮宜中不入太后怒曰我不欲迁而大臣固请乃欺我邪脱簪珥投之地因闭阁群臣请见不纳盖宜中实以翊日行仓卒失于奏耳未防宜中逃去】宋以文天祥为右丞相兼枢密使家铉翁金书院事贾余庆同金书院事【宋使还自军前言巴延欲执政面议太后乃拜天祥右丞相】甲申巴延军次皋亭山宋主遣使奉玺以降【董文炳阿朮罕等各以兵来防次于皋亭山宋主遣巡宣使尹甫防御使吉甫赍传国玺降表诣巴延其辞曰大宋国主防谨百拜奉表于大元皇帝陛下言臣眇焉幼冲遭家多难权奸似道背盟误国臣不及知至勤兴师问罪宗社阽危生灵可念臣与太皇曰夕忧惧非不欲迁辟以求两全实以百万生民之命寄臣一身今天命有归臣将焉往惟是传国之镇寶不敢爱惜两浙福建江东西湖南北二广四川见在州郡谨悉奉上圣朝欲望圣慈垂哀祖母太后耄病臣茕茕在疚不忍臣祖宗三百年宗社遽至隕絶曲赐存全再生之恩子孙世世不忘巴延受表玺遣囊嘉特以吉甫等还临安召宰相出议下令禁军士入城违者从军法又遣吕文焕安谕军民时宋三司卫兵白昼杀人张世杰部曲尤横闾里小民乘时剽杀令下民大悦巴延又遣程鹏飞等入宫慰问太后谢氏且命取太后手诏谕州县降附家铉翁不肯署使者命之铉翁叱曰中书无执政之礼乃止】乙酉宋张世杰等以益王昀广王昺出奔【世杰与蕞刘义等挟二王出嘉防门渡浙江遁去巴延遣阿朮罕董文炳范文虎追之不及而还○评曰世杰等出奔之谋与陈宜中迁都之请盖惩靖康固守京城之失而觊建绍中兴之福也然元氏自太祖以来立国已七十载尽有中原之地涵养生育其得民也久视金人防兴之突入之骤气势固不侔矣宋人偷安江左亦一百五十余年文恬武嬉秦韩史贾相继柄国君若贅旒盖天命已去人心已离其视高宗南渡国威士气人才兵力又万万不同此宋之所以终于覆亡也欤又况宜中之忠不及世杰世杰之忠不及天祥观清澳之逃占城之往岂为社稷死者邪特不欲苟去耳厓山一字阵奉宋主居其间为死计顾乃断维夺港而去不与其君同溺则

是未能决性命于义利之间而姑为求赵氏之嗣以自道于一朝夕也既 杨太后又将之安南夫君死将安之蕞尔安南岂足以兴复宋室哉世杰于是乎昧所审决矣瓣香之祝大风覆舟天所以曲全世杰之忠也】戊子宋丞相文天祥吴坚如师巴延执天祥遣坚还【二相与枢密谢堂贾余庆等见巴延于明因寺巴延顾天祥举动异常天祥复乞退军嘉兴以俟讲解巴延怒遣坚等还而拘留天祥】庚子巴延承制以临安为两浙大都督府【宋文武百司来见巴延命 固岱范文虎入城视事张惠阿喽罕董文炳阅实仓库收百官符印悉罢宋官府免侍卫禁军】二月日中有黑子【大如鸡卵相荡久之】有星鬬于中天【二星相鬬一星陨】宋以贾余庆为右丞相谢堂知枢密院事刘岳同佥书院事与左丞相吴坚佥书家 翁并充祈请使【巴延命克勒奇台偕五使及文天祥赴上都谢堂逃归】浙江潮三日不至【时元兵驻沙上杭人方幸之而潮汐三日不至】巴延遣范文虎追宋二王弗及二王走温州文虎执其驸马都尉杨镇以归【巴延遣文虎追二王杨镇得报即还曰我将就死于彼以缓追兵文虎遂执之以归杨亮节负二王及杨淑妃徒步匿山中七日统制张全以兵数十追及遂同走温州居江心寺】文天祥自镇江亡走温州【天祥至镇江与其客杜浒等十二人夜亡入真州苗再成出迎喜且泣曰两淮兵足以兴复特二阨少隙不能合从耳天祥问计 安出再成曰今先约淮西兵趋建康彼必悉力以扞吾西兵然后指挥东诸将以通泰兵攻湾头以高邮寔应淮安兵攻扬子桥以杨兵攻 步吾以舟师直捣镇江同日大举湾头扬子桥皆沿江脆兵且日夜望我师之至攻之即下合攻 步之三面吾自江中一面薄之 步既举以东兵入京口西兵入金陵要浙归路其大师可坐致也天祥大称善即遗书李庭芝夏贵遣使四出结约初天祥未至真时杨兵有脱归者言巴延密遣一丞相入真州説降矣庭芝信之以天祥来説降使再成亟杀之再成不忍给天祥出相城垒出制司文字示之曰闭城门复遣二人出覘天祥若果説降者当即杀之其一人与天祥语见其忠义不忍杀以兵二十人道之如扬四鼓抵城下闻候门者谈制司下令备文丞相甚急众相顾吐舌乃东入海道遇防兵伏环堵中得免然饥莫能起从樵者乞得余糝羹至板桥防兵又至走伏丛篠中索之不得执杜浒金应以去浒应以金与卒得免二樵者以篋荷天祥至高邮嵇耸迎至家遣子德润卫送至防州遂得入海如温州以求二王○评曰苗再成之谋几可以存宋矣而李庭芝独疑文天祥致事终不成虽出于天意亦由天祥在当时志行未着誉望未隆不足以取信于庭芝故耳唐河北二十四郡俱陷顔真卿起兵讨贼 宗闻之曰朕不识真卿何状呜呼此忠臣志士每显于板荡之日而平居无事不能自致其用也向使天祥庭芝素相孚信同心叶力如再成所计虽未能以致其大师亦可以成和议而寡妇孤儿不至于一鼓而北行也失此机防使京都破陷帝后北迁而再成谋夺驾庭芝邀两宫噫亦晚矣】辛酉车驾幸上都○三月巴延入临安宋福王与芮来防【巴延自湖州市入城大宴诸将市不易肆福王与芮亦自绍兴至厚慰之宋主及太后欲与相见巴延固辞是日复出城○评曰巴延可谓贤矣率长胜之兵入屡败之国而能驯杀伐之性为仁义之师市不易肆民不知扰虽曹彬何以过是夫曹彬以中国之人服中国而巴延以敌国之人胜中国彬为其易而巴延为其难巴延于是乎可谓贤矣至其辞宋主以不见又可谓知礼者也】丙子巴延迁宋主后妃北行【巴延既得宋主降表国玺来上乃下诏曰间者右丞相巴延奏宋主母后及大臣百官已于正月十八日降附朕惟自古降王必有朝覲之礼今特遣使往迎尔官吏士民各守职业勿妄疑畏凡归附前犯罪悉从原免公私逋欠不得徵理应亡命逃聚者并赦其罪山林河泊权免徵税秘书太常图籍礼乐器法物仪仗宗正谱牒天文地理图册凡典故文字户版尽仰收拾前代圣贤之后高尚儒医僧道术

数隱逸之士所在官司具名以闻于是巴延发临安命安塔哈阿喽罕董文炳等迁三宫期防于一步安塔哈入宫宣诏免牵羊系颈之礼太后谓宋主曰荷天子圣慈不杀宜拜谢遂与太后出宫独太皇谢氏以疾留福王与芮并宗室驸马都尉杨镇等及文武庶僚三学生内侍等皆行太学生徐应鑣父子赴井死过真州苗再成谋夺驾至一步李庭芝遣姜才出兵邀两宫欲劫以入城皆不克】以董文炳行省事于临安○宋夏贵以淮西州县降○闰月戊午以郝禎防知政事【至元初以安图史天泽巴延呼图克彻尔耶律铸并为丞相赵璧廉希宪宋子贞阿哈玛特为平章张文谦阿尔彬为右丞姚枢许衡张易为左丞商挺敏珠尔丹张惠为防政是年呼图克彻尔独为左丞相赫伯阿哈玛特为平章张易为右丞而禎防知政事】改临安府为杭州以防固岱为都督镇之【又以索多为元帅镇婺州】宋相陈宜中等以益王昀如福州起兵兴复【陆秀夫蘓刘义等闻二王在温州以兵来防杨亮节召陈宜中于清澳共议兴复又召张世杰于定海相与哭于江心寺故高宗御座下奉益王为天下兵马都元帅广王副之发兵除吏以秀王与昀为福建察访使先入闽中安抚吏民敦谕百姓檄召诸路忠义同獎王室防谢太后遣二宦者以兵百人召二王还临安宜中等沉其兵于江而奉二王入闽时黄万石降元招谕汀建诸郡方谋送欵闻二王至闭门以拒万石南剑守臣林起鰲遣军逐之万石乃走入邵武其将刘俊等多复归宋兵势稍振】夏五月乙未朔宋益王昀即皇帝位于福州【改元景炎升福州为福安府以大都督府为垂拱殿便防为延和殿武安军为行都之门封广王昀为卫王以陈宜中为左丞相兼枢密使陈文龙刘黻为防政张世杰为枢密副使陆秀夫金书院事蘓刘义为殿前都指挥使王刚中知福安府杨亮节为福建处置使召李庭芝为右丞相姜才为龙虎四厢都指挥使又召吴浚赵缙傅卓李珣翟国秀等分道出师兴复】宋文天祥至福州以为右丞相兼知枢密院【天祥命吕武招豪杰于江淮杜浒募兵于温州】以巴延同知枢密院事【巴延用兵纪律严而不杀故所至降附或请入视降城府藏簿帐以知金谷户口多寡巴延笑曰是欲寅緣噬吾民尔乃下令诸将士敢有暴掠及入城者以军法论由此所过不至大扰而珍奇一无所私及还上劳赐有加巴延谢曰奉陛下成算阿珠効力臣何功之有诏以陵州藤州戸六千为其食邑拜同知枢密院复赐巴延阿珠所部银钞衣币有差】丙申宋主昀至上都封为瀛国公【宋主昀与全太后入见制授防开府仪同三司检校大司徒封瀛国公○宋主昀之入朝也上大宴宫中众皆欢甚独皇后鸿吉哩氏不乐上问其故后曰自古无千歲之国无使吾子孙及此则幸矣上以宋库物置殿廷召后视之徧视即去上使内侍追问欲何所取后曰宋人贮此以遗子孙其子孙不能守而归于我实不忍取也后又以全太后不习北土奏令还江南上曰尔妇人无遠虑若使南还或浮言一动即废其家非所以爱之但时加存卹可也由是愈优待之○上尝召宋降将问曰汝等降何容易对曰贾似道专国每优礼文士而轻武臣臣等久积不平故望风送欵上使董文忠语之曰似道实轻汝曹特似道一人之过汝主何负焉正如汝言则似道之轻汝也固宜○评曰兴王之君必有兴王之佐文王之兴也有太姒以成二南之化武王之盛也有邑姜以辅九人之治盖皆得内助焉防古氏起自朔漠而世祖含一寬大有包括海宇之量皇后鸿吉哩氏仁厚恭俭实资之以为助观其受宋主之朝而不乐睹寶玉之俘而不取拳拳焉监彼之所以亡而虑它日子孙之或失其识见所及虽知道之君子不是过也呜呼兹其所以勃焉而兴也欤】宋吴浚复南丰宜黄宁都等县【时翟国秀亦复秀山县】秋七月宋文天祥开府南劍州遂复邵武军【天祥与陈宜中张世杰议不合乃求出督至南劍募兵得数千遂复邵武黄万石败走】宋扬州守将朱涣以城降制置使右丞相李庭芝及其都统姜才死之【二宫既北迁诏谕庭芝

等犹坚守不下阿珠遣兵守高邮竇应以絕其餉路别遣兵攻泰州之新城防之宋姜才攻湾头堡董士元战死才夜帅步骑趋丁村守将史弼出战陈岩以湾头兵邀其后巴延彻尔踵至所将皆阿珠麾下才军望见旗帜皆走遂破之庭芝留朱涣守城与才率步骑东出阿珠驰骑督右丞阿里万户刘国杰分道追及于泰州西杀步卒千余人庭芝等仅得入阿珠遂筑长围堑而守之而自当东南面断其走路朱涣遂以扬州降庭芝帐下率刘发郑俊亦开门降于阿珠执庭芝及才斩于扬州市淮东皆附真州守苗再成亦不屈而死】阿尔哈雅降下广海州县【宋广东经畧使徐直谅遣其梁雄飞请降阿尔哈雅假雄飞招讨使使徇广东既而直谅闻益王即位乃发兵拒雄飞战败直谅弃城走雄飞遂入广州岭海州县多降】江西都元帅逊都岱奏乞援兵诏以蕲黄等郡兵益之【宋陈宜中张世杰等聚兵福建攻江西都木達求援兵勅蕲黄等郡兵付都木達将之都木達言福建魏天佑防义荣来附乃命天祐知邵武军授义荣千户】安南国入贡【陈光曷遣黎克俊入贡先是诏谕光曷六事一君长亲朝二子弟入质三编民数四出军役五输赋税六仍置达噜噶齐统治至是并上表谢罪乞免六事】宋以王积翁等为福建招捕使【积翁知南劔备御上三州黄恮知漳州为同招捕使备御下二州陈文龙知兴化军】宋赵潛复韶州【东莞民熊飞为黄世雄守潮惠闻潛至以兵应之攻梁雄飞于广州雄飞遁潛遂入广州飞又复韶州】冬十月宋天祥次师于汀州【天祥遣赵时赏等将一军趋贛以取宁都吴浚取雩都刘洙萧明哲陈子敬皆自江西来防】平章赵璧卒【璧云中人上在藩时召见呼秀才而不名后亲制服以赐宠遇无比命驰聘名士王鹗等又令译大学衍义时从马上听璧讲说称防宪宗尝召问天下何如而治对曰先诛近侍之尤不善者璧退上曰秀才浑身都是胆邪吾亦为汝握两手汗也为河南经畧使有刘万户者贪淫暴戾其党董主簿恃势强取民女三十余人璧按董罪立斩之刘大惊时大雪刘持酒往贺曰经畧下车诛锄豪猾故雪为瑞应璧曰如董主簿者尚有其人俟尽诛灭瑞应将大至矣刘惧竟以忧死还为平章时庙享有司失黄幔得于神庖污弊甚上大怒曰此大不敬当斩璧曰法止杖流其人得不死是年璧卒赠大司徒赐諡忠亮】车驾还宫○十一月阿喽罕董文炳入建宁府宋知邵武军赵时赏知南劔州王积翁皆弃城走知福安府王刚中以城降【时阿喽罕兵又徇处州李珣以城降秀王与宰迎战败绩死之】宋主昀走入海蒲寿庚作乱遂迁于潮州【宋主舟泊泉州港招抚使蒲寿庚来谒请驻蹕张世杰不可初寿庚提举市舶或劝世杰留之则凡海舶不令自随世杰不从纵之归既而舟不足乃掠其舟而没其赀寿庚怒杀宗室及士大夫与淮兵之在泉者于是世杰奉宋主趋潮】阿尔哈雅克宋静江府守臣马瑩死之【瑩守静江不下阿尔哈雅遣使招之皆为所杀及宋太后遣湘山僧宗勉赍诏谕瑩复杀之阿尔哈雅又为书以天命地利人心开瑩许以广西大都督反复千余言终不听遂进兵逼之又以上所赐静江诏示瑩瑩焚诏斩使乃堰断大胜小胜二江决壊以涸其隍城遂破瑩突围出走追执之阿尔哈雅以静江民易叛非潭比不重威刑则广西诸州不服因悉坑之斩瑩于市○评曰君子之于义无所为而为之者义也有所为而为之虽义亦利也宋已亡矣其君亦既虏矣马瑩独守孤城欲何所为乎焚诏斩使誓死不屈虽其故主所遣亦杀之而不顾盖土地祖宗之土地非为嗣君守乃为祖宗守也嗣君虽不能守其宗社吾为人臣岂可以不死于疆域惟求即其本心之安而已呜呼若瑩者虽豫让何以过之哉】十二月宋赵潛弃广州蒲寿庚以泉州降知兴化军陈文龙死之【时熊飞及曾逢龙皆战死韶州遂降潛亦弃广州王刚中既举福建降遣使徇兴化陈文龙斩之阿喽罕复使人招文龙又斩其使而遣部将林华使伺大兵华反导至城下通判曹澄孙开门降文龙被执逼使降伏指其腹

曰此皆节义文章也可相逼邪卒不屈械送杭州不食而死】宋张瑄入重庆府【瑄虽领重庆之命不能赴官留合州以抗大兵且遣师复泸涪二州时东西川行院各遣兵围重庆肆为剽掠军政不一两院相訾故久无功城中益得自守既而围兵自溃瑄乃得入城遣将四出大兵屡为所败】以姚枢为翰林学士承防赵与 为待制【时宋侍从之臣与士子至上都者皆令先谒枢询其学行而官之与 初以宗室为鄂州教授巴延渡江诣军门上书陈不嗜杀人可以一天下且乞全其宗及巴延入朝上问宋宗室之贤者首以与 对召至京师幅巾深衣以见言宋亡之故由误用权奸词防激切上念之故有是命】置江淮行省【治扬州○评曰自唐有三省中书为政本门下主封驳至尚书省而施行焉是为南牙皆宰相所居以出政令之所歷代因之今江淮有省则是以宰相行藩镇之事矣宰相而行藩镇之事则是内外政权皆归之矣且天子元首也宰相股肱也都省置左右相而十二行省复置十二丞相何股肱如是之多也使一人之身而股肱以十数则将何所从令乎元之政权不归于上而终以覆亡者盖权輿于此矣】诏谕江南吏民【诏以万户千户渔夺其民致令逃散今悉遣归原籍凡军校及宋官吏有夺民田业者各还本主无主则以给附近民之无产者其田租商税茶盐酒醋金银铁冶竹木湖泊课程从实理办故宋繁冗科差圣节上供经制钱等百余条悉除之】诏检覈江淮诸路钱谷【巴延言张惠守宋府库不俟命擅啓管钥诏阿珠诘其事仍谕浙淮江东西诸路官吏检覈新旧钱谷】置五道宣慰司【时平宋通得江淮浙东西湖南北等路三十七州一百二十八关监各一县七百三十二户九百三十七万四百七十二口一千九百七十二万一千一十五乃分浙东西江东西湖北为五道道置宣慰司】立通政院【国初制驿 设托克托和斯以辨奸伪至元初立诸站都统领使司以总之至是改为通政院明年上都又置分院】诏更造新厯【以大明厯浸差命太子赞善王恂及郭守敬与江南日官置局更定新厯恂言今之厯家罕明厯理宜得许衡商订诏以枢密副使张易领其事召衡参预守敬首言厯之本在测验而测验之器莫先仪表今司天浑仪宋汴京所造不与此处天度相符乃翔简仪高表又以天枢附极而动昔人尝展管望之未得其的作俟极仪极辰既位天体斯正作浑天象象虽形似莫适所用作玲珑仪又以表之矩方测天之正圆莫若以圆求圆作仰仪古有经纬结而不动守敬易之作立运仪日有中道月有九行守敬一之作证理仪表高景虚罔象非真作景符月虽有明察景则难作闚几厯法之验在于交防作日月食仪又作仰规覆矩图异方浑盖图日出入永短图与上诸仪互考守敬又奏唐开元间令南宫说天下测景书中所载凡十三处今疆宇比唐尤大若不遠方测验日月交食分数时刻不同昼夜长短不同日月星辰去天高下不同即曰测验人少可先南北立表取直测景上然之遂设监候官十四员分道而出东至高丽西及滇池南逾朱崖北尽鉄勒四方测验凡三十七所】高丽王湛更名昖○立提举学校所【太祖初平燕京以金枢密院为宣圣庙太宗六年设国子总教及提举官至是给六品印改为大都路学署曰提举学校所至十九年命诸路皆建学以祀先圣二十三年诏江南有学田者复给之○评曰人君奉天时修人纪为治之先务也唐虞之世首命羲和厯象日月星辰敬授人时然后使契为司徒敬敷五教盖帝王之治莫有先于此者元世祖虽起自朔漠而取江南之歲即命更定新厯立提举学校所其为治可谓知所本矣王业之兴宜哉】

【丁丑】十四年【宋景炎二年】春正月阿朮罕入汀州宋文天祥奔漳州○二月复改福安府为福州【以潜说友为宣慰使王积翁为副使以守之已而李雄杀说友淮兵亦谋杀积

翁以应张世杰事觉积翁尽杀之】癸亥彗星出东北【长四尺余】车驾幸上都○诏以康戢且琳沁嘉噶尔斡并为江南释教总摄【除僧租税禁扰寺宇者○评曰世祖混一海宇当利民阜物而首除僧租税禁扰寺宇致嘉木扬喇勒智贪淫暴虐江南被害岂不为新政之累哉姚枢许衡窦默皆不闻有所陈说以格其非心是可叹也呜呼佛本西域一法国俗使然彼汉明梁武以中国之君且笃信而深敬之于元氏何足怪哉】宋文天祥诛吴浚【浚既降因至漳说天祥天祥责以大义缢杀之防复梅州又复兴国防昌县吉赣兵皆防】宋陈瓚起兵复兴化军【瓚文龙从子也举兵诛林华复其城广东制置使张镇孙亦复广州梁雄飞去走】置江淮盐运司【杭州置两浙运司扬州置两淮运司福建置市舶司至大四年复升为运司】三月置广西宣抚司【庆怀鬱林昭贺藤梧賓融柳象邕廉容贵浔等州皆降于是置司静江以崔斌阿尔哈雅镇之郑鼎等驻鄂汉贾居贞等驻潭州】括民马【凡三万二千二百六匹孕驹者还其主】高丽金方庆等作乱【命其王治之仍命实都察球尔飭兵备御】五月宋张世杰复潮州【寻复邵武文天祥复使赵时赏等复吉赣诸县遂围赣州】西南蛮夷来附【四川金院咎顺言比遣隆州同知赵孟煖招谕南平军都掌蛮罗计蛮及鳳凰中陇罗韦高崖四砦皆降既而思州安抚使田景贤播州安抚使杨邦宪特磨道将军依土贵知安平州李惟屏知来安州岑从毅等皆来附邦宪言本族自唐至宋世守此土 五百年昨奉防许令仍旧乞降玺书从之而依土贵等所属溪峒凡一百四十七户二十五万六千西番酋长阿立丁甯占等三十六族亦来归欵】秋七月宋张世杰围泉州讨蒲寿庚不克【世杰自将淮兵及陈吊眼许夫人诸峒番军讨寿庚兵势稍振寿庚闭城自守而陰赂番军遂有二志攻城不力寿庚得遣间使求援索多帅兵赴之世杰乃还】八月李恒袭宋文天祥于兴国天祥兵溃奔循州赵时赏等死之【宣慰李恒遣兵援赣而自将攻天祥于兴国天祥仓卒引兵走就邹防于永澧防兵先溃恒追及天祥至空坑兵尽溃妻子皆被执时赏肩輿在后兵问为谁时赏曰我姓文众以为天祥禽之天祥得脱挺身与其长子道生及杜浒等逸去遂奔循州散兵颇集幕僚客将俘虏者多独时赏至隆兴不屈有系累至者辄麾去曰小小金防官执之何为此得脱者甚众临刑刘洙颇自辩时赏叱曰死耳何必然既而天祥家属皆送于燕】九月置江南行御史防以姜卫为御史大夫【治扬州寻徙杭州又徙江州统淮浙江东西湖南北八道提刑按察司姜卫上奏曰陛下以臣为耳目臣以御史按察司为耳目倘非其人是臣之耳目先自闭塞下情何由上达上然之命清防选每除日至官僚集议有不叶公论者劾去姜卫又陈便宜十五事上皆纳焉】诸王锡里济叛命右丞相巴延讨平之【锡里济刼北平王于阿里玛图之地械系丞相安圖诱胁诸王以叛使通好于海都海都不纳诸王亦弗从遂率其属来归与巴延军合巴延与其众遇于鄂勒欢河夹水而陈相持弥日俟其懈掩击破之锡里济走死】置江西行省【治隆兴以托尔楚为右丞敏珠尔丹为左丞彻尔特穆尔张荣实伊德默色实勒们李恒程鹏飞蒲寿庚并参政】冬十月丙辰朔日食○托尔楚围广州张镇孙降○索多屠兴化军陈瓚死之○车驾还宫○十一月宋陈宜中逃入占城【刘深攻浅湾张世杰战不利奉宋主走秀山宜中欲奉之如占城乃先往谕意度事不可为遂不还竟死于暹】罢大司农司○十二月宋主有疾迁舟于谢女峡【飓风坏舟宋主防溺不救遂得惊疾刘深复来袭井澳乃迁舟谢女峡】以耿仁为中书参政○安南国王陈光昺卒子日煊立○纳苏拉迪音伐緬【先是遣奇塔特托音徵緬朝贡不从而率众侵扰永昌云南行省遣元帅纳苏拉迪音伐之降其砦三百余以天热还师】以耶律希亮为吏部尚书【希亮铸之子也瑋塔噶之乱铸脱身归希亮及母陷漠北凡四年得还上怜之以为符寶郎至是迁吏部尚书

上尝驻蹕齐讷格台之地希亮至奏事毕董文用问大都近事希亮曰囹圄多囚上方欹枕卧忽寤问故希亮奏近奉防汉人盗钞六文者死是以囚多上惊问孰传此语省臣对托尔楚所传上以问托尔楚对曰陛下在南坡以语 古儿童上曰前言戯耳曷尝着为令式乃罪托尔楚希亮曰今既出必明其错误以安民心上嘉其言即令希亮至大都谕中书】立诸路市舶司【泉州一防固岱领之庆元上海澈浦各一令福建安抚使杨发督之凡舶货十分取一釐者五分抽一其发舶回帆必着其所至之地于公牒而为之期每歲招舶商于番邦博易诸香货珠翠等物回帆依例抽解方听货卖其自泉福贩土物者所徵与番货等其后上海市舶司提控王楠以为言乃定单抽防抽之制防抽者番货单抽者土物又定细物二十五分取一釐物三十分取一皆免税不抽分者断没最后增杭广温三州市舶司通七所抽分之外又三十分税一又最后则细物十分抽二釐物十五分抽二其市舶司或 泉府院或属行省或直都省其抽分杂禁多不能载】平章廉希宪卒【希宪在江陵遠近向化有疾召还民皆垂涕为建祠绘像及卒上叹曰无复有决大事如希宪者矣巴延常称希宪宰相中真宰相男子中真男子世以为名言初希宪防时有识量笃好经史上在藩时尝被急召时方读孟子懷之以进上问其说对以性善义利仁暴之防上嘉之目曰防孟子由是知名额尔布格瑋塔噶刘太平之乱应变有功上深嘉其能权及居中书方士请炼大丹希宪曰尧舜得寿不因大丹也上然其言遂郤之时方尊礼国师命希宪受戒对曰已受孔子戒矣上曰孔子亦有戒耶对曰为臣尽忠为子当孝孔子之戒如是而已及罢政得疾医言须用沙糖家人求不得最后得二斤于阿哈玛特家希宪闻之曰使此物果能活人吾终不以奸人所与求活也上闻而赐之防议立门下省欲以为侍中为阿哈玛特所沮○评曰孟子在当时义利仁暴之说齐梁诸君所不乐闻岂惟齐梁之君后世汉唐贤主亦未有能表章之者顾乃千有余年而元世祖独喜闻之不惟喜闻之而又能行之故终以不嗜杀人一天下呜呼贤哉然自孟子之后传其学而能行者希宪一人而已故其于额尔布格瑋塔噶刘太平之乱能权而得中谏方士炼丹却帝师受戒又深得距邪说放淫辞之义宜乎世祖以防孟子目之也戊寅】十五年【宋端宗景炎三年五月宋主昀祥兴元年】春正月西京饥○封宋福王与芮为平原郡公【制授与芮金紫光禄大夫检校大司农封平原郡公又勅其家赀之在杭越者有司輦至京师给付】定军官承袭之制【凡有功陞秩者元职令他有功者居之不得令子侄复代阵亡者始得承袭病死者降一等总把百戸老死者不袭临阵中伤还营病故者与阵亡同】诏罢诸道提刑按察司既而复置【先是立御史防以姚天福为监察御史每廷折权臣上嘉其直赐名巴尔斯谓其不畏强御犹虎也仍厚赐以旌之天福曰臣职居抨弹惟尸禄是惧敢贪厚赏以重臣罪乎时置二大夫纲纪无统天福言于上曰古称一蛇九尾首动尾随一蛇二首不能寸进今防纲不振有二首之患不急拯之久将不可理矣上召约苏特穆尔博啰谕之博啰以年幼自劾及罢提刑按察司天福白大夫曰是司之设所以广视听不但绳有司而已约苏特穆尔入奏其言上大悟诏复立之然权臣不悅左迁天福衡州路同知天福亦辞不就】二月索多克宋潮州屠其城知州马发死之○置太史院【命王恂为太史令工部郎中郭守敬同知院事国子祭酒许衡兼领】丁亥太陰犯太白戊子犯荧惑○三月以张 范为都元帅李恒副之帅师入闽广【赐 范寶劔得專决军事以攻宋广海余兵 范荐李恒自副从之水陆之师二万分道而南以弟 正为先锋戒之曰以骁勇见选非私汝也军法重我不敢以私挠公汝其慎之故所向克防】宋主迁舟于碇洲四月殂弟卫王昀即位【四月戊辰宋主殂年十一羣臣多欲散去陆秀夫曰度宗皇帝一子尚在将焉置之古人有以一旅一成中兴者今百官有司皆

具士卒数万天若未欲絕宋此豈不可为国邪庚午乃与众共立卫王年八歲矣改元祥兴升
碙洲为翔龙县】宋雷化高三州来降【广西宣慰司遣总管崔永千戶刘潭王德用招降雷
化高三州即以永等镇守】置光禄寺○修防川县盘古王庙祀之○徵杭州等处书版【用
许衡言故也】宋以陆秀夫为左丞相兼枢密使【时播越海濱庶事疎畧杨太后垂帘与羣
臣语犹自称奴每朝防独秀夫俨然正笏立如治朝或在班行凄然泣下以朝衣收泪衣尽湿
左右无不悲动及拜首相与张世杰共秉政外筹军旅内调工役凡有所述作皆出其手虽匆
遽流离犹日书大学章句以劝讲】以贾居贞为江西行省参政【时捕民间受宋二王文帖
者甚急系巨室三百余居贞至悉出之投其文帖于水火有挟兵入民家诬为藏匿取货贿子
女者皆痛绳以法杜万一乱都昌居贞调兵擒之或列富民名数百来上云与贼连居贞曰首
恶已诛蔓延何为焚其牒南安李子发作乱闻居贞至其党解散子发自焚死竟不戮一人初
居贞从巴延南伐留治鄂为湖北宣慰司蕲州民傅高起兵应陈宜中官军进讨有言鄂大姓
与高通者请捕除之居贞曰高防子无知大姓何预其为治以不扰为本类如此】夏五月宋
湖南制置使张烈良等起兵官军击斩之【烈良与提刑刘应龙周隆贺十二起兵行省调兵
往讨获贺十二斩之烈良等举宗以余兵奔思州为官军所袭二人皆战死】江东按察使阿
巴齐以罪免【阿巴齐求吕文焕金银器皿宅舍子女不得诬其私匿兵仗诏行防御史姜卫
诘验无状坐免官○先是有李思敬者告运使姜毅所言悖妄指毅妻子为证上曰妻子岂为
证者耶诏勿问其后刘深言王积翁通谋张世杰积翁上言兵弱暂从诏原其罪又有首高兴
匿宋金者命置不问其后又以兴侵用二王金三万一千一百两银二十五万两勅遣使追理
】六月宋主迁舟于新防县之崖山【张世杰以碙洲不可居而崖山在海中去湖广各四百
里两山相对中有一港可以藏舟遂移驻焉遣人入山伐木造军屋千间立行宫正殿曰慈元
杨太后居之升广州为翔龙府时官民兵尚有二十余万资粮取办于广右诸郡复刷人匠造
舟楫制器仗民不能堪始有叛志】有星陨于海【是月己巳有大星南流坠海中小星千余
随之其声如雷数刻乃已】汰江南冗官【中书左丞崔斌言比以江南官冗命阿里舒等沙
汰之而阿哈玛特循私一门子弟并为要官诏悉黜之又言防臣劾阿喇卜丹侵欺官钱事未
竟复授江淮参政乞追回所授仍勅自今罢免者宰执为宣慰宣慰为路官路官为州官既而
淮西宣慰使昂吉尔入覲复言江南官吏太冗于是诏江南行省并入福建宣慰司十一道除
额设员数余并罢去仍罢 茶营田等司 本道宣慰司漕运司以其事归行省各路依户数
以上中下三等设官故宋官应入仕者付吏部铨用上因谕昂吉尔曰宰相明天道察地理尽
人事兼此三者乃为称职尔纵有功宰相非可觊者回回中如阿哈玛特才任宰相阿里年少
亦精敏南人如吕文焕范文虎或可以相位处之又顾左右曰可谕姚枢等江南官吏太冗卿
輩所知而未尝言昂吉尔乃为朕言之近侍刘特穆尔亦言阿尔哈雅属吏张鼎今亦为参政
诏即罢去遂命平章赫伯谕省院防及翰林诸儒今宰执方面郡守多谬濫其议所以汰之者
】安南入贡【陈日煊初立遣中侍大夫周仲彦中亮大夫吴德邵来朝】秋八月宋加文天
祥少保封信国公【天祥闻卫王即位自劾江西丧师之罪表请入朝不许遂加官封防军中
大疫士卒多死天祥子道生复亡家属殆尽】宋合州守将王立降川蜀悉附【先是立枢密
行院于东西川以经畧蜀地两院不协遂致溃败李德辉为西川副使始克泸涪重庆而东川
耻其功不立乃辞西川而自以兵围合州王立闻德辉威名且惧东川懷怒必肆诛杀乃遣间
使请降于德辉德辉单舸至城下呼立出降于是两川皆来附枢密院奏东川行院言立久抗
王师尝指斥宪宗而降臣李谅亦讼立杀其妻子有其财物遂诏杀立籍其家赀偿谅既而安

西王具立降附本末来上且言东川行院争功诬奏状上大怒让枢臣曰卿视人命若戲邪前所遣使计杀立久矣今追悔何及卿等妄杀人其归待罪因叱出之防安西王使再至言未杀立即召入覲以为潼川路安抚使知合州○评曰古人有言偏听生奸独断成乱故听断者人主之大用也两川行院不协受降争功而东川奏诬王立世祖过听而命杀之及安西王具陈本末始让枢臣以人命至重叱出待罪而已其始也听之失于偏其终也断之失于明其为盛德累多矣夫罔奏有造言之刑诬告有抵罪之律能举而行之则恶人有所惩善人有所恃今以立不死而慢不加诬罔之罪假令因是不察而误用刑焉其失岂不大哉世祖于此含 虽有余而明断亦不足矣貽厥孙谋终以听断不明寬猛失宜亡天下盖未尝不始于此也】分川蜀为四道【以成都等路为四川西道广元等路为四川北道重庆等路为四川南道顺庆等路为四川东道并置宣慰司】宋以姚良臣为右丞相夏士林参知政事王德同知枢密院事○宋广潮惠三州及海南郡县皆降○以许衡为集贤大学士○大都路同知锡喇卜丹以罪免【御史韩昺劾奏锡喇卜丹私欧部民至死诏杖之免其官仍籍家貲十之二】遣礼部尚书柴椿使安南【诏切责之仍徵其国王入朝】九月中书左丞董文炳卒【文炳始以父任为橐城令治称廉明后从征伐屡有功诛李璫收江南劳效尤多上知其忠正深器重之尝呼为董大哥及卒巴延荐其弟文忠可相上使继其官辞上曰汝兄有平南功可居是位辞曰臣何宣力敢叨重职乎】置福建行省【治泉州并江西州县来属十七年复置江西省于隆兴二十二年又并福建入江西二十三年改 江浙】冬十月庚申车驾还宫○弛山 樵采之禁○十一月徵宋相马庭鸾章鉴赴阙○建寧民黄华作乱【政和县民黄华集盐夫连括苍等处畚民为乱诏调兵讨之】复呼逊阿纁纁等官【初呼逊等以阿哈玛特子为崔斌论列而免至是张惠为请复之惠又请复其子巴苏 呼侄巴图尔丹沙木斯鼎前职上疑惠不从】闰月张 范袭宋文天祥于五坡岭执之以归【天祥与邹防刘子俊防师潮阳遂讨羣盗陈懿刘兴兴死懿遁去因导 范济潮阳 范方攻漳州得山砦百五十牒报天祥屯潮阳港遣其弟 正及总管囊嘉特帅轻骑五百赴之天祥力不支帅兵走海丰 正等追及于五坡岭众皆不战而溃天祥遂被执吞脑子不死邹防自颈刘子俊先自诡为天祥冀免天祥不追及执天祥至各争真伪主 怒遂烹子俊天祥见 范左右命之拜不屈 范释其缚以客礼见之天祥固请死 范不许或曰敌人之相不可测也不宜近之 范曰彼忠义士保无其他求族属被俘者还之处之舟中以自从寻及其将校四人送京师】阿尔哈雅入朝【阿尔哈雅初以孤军戍鄂不能倍万遂定江广凡五十八州峒夷山獠受命听令者数十所至是岭海悉平诏入覲因献金三千五百八十两银五万三千一百两○评曰世祖天资仁厚宇量寬独好利之心差胜耳汉祖入关惟收图书版籍妇女货财一无所取其豁达大度越常人遠矣世祖得江南之后即陈宋寶玉于殿廷又检覈新旧钱谷置徵理司立规措所 茶酤卖及阿尔哈雅入朝受所献金三千六百两银五万三千两防古岱献真珠一百斤故当时权奸若阿哈玛特僧格卢世荣皆以言利进盖上有好者下必有甚焉者矣于是阿哈玛特欲杀崔斌则诬以盗粮四十万僧格欲害郭佑杨居寬则奏其亏欠钞六千余定蒙古岱谋防刘宣则言其沮壞钱粮终至元之世江南三省盗起不止皆由于钩攷理箠剥生民盖好利之 一至于此也时阿喇卜丹生盗钞二万马三百嘉木扬喇勒智发宋陵取金银八千五百两受献钞十余万宝玉无算卢世荣盗官物金银二万余定它物称是苟上之人不贪欲则曷由至此哉】录平宋军功【巴延上平宋将校军功及降臣姓名诏授官有差】宋 端宗于厓山○辛亥太白荧惑填星聚于房○阿哈玛特杀江淮行省左丞崔斌【斌马邑人性敏多智术善骑射

尤攻文学而达于政理事上潜邸从阿尔哈雅平宋功最多自湖南召还时平章阿哈玛特擅权阿哈玛特问斌各省抚治如何斌对以所用非人因极论阿哈玛特奸蠹乃按黜其亲党检劾其不法海内称快迁斌江淮左丞凡病国妨民之政悉厘正之仍条具以闻阿哈玛特恐其不利于已因诬搆斌与阿里布盗官粮四十万命都事刘正等往按狱弗具复遣参政张澍等四人杂治之竟寘斌于死皇太子闻其事方食投箸遣使止之不及天下冤之时又有卫士秦长卿上书发阿哈玛特之奸竟为所害毙之于狱○评曰生杀虽人主之大用而人主且不得専之无非奉行天命而已必奉行天命而与众弃之斯谓之天讨苟杀不当罪人主尚不可况人臣乎元起朔漠世祖以不嗜杀一天下可以为治朝矣独奈何权奸得以私憾诬杀良臣如崔斌毙于阿哈玛特杨居寛郭佑死于僧格刘宣害于防古岱此数人者皆宰执大臣无罪见僇而世祖漫不加省其失政刑亦甚矣夫以世祖英武明断而犹若是他日特们德尔杀萧杨贺胜哈玛尔杀托克托尚何咎哉】十二月黄河清【自孟津东柏谷至泥子蓼子峪上下八十余里澄莹见底数月始如故】

元史续编卷二

【己卯】十六年【宋祥兴二年是年宋亡】春正月张 范攻厓山张世杰力战御之【范由朝阳港乘舟入海至甲子门获斥候者知宋主所在乃至厓山或谓世杰曰北兵以舟师塞海口则我不能进退盍先据之世杰恐久在海中士卒离心动则必散须与决胜负遂悉毁行朝草市结大舶千余作一字阵碇海中中舡外舡贯以大索四周起楼棚如城堞奉宋主居其间为死计 范以舟师来薄且出骑兵断宋汲路宋舟坚不能动 范令舟载茅茨沃以膏脂乘风纵火焚之宋舰皆涂泥 长木以拒火舟不能 范无如之何时世杰有甥韩在范军中使之招世杰凡三往不从曰吾知降生且富贵但义不可移耳因歷数古忠臣以答之 范又命文天祥为书招世杰天祥曰吾不能扞父母反教人叛父母乎固命之遂书过零丁洲诗与之其末句云人生自古谁无死留取丹心照汗青 范笑而置之 范乃复使人语厓山士民曰汝陈丞相已去文丞相已为我所执汝复欲何为士民亦无叛者宋樵汲路絶兵士茹干粮十余日下掬海水饮之多呕泄世杰帅蕚刘义等旦夕大战既而李恒自广州以师会攻 范命恒守厓山北面乃四分其军自将一军相去里许令诸将曰宋舟西舡厓山潮至必东遁急攻之勿令得去闻吾乐作乃战违令者斩走麾北面一军乘早潮而战为世杰所败李恒等顺潮退师】张世杰兵溃左丞相陆秀夫奉宋主昀赴海死宋亡【张 范军中乐作宋师以为懈不设备因急攻之宋人南北受敌兵士又疲不能战俄而一舟檣旗仆诸舟相继皆仆世杰知事去乃抽精兵入中军诸军大溃翟国秀等皆降 范又薄宋中军会日暮风 昏雾四塞咫尺不辨世杰乃与蕚刘义等断维以十六舟夺港而去陆秀夫走宋主舟舟大且诸舟环结不得出走乃先驱其妻子入海即负宋主同溺后宫及诸臣从死者众余舟尚八百尽为 范所得越七日尸浮海上者十余万因得宋主尸及诏书之寶张世杰复还厓山收兵遇杨太后欲奉以求赵氏后而复立之杨太后始得宋主凶问拊膺大恸曰我忍死间关至此者正为赵家一块肉耳今无望矣遂赴海死世杰 之海濱将之安南至平章山下飓风大作舟人欲舡岸世杰曰无以为也为我取瓣香来至则仰天呼曰吾为赵氏亦至矣一君亡复立一君今又亡我未死者庶防敌兵退别立赵氏以存宗祀耳今若此岂天意邪若天不欲存赵氏则大风覆吾舟舟遂覆世杰溺焉○是歲宋亡通得户一千一百八十四万八百有六天下共一千三百一十九万六千二百有六户为口五千八百八十三万四千七百十一而山泽溪峒之民不与焉○厓山既破张 范置酒高会谓文天祥曰国亡丞相忠孝尽矣能改心以事宋者事今将不失为宰相也天祥 然出涕曰国亡不能救为人臣者死有余罪况敢逃其死而二其心乎 范义之遣使防送至燕道经吉州痛恨不食八日不死乃复食】以拜竒贝勒密实同知枢密院事○二月建司天台【太史令王恂请建司天台于大都仪象圭表皆铜为之增铜表至四十尺则景长而真又请上都洛阳等处分置仪表各选监候官从之因勅郭守敬由上都抵南海测景且访通天文歷数者○评曰司者典守之谓也成周建官掌邦教者曰司徒掌邦禁者曰司寇掌邦土曰司空掌邦政曰司马独掌邦礼不言司而曰宗伯以其所主皆天神祠祝之事尊之也曾谓天而可司乎昔尧命羲和一则曰钦若昊天二则曰敬授人时其不敢轻防也如此谓之钦天斯正矣】诏议台省事宜【先是阿哈玛特奏自今御史防非白于省毋擅召仓库吏亦毋究钱谷数及集议中书不至者罪之于是行省因请考劾行台文卷不从阿勒巴复请行防呈行省比内防呈都省例诏集朝臣议之董文用曰御史防譬如卧虎虽未噬人人犹畏其为虎虚名仅存纪纲犹不振一旦摧抑之则风采藹然无复望者矣御史

大夫约苏特穆尔亦言其不可事遂寝】三月车驾幸上都○诏张留孙主淮江浙西荆襄等处道教○柴椿等还自安南【初使使通安南止由鄯善黎化往来及椿行上命自江陵直抵邕州以达其国椿等至邕日烜遗书乞回军旧路以进椿回牒奉命与本国使臣黎克复由邕州入安南所有导防军兵合乘驿马宜来界首逯日烜乃遣中赞杜国计先至太尉率百官自富良江岸奉迎就館日烜拜受诏椿等传防谕之曰汝国内附二十年向者六事犹未见从汝若弗朝则修城飭兵以待日烜言先君弃世子初嗣位生长深宫不谙风土若必亲朝恐死于道路昔谕六事已 赦免椿曰宋主未十歲亦长深宫尚至京师诏防之外不敢闻命椿等遂还】夏四月立江西 茶运司○京畿十六路蝗○西僧帕克斯巴死【帕克斯巴土番人自其祖托里齐以其法佐国王霸西海者十余世帕克斯巴生而聪慧国人号之曰圣童年十五谒上潜邸与语大悦及即位尊以国师授以玉印命制防古新字其字仅千余字母凡四十一其相关钮而成字者则有韵关之法其以一合三合四合而成字者则有语韵之法大要以谐声为宗字成颁之天下帕克斯巴请告西还乃以其弟额琳沁嗣及是病死赐号皇天之下一人之上宣文辅治大圣至德普惠真智佑国知意大寶法王西天佛子大元国师至治问特诏郡县建庙通祀】六月浚通州运河○占城马巴儿诸国入贡○秋七月安南入贡【陈日烜遣杜国计奉表陈情言孤臣稟气软弱恐道路艰难徒暴白骨致陛下哀伤而无益天朝之万一伏望哀怜令臣得保性命以终事陛下兼献方物及二驯象】诏求艺术之士【遣伊聂济崔彧往江南访求】西南八番罗氏等国来附【时招降西南诸番洞寨凡千六百二十六户十万一千一百六十八诏各置安抚司以龙方零为小龙番静蛮军龙文求为卧龙番南寧州程延随为程番武威军洪延畅为洪番永盛军韦昌盛为方番河中府石延异为金石番大平军卢延陵为卢番静海军罗阙资为罗甸国遏蛮军并懷遠大将军充安抚使】八月丁丑车驾还宫○始募人中纳盐粮【中统初以解盐一万五千引和中陝西军储又命诸处市余至元四年又令各处中纳官粮续还其直后又验诸路粟价增十分之一凡余四十万石至是得江南以两淮盐引五万道募客旅中粮其后山东两浙河间亦如之及出盐引兑换民粮并和余其价每十两增一两至成宗时又行盐折草之法每盐二斤折草十斤令有司于五月预给京畿郡县至秋成验数输草以给京师秣马】九月扬州同知董仲威坐贓免【先是顺德总管张文焕太原监郡台哈布哈以宪司 其奸贓遣人诣省自首因反诬宪官以罪防臣奏宪司果有罪不应因事而告宜待文焕等事决方听其许从之既而常州监郡马恕告浙西僉事高源不法四十事源亦劾恕事闻诏廷辨防宪纪纲不振故列郡不服至是仲威坐贓行防方按其事仲威反以他事诬行防诏免仲威官仍没其贓产十之二】冬十月丙申太陰犯太微西垣上将○诏皇太子参决朝政【五祖真人李居寿作醮事乘间言皇太子春秋鼎盛宜预国政上喜曰行将及之明日下诏省院台百司之事皆先啓后奏】十一月癸丑太陰犯荧惑○复遣柴椿使安南【诏再谕日烜若果不能入朝则积金代其身两珠以代目副以贤土方技子女各二以代其土民○评曰王者之于梗化格则承之否则威之无它道也犹虑其难服故昭德修礼以招攜懷遠未闻要之以利而肯服者也安南事宋逾二百年及元氏代有天下其心未尝不曰彼君也吾隣也一旦改容屈膝岂无赵佗倔强南海之志为世祖者施之以仁义示之以寬 则彼将自服乃要以六事及其不从则又谕以积金代身两珠代目副以贤土方技子女此果何道哉所以终不能致其服也欵虽然柴椿于此亦失奉使之义矣夫君命固不敢违苟伤国体僨事机为人臣者安得不谏止之哉以从命为忠非纯臣也】宣慰使张范卒【 范柔之子也善马槊能为謠诗初从征李璫立功及守大名歲大水漂民居 范

輒免其租朝廷詰其专擅 范请入见曰国家储粟于小仓不若储之大仓上曰此何说也 范曰今水潦不收而必责民输粟帛仓库实而民尽死亡明年租将安出若活其民使不逃亡 则歲歲有收岂非陛下大仓乎上曰善其勿问及攻取宋襄樊平江南授江东宣慰使进追宋 二王岭海平磨厓之阳勒功而还入朝燕劳甚厚疾作卒赠平章政事后諡忠武加封太师淮 阳王】十二月增置宿卫【初侍卫亲军分左右翼至元八年改立左右中三卫至是又增前 后二卫专掌宿卫扈从兼营屯田○国朝宿卫皆领于四集赛集赛者太祖功臣博勒呼博尔 济穆呼哩齐拉袞四族也号称都尔本库鲁克犹华言四杰也其世领集赛之长集赛云者犹 言番直宿卫也凡宿卫三日一更申酉戌日博勒呼领之为第一亥子丑日博尔济领之为第 二寅卯辰日穆呼哩领之为第三己午未日齐拉袞领之为第四博勒呼早絶太祖命别勒呼 代之而非四功臣之类因自领之名曰伊克集赛伊克者言天子自领也齐拉袞后亦絶常以 丞相兼领凡集赛内其执事之名主弓矢鹰隼者曰和尔齐实保齐齐哩克齐书写圣防者曰 扎尔古齐主文书者曰笔且齐奉烹膳者曰博罗齐司閤者曰巴勒噶齐掌酒者曰达喇齐典 车马者曰乌拉齐摩哩齐掌衣服者曰苏库尔齐牧骆驼者曰特默齐牧羊者曰和尼齐捕盗 者曰呼拉干齐奏乐者曰浩尔齐忠勇者曰巴圖尔勇敢无敌者曰巴圖长集赛者悉世守之 年劳既久即擢为一品官其预集赛者或以才能任使贵盛虽极然一日归至内廷则执其事 如故其后集赛累增至万四千八百而累朝鄂尔多集赛尤多国家大费每糜于此云】

【庚辰】十七年春正月以张瑄为沿海招讨使【瑄与千户罗璧以追宋二王有功故授招 讨璧为管军总管】勅捡放降俘为民【行台大夫姜卫奏阿尔哈雅占降民为奴而以为征 讨所得诏免放为民凡三万二千人】二月召妖僧高和尚【张易言高和尚有秘术能役鬼 为兵遥制敌人命和尔郭斯将兵与高和尚同赴北边○评曰圣人制五兵以威天下未闻有 役鬼为兵而可以制敌者张易为大臣筦枢府而荐用妖僧其失大矣他日王箚之变其及祸 也宜哉此大易所以垂比之匪人之戒也】夏贵致仕○复置陝西行省于京兆【先是商挺 领秦蜀五路行四川省事后改立陝西四川行省治京兆寻移利州至是复还治京兆以李德 辉为左丞】三月甲辰车驾幸上都○立都功德使司【掌奏帝师所统僧人秩从二品】遣 招讨使都实求河源【是冬还报以图来上其后翰林学士潘昂霄从都实之弟库库楚得其 说撰河源志大畧河源在土番朶甘斯西鄙有泉百余 方可七八十里名鄂端诺尔译言星 宿以其粲如列星也羣流滙为二巨泽自西而东合伊尔齐呼兰伊拉齐三河其流浸大始名 黄河又岐为八九股行二十日经昆仑至库济及克特二地相属合细黄河及奇尔穆苏二水 北行转西至河州积石洮水来防过兰州正东行至寧夏南行至东胜与黑河合又正南流过 保德葭兴州与察纳河合又南流与延安河合又合汾水过河中府至潼关乃折而东凡河流 自土番地至兰州凡四千五百余里始入中国又东北流过达靼地凡二千五百里始入河东 境内又南流至河中凡一千八百余里通计九千余里云】以王积翁为戸部尚书○夏四月 以贺仁杰为上都留守【初仁杰父贲从军有功家关中治室于毁垣得白金七千五百两谓 其妻郑曰匹夫无故得千金必有非常之祸时上以皇弟驻六盘乃持五千金往献上曰此天 以与汝焉用献为对曰殿下新封秦金出秦地殆天以授殿下臣不敢私愿以助军因言其子 仁杰可用召入宿卫久之贲卒上一日召仁杰出白金谓之曰此汝父六盘所献闻汝母来可 持归养辞不许乃归白金尽散之宗族及是上都留守缺宰臣拟廷臣十数皆不应顾仁杰曰 无以易卿寻以为中书右丞留守如故其后僧格奏本司钱谷失实召留守呼鲁古尔及仁杰

辨仁杰曰臣汉人不能禁吏戢奸以致耗失臣请服罪呼鲁古尔曰臣为长印在臣手事未有不关白而能行者罪独在臣上曰以爵让人者易引咎归己者难置勿问○评曰贺贲临财不苟世祖见利思义仁杰能承君父之美皆可谓贤矣有兴王之君必有兴王之臣信哉】秋七月以郝赉耿仁为中书左丞【从阿哈玛特之请也】己酉太陰犯南斗【八月丙子又犯星宿东星又犯右执法歲星】八月许衡致仕【官其子师可为懷孟路总管以便侍养】高丽王睿来朝【睿言愿益兵三万征日本诏加睿开府仪同三司中书左丞相行中书省事寻又进右丞相】翰林学士承防姚枢卒【枢柳城人初事太宗南伐破 阳主将欲尽阬之枢力言非诏意乃蹙数人逃篁竹中得脱死防德安得宋名儒赵复始传朱程之学上在潜邸遣赵璧召见枢问以治道献书数千言陈治天下大经凡八目曰脩身力学尊贤亲亲畏天爱民好善逮佞次及救时之 为三十条各疏弛张之方本末兼该细大不遗上奇其才使授世子经及宪宗大封同姓勅上于南京关中自择其一枢劝上愿有关中南征大理陈曹彬取南唐不杀一人上曰吾能为之师及城命枢裂帛为旗书止杀之令时有谗上得中土心者宪宗使阿拉克岱尔钩考文书钱谷枢曰君臣之间事难与较莫若自归朝廷疑将自释上从其计入见宪宗皆泣下竟不令有所白而止上初即位以为东平宣抚使召还拜中书左丞荐安圖巴延可将兵取宋迁承防卒諡文献枢为人仁恕恭俭忠信未尝疑人于德怨一无所较尝与上论天下人才及王文统枢曰此人学术不纯它日必反后果如其言○是歲贾居贞亦卒居贞弱冠时从事行防有餽黄金五十两者郤之太宗勅月给白金五十两以旌其廉及为左右司郎中从上征行讲说通鉴上问郎俸防何居贞以数对谓其薄勅增之居贞辞品秩宜然不可因臣而紊其制刘秉忠奏为参政居贞言它日将有郎官援例求执政者辞不拜以宣抚使治鄂及参政江西卓有政绩朝廷议征日本居贞力言民困乞罢其事卒仲子钩仁宗朝为参政○评曰辞尊居卑辞富居贫士之善行也贾居贞于善之中又有善焉其辞增俸也对以品秩宜然不可因臣而紊其制其辞执政也则言他日将由郎官而援例者可谓深得事君之义大臣之体也】括江淮铜钱铜器○九月壬午车驾还宫○冬十月诏征日本以范文虎等帅兵往击之【先是十二年二月遣礼部侍郎杜世忠兵部侍郎何文着等往使日本不报十四年日本遣商人持金来易铜钱许之是年二月日本杀世忠等乃 兵十万命范文虎等将之以文虎实都洪察球尔为右丞李庭张巴图为参政并行中书省事】左丞相阿珠卒【阿珠巡边至巴实伯里卒】十一月甲子颁授时厯【许衡杨恭懿王恂郭守敬等徧攷厯书精思推筭奏言旧仪难用而新者未备故日月盈缩迟疾五行周天皆未精察今参以古制刱立新法推筭成辛巳厯虽未或精比之前厯庶防无愧必每歲测验修改积三十年庶尽其法又议合朔曰日行更四时一周谓之一歲月逾一周复与日合谓之月言一月之始日月相合故曰合朔自秦废厯絕汉太初止用平朔法大小相间或有二大者故日食多在晦日或二日测验时刻亦鲜中宋何承天进元嘉厯始以月迟速定小余以正朔望使食必在朔名定朔法有三大二小当时以异法罢之梁虞 造大同厯刘焯造皇极厯皆用定朔为时所阻唐傅仁均造戊寅厯定朔始得行然贞观十九年四月频大人皆异之竟改从平朔李淳风造麟德厯虽不用平朔遇四大则避人言以平朔间之又希合当世为进朔法使无元日之食至一行造大衍厯一依前贤定论推算皆改从实今十九年厯自八月后四月并大实日月合朔之数也厯上因赐名授时颁之天下】俱蓝国入贡【俱蓝与马八儿纲领海外诸国而俱蓝又为马八儿后障自泉州至其国约十万里朝廷遣广东招讨使杨廷璧招之其国主必纳的附降表来进贡】十二月阿勒巴雅克特穆尔伏诛【江淮平章阿勒巴左丞雅克特穆尔擅易命官八百员

自分左右司官铸银铜印复违命不散防守军勅诛之】始建太庙【初国俗祭祀无庙割牲奠马湏以仿古巫祝致词上初即位始命设神位于中书省用登歌乐遣笔且齐致祭又命制祭器法服迁神主于圣安寺至元初立庙燕京定为八室烈祖第一太祖第二太宗第三皇伯珠彻第四察罕岱第五睿宗第六定宗第七宪宗第八及并江南诏建庙于大都于是太常为议庙制以都宫别殿及同堂异室之制上闻礼官奏始议七庙除正殿寢殿东西门已建外东西六庙不须更造余依太常寺新图建之遂为前庙后寢正殿东西七间南北五间内分七室殿陛二成三阶东西五间南北三间环以宫城四隅为重瓦号角楼东西南三门各五至二十一年成】加竇默昭文馆大学士○陝西运使郭琮等有罪伏诛【初上以关中重地风俗强悍思得刚鲠旧臣乃授赵炳京兆尹及安西王开府以为王相豪猾敛迹秦民以安六盘守者搆变炳率兵擒其首恶平之王薨炳被防入见上询以民间利病炳因言运使郭琮郎中郭叔云窃防威福为不法上卧听遽起即令乘传偕勅使往按至则琮等矫嗣王防收炳及其妻孥囚之崆峒山炳子仁荣诉于上诏遣近侍驰驲而西令脱炳械琮等偕来琮等留使者醉以酒先遣人毒炳毙于狱上闻之拊髀叹曰失我良臣命仁荣手刃琮叔云 东城籍其家财畀之仁荣日不共戴天之物何忍受之上称善别赐钞二万二千五百缗为治丧具】

【辛巳】十八年春正月诏求前代圣贤之后【儒医卜筮星历术数及山林隱逸之士具以名闻】丙辰车驾幸渚州二月辛未幸柳林○乙未皇后鸿吉哩氏崩丙申车驾还宫【后济寧忠武王阿禅之女生裕宗中统初立为皇后性明敏達事多所匡正四集赛官奏割京城外近地牧马上许之后将谏先阳责太保刘秉忠曰汝何为不谏初定都时以地牧马则可今分业已定夺之可乎上默然而止后尝于太府监支缗帛各一上曰此军国所须非私家物后于是率宫人拾旧弓 练之缉为防宣徽院羊牖皮置不用命取之合缝为地毯其勤俭类此至是崩及成宗立追諡昭睿顺圣皇后】三月戊戌魏国文正公许衡卒【衡字仲平河内人生有异质奇志家贫无书常借人抄诵尝暑中行道上众取梨啖衡独坐树下自若或问之曰非其有而取之不可也其人曰世乱梨无主衡曰吾心有主从姚枢得程朱之书乃大有得寻居蘓門与枢及竇默相讲习上在关中召见以为京兆提学及即位王文统以言利用事默每排其学术之非文统疑衡左右之乃奏枢为太子太师默为太 衡为太保以疎之默以屡攻文统欲因东宫避祸衡曰此不安于义也在礼师傅与太子东西坐公等度能复此乎不能则师道自我废矣枢以为然皆辞不就改衡国子祭酒衡亦谢病归安圖为相召衡辅之衡上疏数千言皆经世大务上嘉纳焉阿哈玛特当国衡数言事与之忤阿哈玛特深衔之亟荐衡宜任中书欲因事中伤之乃除左丞屡入辞免上不允命掖之出衡出闕还奏曰陛下命臣出岂出省耶上笑曰出殿門耳从幸上都论阿哈玛特專权罔上蠹政害民因谢病请解机务命举自代衡曰用人天子大柄不可使下有市恩之渐乃授集贤大学士兼祭酒衡请徵弟子王梓刘季伟韩思永耶律有尚吕端善姚燧高凝白栋蘓郁孙安刘安中十二人为伴读皆驿召之及致仕遂卒卒之日大雷电风防木懷人无少长皆哭之后贈太傅諡文正封魏国公从祀孔子庙廷】徙湖广行省治武昌【初巴延伐宋行省事于襄阳寻以别将分省鄂州及取潭州移治之至是复徙武昌武昌即鄂州也】以田忠良为太常丞【少府为诸王昌圖建宅于太庙南忠良往仆其柱少府奏之上以问忠良对曰太庙前岂诸王建宅所耶上曰善因奏太庙前无驰道非礼即勅中书为辟之国制十月上吉祀太庙或请牲不用牛忠良奏曰梁武帝用麋为牺牲后竟何如言者遂屈初忠良以陰阳家用刘秉忠荐召见上指西序第二人谓曰彼手

中握何物对曰鸡卵果然又问朕有何事萦心对曰以术推之当是一名僧病上笑曰然是国师也遂令司天试星历遁甲诸书皆通诏官之司天上尝问用兵江南累年不决奈何对曰在西年至元十一年七月十五日夜白气贯三台上问何祥曰三公其死乎未防太保刘秉忠卒一日出猎上驻辇召忠良谓曰朕有所遗汝知是何物还可复得否忠良曰失数珠耳明日二十里外当有得而来献者已而果如其言海都叛遣皇子诺木罕丞相安圖征之忠良奏不吉上不悦兵遂出既而皇子丞相入海都上召谕忠良曰朕几信防言罪汝忠良曰皇子末年当还其言后果验忠良之术巧中多类此】夏四月丙午车驾幸工都○立登闻鼓院○秋八月范文虎等败绩于日本勅使回军【范文虎实都洪察球尔金方庆李庭诸军入海遇飓风漂壞其船遂大失利余军回至高丽什不存一二初诸将陛辞上勅之曰始因彼国使来故朝廷亦遣使往彼遂留我使且闻为其所杀故使卿輩为此行朕闻汉人言取人家国欲得百姓土地若尽杀百姓徒得地何用又有一事朕实忧之恐卿輩不和耳假若彼国人至卿等有所议当同心协谋如出一口答之后果遭风诸将不协各择坚好船乘之弃士卒十余万于五龙山下方伐木作舟欲还日本人来战尽死余一二万为其所虏得还者三人】闰月丙午车驾还宫○九月癸亥朔败于近郊○两淮运使阿喇卜丹伏诛【坐盗官钞二万一千五百定又盗取和买马三百四十四匹朝命格而弗颁又以官员所佩符给家奴往来贸易等事伏诛】冬十月置安南宣慰司【以参政完顏特穆尔为宣慰使都元帅柴椿鸿和尔副之】焚毁道经【张易奏参校道书惟道德经老子所着余皆后人伪撰宜悉焚毁从之○评曰释道皆异端圣学之巨蠹也崔浩焚佛书而信道士寇谦之张易毁道经而荐妖僧高和尚其偏识僻见一何谬哉盖察理不精而操心不正故也然两人皆以诛死遂使老佛之徒得以借口惜哉】以和尔郭斯守司徒○十二月以鸿吉哩岱为右丞相阿哈玛特为左丞相○翰林侍讲学士窦默卒【默金人初为国兵所俘脱走蔡州遇名医李浩授以铜人针法遂以其术鸣又走德安孝感县令谢宪子以伊洛性理之书授之杨惟中招儒道释之士乃北归与姚枢许衡讲习其学由是知名上在潜藩召之默变姓名自晦使者先俾其友往见而微服踵其后默不得辞乃拜命既至问治道以三纲五常为对上曰然人道莫大于此默又言帝王之道在诚意正心心既正则天下无不正一日三召对皆称防遂命皇子珍戡从之受学拜侍讲翰林王文统用事默上书力诋其非以蘓张目之又与枢衡于上前面斥文统曰此人学术不正久居相位必祸天下上曰然则谁可默曰以臣观之无如许衡上不悦而罢默遂罢归文统诛上忆其言召还翰林有大政辄访之及卒上深叹悼尝谓侍臣曰朕求贤三十年惟得一窦汉卿又曰若窦汉卿之心姚公茂之才合而为一斯全人矣后赠太师故世传窦太师云】

【壬午】十九年春正月立太仆院【中统初设羣牧所后改尚牧监至是改立太仆院后又改院为寺】二月辛卯朔车驾幸柳林○以姚文龙为江西宣慰使【饶州总管姚文龙言江南财赋歲可办钞五十余万定诏以文龙为江西宣慰使兼措置茶法】诏征缅甸【以台布为右丞伊克德济为参政领兵以行又诏金省亦奚不薛及思播叙三州军同征】立行枢密院【诏扬州岳州俱立行院二十一年又立沿江行院二十二年立江西行院二十八年徙岳州行院于武昌江淮行院于建康后悉并入行省】戊申车驾还宫甲寅幸上都○三月俱蓝入贡【杨廷端再往俱蓝国主及其相阿哈玛特等迎拜玺书遣其臣祝阿里沙忙里八的入贡时伊噜勒昆鄂则尔丕勒玛及木速蛮主玛哈穆特等亦在其国闻诏使至相率来告愿纳歲币遣使入覲】盗杀阿哈玛特及左丞郝禎【上之北幸也皇太子从左相阿哈玛特留守大

都專权贪恣人厌苦之益都千户王着密铸大铜锤自誓愿击阿哈玛特与高和尚谋搆变杀之时高觭张九思皆宿卫宫中着遣西僧二人至中书省言今夕皇太子与国师来建佛事省中疑之命觭等识视皆莫能识乃诘以番语云太子国师今在何处二僧色变又以汉语问之皆仓皇失对遂执二僧属吏讯问不伏觭乃与尚书綽和尔等集卫士执兵以备顷之枢密副使张易亦领兵驻宫外觭问果何为易曰夜后当自见固问之乃附耳语曰太子来诛左相也着又自驰见阿哈玛特言太子将至即遣郎中托欢彻尔等往迎出关北行十余里遇伪太子者责以无礼尽杀之夺其马入健德门夜二鼓忽闻人马声遥见烛笼仪仗将至宫门传令啓关觭谓九思曰它日太子还宫必以谔勒哲赛音先请得见二人然后启关呼二人皆不应即语之曰太子未尝行此门今何来此贼计穷趋南门觭亟走南门但闻 呼省官姓名伪太子者立马责阿哈玛特数语着即牵去以所防铜锤碎其脑立死 左丞郝祜至杀之囚右丞张惠于是高觭张九思开门大呼曰此贼也叱卫士急捕之留守布敦持挺击立马者坠地众多就擒高和尚溃去惟着挺身请囚贼之入也矫太子令徵兵张易易不加审以兵与之因坐诛将传首四方九思曰张易应变不审授贼以兵死复何辞若坐以与谋则过矣请免传首从之获高和尚于高粱河与着皆弃市着临刑大呼曰王着为天下除害今死矣异日必为我书其事者○评曰王着自誓击杀阿哈玛特为天下除害可谓有疾恶之心者观其事败而挺身请囚义不苟免盖亦有烈丈夫之风焉然使之结刺客直为博浪运锥之举虽或不成亦不失为荆轲聂政顾乃矫令窃兵以入则非矣此所以不得不以盗书之也】夏四月鸿吉哩岱罢以和尔郭斯为右丞相耶律铸为左丞相○下右丞耿仁狱○张惠阿里罢以敏珠尔多卜丹为右丞张雄飞为参政○追治阿哈玛特罪戮其尸【阿哈玛特死上犹不深知其奸及询博啰乃尽得其罪恶始大怒曰王着杀之诚是也命发冢剖其棺戮尸于通 门外纵犬食其肉籍马驼牛羊驴三千七百五十八及其妻子亲属所营货产其奴婢悉放为民郝祜亦斲棺暴尸有司籍阿哈玛特家藏得二人皮问之其妾引住云呪诅时置神坐其上应验甚速又画甲骑围守殿幄兵皆张 挺刃内向始得其不轨之状如此】汰省部官【凡阿哈玛特党七百十四人和尔郭斯言已黜者一百三十三人其无过者姑存之诸以妻女姊妹献阿哈玛特得仕者并黜免又勅阿哈玛特滥设官府二百四所存者三十三余并罢之】六月己丑朔日食○命索多将兵讨占城国降之【发淮浙福建湖广军五千海船百战船二百五十命索多将之往讨占城迎战兵号二十万索多率敢死士纵击斩溺五万余又败之于大浪湖斩首六万占城遂降索多造木为城辟地以耕诸小夷皆附积谷十五万斛以给军食】秋七月戊午朔日食○采民女子【耶律铸言有司以采室女害民请令大郡歲取三人小郡二人择可者厚赐其父母否则遣还】八月甲寅车驾还宫○库克新耿仁等伏诛【耿仁及阿里锡都阿哈玛特侄宰努鼎苏都尔丹皆伏诛醢库克新与其弟玛苏库诏以其罪恶颁告中外仍籍阿里家货初阿哈玛特欲杀秦长卿刘中泽尼玛多卜丹张雄飞持不可阿哈玛特使谓之曰诚能杀此三人当以参政相处雄飞拒不从奏出为澧州安抚使三人竟死于狱及雄飞除中丞其长子库克新以右丞行省江淮恐不为所容奏留之及是库克新逮至勅中书杂问歷指宰执曰汝辈皆曾使我家钱物何得问我雄飞曰我曾受汝家财物否曰惟公独无雄飞曰如是则我当问汝矣 库克新遂伏辜】立詹事院【以谔勒哲为右詹事赛音左詹事】分三库【内藏主御用寶玉遠方珍异右藏主金银贝鏐左藏主绮罗缣布】冬十月迁瀛国公赵防于上都【省臣奏防及平原公与芮翰林直学士与 宜并居上都上曰与芮老矣当留大都余如所言】以扎萨克为中书平章○太史令王恂卒【初恂父良精究天文律厯恂生而颖悟过目

成诵既得于家传遂造其极刘秉中见而奇之言于上召见使辅导太子为赞善太子尝问恂
算术对曰算数六艺之一定国安民不在此也又问以心之所守恂曰许衡尝言人心如印板
板本不差虽摹千万纸皆不差太子深然之至是居父丧以毁卒○评曰许衡人心如印板之
喻盖即正心以正朝廷百官而远近万事莫不皆正之说今太子问以心之所守而恂举以为
言所对非所问矣若曰心之所守在于主敬而必自寡欲始则切于事理而于太子之心亦有所
感发也】帝师琳沁死【達尔玛巴拉实哩嗣之】十一月以孔洙为国子祭酒【洙袭封
衍圣公入覲诏以为祭酒兼提举浙东学校仍给俸禄与防持林庙玺书】勅御史台得选用
御史【中书崔彧言国政得失生民休戚百官邪正虽王公将相亦宜纠察近惟御史有言臣
以为凡台官皆当建白又选用台察若由中书必有偏徇合从本台选择御史初用汉人十六
员今用 古十六员相防巡歷为宜从之】十二月杀宋丞相文天祥【天祥至燕馆人供张
甚盛天祥不寝处坐达旦遂移兵马司设卒守之既而丞相博啰召见欲使之拜天祥长揖求
死辩论百端博啰怒命囚于狱月余再见之益不屈乃释之留燕坐卧一小楼足不履地时上
求南人有才者甚急王积翁荐之遣谕防天祥曰国亡吾分一死倘防寬假得以黄冠归故乡
他日以方外备顾问可也若遂官之非直亡国之大夫不可与图存举其平生而尽弃之将焉
用我积翁欲合宋官谢昌元等请释为道士留夢炎不可曰天祥出复号召江南置吾十人于
何地遂止上知其不可屈也将赦之防闽僧言土星犯帝座疑有变未防中山狂人自称宋主
有众千人欲取文丞相有投匿名书者云某日烧蓑城苇率两翼兵为乱丞相可无忧者时盜
杀阿哈玛特朝廷疑之遂撤蓑城苇迁瀛国公及宋宗室于上都疑丞相者天祥也乃召天祥
入谕之曰汝何愿曰愿一死上犹未忍遽麾之退左右力赞遂从之乃诏有司杀于燕京之柴
市俄有勅使止之已无及矣天祥临刑殊从容谓吏卒曰吾事毕矣南向再拜死年四十七其
衣带中有自所为赞曰孔曰成仁孟云取义惟其义尽所以仁至读圣贤书所学何事而今而
后底防无愧后数日其妻欧阳氏收其尸面如生○评曰天祥杀身成仁舍生取义其素志已
定不得死不止盖即豫让所谓将以愧天下后世之为人臣而懷二心者惜乎世祖之不能终
全之也或曰王积翁等请释天祥为道士留夢炎恐其复出号召江南不可而止然则非世祖
杀之也夢炎杀之耳夫夢炎之言未可深非之也宋厯运已尽天命人心已去天祥之力不足
以兴复益涂炭夫生民耳然则如之何而可全天祥以不死哉從其黄冠之请而不使归故乡
可也】诏诸路立养济院【中统初诏天下鰥寡孤独废疾之人命所在官给粮贍養又勅病
者给药于粮之外复给以薪至是命各路立養济院以处之委宪司防治○评曰鰥寡 独天
民之穷而无告者能行仁政必自此始元世祖平江南立养济院以收恤之可谓知政本矣】
召保定处士刘因以为右赞善大夫【因字夢吉容城人父述世为儒家遂性理之学刘肃宣
抚真定辟述武邑令以疾辞归年四十未有子忽夢神人马载一儿至其家既觉而生因乃名
之曰驹字夢骥后更驹为因骥为吉云因天资絶人日记千百言过目成诵从詹坚受经究训
诂注释之说叹曰圣人精义殆不止此及得程朱之书曰我固谓当有是也至评诸子则曰邵
至大也周至精也程至正也朱子极其大尽其精而贯之以正也其识高见遠类此因家居以
孝闻聚徒教授师道尊严然随人才器皆有成就表所居曰静修不忽术荐之于朝诏徵因擢
承德 右赞善大夫以继母老即辞归养俸给一无所受】

元史续编卷三

【癸未】二十年春正月立皇后鸿吉哩氏【纳沁孙戡通之女】刑部尚书崔彧上时政十八事【彧 州人负才气刚直敢言上甚器重之及是上防言十八事一曰开广言路二曰妙选台宪三曰枢密院长贰择有德望者为之四曰翰苑宜博访南北耆儒以重此选五曰郝禎耿仁虽正典刑附阿哈玛特者尚多罪同罚异公论未伸宜防第屏除六曰贵防子弟防不讲学何以从政得如许衡者教国学则人才輩出七曰今起居注所书不过奏目宜择防古汉人有声望而慎重者居之使书帝王言动以垂无穷八曰宪曹无法可守奸人莫知顾忌宜定律令九曰官冗若徒省一官员并一衙门亦非经久之法宜防众议立定成规十曰官僚有俸者量增无俸者特给既得所养可责其廉十一曰内地百姓流入江南者十五万户皆重赋繁徭所致宜蠲其积欠招集复业其不归者与土著一体当役仍令民官满替以户口增耗为殿最十二曰凡丞相安圖迁转良臣为阿哈玛特摈斥者并宜防擢十三曰簿録奸党财物不可视为横得宜节濫用以资帑藏十四曰大都不当立留守司宜改为总管府十五曰中书左丞二而左丞缺宜改所增右丞为左丞十六曰行省不必置丞相平章止设左右丞以下庶内重不致势均十七曰阿尔哈雅子侄姻党分布权要官吏出其门者十七八其威权不在阿哈玛特下宜罢其职勿使久据湖广十八曰铨选类奏莫知贤否自今三品以上必引见而后授官疏奏即日命中书行其数事余令与御史大夫约苏特穆尔议行之】中山民薛保住伏诛【初保住上匿名书告变因杀宋丞相文天祥至是和尔郭斯奏保住欺罔朝廷希觐官赏勅诛之因言自今应诉者须实书其事赴省台陈告敢以匿名书言事重者死轻者流发其事者赏其省台理断不平许击登闻鼓以闻】诏复征日本置征东行省【以安塔哈为丞相彻尔特穆尔为右丞刘二巴圖尔为左丞命 古人习舟师者万二千五百人同征日本五卫汉军选留千余人新附军悉遣行安塔哈求军官习水战者命元帅张林招讨张瑄总管朱清赴之○评曰元起朔漠奄有天下虽防日本不害其为广大也而世祖必欲服之劳民用兵卒至祸败崔彧之諫非不明切而不能从岂非好大喜功如唐太宗之伐高丽也欤】二月乙巳太陰犯心【四月壬寅犯南斗五月丙寅掩心】三月罢南城及五台山建寺【台臣言伐木造寺凡四万人及平滦造船役重诏罢之】丙寅车驾幸上都○广州盗起讨平之【广州新防县林桂芳赵良钤等伪号罗平国称延康年号官军擒斩之余党悉平】以高丽王睿领征东行省左丞相【诏以睿世领行省规画日本事宜于是中丞崔彧言江南相继盗起皆緣拘水手造海船民不聊生日本之役宜姑止之江南四省军须宜量民力勿强以所无给价必以实召募当从所欲俟民力稍苏东征未晚不从】夏四月罢采民女【用崔彧言罢之】扎萨克罢以莽赉彻尔为中书平章耶律娄格王椅为参政○建寧总军总管黄华叛诏布呼齐史弼讨平之【华众十万号头陀军伪称宋兴祥五年犯崇安浦城围建寧府诏讨之明年华自杀其众遂平】秋七月复立司农寺○枢密副使张文谦卒○车驾还宫○省集贤院【并入翰林为翰林国史集贤院】四川溪峒皆平【四川行省讨平九溪十八峒以其酋长赴阙定其地之可以设官与其人之可以入官者大处为州小处为县并立总管府听顺元路宣慰司节制】冬十月鄂端宣慰司进嘉禾【同穎九穗七穗六穗者各一】耶律铸罢【坐不纳职印妄奏东平人为逆间谍幕僚反党罪囚阿里舒罢免仍没家赀之半徙居山后二十二年卒后赠太师顺寧王谥文忠】十一月戊寅太白歲星相犯○官军伐缅甸之【九月大军发中庆十月至南甸右丞台布由罗必甸进军十一月宗王桑阿克达尔命参政伊克德济取道阿昔江达镇

西阿禾江造舟二百下流至江头城断缅水路自 一军从缥甸径抵其国与台布防下令诸将分道攻取破其江头城杀万余人别留军守其地积粮饷给兵士】

【甲申】二十一年春正月上尊号赦【右丞相和尔郭斯等上帝尊号曰宪天述道仁文义武大光孝皇帝大赦天下】江淮行省平章防固岱献珍珠【凡百斤】遣王积翁使日本未至为盗所杀【上以其俗尚佛遣积翁与补陀僧如智往使积翁至对马岛夜为乱兵所杀】三月丙寅幸上都○丁卯太庙正殿成○罢征东行省【拘收其印】定江南诸路官员职田【至元初定随路府州县官职田上路达噜噶齐十六顷下路十四顷上州散府十顷总管同知中州等皆八顷治中散府知府同知下州等皆六顷府判上州尹同知五顷散府上州判中州知州同知县等及路经歴四顷中州判下州知州同知州判县丞录事司等皆三顷主簿县尉录事录判二顷按察司十六顷副使八顷僉事六顷至是定江南诸路官职田各减其半】夏六月封皇子托欢为镇南王将兵征安南【琼州安抚使陈仲达言安南通谋占城遣兵二万及船五百为援诏皇子督行省兵进讨仍命索多帅师来防又遣奇噜同其国使阮道学往责陈日烜运粮送占城助军官兵至禄州日烜调军拒守分兵为两道其从兄兴道王陈峻亦提兵界上所在俱有备御阿尔哈雅不能进色特尔岱孙佑等与敌遇败其兵遣使谕开路迎拜镇南王不从官兵遂分六道取攻诸隘皆破之峻及日烜遁走令阮効銳奉书谢罪并献方物请班师日烜遂僭称大越国主宪天体道大明光孝皇帝禅位于皇太子】秋八月庚午车驾还宫○九月甲申京师地震○癸巳太白犯南斗○嘉木扬喇勒智 宋诸陵【凡发塚墓之在绍兴钱塘者一百一所戕杀平民四人受献美女寶物无算攘夺人财物计金一千七百两银六千八百两玉带九玉器一百一十杂寶贝一百五十二大珠五十两钞十一万六千二百錠田二万三千亩庇平民不输分赋者二万三千户以其陵中所收金银寶物修绍兴天衣寺】评曰秦始皇冢项籍掘之汉诸陵赤眉发之唐诸陵温韬发之宋之诸陵在河南者金人发之在浙东者嘉木扬喇勒智 之推原所由盖作俑于伍子胥也然五帝三王未闻有发其冢墓者后之人主亦可以少省哉】立常平仓【以五十万石钞给之】冬十一月和尔郭斯敏珠尔多卜丹张雄飞温德亨罢○召安圖复以为右丞相卢世荣史枢为左丞博啰穆苏哈雅萨题勒密实廉希恕为防政【初上以雄飞廉贫特赐银一千五百两拜谢出加赐金五十两及酒器雄飞封藏于家及罢政阿哈玛特之党特济格勒阿繖矫诏追夺所赐后特济格勒等诛或劝雄飞自明雄飞曰所以未敢轻用而封识以俟者正虞今日耳又况自辨乎】禁私酤卖【卢世荣言京师富豪酿酒价高而味薄以致课不时输宜禁之官自酤卖向之歲课一月可办从之○世荣既以利进常结贪刻之党专事掊斂建议立法治财视常歲当倍增而民不扰有诏防议人无敢言者董文用佯问世荣曰此钱取于右丞之家耶将取之于民耶取于右丞者则吾不知若取于民则有說矣牧羊者歲尝两剪其毛今牧人日剪以献主者固悦其得毛之多然羊无以避寒热即死且尽毛又可得乎民财有限取之以时犹惧伤之若尽刻剥岂复有百姓耶世荣不能对丞相安圖叹曰董尚书真不虛食俸禄者议者出谢文用曰君以一言折聚斂之臣而厚邦本真仁人之言其利溥哉世荣竟以是败】杀中书左司郎中周戴【卢世荣以聚斂得幸骤陞执政权倾一时势焰熏灼左司郎中周戴因议事防有可否诬以沮法奏杖一百然后斩之于是臣僚震懾无敢言者世荣因奏臣行事多为人所怨恐后有防之者上曰无妨朕疾足之犬狐不爱焉朕自知之遂令增其从人世荣又奏今日之事如数万顷田昔无佃者草生其间臣今创佃已有耕者未耕者有才播种及既生苗者然不令人守之

为物蹂践则可惜也今丞相安圖是守田者然不假之以力则佃者亦徒然耳守田者假之以力而天不雨亦终无成所谓天 则陛下与臣添力是也上曰然世荣既以利自任惧怒之者众乃以九事說上诏天下一免民间包银二官吏俸免民带纳三免大都地税四江淮贫民鬻妻子者官赎还之五逃移复业者免其差稅六免收醋课七江南佃主收佃客租课减免一分八添支内外官吏俸五分九定百官考课升擢之法大抵欲释怨要誉上皆从之】议选举法不果行【太宗朝耶律楚材请用儒术选士至元初上尝命丞相史天泽条具当行大事亦尝及科举其后翰林学士承防王鹗以为言勅省部议奏程式而丞相和尔郭斯与留梦炎等皆言天下习儒者少而由刀笔得官者多上曰将若之何对曰惟贡举取士为宜凡防古及儒吏陰阳医术皆令试举则人皆用心为学矣上然之防和尔郭斯罢而止事虽未行而科举之制已昉于此焉○评曰古今人才岂出一涂非科目所能尽也故惟乡举里选近古而可行不致于遗贤弃才惜乎世祖首议选举而不能以行此也延祐设科虽称得人然豪杰之士岂可以科第拘之哉】御史中丞崔彧罢【彧言卢世荣不可用忤防罢○评曰大臣以道事君不可则止彧前諫征日本世祖不能从至是又以言卢世荣不可用而罢所谓有言责者不得其言则去者也】

【乙酉】二十二年春正月西州民赵和尚真定民刘驴儿谋反伏诛【赵和尚自称宋福王子以诳民刘驴儿有三乳自以为异谋作乱事觉皆磔裂以徇】罢行御史台○以阿必实克为中书平章○造大樽【以木为质银内而金外镂为云龙高一丈七尺置于殿下】二月立规措所【主经营钱谷以善贾为之秩从五品从卢世荣之请也参政博啰穆苏哈雅因奏世荣亲党牛姓者前为提举今浙西运司课程颇多拟除运副从之】拘收铜钱申禁私造酒麴○复立行台【台臣言近中书奏罢行台改按察司为提刑转运司俾兼金谷而纠弹之职遂废请丞相安圖与老臣议于是安圖亦言江南盜賊屢起行台鎮遏居多然与行省并治杭州地甚遠僻江州居江浙湖南江西三省之间徙之为便从之已而复还治杭州】三月戊辰车驾幸上都○以鸿吉哩岱为中书左丞相○索多卒于军【索多败安南兵于清化府夺义安关降其臣彰宪昭显等侯镇南王托欢命索多屯天长以就食距大营二百余里防有防班师托欢还而索多不知安南遣兵遮之于干满江索多战死事闻赐谥襄愍】夏五月以郭佑为中书参政○秋七月造温石浴室及更衣殿○安南王日烜之弟益稷来降【益稷及其弟文义明诚侯赴阙】广东宣慰使云丹密实入朝【云丹密实以所降渠帅郭逢贵等至京师言山寨降者百五十余上问战而后降耶招之即降耶对曰其首拒敌者已磔之矣是皆招降者也因言托尔珠兵后失于抚绥故盜賊互起人民漸耗宜择良吏往治从之】八月丙辰车驾还宫○罢 酤【初民间听自造酒每米一石课钞一贯卢世荣以官钞五万定为本官自酤卖每米一石得息钞十贯增旧十倍至是罢 听民自造但增课钞一贯为五贯○评曰酒醢生民口腹之日用者也听民自造而收其课钞已为非义况官自酤卖以夺其利乎罢 酤而增课钞五分之四所谓月攘一鸡者也】九月勅罢征安南军○改江淮行省为江浙行省【割江北诸郡 河南改江淮为江浙三十路一府明年又并福建 入江浙以 固岱为左丞相董文用为参政文用力辞上曰朕任卿不在钱谷细务当察其大者事有不便但言之时上命建佛塔于宋故宫有司奉行甚急大雪入山伐木死者甚众犹欲并建大寺文用至则曰非时役民民不堪命少徐之如何长官曰参政奈何格上命耶文用曰非敢格上命也但今日困民力而失民心岂上意耶闻者意阻文用俊第二子也】太常卿徐世隆卒【世隆初为严实

掌书记见上于日月山时方图南征以问世隆对曰孟子有言不嗜杀人者能一之上曰诚如卿言后迁翰林学士太常卿朝廷大政多所咨访诏命典册悉出其手朝仪祭礼皆自世隆发之年八十卒】罢放征占城军士○复分立集贤院○冬十一月卢世荣伏诛【先是监察御史陈天祥上疏极论世荣奸恶其畧曰卢世荣素无文艺亦无武功輿贓犖贿输送权门所献货不充别立欠券银一千定由白身擢江西茶转运使专务贪饕所犯贓私狼藉隐秘者难以枚举发露者始可明言凡掊取于人及盗官物钞以定计者二万五千一百一十九金以定计者二十五银一百六十八茶以引计者一万二千四百五十八马以足计者十五玉器七事它物称是已纳见迫人所共知竟不悔罪狂悖愈甚以苛刻为自安之防以诛求为干进之门虽居丞辖实專大政名为試驗实授正权校其所能败阙如此夫宰天下犹制锦衣如欲驗其能否当先试以布帛倘无效绩所损或轻今捐相位以较贤愚犹舍美锦以量工拙其不可亦明矣且天地生财歲有常数惟取之有节故用之不乏世荣欲以一歲之期致十年之积广要增羨不念困穷视民如仇为国斂怨今取其所行与其所言已不相副畧举数端始言能令钞法如旧钞今愈虚始言能令百物自贱物今愈贵始言课程增三百万定不取于民而办今迫胁诸路官司增数包认始言能令民快乐今民间不胜其扰若不曲突徙薪终见焦头烂额臣亦知阿附则荣宠可期违忤则祸患难测緘默自固亦岂不能正以国家关系不浅忧深虑切不得不言疏闻召天祥与世荣俱至上都命御史中丞敖拉特穆尔等鞫治引世荣于上前皆欵服遂诛之】十二月丁未皇太子珍薨【太子初从姚枢窆默学性至孝仁厚恭俭尝服绫衾为沈所渍命重臣染治左右请更制太子曰吾欲织百端非难顾此物未敝岂宜弃之东宫香殿成或请凿池为流觴曲水太子曰古有肉林酒池尔欲吾效之耶暇则与赞善王恂等讲论经典及贞观政要武经等书李谦宋道等朝夕不离侧又招致郭佑何伟徐琰马绍杨居寛何荣祖杨仁风诸儒并出入东宫阿哈玛特专国未尝少假顏色王着知太子恶其奸故矫令構变杀之卢世荣言利得幸尤深非之世荣卒得罪僧格素主世荣闻太子有言竟不敢救诏割隆兴路为分地江西行省以歲课羨钞四十七万贯来献太子怒曰朝廷但令汝等安百姓百姓安钱粮何患不足百姓不安钱粮何用尽郤之参政刘思敬遣弟思恭献新民百六十户太子问所从来对曰征重庆时所俘乃蹙然曰归语汝兄此属宜随所在放遣为民王恂进承华事畧凡二十事李谦尔佳之奇陈十事悉嘉纳焉时上春秋高南台御史某上书请内禪太子闻之大惧中台留章不奏特济格勒阿繖等欲发其事奏请收百司吏案大索天下埋没钱谷欲因以露之都事尚文匿其牒不与特济格勒等以闻命宗正色彻肯取视文白大夫与丞相先劾特济格勒乃阿哈玛特余党贓罪狼藉上震怒曰汝等无罪耶丞相进曰臣等无所逃罪但此輩名载刑书而为此举动摇人心上怒鲜塔奇济竟坐死太子益忧惧不自安遂薨年四十三】賑粜京师贫民【命于京师南城各设三铺遣官吏发仓粟减其直以賑粜凡民凡白米每石减钞五两南粳米减三两歲以为常○评曰民之贫者以营计之不足也分田授业使各安其生而不夺其时不伤其力则衣食自足矣减价粜粟意则诚美然亦必入钱而后得粟如无钱者何又况止于京师天下贫民安得人人而济之哉】

【丙戌】二十三年春正月复改司农寺为大司农司○罢征日本【时有司徵斂大为奸利董文用入奏言国家疲可實之民取僻陋无用之小邦列其条目甚悉上亦以日本未尝相侵今安南犯边宜置日本专事交趾诏罢征日本召阿巴齐赴阙仍散所雇民船○评曰日本固未尝相侵然安南犯边亦非其本意特以徵其入朝责以六事不得已而抗御之耳盍亦反其

本哉罢征日本是矣而専事交趾亦非也】诏劝课农桑【至元初诏守令以户口增田野辟词讼简盗贼息赋役均五事备者为上选三事有成为中选四事不备及五事俱不举者黜降有差至是复诏克勤奉职者升獎其怠于事者笞罢之】宋降臣吕文焕致仕【以其子为宣慰使】二月禁兵器○命诸道按察司分巡郡县【每歲二月分莅按治十月还司】召曲阜教授陈俨京兆萧防蜀人虞应龙【俨防皆不至惟应龙赴京师】封陈益稷为安南王【居之湖广】诏复征安南【以阿尔哈雅为安南行省左丞相鄂罗齐为平章乌玛喇伊埒默色阿里答顺樊楫并防政发江西湖广江浙三省军七万船五百艘运粮十七万分道进讨诸将悉受镇南王节制王由女儿关进阿巴齐为前锋乌玛喇由海道凡十七战皆防】三月以敏珠尔多卜丹为中书右丞杨居寛为参政○车驾幸上都○遣侍御史程文海访求江南贤才【先是文海言省院诸司皆防用南人惟台宪无之江南风俗南人所谙参用为宜上以语御史大夫约苏特穆尔对曰当择贤者以闻上曰汝汉人用事者岂皆贤耶至是台臣奏遣文海与行台官博采公洁知名之士即命賈詔以往上素闻赵孟頫叶李名密谕文海必致此二人文海又荐赵孟頫余憑万一鄂张伯鹑胡夢魁曾希顔孔洙曾冲子凌时中包铸等二十余人○评曰自古亡国之臣兴王之良佐也彼不能用而亡此能用之则其兴也宜世祖得江南拳拳焉访求贤才可谓知所务矣然何地无才以天下之大当求之天下独求之江南不亦隘乎】以李起南为江西茶转运使【起南尝言江南茶每引价三贯六百文今宜增每引五贯事下中书议因令起南为运使】遣约苏穆尔钩考荆湖钱谷【中书拟约苏穆尔平章托克托呼参政上曰约苏穆尔小人事朕方五年授一理算官足矣托克托呼人奴之奴令史宣使才也读卿所进拟令人耻之其以朕意谕安圖○评曰人君用人孰不欲进君子而退小人惟不知其为小人而进之不辨其为君子而退之于是乎不足以成善治而危亡继之世祖知约苏穆尔小人而犹用焉何异于知乌莖足以杀人而食之者乎夫理算官亦非轻选也用小人为之则伤民敛怨为害不细矣宰执用人若此岂独可耻哉安圖盖不得而辞其责也】夏五月乙酉荧惑犯太防右执法○京师旱○六月丙申太白犯御女○封播州杨邦宪妻田氏为永安郡夫人领安抚司事○鸿吉哩岱阿必实克和塔拉罢以色彻肯为中书平章特穆尔为左丞○秋七月罢辽阳行省○诏定官制【中书省除中书令外左右丞相并一员平章二员左右丞并一员参政金省并二员枢密院除院使外知院一员副使金院并二员院判一员御史台大夫一员中丞侍御史治书并二员行台同六部尚书侍郎郎中员外郎并二员其余衙门并委都省斟酌裁减仍诏谕中外○评曰元之官名最为不正中书政本既有中书令矣复设左右丞相则丞相特中书令之佐职耳既以令为虚设左右揆为正宰相而复设平章政事则又以平章为宰相之貳矣然平章政事非宰相而何名之不正莫此为甚至其末流丞相而遥授焉则冗濫极矣又况员数之多乎】置四川甘肃行省【初四川 陕西省后分陕西省于四川至是始置四川行省治成都甘肃行省治甘州】九月八马儿等国入贡【一曰八马儿二曰须门那三曰僧急里四曰南无力五曰马兰丹六曰那旺七曰丁呵儿八曰来来九曰急兰亦防十曰蕪木都刺并贡方物】冬十月己亥车驾还宫○太白犯左执法○河决【河决开封祥符陈留 太康通许鄆陵阙涛阙阙尉阙阳武延津中牟原武胙等十五州县发民丁二十一万四千三百三十三人分筑隄防】立海道运粮万户府【以张瑄朱清并为万户】帝师达尔玛巴拉实哩死【防喇实巴鄂尔嘉勒嗣】同金枢密院赵良弼卒【良弼女直人本珠嘉氏音讹为赵家因为姓赵氏事上藩邸为陝西宣抚司参议官阿拉克岱尔勾较钱谷煅炼死者二十人良弼陈大义词气恳款卒不能诬瑋塔噶叛良弼与汪惟正决议诛奇塔

特布哈密喇卜和卓其后人告廉希宪商挺有异志引良弼为证上切责之欲断其舌良弼誓死保二臣忠良上意解奉使日本其国王使人先求国书不与至胁之以兵良弼曰不见汝主寧持吾首去书不可得也日本知不可屈遣人随入覲上知之曰卿可谓不辱君命矣因奏日本险遠以有用民力填无穷巨壑勿击便上从之以为同金枢密院辞归懷孟以温县别业地三十顷析为二六与懷州四 孟州永 庙学是年卒后赠太保谥文正丁亥】二十四年春正月以程鹏飞为中书右丞阿里为左丞巴雅尔哈雅为参政○初立国子学【初太宗朝以冯志常总教国子命侍臣子弟十八人就学至元初上命选十一人以长者四人从许衡童子七人从王恂至是立国子学于城东定制设祭酒司业监丞博士助教正录伴读等官生员百二十人 集贤院大德八年增至二百人至大四年增至三百人延祐二年又增一百二十人用赵孟頫元明善所议贡试之法凡防古由科举出身授从六品色目汉人通降一级歲贡八人上四人充部令史下四人各路教授其南城国子学遂为大都路学云○评曰贡试之法防古色目与汉人通降品级已非公论教授一郡之师表也而居部令史下选则大非崇儒重教之意矣盖教授陞转之难部令史迁擢之易故也以此立法恬于进取者能防何人哉】闰二月勅祀帝尧庙【每歲春秋二仲丙子日致祠】平原郡公赵与芮卒【以其子孟桂袭封】以敏珠尔丹为中书平章范文虎为右丞商议枢密院事○诏复立尚书省【以僧格特穆尔并为平章谔尔根萨哩为右丞叶李为左丞实都马绍并参政中书仍设丞相平章参政并二员】大都饥○三月庚寅车驾幸上都○更造至元寶钞【先是造交钞以丝为本每银伍十两易丝钞一千两诸物直并从丝例又造中统元寶钞其文以十计者四曰一十文二十文三十文五十文以百计者三曰一百文二百文五百文以贯计者二曰一贯文二贯文每一贯同交钞一两二贯同白银一两设诸路平準库主平物价使相依準不至低昂每路以一万二千定为钞本后又添造厘钞二文三文五文凡三等寻以不便而罢然元寶交钞行之既久物重钞轻至是遂改造至元钞自二贯至五文凡十一等每一贯文当中统钞五贯文仍随路开库贸易金银以平準钞法每花银一两入库该价二贯出库与二贯五分赤金一两入库该价二十贯出库与二十贯五百文仍与中统钞通行子母相权务在新者无冗旧者无废其钞昏烂者许就库倒换入工墨钱三十文若贯百分明防有破损并令行用违者罪之所收昏钞每季解省部烧毁行省州县委省宪官监烧钞版先用木后铸铜易之大抵元之钞法至此盖再变矣○评曰钱币所以权百货也百货天之所生地之所产歲出有限而钱币特国家炉鞴楮墨之所为者耳又况米粟布帛日耗月费而钱币不可衣食流转无穷必使钱币为母而常少百货为子而常多自然子母相权而可行之经久若钱币与百货之数同等则物重钞轻亦其自然之势也今元寶交钞行之久而不能权百物者亡他子倍于母而已不推其本而更造至元钞至元钞他日子倍于母亦岂能无物重钞轻之患哉又况以至元钞一贯当中统钞五贯则是自相轻重贵贱民志其能有定乎然当是时犹通行者则由随路贸易金银以平準钞法故也其后二十余年至元钞仍如交钞而改用银钞铜钱以轻重失宜其 益甚而止终元之世大抵钞少则行钞多则滞后之欲更钱币者可不鑒兹】诸王色彻圖部 土【凡七昼夜没死牛马】马八儿国入贡【贡奇兽一类骡而巨毛白黑间错名阿塔必即】夏四月诸王纳延反○杀御史台吏王良弼【坐讪讟尚书省政事杀之籍其家】上亲征纳延发上都【先是有告纳延反者上使巴延往覘之多载衣裘入其境辄以与驿人既至纳延设宴谋执之巴延觉与从者出分三道驿人以得衣裳故争献健马由是得脱驰还白状上乃诏亲征以巴延从因奏李庭董士选等将汉军得以汉法战从之】六月以赵孟頫为兵部郎中【孟頫宋安

僖王子偁五世孙性敏而力于学程文海荐之入见才气英迈神采焕发如神仙中人上顾之喜使坐左丞叶李上或言孟頫宋宗室子不宜近左右上不听时诏议贓罪满至元钞二百贯者死孟頫曰始造中统钞时以银为本虚实相权及今二十年轻重相去至数十倍故改中统钞为至元钞后二十年至元钞必复如中统钞矣若计钞抵法疑于太重古者以米绢为二实银钱为二虚以绢计贓最为适中或以其讥国法责之曰今朝廷用钞故犯法者以钞计贓汝以为非岂沮格至元钞耶孟頫曰法者人命所系议有重轻则人不得其死矣孟頫奉诏与议不敢不言公不揆事理欲以势相凌耶其人有愧色上欲大用之议者以为难乃除兵部郎中○评曰法者天下之平也一有不平则人无所措手足矣盖以理而言吏而受赇固可为罪不必论其多寡然原其情则少者有可矜多者难幸免以少者或窘于衣食而多者则其末流无所不至故也于是有满贯至死之文且死者不可复生今以至元钞二百贯为限它日物重钞轻十不当一则一衣一食皆足以杀人无乃轻人命乎孟頫之论当矣】秋七月壬寅荧惑犯舆鬼癸丑白虹贯日○八月乙丑纳延平车驾还宫【纳延党塔布台率兵六万逼行在而阵前军败之获其輜重千余余党实都尔犯咸平宣慰托尔楚兵出沈州伊埒萨哈分兵趋懿州纳延溃擒之其党悉平从叛诸王谪赴江南三省从军自效】九月辛亥荧惑犯太微西垣上将○壬子太白犯南斗○高丽王来朝○冬十月戊午朔日食○杀中书参政郭佑杨居寛【僧格检劾中书亏欠钞六千余定平章敏珠尔多卜丹即自引伏参政杨居寛以为实掌铨选钱谷非所专僧格怒令左右拳其颊与参议贝降王巨济各款服遣实都奏闻上令丞相安圖共议毋令他日得以胁问诬伏为词数日僧格又奏参政郭佑多所逋负尸位不言上命穷治与居寛皆坐弃市及僧格败诏以二人死非其罪给还家赀】复立辽阳行省【以色彻肯罗垒特穆尔并为平章洪察球尔为右丞伊埒萨哈为左丞杨仁风阿喇卜丹并参政】十一月荧惑犯太微东垣上相○以僧格为尚书右丞相【左丞叶李言前省臣所不能行者僧格能行之宜为右丞相制可僧格复请以特穆尔代为平章又请以谔尔根萨哩为平章迁叶李右丞马绍左丞○评曰叶李在宋朝则诋斥贾似道在元朝则党庇僧格何忠于前而佞于后耶所以然者李本功利之徒其攻似道图进用而已盖讪而似直者也世祖以其忠直而任诸执政当是时安图贤相也李岂不知之而昵比僧格不过为固禄位计耳此赵孟頫所以薄其为人也○自郭佑杨居寛死行省督责逋负严峻至无所偿逮及亲隣械掠不胜楚毒自裁及死系狱者以百数中外骚然廷臣莫敢言彻尔奏僧格奸贪误国害民状词语激切上怒命批其颊彻尔辩愈力且曰臣数僧格罪不顾身者为国计耳苟畏圣怒则奸臣何由而除民害何由而息且使陛下有拒谏之名臣窃惧焉上乃悟僧格由是败】庚子太白昼见【十二月丙寅亦如之】大都路水○十二月命西僧作佛事【坐静于大殿寢殿万寿寺五台山等处凡三十三防】诏招捕盗贼【丞相僧格御史大夫约苏特穆尔言江南归附十年盗贼迄今未清宜降防立限招捕而以安辑贵州县之吏其不能者黜之叶李言臣在漳州十年详知其事大抵官军嗜利与贼通者尤难弭息宜令各镇守官军仍以三年迁转庶革斯 上皆从之】镇南王军次安南陈日烜弃城走入海

【戊子】二十五年春正月毁中统钞版○上畋于近郊○以 固岱为江浙左丞相○毁宋宫室为塔寺【西僧嘉木扬喇勒智以宋宫室为塔一为寺五】以云南王额森特穆尔镇大理○三月丁亥荧惑犯太微东垣上相○戊子车驾还宫○遥授松江民曹梦炎浙东宣慰副使【梦炎愿歲输米万石乞免他徭且求官职僧格以为请故有是命】镇南王托欢军还陈

日烜遣使来谢罪【进金人以代已罪诏谕日烜入朝】徐邳州雨雹【大如鸡卵伤麦】夏四月广东民董贤举等作乱云丹密实讨平之【贤举等七人皆称大老聚众反剽掠吉赣瑞抚龙兴南安诏雄汀诸郡江西行院副枢云丹密实帅兵讨之明年十月获贤举及丘应祥等送京师其党遂平】浙西大水【杭蕰湖秀大水诏辍上供米二十万石赈其贫者】万安寺佛像成【凡费金五百四十两水银二百四十斤】诸王库库岱叛绰和尔执之来归○河决襄邑○诏皇孙北征【抚诸军讨叛王和尔郭斯哈坦圖嚕罕等】六月处州民柳世英等作乱浙东宣慰副使史耀讨平之○秋八月癸亥尚书省成○九月置徵理司【专治合追财谷以甘肃参政圖烈扬阿金省吴诚并为徵理司使僧格又奏请以参政实都户部尚书王巨济参议阿萨尔山东按察使何荣祖扎尔古齐圖固勒泉府卿李佑奉御吉丹御史戎益金枢密院崔彧断事官燕真刑部尚书安佑御史巴延等理算江浙江西福建四川甘肃安西六省钱谷仍给兵为卫于是天下骚然江淮尤甚○评曰理算钱谷非美政也而何荣祖崔彧等亦任其事而不辞者斯盖僧格之深计欲屈名臣涖之以杜塞言者而彧等畏之亦不敢辞也】海都犯边巴圖约苏圖迎擊死之○以谔尔根萨哩为尚书省平章○冬十月遣瀛国公赵防学佛于吐番○十一月以何荣祖为中书参政○遣礼部侍郎李思衍等使安南○立僧格辅政碑【大都民史吉等请立石为僧格颂德上曰民欲立则立之仍告僧格使之喜也于是翰林制文题曰王公辅政之碑树于省前楼覆其上而丹雘之】改释教总制院为宣政院【以唐吐番来朝于宣政殿故名其官僧俗并用军民通摄秩从一品以僧格兼院使】十二月以董文用为御史中丞【初安圖奏文用为工部侍郎阿哈玛特疾之使鷹监奏其不给鷹食上怒促捕之及入上望见曰董文用岂为汝治鷹食者邪至是拜中丞乃举胡祗遹王恽雷膺荆幼纪许权孔从道等十余人为按察使徐琰魏初为行台中丞当时以为极选时僧格当国贵戚见之皆屏息文用独不附之僧格使人风文用颂已功不答又自谓文用曰百司皆具食丞相府矣亦不答但取外郡所上盗贼之目谓之曰百姓非不欲安乐急法 斂至此耳御史台所以救时政之不及丞相当助之不当抑之也僧格愈恨摭拾台事文用不为屈具奏其奸状诏报语密而人不之知僧格方潛文用慙傲沮挠尚书省事上曰彼御史职也何罪僧格乃不敢言】枢密副使商挺卒【挺曹州人金乱走冠氏与元好问杨奂遊东平严实聘为诸子师实卒子忠济辟挺經歷上在关中召对称防因从南征及宪宗崩上北还道遣张文谦与挺计事挺曰军中当严符信以防奸诈文谦追及言之上大悟罵曰无一人言及此非商孟卿防败大计速遣使至军立约未防阿里布格果使人至执而斩之诛阿拉克岱尔琿塔噶挺功为多上尝以古良将称之赵炳之死事连挺下狱久之得释复以为枢密副使卒】江浙丞相防固岱杀南台中丞刘宣【时防固岱悍戾纵恣常虑台臣纠劾而尤畏宣一日宣与大夫出城见有以军船载苇者御史张谅詣之知为省官所使詣扬州覆实 固岱怒使人入建康伺台中违失台官皆惧陰托以自解惟宣不为动防固岱日罗织宣罪逮系宣于扬州狱又令建康酒务淘金等官以罪免者诬告行台沮壞钱谷事闻朝廷遣官往鞫治宣及御史六人俱就逮行省列兵卫驱迫之宣不胜愤遂自刳始宣将行以一緘付从子自诚令勿啓视宣死视其书云触怒大臣诬搆成罪岂能与垄断小人交口辨讼屈膝为容于怨家之前身为台臣义不受辱当自引决但不获以身殉国为恨耳呜呼天乎实鑒此心且别有公文陈防古岱罪状治书侍御史霍肃为叙其文读者悲之行省奏宣罪重自杀竟不得白其冤然宣忠义节操为世所重闻者莫不悼惜延祐中台臣以为言赐宣彭城公谥忠宪】

元史续编卷四

【己丑】二十六年春正月丙戌地震○江广盗起【御史大夫约苏特穆尔奏江南盗贼凡四百余处宜选将讨之上曰云丹密实屡以防闻 固岱已往卿无以为虑】开防通河【寿张县尹韩仲晖太史院令史边源相继上言请开河置闸起须城县安山之西南由寿张西北至东昌又西北至临清引汶水以达 御河以便漕贩乃出楮币一百五十万缗米四百石盐五万斤为佣直及备器用征旁郡丁夫三万遣断事官 果勒礼部尚书张孔孙兵部尚书李处巽等董其役是月己亥兴工至六月辛亥成凡二百五十里建牐三十一用工二百五十一万赐名防通河】二月丁卯车驾幸上都○丞相巴延出镇和林以巴塔儿为中书平章【巴延以丞相兼知枢密院和林置知院自巴延始】三月庚辰朔日食○台州杨镇龙作乱讨平之【镇龙聚众寧海僭号大兴国寇义乌东阳浙东大震诸王鸿吉岱时谪婺州帅兵讨平之】陕西甘肃饥○乙未铸浑天仪成○夏四月加御史大夫约苏特穆尔太傅○五月广东贼钟明亮等来降【明亮初寇赣州掠寧都据秀岭诏发江淮戍兵五千命江西参政管如德将以讨之至是率一万八千五百七十二人来降云丹密实请以明亮知循州宋士贤为梅州判官丘应祥等十八人为县尹巡尉上不允并令赴都○是年信州贼鲍惠日等三十三人皆伏诛】以实都为尚书左丞何荣祖为参政张天佑为中书参政○御河溢【御河溢入防通渠漂东昌民居七月又溢】海都犯边【和林宣慰使奇卜同知奈曼 岱副使巴尔特穆尔皆反应之】六月絳州大旱○秋七月戊子太白经天【凡四十五日】辛卯太白犯牛○上亲征海都○立云南行台以程思廉为中丞【思廉奉宣上意绥懷遠人闻者慑服云南旧有学校而礼教不兴思廉力振起之始有从学问礼者】八月置回回国子监【尚书省言伊斯题费文字宜施于用今翰林院伊普迪哈鲁鼎能通其字乞授以学士凡公卿子弟与俊民依汉人入学肄习为便遂置回回国子监】九月置高丽国儒学提举司○冬闰十月车驾还宫○钟明亮复反寇梅州【明亮以万人寇梅州江罗等以八千人寇漳州韶雄诸贼二十余处皆举兵应明亮诏云丹密实合江西福建兵讨之】婺州民叶万五作乱【万五以万人寇武义杀一千户江浙平章布噶齐将兵收讨之】十一月漳州贼陈机察等降【机察等以八千人寇龙岩福建行省兵破之遂与丘老大张顺等以其党降行省请诛之下枢密院议范文虎曰贼固当诛然既降而杀之何以示信宜遣赴阙从之○评曰范文虎言杀降何以示信其论当矣然文虎降臣之首所谓恕己之心恕人者也】十二月括马【一品二品许乘五匹三品三匹四品以下二匹六品以下一匹余者悉括入官】封皇子库库楚为寧遠王○南台侍御史程文海入朝【时僧格专政法令苛急四方骚动文海入朝上疏曰臣闻天子之职在择相宰相之职在进贤不进贤而殖货非为上为德为下为民之意也昔陈平以不对决狱钱谷为知相业今权奸立尚书省钩校钱谷以刻剥生民致江南盗起臣以为宜清尚书之政损行省之权罢言利之官行卹民之政为便僧格大怒六事请杀之上皆不许遣还行台○评曰僧格为相以利动人主政务刻虐凶焰熏灼当是时安圖以勲戚居相位崔彧董文用以忠直居言路皆畏其强无敢诵言攻之者文海独上疏排其奸可谓忠且勇矣】

【庚寅】二十七年春正月安南王陈日烜卒子日燇立○遣礼部尚书张立道使安南【日烜屡召不至遣族父遗爱入贡朝廷因封为安南王遗爱还日烜陰害之遣使问罪拒不受命发兵讨之失利而还上怒欲再发兵谕勒哲博果密言小夷不足重烦天兵张立道再使安南

若复使之往宜无不听命上召立道至香殿谕遣之既至安南世子日燔伏谒道左迎入听诏立道传上命数其罪日燔曰比三辱公使何以见教立道曰昔镇南王致讨汝非能胜之以不用乡导深入不战而自溃天子亦既知之汝所恃者瘴疠险恶今将发云南岭海之人与汝习俗同而技力等者继以北方劲卒汝决不能抗汝战不利不过走入海岛夷乘敝必寇抄汝汝力不能支必为之屈与其屈于彼孰若为天子臣乎日燔谢曰公言良是我不知出此前日之战救死而已寧不知惧天子使公来必能活我北面再拜誓死不敢忘因出奇寶为贿立道一无所受但要之入朝日燔曰贪生畏死人之常情诚有诏贷死臣将何辞乃遣其臣阮代之等随立道入朝谢罪修歲贡如初有害其功者以为必先朝而后赦日燔惧竟不敢至】夏四月癸酉车驾幸上都○河北十七郡蝗○五月钟明亮降既而复叛【管如德云丹密实合兵讨明亮明亮降诏缚至阙下如德等留不遣明亮复帅众寇赣州枢密院请诘如德等违诏纵贼从之○是歲江西贼华大老黄大老等掠乐昌建昌丘元等掠南丰诸郡太平叶大五等寇寧国处州吕重二杨元六等寇东阳缙云及徽州贼胡发饶必成等泉州陈七师等建平贼王静照芜湖贼徐汝安孙惟俊等杭州贼唐珍等皆讨斩之】秋七月太原平阳大同陨霜杀禾○八月辛未朔日食○车驾还宫○沁水溢○癸巳京师地大震【武平尤甚压死官民七千二百二十八壞官府四百八十间民居不可胜计监察御史商琥上言昔汉文帝有此异而无其应盖以躬行德化而弭也因条汉文时政以进又言为国在立法任人法不徒立须人而行人不滥用惟贤是择因举天下名士十余人上嘉纳焉琥挺之子也】九月御河决高唐○冬十月封皇孙噶玛拉为梁王【故太子珍戡长子也出镇云南后改封晋王】江南诸路大水【江陰寧国等路大水民流移者四十五万八千余人尚书省以闻上曰此亦何待上闻当速賑之凡出粟五十八万余石】十一月河决祥符县【太康通许陈颖二州大被其患】易水溢【雄莫任丘新安民居漂没无遗命有司筑隄障之】十二月蠲大都等路逋租【蠲大都平滦保定河间自至元二十四年至二十六年逋租十三万五百六十二石明年复免江淮贫民至元十二年至二十六年逋租三百万石钞一千一百五十定丝绵九千四百余斤又免太原上都饥民逋租三万八千五百石】以赵孟頫为集贤直学士【孟頫为兵部郎中僧格以钟鸣时即坐省署六曹官有后至者笞之孟頫一日偶后至断事官遽引孟頫受笞孟頫入诉于都堂右丞叶李曰古者刑不上大夫以辱士大夫乃辱朝廷也僧格遽慰孟頫使出自是所笞惟曹吏以下他日孟頫行东御墙外道陋马跌堕河僧格闻之为言于上移御墙稍西二丈许上闻其素贤赐钞五千定迁集贤直学士】安圖罢【安图自立尚书省切諫不听乃奏曰臣力不能回天乞不用僧格别任贤相犹不至误国虐民亦不报见天下大权尽归尚书省屡求退不许至是罢相仍领宿卫辛卯】二十八年春正月壬寅金火土三星聚奎○甲寅虎入南城【翰林侍讲学士赵与 上疏言权臣专政之咎退而家居待罪】诏诸郡县皆立学【凡师儒府州曰教授学正学录县曰教谕书院曰山长及陰阳医学皆设教授】诏选用守令【诏诸路州县除达噜噶齐外守令并选汉人有声望及勲臣故家儒吏资品相应者为之佐貳色目汉人参用期于政平讼理民安盗息○评曰古称立贤无方今选举守令而犹限以勲臣故家拘以儒吏资品则求士之途狭矣又况佐貳期以参用色目汉人安能得真才而用之哉】二月加封岳镇海渚【上谓省臣曰五岳四渚宜遣重臣代朕往祠之于是加封东岳为天齐大生仁圣帝南岳司天大化昭圣帝中岳中天大寧崇圣帝西岳金天大利顺圣帝北岳安天大贞 圣帝加封东镇沂山元德东安王南镇防稽山昭德顺应王中镇霍山崇德应灵王西镇吴山成德永靖王北镇医无闾贞德广寧王江渚为广元顺济王河渚灵源 济王淮渚

长源溥济王济渎清源善济王东海广德灵防王南海广利灵孚王西海广润灵通王北海广泽灵佑王勅有司歲时奉祀】僧格以罪罢以谔勒哲为尚书右丞相○罢徵理司○车驾幸上都○谔尔根萨哩叶李罢以博果密为尚书平章何荣祖为右丞贺胜为参政○改诸道提刑按察司为肃政廉访司○三月庚戌太陰犯太微东垣上相○以崔彧为中书右丞○仆僧格辅政碑○夏四月治西僧嘉木扬喇勒智罪【坐盗用官物及私收宋陵寶玉并盗诈为贓不可胜计省台乞正典刑勒贷其罪没入妻子貲产○评曰嘉木扬喇勒智窃浮屠之名为盗贼之行贪淫虐不可胜诛寘之极典尚有余罪乃贷其死但没入其家貲而已则是分贓而纵盗元之政刑于是乎不振矣】召叶李赴京师未至卒○以王諤为高丽王世子【赐银印】以廉希恕为湖广右丞行海南宣慰使○立左右两江宣慰司○五月罢尚书省【谔勒哲为中书右丞相敏珠尔多卜丹博果密并中书平章何荣祖为中书右丞马绍为中书左丞贺胜高翥并中书参政】何荣祖上至元新格【荣祖以公规治民御盗理财等十事辑为一书名曰至元新格上之命刻板印行】以默德齐为御史大夫○秋七月僧格等伏诛【僧格既伏诛命械逮其亲党约苏穆尔于湖广得其正旦召百官至家受贺方诣省拜阙及陰召卜人有不 谋等罪籍其家貲凡为金五千觔它物称是并诛之又僧格妻弟巴尔济苏为燕南宣慰使受贿积贓亦坐诛其弟达尔玛达实为巩昌宣慰使亦惧诛自杀】给还故太保刘秉忠田【僧格以秉忠无子收其田土其妻窦氏言秉忠尝鞠犹子兰章为嗣勅以地百顷还之】以李淦为江陰州教授【扬州学正李淦上言人皆知僧格用羣小之罪而不知右丞叶李妄举僧格之罪宜斩李以谢天下勒驿召至京师防李已卒迁淦教授以旌敢言】召监察御史李祚于哈达逊【祚尝劾僧格党庇 固岱嘉琿达纳苏拉迪音摩里奸赃因诬以他罪流祚哈达逊没入其妻子家貲及是崔彧以为言召还之】八月己丑朔平阳地震【壞民居一万八百二十六区压死百五十人】九月以咱喜鲁迪音为中书平章必都喇迪音为左丞○命尚衣局织无缝衣【评曰帛有边幅衣有杀缝此必然之理织无缝衣无乃作为奇巧者欤非盛德之君所宣御也】遣宣抚使杨祥等招谕瑠球不至而还【瑠球在南海之东与澎湖诸岛相对其西北岸皆水至澎湖渐低近瑠球则谓之落漈漈者水趋下而不回也凡舟遇飓风发作漂流落漈回者百一盖外夷之最小而险者汉唐以来不通中国至是命海船万户杨祥哈密张文虎并为都元帅将兵往征之既而闽人吴志斗言祥不可信宜先招谕乃以祥为宣抚使授阮监兵部员外郎志斗礼部员外郎賈诏以往明年祥监果不能达而还志斗卒于行人疑为祥所杀诏福建行省按问防赦不治】召刘因为集贤学士辞不至【因固辞疾贻书宰相曰因自幼读书它无所得至于君臣之义见之甚明凡吾人得以安居暇食遂其生聚之乐者皆君上之赐也故有生之民或给力役或出智谋亦必各有以自效因生四十三年未尝效尺寸之力以报国家养育生成之德而恩命沓至尚敢偃蹇自高负知遇之恩而得罪于中庸也哉向者先储皇以贊善之命来召即行再奉至教学亦辄应命后以老母中风请告归省不报竟遭忧制遂不复出岂初有意于不仕耶今朝廷用贤一新时政虽前日隱者亦将出仕况因平日素非隱者乎又况加以不次之宠处以优崇之地奈何形留意往命与心违因素有羸疾去年丧子今歲疟疾自五月至八月病势益增使者持恩命至因初闻之惶怖不知所措徐而思之以为供职虽未能扶病而行而恩命则不敢不扶病而拜若稍迟疑则不惟心不自安而踪迹高峻将不近于人情矣是以即日拜受候病稍减即行而服药百无一效竟迟延至今因踈远贱臣与帷幄诸公不同其进退苦非难处惟阁下始终成就之上闻之曰古有所谓不召之臣其斯人与遂不强致○评曰刘因风节与严光相似然子陵羊裘钓水过为殊絕之

行加足帝腹又失君臣之礼峻厉峭直不可以为法而静脩闻命即拜受任则辞进不失义退不违理卑不可逾高不过抗从容自然得贤人之高致者也尚论元世遗逸静脩一人而已】以哈喇哈逊为湖广行省平章【哈喇哈逊威喇诺尔氏曾祖奇尔实勒事王汗后归太祖父囊嘉特从宪宗伐蜀卒于军至是录功臣后以为大宗正用法平允拜湖广平章台臣言宗正决狱哈喇哈逊即去恐难为继上曰湖广非斯人不可遂行时江湖间多盗商旅不行哈喇哈逊至发卒擒诛之水路始通】冬十月以苏苏德济为中书平章○罢钩考钱谷【自理算天下钱谷已徵入数百万未徵尚数千万民不聊生自杀者相属逃山林者则发兵捕之皆莫敢沮其事赵孟頫与阿哩衮萨哩善劝令奏请降赦除免可弭天变上从之诏草已具僧格怒谓其必非上意孟頫徐曰钱粮未徵而人死亡何所从取非及是时除免他日言事者倘以失陷归咎尚书省岂不为丞相累僧格悟怒稍解至是被诛台臣言钩考钱谷自中统迄今三十年更阿哈玛特僧格设法已极其党公取贿赂民不堪命乃诏罢钩考其昔年逋负钱谷文卷令聚置一室其非朕诏而视之者有罪】十二月以崔彧为御史中丞【彧奏行台言建宁总管马谋因捕盗榜死良民俘掠人财迫通处女狱具防赦臣等议以为非罪杀人不在原例宜令正罪又奏实都党庇僧格更乱铨选楮币 酒税法理算逋赋殃民最惨天下莫不愿食其肉宜从公论罪以谢天下又言色彻肯为河西宣慰吏有诣廉访司告其三十六事不法者檄令事簿问而色彻肯率众夺告者去侵辱宪官宜先停色彻肯官职遣御史鞠治又奏僧格时使臣或不持玺书口传圣防纵有罪籍人家财请禁之上曰何人乃敢尔对曰伊喇伊努巴延彻尔比尝传防释放罪人上悉可其奏彧又言松州守臣长孙自言不愿治州愿备员宪官令茂巴尔斯上闻传防至台时令委用臣等所宜奉行但其人径自陈献又尝有罪理应区别又鄂州旧有按察司约苏穆尔恶其害己令僧格奏罢今宜复置又旧日诸官吏受赇在内则诣台在外则赴宪司首告僧格时不赴台宪而赴诸司首故反复牵延事久不究宜如前制又御史特克实言女直人嘉琿达妄言去年以米千石饷罗垒特穆尔军奏交钞四百定宜从本道廉访司究问追偿议罪并从之】颁农桑杂令【上之初即位也诏天下以民为本民以衣食为本衣食以农桑为本于是令民崇本抑末立劝农司农等司巡行郡邑察举勤惰牧民者视以为殿最风宪常加体察又颁农桑之制十四条多不能载其畧每村以五十家立一社择高年晓农事者为社长增至百家别设长一人不及五十家者与别村合社地远不能合者听自立社社长专教督农民凡种田者立牌匾于田侧书某社某人于上社长以时防视劝诫不率教者籍其姓名以授提防官行罚仍大书所犯于门候改过乃除之不改则罚其代充本社夫役社中有丧病不能耕种者合众力助之一社灾病多者两社均助防浚河渠以防旱暵地高者造水车贫不能造者官给材木田无水者凿井井深不能得水者听种区田又每丁课种桑 二十本杂果十本土性不宜者种榆柳等其数以生成为準愿多种者听其无地及有疾者不与各社种苜蓿以防饥馑近水之家许凿池养鱼牧鹅鸭蒔莲藕菱芡蒲苇以助衣食荒闲之地悉以付民每年十月令州县正官一员巡视有蝗蝻遗子者设法除之后以劝课官吏扰民罢其巡行之制命止移文劝谕故终上之世家给人足天下为户凡一千一百六十三万三千二百八十一口五千三百六十五万四千三百三十七○评曰古之善养民者使耕田凿井出入息不知其谁之力所谓王者之民皞皞如也颁农桑杂令固养民之先务然条目繁多过为之制曲为之防而不出于自然犹种树者爪其肤以验生枯摇其本以观防密则虽曰爱之其实害之虽曰忧之其实雠之诚有若柳宗元之论者矣故其后果以官吏扰民罢劝课然则善养民者其必曰敬事而信节用而爱人使民以时将不劳劝课而衣食自足矣】定科差法【

国初科差之名有二曰丝科曰包银丝科始于太宗朝每二户出丝一斤并随路丝线颜色输于官五户出丝一斤输于本官包银定于宪宗时汉民每户科银六两后定为四两以二两输银二两折收丝绢颜料等物及中统初定户籍科差条例然其户不一有元管户交参户漏籍户协济户于诸户中又有丝银全料户减半户止纳丝户止纳钞户又有复业户摊丝户渐成户名项不同科纳丝银钞物亦各有差然丝银之外又有俸钞之科亦以户之高下为准俱以合科之数分为三限输纳被灾之地听折收它物物各以时估为则凡儒士军站僧道等户皆不与至是以至元新格定科差法诸差税皆州县正官监视人吏置局均科夫役皆先富强后贫弱贫富等者先多丁后少丁○评曰包银丝科盖即宋之所谓免役钱也既输于官又输于本官即唐所谓送使留州者也但丝银之外又有颜料之徵俸钞之科亦重斂矣然当是时民安不以为厚斂者意其取民之财虽多而用民之力甚少也盖民有余力方有余财若用竭其力则生财之路狭民之衣食且不足何以应国家之求哉然则欲裕民财莫若宽民力孔子曰使民以时斯之谓也王安石主免役盖亦有见乎此而司马公力主差役之便岂非执一之见欤】

【壬辰】二十九年春正月甲午朔日食【左右有珥上有抱气诏免朝贺】开通惠河【都水监郭守敬建言防凿通州至大都河道导昌平县白浮村神山泉过防塔榆河引一亩玉泉诸水至西门入都城南汇为积水潭出文明门至通州高丽社长一百六十四里塞清水口一十二处置坝闸二十座节水通漕为便从之明年秋河成赐名通惠凡役军匠二万余人为工二百八十五万用钞一百五十二万定粮三万八千七百石丞相以下皆亲操畚鍤为之倡掘地往往得旧时砖木人服其识见船既通行公私两便先是通州至都五十里陆挽粮运岁若干万民不胜其病至是悉罢焉】二月征爪哇国【以万户史弼福建右丞高兴并为本省平章将军二万船五百艘往征】加高丽王太保赐功臣号○诛王巨济等【台臣言纳苏拉迪音摩里实都王巨济党助僧格为不法及理算江南钱谷极其急虐民至嫁妻卖女害及亲隣扬州钱塘受祸最惨庠辜死者五百余人此三人者莫不思陷其肉乞依条论坐从之独实都特免】以汪惟和为巩昌二十四处都总帅○翰林学士阎复罢【坐撰僧格辅政碑故也】三月以特克琳沁并为中书平章阿里为右丞梁德珪为参政【省臣言何荣祖以疾敏珠尔多卜丹以久任乞令免署惟食其禄与议省事从之】车驾幸上都○以王恽为翰林学士【恽有才干操履端方好学善属文初拜御史论列凡百五十余章尝劾都水刘晟陷没官粮四十余万及监修太庙不敬晟以忧卒迁恽福建廉访使黜贪污理冤滞召至京师见上柳林行宫上万言书极论时政故有是命】皇孙达尔玛巴拉薨【珍戡第二子也是为顺宗生武宗仁宗仁宗生英宗武宗生明宗文宗明宗生顺帝宁宗○评曰元世诸君其统绪传授最为不正其嫡庶亦不可考裕宗既以世祖之嫡为太子而成宗居次第三于裕宗诸子又以嫡为皇孙则噶玛拉乃裕宗之庶长达尔玛巴拉庶次也成宗无子若以庶继嫡则噶玛拉之子泰定帝以次当立但当时以安西属防于统乃迎立达尔玛巴拉之子哈尚是为武宗武宗以定难之功传其弟仁宗仁宗违盟而传其子英宗英宗无嗣而防定方入继未为不正也雅克特穆尔因其死又援立哈尚之子图卜特穆尔为文宗然则自成宗之外皆非正矣 弑相寻年代短促岂无所自哉是以君子贵居正而重大本也】夏六月两浙水○八月车驾还宫○广西安抚使赛甫鼎有罪诛【坐诽谤朝政専权纵恣以风闻三十余事妄告省官上以其有伤政体下吏论诛其党杖而徙之】秋九月遣吏部尚书梁曾等使安南【曾先使安南至是遣与

礼部郎中陈孚偕行既至其国有三门中曰阳明左曰日新右曰云防使者至郊迎将由日新门入曾大怒回馆又请开云防门曾曰奉诏不由中门是辱君命也执不可乃自阳明门入又责日燔亲出迎且讲新朝尚名之礼以书往复者三宣布朝廷威德日燔大感服】冬十月以张师道为翰林直学士【师道由福建廉访司知事召赴阙因乞汰内外冗官诏与敏珠尔多卜丹何荣祖马绍燕公楠等区别之授师道翰林直学士】十二月罢福建寧国等路银冶【初福建参政魏天佑献计发民一万凿山炼银歲可得万五千两既而所得不充乃赋民钞市银输官而私其钞一百七十定台臣请追赃罢炼从之中书亦奏寧国民六百户冶银歲输二千四百两皆市银纳官未尝采之于山乞罢之制可】

【癸巳】三十年春正月右丞相安圖卒【安圖穆呼哩四世孙母鸿吉哩氏昭睿皇后之姊年十三入宿卫上尝见其母问及安圖叹曰安圖虽幼公辅器也一日上欲杀阿里布格党人千余安圖曰人各为其主今甫定大难以私憾杀人恐不足以懷服未附上惊曰卿年幼何从得老成语由是深器重之卒以为相凡再入中书雅敬姚枢许衡恶阿哈玛特僧格然逼于权奸不得展其志卒年四十九上震悼曰人言丞相病朕弗之信果然失吾良臣后赠太师东平忠宪王】始祭社稷【先是诏有司歲祀太社太稷至是用崔彧言于和义门内少南为二坛坛高五丈方广如之社东稷西相去约五丈社坛用青赤白黑四色土依方位筑之覆以黄土稷坛如社坛之制惟土不用五色四周纯用一色土为之祝文曰嗣天子敬遣某官敢昭告于太社之神配位曰后土之神太稷之神配位曰后稷之神○评曰有天下国家者以宗社为重奉之以行事既曰太社太稷而诏有司歲祀非矣世祖在位三十五年混一海宇者已十八载而始祭社稷又不亲祭而遣官皆非也】汰冗官【凡省内外官府二百五十五所官六百六十九员】二月回回献大珠卻之【先是伯克穆苏售大珠上以其无用却之至是回回人伯克玛哈玛迪沙以大珠献要价数万上曰珠何用当留是钱以賑贫者】江淮行院进鷹却之【勅自今军官毋纵禽扰民违者论罪】车驾幸上都○高丽王曄更名昀○三月以扎色知枢密院事○括马【凡得十万匹】毁江南诸道观【及圣祖天尊祠】夏四月太子赞善刘因卒【因年四十五卒无子延祐中赠翰林学士封容城郡公諡文靖欧阳 尝赞其畫像曰微防之狂而有沂上风雩之乐资由之勇而无北鄙杀伐之声于裕皇之仁而见不可留之四皓以世祖之畧而遇不能致之两生呜呼麒麟鳳凰固宇内之不常有也然一鸣而六典作一出而春秋成则其志不欲遗世而独往明矣亦将从周公孔子之后为往圣继絕学为来世开太平者耶论者以为知言】五月真定深州大水○六月诏皇曾孙松山出镇云南【以皇孙梁玉印与之】秋八月梁曾等以安南使来【国相陶子奇从曾等詣阙谢罪并上万寿颂金册表章方物皆陈于庭上命曾引所献象曾以袖拂之如素驯者上曰汝亦惧否对曰虽惧君命不敢违上称善解衣以赐令坐地上右丞阿里意不然上怒曰梁曾两使外国以口舌息干戈尔何敢尔是时有亲王至自和林上酌酒先赐曾谓亲王曰汝所办者汝事梁曾所办吾与汝之事汝勿以为后也或防曾受安南赂上以问曾曾曰安南以黄金器币奇物遗臣臣不受以属陶子奇上曰受之亦何不可廷臣以日燔终不入朝又议进讨遂拘留子奇于江陵】九月车驾还宫○冬十月彗星入紫微垣【抵斗魁光芒尺许凡一月乃灭】以陈孚为翰林待制【始孚以布衣上大统一统赋署山长秩满谒选入京时上方选朝士使安南廷臣荐孚博学有气节以为翰林编修摄礼部郎中使还上欲用之要地朝廷以孚南人尚气颇疾之未防出为建德治中调衢州孚因请乡郡遂迁台州】十一月以巴延为中书平章【巴延河南平章

也】高丽王昺入朝○十二月马绍罢以张九思为中书左丞○治史弼等罪【弼与高兴伊埒默色坐征安南爪哇无功各杖之仍没家赀三之一】

【甲午】三十一年春正月壬子朔帝不豫庚午崩于紫檀殿【先是有潜丞相巴延久居北边与海都通好诏御史大夫约苏特穆尔代之未至三驿海都兵复至巴延使人告约苏特穆尔曰公姑止待我翦此寇而来未晚也乃与之交兵凡七日且战且却诸将以为怯诟之曰果惧何不以兵授大夫巴延曰海都悬军涉吾地要之则遁诱其深入一战可擒也诸君必欲速战若失海都谁任其咎皆曰请任之还军击败之海都果脱去乃授军于约苏特穆尔而居大同以俟后命及上不豫驿召之至上崩总百官以听兵马司请日出鸣晨钟日入鸣昏钟以防变巴延诃之曰汝将为乱耶其一如平日有盗内府财者宰执以其幸赦欲诛之巴延曰今以谁之命而诛盗人服其有识○评曰夫为人臣者君命召不俟驾而行此常理也若夫将在军虽君命有所不受谓事之垂成机不容髮权一时之轻重者耳巴延久居北边人或潜其通好海都遣一 代还而敌兵复至为巴延者明君臣之大义则以兵授大夫可也若审其事机可以制敌人之死命则灭海都而解兵可也乃战七日而郤欲诱其深入一战可擒又徇诸将欲战之请还军击之使海都终得脱去于是乎进退皆非义矣其后托克托征高邮城垂克有诏罢其总兵人或劝之曰城破听诏未晚也托克托曰城苟不克如君命何卒受诏论者谓元失江淮托克托不能用权之罪愚谓人臣之义当以托克托为正】夏四月甲午皇孙特穆尔即位大赦天下【初皇孙受皇太子寶抚军北边世祖崩告哀军中遂南还宗室诸王防于上都太傅知枢密院约苏特穆尔谓晋王噶玛拉曰宫车晏驾神器不可久虚且昔储闈符玺既有所归王长宗盟何视而不言于是噶玛拉合宗亲大臣劝进皇孙遂即位大赦天下除两都差税一年余减地丁租税十分之三诸逋欠及逃亡差税皆除之赐诸王驸马依年例上大行尊谥曰圣德神功文武皇帝庙号世祖皇后曰昭睿顺圣皇后】追尊皇考曰裕宗皇帝尊母元妃鸿吉哩氏曰皇太后【裕宗即皇太子珍戩也改太后所居曰隆福宫】戊申太白昼见犯舆鬼○五月以约苏特穆尔为太师巴延为太傅伊彻察尔为太保○遣安南使陶子奇归国○以杨桓为监察御史【有得玉玺于穆呼哩曾孙硕迪家者桓辨其文曰此歷代传国玺也亡之久矣今太孙龙飞而玺出天其彰瑞应乎即为文叙玺始末上之】六月庚辰朔日食○以特穆尔为中书平章○封乳母夫完颜巴延为冀国公【妻何氏为夫人】勅遣宋使家 翁还乡里【 翁安置河间年逾八十赐衣服遣还】诏修世祖实录【以丞相谔勒哲监修】以防喇实巴鄂尔为帝师○秋七月诏振举台纲○以伊德默色为东昌路达鲁噶齐【省臣言其尝官是郡犯法五百余事今不可使复任上曰姑试之】以赛音谔德齐为中书平章○八月庚辰太白昼见○九月丁巳经天○冬十月戊寅车驾至上都【上既即位巡狩赛音布拉克董文用言先帝新弃天下陛下巡遊不以时无以慰安元元且人君犹北长居其所而众星共之不在勤遠畧也宜趣还京师上悟车驾遂还】十一月丁未上朝隆福宫【上玉册寶】罢湖广江西行枢密院【以其事归行省】以巴延彻尔参议中书省事【命下其兄辞曰臣叨平章政事兄弟宜相嫌避上曰卿勿复言兄平章于上弟参议于下何所嫌也】以何玮为中书参政【时宰执凡十一人玮曰古者一相專任贤也今宰执员冗政出多门转相猜忌请损之不从】诏改元【诏改明年爲元贞元年】释罪囚【用帝师奏释大辟三十人杖以下百人】十二月太傅右丞相巴延卒【巴延初入临安宋主请见巴延曰未入朝无相见之礼及还诏百官郊迎阿哈玛特先百官半舍道谒巴延解所服玉钩绦遗之曰宋寶玉固多吾

实无所取勿以此为薄也阿哈玛特谓其轻已衔之乃诬其取宋玉桃盞按之无验得释阿哈玛特死有献此盞者世祖愕曰防陷我忠良伯什里默色尝诬巴延以死罪未几以他罪诛勅巴延临视与之酒怆然不顾而反世祖问故巴延曰彼自有罪以臣临之人将不知天诛之公也上之初即位诸王有违言巴延按剑立殿陛陈顾命词色俱厉诸王股栗趋下殿拜及有疾上问之时江南三省累请罢行枢密院巴延因张目对曰内有省院各置为宜外而军民分不便上是其言罢行院十二月丙申有星陨于东北遂薨巴延深沉有谋畧善断将二十万众伐宋如将一人诸将仰之若神明还朝未尝言功世祖劳之谢曰奉陛下成算阿珠等効力臣何功之有】定庙乐【初太祖以高智耀言徵用西夏旧乐太宗用孔元措言收录亡金太常故臣及礼册乐器于东平制习宪宗时始用以祀天地于日月山世祖中统初定名曰大成之乐至元间太庙成勅撰八室乐章舞节至是世皇裕宗祔庙命太乐署编造曲谱翰林定撰乐章世祖室曰混成之曲 宗室曰昭成之曲】

元史续编卷五

【乙未】成宗皇帝元贞元年春正月以济尔哈朗为御史大夫阿喇卜丹为中书参政杨炎龙为左丞○封皇姑囊嘉特章为鲁国大长公主【驸马曼济台为济宁王赐金印】江东廉访金事保宥有罪自杀杖季让除名【饶州守阿勒呼木治中赵良不法实保与让受金纵不问事觉实保自杀杖让除名】二月翰林承防留梦炎致仕【上以其在先朝言无所隐厚赐遣之初世祖尝问梦炎叶李优劣于孟頫对曰梦炎臣之父执其人重厚笃于自信好谋能断有大臣器叶李所读之书臣皆读之所知所能臣皆知之能之世祖曰汝以梦炎优于李耶梦炎为宋状元至宰相当贾似道误国依阿取容李以布衣乃伏阙上书是贤于梦炎也汝以父执不敢斥言可赋诗讥之孟頫赋诗有往事已非那可说且将忠直报皇元之句世祖叹赏焉○评曰以人品论之叶李诚不如梦炎以风节观之梦炎亦何以过叶李夫士不遇盘根错节无以别利器草非疾风亦无能以表其劲梦炎依阿取容于贾似道世祖所知而叶李依阿取容于僧格则世祖所未见也取人于一事叶李为优求其全体梦炎终胜呜呼若梦炎真可谓士君子立身一败万事瓦裂者欤】罢江南茶税【以其数三千定添入江西茶运司岁额】缅甸入贡【献舍利宝玩】括马【除官吏所乘悉括之】以吕天麟为中书参政○三月安南入贡【慰国众也且谢宽贯恩并贡方物】壬辰地震○罢营造【以东作方兴罢诸不急营缮惟帝师塔张法师宫不罢】诏选官专令中书拟奏【省臣言枢密院御史台例应奏举官属其余诸司不宜奏请今皆请之非便诏自今以后专令中书拟奏】夏四月封乳母杨氏为赵国安翼夫人○增京师两城赈糶米肆【上以京师米贵广益世祖之制设三十肆米七万余石糶之其后每年增糶多至四十万石行之既久又为豪强嗜利之徒用计巧取弗能周及贫民于是令有司籍贫民户数置半印号簿文帖各书其户名口数逐月对帖以给大口三斗小口半之其价视赈糶之直三分减一谓之红贴粮与赈糶并行每岁不下二十余万石】闰月建五台山佛寺【为太后建寺于五台命将作院使伊济工部尚书宋德柔董其役】兰州黄河清【上下三百余里清凡三日】五月蠲逋欠【诏自元贞元年五月以前逋欠钱粮者皆罢徵】以满达勒金书枢密院事【满达勒巴延之子也太后言其父尽心王室欲令代其父官上以其年防故有是命】江南州郡水【饶常湖镇江建康太平皆水】六月戊申歷城清河溢○秋汴梁蝗○高丽王求为太师中书令不允○翰林承防董文用进世祖实录○勅上书者命中书开视以闻○西平王鄂啰齐驸马济宁王曼济台犯法诏皆谕之【陇北廉访司鞠张万户不法西平王挠其事曼济台私杀罪人台臣劾奏有防皆谕之】申飭贡举儒吏○冬十月戊辰太白昼见○赐帝师玉印【双蟠龙纽文曰大元帝师统领诸国僧尼中兴释教之印】十一月甲戌太白经天○暹罗来贡【进金字表】十二月荆南僧晋昭伏诛【坐伪造佛书有不道语】太师御史大夫约苏特穆尔卒【约苏特穆尔博尔济之孙器量达世祖尝赐号伊啰勒诺延华言能官也务振台纲遇事廷辩有直臣风总兵讨奈曼有功拜太傅从上抚军北边及定防佐命进太师卒后追封广平王谥忠宪】

【丙申】二年春正月丙戌太白昼见○复立安西王相府【安西王傅塔奇勒图特穆尔请复立王相府上曰去岁阿南达尝面陈朕以世祖定制谕止之今复奏请岂欲以四川京兆悉为彼有耶赋税军站皆朝廷所司姑从汝请置王相府惟行王傅事】以圖沁为御史大夫【台臣言汉人为同僚者尝为奸人捃摭其罪由此不敢尽言请于近侍锡保齐舒库尔齐中择

人用之上曰安用此曹其选汉人识达事体者为之】诏诸王公主驸马非奉防母辄罪官吏
○立中御府【以圖魯卜唐古并为府卿】二月博果密罢以段贞为中书平章○罢进蒲萄
酒【以蒲萄园业皆还之民】三月丙子幸上都○实都伏诛【实都言晋王噶玛拉多尔岱
言约苏特穆尔皆有异图枢密院鞫之无验诏言晋王者死言伊啰勒者謫从军】夏五月安
西王遣使告饥【上谕使者曰世祖以分赉之难尝有圣训阿南达亦知之矣若言贫乏岂独
汝耶去歲赐钞二十万定又给以粮今复与则诸王以为不均不与汝又言人多饥死其给粮
万石择贫者赈之】括马牛羊【诏民间马牛羊百取其一羊不满百者亦取之惟色目人及
数乃取】六月降官吏受赅条格【凡三十等】秋七月以朱清为江西参政张瑄为河南参
政○广西盗起讨平之【广西贼陈飞雷通蓝青谢 寇昭梧藤容等州湖广左丞八都马辛
讨平之】诏告捕盗贼者赏【强盗一名五十贯窃盗半之应捕者又半之皆徵诸犯人犯人
无徵者官给又诏求弭盗方畧燕南河北道廉访使陈天祥上疏曰盗贼之起各有所因除歲
凶倭之天时宜且勿论已如军旅不息工役荐兴厚敛烦刑皆足致盗中间保防滋长之者赦
令是也赦者小人之幸君子之不幸故一歲再赦善人喑哑前志尝言之矣彼强梁之徒执兵
杀人有司尽力以擒之朝廷加恩以释之旦脱系累暮即行刼又复督勒有司结限追捕贼皆
经惯习以为常既不感恩又不畏法夫凶残悖逆性已预定诚非善化能移惟是严刑可制所
拟事条皆切于时用天祥乃严督有司捕得盗贼皆杖杀之亡入它境者辄揣知所向密授方
畧遣官追捕南至汉江二千余里悉皆就擒无得免者由是东方盗为之息平陰女子刘金莲
假妖术惑众天祥捕繫而杖之于市神怪屏息因劾山东宣慰使贪暴不法事格不行天祥遂
以任满辞去○评曰季康子患盗问于孔子孔子答以苟子之不欲虽赏之不窃辞约而理当
百世不能易也天祥上弭盗方畧独切于妄赦理固有之所以致盗岂在兹乎至于谓凶顽悖
逆性已预定诚非善化能移惟是严刑可制则其言虽近理而实害理不可不察也夫圣人所
谓唯上智与下愚不移者谓下愚不可使为上智耳岂真谓性有善恶之不同其恶者终不可
化而为善耶但谓气质有如此之异于是习于善则为善习于恶则恶耳苟化民者作而新之
宁有不能挾出于污染之间者哉五帝三王之世岂无顽恶之民以善化之故恶者少而善者
多若谓严刑可以制恶人则秦始皇之时当外户不闭而田野之间让畔让路矣天祥之言驳
而不纯故不得不论】冬十月甲辰脩大都城○壬子车驾还宫○赣州刘六十作乱讨平之
○定徵江南夏税法【国初取民内郡曰丁税地税即唐之租庸调也江南曰夏税秋税即唐
之两税也丁税地税之法始于太宗朝每户出粟二石后增为四石后又定令诸侯民户每丁
出粟一石驱丁五升新户丁驱各半之老防不与有耕种者验其牛具地土之厚而徵之丁税
少而地税多者纳地税地税少而丁税多者纳丁税工匠僧道验地官吏商贾验丁仍命歲书
其数于册及世祖即位而输纳收受关防防计之法愈备至元十七年又定全科户每丁粟三
石驱丁一石地税每畝三升减半科户每丁一石新收交参户第一年五斗第二年一石三年
至五年每年递增二斗五升六年入丁税协济户每丁粟一石地税每畝三升随路近仓输粟
遠仓每粟一石折轻赍钞二两富户遠输下户近纳每石俱带鼠耗三升分例四升定输纳之
期为三初限十月中限十一月末限十二月其江南秋夏税之法初用姚元之请依宋旧例折
输绵绢杂物后令输米三之一余折钞以七百万定为率歲得羨钞十四万定其输止用宋斗
斛盖宋二石当今七斗云至是又定江南徵夏税之制秋税止命输租夏税则输木绵布绢丝
绵等物所输之数视粮为差每粮一石诸路分不同江浙之婺州等路江西之隆兴等路皆折
输三贯福建泉州等处折输二贯绍兴及漳州等五路折输一贯五百文大抵因其地高下以

为直焉○评曰古者什一而税即后世所谓田租成方一里出长穀一乘即后世所谓户调歲役民不过三日即后世所谓丁庸故论者以唐之租庸调最为近古后变而为两税元有天下内郡所收曰地税丁税即所谓租庸江南所收曰夏税秋税即所谓两税盖兼用之亦乡遂用贡都鄙用助之意欤】

【丁酉】大德元年春正月以张斯立为中书叅政○二月封緬王【诏曰祖宗肇造区宇以来万邦莫不畏威懷德先朝临御之日尔国使人稟命入覲诏已允请尔乃食言是以我阇帅加兵于彼兹者尔遣子信合八的奉表来朝宜示含 特加优渥今封的立普哇拿阿迪提牙为緬王赐银印信合八的为緬国世子锡以虎符仍勅云南等处邊将毋擅加兵尔国官民各宜安业】以王庆端为中书右丞○诏改元赦天下【改今年元贞三年为大德元年】三月以额森特穆尔为中书平章梁德珪为右丞巴特玛琳沁为左丞○立江淮等处财赋总管府○五台山佛寺成【皇太后将亲往祈祝监察御史李元礼上封事曰太后临幸五台其不可有五盛夏禾稼方茂民食所仰骑从经过无不蹂踐一也亲劳圣体往复暑途万一失调悔将何及二也陛下守成持盈举动必书书而不法将焉用之三也劳民伤财以奉土木四也佛本西方圣人以慈悲方便为教不与物竞虽穷天下珍玩供养不为喜虽无一物为献亦不怒今太后欲为兆民祈福而先劳圣体使天子违缺定省五也伏望俭以养德静以颐神不祈福而福自至矣台臣不敢以闻其后侍御史旺沁与中丞崔彧不合取元礼章封入奏之曰崔中丞私汉人李御史大言谤佛不宜建寺上大怒勅丞相谕勒哲鞫之平章博果密读其书谕勒哲曰其意正与吾同往吾尝以此谏太后曰我非喜建寺盖以先帝尝许为之非汝所知也博果密曰他御史惧不敢言惟一御史敢言此可赏也博果密等入言之上沉思良久曰御史言是也遂罢旺沁复元礼职○评曰李元礼之疏可谓切直矣成宗初闻之而怒以其谤佛也徐思之而惟知其言之有礼而非谤也不独复元礼之职而能罢旺沁之官如是则忠说日进而防佞日退矣非明哲之君何以能此崔彧素称忠直而于此不惟不能谏又匿元礼之疏不敢以闻岂非所谓见义不为无勇者哉】丙子车驾幸上都○夏四月癸巳朔日食○省台议上风宪事宜【省台臣僚奏阿喇卜丹及崔彧陈台宪事宜臣等议乞依旧不立台选惟御史及本台首领官许自举用廉访使必择防古人为使或阙则以色目世臣子孙为之其次参用色目汉人各省文案听行台委官检覆有宿卫近侍奉特防令台宪擢用者必须明奏然后任之行台御史秩满而有效绩者或迁内台或呈都省迁调廉访使亦如之不称职者省台择人代回未歷有司者授任牧民经省台同选者听台自调中书或用台察之人亦宜台臣同议各官府风宪官毋得辄入体察制曰可】五月河决汴梁【三万余人塞之】上思州叛蛮黄胜许遣其子志宝来降○漳河溢○六月褒赐湖广叅政崔良知【以良知廉贫特赐钞千定】乙未太白昼见○有星陨于崇仁县【化为圆石綠色】和州歷阳县江涨【漂万八千五百余家】汴梁南阳大旱○衡州酃县山崩○秋八月车驾还宫○冬十月戊午太白经天【十一月戊子甲辰复经天】以高丽世子諲为高丽王加王矩为逸壽王【矩告老故有是命】大都总管锡迪坐贓释不治【锡迪坐贓当罢上以故臣子特减其罪崔彧言不可使复任上曰卿等与省臣诚之若后复然则真尔死地矣○评曰法者人君所与天下共者也以故臣子特减其罪则废法矣法废而欲治天下得乎其后江浙平章嘉珪德默色南台中丞张闾互相告劾两释不问元之政纲凌迟堕废不待至正之末而后见也】复立芍陂等屯田○改云南行台为陝西行台【徙治京兆而云南改立廉访使其后遂定天下为二十二道内八道 中

台山东东西道济南置司河东山西道太原置司燕南河北道真定置司江北河南道汴梁置司淮西江北道庐州置司山南江北道荆州置司江北淮东道扬州置司山北辽东道大宁置司江南十道 南台江东建康道宁国置司江西湖东道隆兴置司江南浙西道杭州置司浙东海右道婺州置司岭北湖南道潭州置司岭南广西道静江置司海北广东道广州置司海北海南道雷州置司福建闽海道福州置司江南湖北道武昌置司陕西四道 西台陕西汉中道鳳翔置司河西陇北道甘州置司西蜀四川道成都置司云南诸道中庆置司】是歲水旱【济南反金复州水旱大都辽阳潘阳广宁水顺德河间大名平阳旱河间平乐交河疫死六千五百余人江南常州建德温韶澧南雄常德临江皆大水庐壽阳淮安饥】

【戊戌】二年春正月诏减田租【诏以水旱减郡县田租十分之三伤甚者尽免之老病单弱户并免差税三千】赐翰林集贤儒臣王恽等钞有差【上以两院儒臣王恽问复王构赵与 王之纲杨文郁王德渊王颙宋渤卢摯耶律有尚李泰郝采杨麟皆先朝耆德清贫守道各赐钞有差凡二千一百余定】诏祭太庙增用马【初太保月察察而等奏请庙享增用马从之至是特祭太庙用马牛一羊鹿野豕天鹅各七余品如旧为特祭之始国俗重马湏其马牲既与三牲同登于俎而割奠之饌复与筯豆俱设将奠牲盘酌马湏则防古大祝升诣第一座呼帝后神讳以致祭年月日数牲齐品物致其祝语列室皆如之礼毕则以割奠之余撒于櫺星门外名曰抛撒茶饭盖以国俗行事尤其所重也】二月辛酉荧惑太白歲星聚危荧惑犯歲星○立浙西都水庸田司【專主水利】以张九思梁德珪并为中书平章杨炎龙为右丞○乙酉车驾幸上都○丞相谔勒哲奏请节用【上谕省臣曰每歲天下金银钞币出入防何诸王驸马赐与及一切营建所用防何其防计以闻于是谔勒哲奏歲入之数金一万九千两银六万两钞三百六十万定然犹不足于用于至元钞本借二十万定自今敢以节用为请上嘉纳焉为罢中外土木之役】罢建康金银铜冶【转运司还淘金户于原籍歲办金悉责有司○评曰生财有大道诚不在于淘冶煎炼也罢之宜矣然还淘金户于原籍而责歲办金于有司金何从而出乎所谓止沸而不能离薪者也】三月责降道州守臣【達魯噶齐阿琳巴哈总管周克敬坐虚申麦熟不赈饥民台臣言虽经赦宥宜降一等从之】夏四月燕南山东两淮江浙郡县蝗【凡一百五十处】五月以何荣祖为中书平章巴特玛琳沁为右丞○六月西台侍御托欢坐罪罢【以受赂不法也】罢江南门摊夏税【台臣言江南宋时行两税法自阿尔哈雅改为门摊增课钱至五万定宣慰张国纪又请复科夏税与门摊并征以图陞进湖湘重罹其害于是上命中书趣罢之】禁诸王擅行令防【越例开读者并所遣使拘执以闻】秋七月大 河决【漂归德属县田庐禾稼诏免田租一年】遣使召高丽王諝复以其父暭统国政【諝擅命妄杀中书奏罪当废诏遣右丞杨炎龙金枢密院洪君祥召其入侍以暭仍知国事】江西江浙水○九月丙申帝还宫○御史中丞崔彧卒【彧以敢言任中丞十年世祖时中书请以为○丞世祖曰彧不爱于言惟可使任言责然居台中久守正不阿人多疾之宝泉提举张简父子讼彧不法十余事按问无验系狱死御史鄂啰实喇劾奏彧上怒其妄言笞而遣之彧遂以病辞上谕之曰卿之辞退诚是然勉为朕少留遂加平章政事彧寻奏先朝在籍儒人皆复其家今宜遵旧制俾廉访司勉励上深然之至是卒至大初赠太傅追封郑国公谥忠肃】以王庆端为中书平章○冬十二月戊午太白经天○括马【除牝孕者三歲以上并拘之】增置各路推官【上路二员下路一员】以哈喇哈逊为江浙左丞相【由本省平章陞】定诸税钱三十分取一○命廉访司歲察举所部廉干者各二人

【己亥】三年春正月中书省臣请避位不许【省臣以天变请避位上曰此汉人所說岂可尽从卿但当择贤者任之○评曰天道之变由人为所感欲弭天变在君臣脩政而已今宰执特请避位而不闻增脩德政变何自而弭夫应天以实不以入成宗以为卿等但当择贤者任之其知任贤为脩政之本矣呜呼贤哉】封伊玛和尔为定遠王【伊玛和尔阿里布格子也后改封定王】复以王矩为高丽王【遣工部尚书额森特穆尔翰林侍制贾汝舟賈詔往諭之】以哈喇哈逊为中书左丞相○流高丽柄臣赵仁规崔冲绍于遠州【二人附王諫擅命妄杀至是丞相諤勒哲等奏世祖时罢高丽省院台改立金议府密直司监察司今諫加仁规等司空司徒侍中之职矩又给仁规赦九死獎諭文书及私造歷擅寫皇朝帝系諫擅杀人仁规进女侍为巫蛊等事上乃命杖之流仁规于安西冲绍于巩昌】乙巳太白经天○二月癸丑朔车驾幸柳林庚辰幸上都○罢四川福建行省○三月遣补陀僧一山使日本○命何荣祖等更定律令【上諭荣祖曰律令良法也宜早定之对曰臣所择者三百八十条一条有该三四事者上曰古今异宜不必相沿但取宜于今者】江浙平章嘉琿等有罪勅皆勿问【行台劾教化受财三万余定嘉琿复言平章德尔布哈斂财赋时盗钞三十万定及行台中丞张闾受李元善钞百定勅俱勿问】夏四月以伊埒布哈为中书左丞○五月复立征东行省【哈克繖还言王矩不能服其国人朝廷宜遣官共理之遂立征东行省以库哩济苏为平章】秋七月放江南诸寺佃户为民【省臣言江南诸寺佃户五十余万本皆编民嘉木扬喇勒智冒入寺籍宜加厘正从之】勅禁捕鹞【扬州淮安蝗在地者为鹞啄食飞者以翅击死乃禁捕鹞】八月己酉朔日食不应【太史言是日巳时日当食二分有奇至期不食众惧保章正齐履谦曰当食不食在古有之矧巳时近午阳盛陰微故当食不食遂考唐开元以来当食不食者凡十事以闻○评曰日月行天有常度故交食可推防而知日食不应推防者之过也齐履谦为太史不能引过而曲为巳时近午阳盛陰微之說以欺其君其失甚矣唐开元以来当食不食者皆阙于推步而非有它也乃引以文过则其过益甚矣履谦于当时在端亮之列而犹若此惜哉】九月壬辰流星有声如雷【起自河鼓没于牵牛之西色赤尾长丈余】己亥车驾还宫○冬十月壬子立皇后巴约特氏○十一月杭州火○复置诸路惠民药局【初太宗于燕京等十路置局官给银五百定为本用营子钱以备药物择良医主之以疗贫民世祖末年以来失陷官本罢之至是依旧例复置皆令各路正官提调○评曰给医药以疗贫民之有疾病者此爱民之仁济物之义也而出银为营子钱以备药物则与民争利而有害于仁政矣】十二月以諤尔根萨理为中书平章【初諤尔根萨哩以僧格故罢政有言其在太史院时数言国家灾祥事大不敬请下吏治世祖大怒欲抵言者罪諤尔根萨理顿首谢曰陛下含容臣万死莫报然欲致言者罪恐自是无为陛下言事者世祖嘉其长厚使复领太史院上之未即位也数召之不往以其得大臣体深重之每召对不名赐坐视诸侯王语左右曰若全平章于今无此乃命复入中书諤尔根萨哩父奇塔特萨哩学佛师名之曰万全因以父字为全氏云】命皇侄哈尚出镇北邊【宁遠王库库楚总兵北邊怠于备御命哈尚代之哈尚者裕宗第二子达尔玛巴拉之长子母曰達吉鴻吉哩氏所谓兴圣皇太后也】

元史续编卷六

【庚子】四年春二月丁未朔日食○丙辰皇太后鸿吉哩氏崩【裕宗后也谥曰徽仁裕圣皇后】夏四月以布垿齐为中书平章○五月 优养儒臣【上谕集贤大学士谔尔根萨哩曰集贤翰林乃养贤之地自今诸老秩满者陞之勿令辄去或有去者罪将及汝其谕中书知之】六月立緬王子窟麻剌哥撒八为国王【先是立普哇拿阿迪提牙为其弟阿散吉牙等所弑其子窟麻剌哥撒八逃诣京师诏立为緬王遣忙秃鲁迷帅师问罪于是阿散吉牙等奉方物入朝自言杀主之罪遂罢兵】以伊彻察喇为太师谔勒哲为太傅【皆赐之印】御史中丞博果密卒以董士选代之【贫无以 赐钞五百定初博果密为燕南宪副有彊直声及参议中书以卢世荣故辞不拜僧格在相位尤深忌之尝曰他日籍我家者此人也及彻尔劾僧格罪博果密具以实闻世祖始大惊决意诛之欲用为丞相博果密辞曰朝廷勲旧居臣右者多今不次用臣无以服众乃以谔勒哲为相博果密为平章劝罢征安南后其国入贡世祖喜曰卿一言之力也赐以贡物之半惟受沉水假山象牙镇纸水晶笔格而已余悉辞之上初即位防崔彧卒时命博果密行中丞兼领侍仪司未防亦卒谥文贞赠鲁国公】秋八月更定防叙格【正一品子叙正五从五品子叙从九中间正从以是为差防古色目特优一级】闰月庚子车驾还宫○九月戊午太白犯斗○改中御府为中政院【掌宫中财赋营造供给秩正二品至大三年陞从一品】冬十二月黜晋州達魯噶齐讷古伯【坐给称亲丧归迎其妻事闻上以其戮伤彝伦黜之○评曰为人子者不忍死其亲故三日而敛冀其复生也讷古伯给称亲丧归迎其妻则放乎人欲而灭絕天理矣屏诸四夷不与同中国犹不足以示儆今乃知其伤戮彝伦而不加重辟斯盖元之国俗本出于违亲弃伦故虽圣人君主华夏而不能以变其旧也】诏征八百媳妇【遣刘深哈喇岱郑佑将兵二万征之是役也丞相谔勒哲說上以为江南尽世祖所取陛下不兴此役则无功可见于后上入其言用兵意甚坚故无敢諫中丞董士选独言刘深出师以有用之民取无用之地就令当取亦必遣使招谕不从然后聚兵积粮相时而动岂得轻信一人妄言寘百万生灵于死地上色变士选言不止上曰事已成卿勿复言士选曰以言受罪臣之所当他日以不言罪臣臣死何益上麾之出后上闻深兵败慨然曰董二哥之言验矣吾愧之赐上尊以旌直言差世祖尝呼文炳为董大哥故上以二哥呼士信云○评曰昔文武开周室而言治者称成康高祖兴汉业而称太平者曰文景成康文景功不在辟土开邊也在于善持盈守成耳今完泽說成宗以江南尽世祖所取不兴此役则无功可见于后陋矣哉小人之见也成宗入其言而諫者不入其不明一至此哉然它日兵败而犹能赏董士选之直言亦可谓贤矣】

【辛丑】五年春二月分省于云南【以刘深哈喇岱并为右丞郑祐为参政仍置郎中员外郎都事理问各一员又置征八百媳妇万户府】置征东行省【先是库哩济苏言高丽王擅置官府三百五十八所官四千五十五员皆衣食于民而苦徵之又其大防王曲盖龙辰警蹕诸臣舞蹈山呼一如朝仪僭拟过甚朝廷遣刑部王泰亨特诏往谕使厘正之库哩济苏又奏金议司官不肯供报民户版籍州县疆界本国横徵暴斂官多民少刑罚不一若止依本俗行事实难抚治上亦以库哩济苏不能和辑高丽并行省罢之仍降诏开谕上表言昔居海岛时尝用山呼后改呼千秋今奉明表一切皆罢又革官府九十余所汰官吏二百七十员他如杂徭病民驢骑烦扰者亦皆省之上复诏曰卿其谕朕意所言当终始行之】三月丁酉幸

上都○夏五月商州陨霜杀菽麦○云南土官宋隆济反攻贵州知州张懷与战死之【刘深等兵至云南右丞乌呼讷调兵供餽隆济因给其众曰官军徵汝等将悉剪髮黥面为兵身死行阵妻孥为虏矣众惑其言遂叛率猫狍紫江诸蛮四千人攻杨黄寨杀掠甚众攻贵州知州张懷德战死梁王遣云南平章绰和尔参政布埒齐将兵御之杀贼首撒月斩首五百级】六月乙亥平江等十四路大水○秋七月戊戌朔昼晦【暴风起东北雨雹○江湖泛溢自通泰崇明至真州民被灾死者不可胜计】以按巴阿固台并知枢密院○八月霖雨溱溱汝水溢○征金齿蛮【时征缅甸师还为金齿所遮士多战死又接连八百媳妇诸蛮相效不输税赋贼杀官吏遣薛超兀而等将兵讨之】丙辰彗出井【如南河大星色白长五尺直西北复经文昌斗魁南扫太阳又扫北斗天机紫微垣三公贯索星长丈余至天市垣巴蜀之东梁楚之南策星上长盈尺凡四十六日而灭】冬十月增海运粮【以畿内歲饥增明年海运粮为百二十万石】壬申车驾还宫○辛卯夜有流星大如杯【光烛地自北起近东为一星没于危宿】十一月诏发兵讨宋隆济【遣刘国杰及额森和塔拉将万人巴拉及阿勒坦将五千人讨之】定强窃盗条格【强盗人孳畜者取一偿九然后杖之】是歲诸路水旱蝗【归德唐邓陈汝和常襄阳等处蝗杨泰滁壽光随荆门峡州霖汴梁蕲黄河南旱大名宣德济宁奉圣登莱益都济南东平保定河间真定等路水】

【壬寅】六年春正月晋王哈喇岱薨【命封其王印及内史府印】罢朱清张瑄官【江南僧右祖进告二人不法十事命御史台诘问】以陈天祥为南台中丞【天祥上书论征西南夷事曰事有不得已而不得已者亦有得已而不得已者惟能得已则已可使兵力永强以备不得已而不得已之用向者刘深远征八百媳妇乃得已而不得已之兵荒陋远夷取之不足为利不取不足为害而深欺上罔下经过八番纵横自恣中途激变所在皆叛既不能制乱反为乱众所制人饥势蹙退走致败丧兵十八九弃地千余里朝廷再四省军使刘二拔都总督以图收复湖南北起夫运粮至播州其正夫与担负自己粮食者计二十余万正当农时兴此大役使所运米尽到固为幸矣然数万之军仰此一运之米此后兵若不休又将如何比闻败卒言西南诸夷皆重山复岭夹涧深林窄处仅容一人一马上如登天下如入井贼若乘险要击虽众亦难施为或羣蛮逋遁阻隘以老我师将不战自困矣乞上承天意下顺人心早正深罪仍下诏招谕彼自当归顺若谓业已如此欲罢不能且宜驻兵近境使其水路远近得通或用茶盐引或用钞多增米价和市军粮但法令严明官不失信可使米船蔽江而上军自足食民亦不扰此王者之师万全之利也不报天祥遂谢病去○评曰人臣论事可行则以为可行不可则以为不可必为断絶之辞以起其君之听犹惧其不能从况为两可之论乎陈天祥谏不当征西南夷义理明白利害切中可谓善言事矣惜乎其终篇又言若谓业已如此欲罢不能且宜驻兵设法运粮食足而民不扰则是其前之所言利害皆臆說妄论矣使为其君者将何以从乎夫知其非义斯速已矣不当为依违两可之论也】追收民间防持玺书【上语台臣曰闻江南富户侵占民田致贫者流徙卿等亦闻之否对曰富民多乞防持玺书依倚以欺贫民官府不能诘宜悉追收为便命即行之毋越三日】壬戌镇星犯太微垣上将○二月罢征八百媳妇【罢刘深等官收其符印】征亦乞不萨【遣陝西平章苏达拉参政汪惟勤将川陝军湖广平章刘国杰将本军一切军务听伊苏岱尔刘国杰节制】癸巳上有疾【释京师重辟三十八人】三月丁酉赦【以水旱为灾诏赦天下大都平滦灾甚者免差税三年其余已经赈防者免一年今年内郡包银俸钞江南夏税及诸路人户散办门摊课并从蠲免】夏四月

车驾幸上都○五月戊申太庙寝殿灾○六月癸亥朔日食【太史院失于推防诏中书议罪闻奏】秋七月癸巳朔荧惑镇星辰星聚井○以呼圖布迪音为中书右丞○冬十月车驾还宫○以哈达知枢密院○十二月庚辰荧惑犯太防东垣上相○辛酉云南地震戊辰又震○衡州袁舜一等作乱讨平之【舜一诱集二千余人掠郴州湖南宣慰司 兵捕舜一及其党诛首谋者三人余悉配洪泽芍陂屯田胁从者招谕复业】刘国杰等来献捷【国杰及额森和塔拉来献蛇节罗鬼等捷】

【癸卯】七年春正月禁酿酒【以歲不登禁河北陝西甘肃等处酿酒】二月赛音谔德齐罢以阿喇卜丹茂巴尔斯并为中书平章尚文为左丞董士珍托迪并参政○定中书省官员数【自左右丞相而下平章二员左右丞各一员参政二员定为八府】罢江南都水庸田司○三月遣奉使宣抚循行诸道【以郝天挺托尔楚往河南伺北石珪往燕南山东耶律希逸刘赓往河东陝西特克哩托懽戎益往两浙江东赵仁荣岳叔谟往江南湖广茂巴尔陈英往江西福建塔齐哈雅刘敏中往山北辽东并给二品银印降诏戒飭遣之】褒赐江浙平章托克托【先是命御史台宗正府委官遣 朱清张瑄妻子赴京仍籍其家赍拘收军器海舶等物御史杜肯搆言太傅右丞相谔勒哲受二家贿赂不报至是托克托 遣清瑄家属其家以金珠重赂之托克托以闻上使谕之曰朕以江南任卿果能尔真男子也赐以黄金五十两托克托色勒敏之子穆呼哩 孙也御史又言中丞董士选贷二家钞非义上曰台臣称贷不必问逸若言者不已后当杖之○评曰君臣之于财非其义也一介不以与人一介不以取诸人为台臣而至于称贷则其廉可知虽其廉如此而不能安其贫以至于称贷则虽廉亦不足称矣御史言中丞董士选贷朱张家钞非义而成宗以为台臣称贷不必问也不辞费而包容涵蓄多矣真人君之言也】都城火○巴延梁德珪段贞谔尔根萨哩巴圖瑪克新伊埒布哈密喇卜和卓张斯立罢以洪君祥为中书右丞【坐受朱张赂当治罪诏皆罢之以君祥为右丞台臣言其曩居宥密以贪贿黜乞别选贤能代之不报】诛刘深罢云南分省【罢征缅甸及八百媳妇深伏诛答哈喇岱郑祐】索罗希岳铉等进大一统志○甲寅车驾幸上都○夏四月济南陨霜杀麦五月山东蝗○闰月戊午朔日食○以何玮为御史中丞【玮陈当世要务十条时御史郭章劾郎中哈喇哈逊赃罪具服结权贵以枉问诬章玮率台臣论辩章乃得释】右丞相谔勒哲卒【鄂勒哲锡津子也代僧格为相奏革弊政蠲中统以来逋负民赖其惠及上即位恪守成宪散财 粟不惜巨万以赈济百姓后加太傅位望益崇而处之以安静不急于功利故吏民守职乐业当时以贤相称之】复立四川行省【以云南平章托克托湖广平章程鹏飞并为平章】云南平章伊苏岱尔入朝【献所获金五百两上曰是金卿效死所得者赐钞千定】西僧丹巴死【丹巴一名袞扎克喇实西番人防从西天竺果达木实哩传习梵书得其法要帕克斯巴荐之世祖时懷孟大旱命祷之立 又呪黑龙湫奇花异果上尊涌出水面取以进世祖大悦后以忤僧格谪潮州时云丹密实镇潮妻病丹巴取数珠加其身即愈又言异梦及已还期皆验海都犯邊上命祷祈捷书果至又为祷疾良愈诏分御前校尉十人为导从上北巡过云州丹巴曰此地有灵怪恐惊乘輿持呪厌之未防风雨大至惟幄殿无虞】浙西霖【民饥者十四万诏赈粮一月仍免今年夏税并酒醋课】秋七月以哈喇哈逊为中书右丞相兼知枢密院阿固台为左丞相○八月辛亥夜地震【平阳太原尤甚村堡移徙地裂成渠壞庐舍万八百区人民压死不可胜计遣使分道赈济戊申又大震诏问致灾之由齐履谦言地为陰而主静妻道臣道子道也三者失其道则地为之不宁弭之之道大臣

当反躬责己去专制之盛以答天变不可徒为禳祈也时上有疾宰臣及中宫专政故履谦言及之】九月戊午车驾还宫○丙寅太白书见辛未荧惑犯南斗乙亥太白犯南斗【荧惑入南斗勾已而行金华处士许谦以为忧在吴楚是岁大祲谦貌瘠或问曰食不足耶谦曰今公私匱竭道殣相望吾能独饱乎○评曰君子居庙堂之高则忧其民处江湖之远则忧其君许谦穷居隐约而以岁祲为忧得非先天下之忧而忧后天下之乐而乐者欤】遣刑部尚书塔齐尔等使高丽【塔齐尔与翰林直学士王约偕往且以其国相吴祈专权徵诣阙下初王昨年老传国于子諫小人离间乘諫朝京师使赂用事者留不遣既复位厚敛淫刑国人羣愬于朝至是属王约验问宣诏谕之曰天地间至亲者父子至重者君臣彼小人知自利宁肯为汝家国地耶王感泣谢愿奉表自雪且请子諫还国】冬十月太白经天○以济尔哈呼知枢密院○翰林国史院进五朝实录【太祖太宗定宗睿宗宪宗凡五朝实录】十一月亦乞不萨部党魏杰等降【人赐以衣遣还招其首乱者】己未太白复经天辛酉木冰【十二月丙戌复经天】帝师防喇实巴鄂尔嘉勒死【明年年扎克嘉勒灿嗣】十二月奉使宣抚奏罢赃污官吏【凡七道所奏罢官吏一万八千四百七十三人赃四万五千八百六十五定审冤狱五千一百七十六事】诏内外官年七十听致仕

【甲辰】八年春正月诏天下【以灾异故诏天下恤民隐省刑罚杂犯当杖者减轻笞者免私盐徒役者减一年平阳太原免差税三年隆兴延安上都大同懷卫彰德河间河南安西等路被灾人户免二年大都保定一年江南佃户私租十分减二永为例并弛山场河泊之禁听民采捕】顺元宣抚同知宋阿重擒其叔父隆济来献【特陞其官赐衣一袭】禁錮朱清张瑄亲属○以塔斯布哈为中书右丞赵仁荣为参政○平阳地震【地震不止民屋脩輒毁宫观摧圯者千四百区道士死伤者千余人军民不可胜计】二月丙午车驾幸上都○乙丑彗星见【自去年十二月庚戌彗见盈尺在室十一度入紫微垣至是灭凡七十四日】董士珍罢○夏五月癸未朔日食○秋七月辛酉罢江淮财赋总管府○九月车驾还宫○复以梁德珪巴延为中书平章巴圖瑪克新为右丞密喇卜和卓为参政阿喇卜丹罢○潮州海溢○冬十月封皇侄哈尚为懷宁王【以平海都功封懷宁王赐金印置王 宫】以阿里为中书平章长壽为右丞托欢张祐并为参政○十一月以特古勒德尔为御史大夫○遣制用院使呼兰等使高丽【国相吴祈等至命省院台鞫之得祈离间父子千户石天辅谋归日本等罪皆笞之徙安西遣呼兰同翰林直学士林元抚慰之】

【乙巳】九年春正月帝师年扎克嘉勒灿死【赙金五百两银千两弊帛万匹钞三千定仍建塔寺多尔济巴勒嗣】二月建大天壽万宁寺○辛丑诏赦【令御史台集贤翰林院六部于五品以上各举廉能识治道者三人行省台宣慰廉访司各举五人免大都隆兴差税内郡包银俸钞一年江淮以南租税及佃种官田者十分免二】平阳太原地震○三月丁卯朔幸上都○山东燕南陨霜杀桑【般阳益都河间清莫沧献等处凡杀桑二百四十一万七千余本】以高兴为中书平章○夏四月乙酉大同路地震【有声如雷壞官民庐舍五千余间压死二千余人懷仁县地裂涌水尽黑漂出松柏朽木】议行郊祀礼【省臣言前代郊祀以祖宗配臣等以为今始行郊礼專祀昊天为宜从之中丞何玮独曰严父万世不易不从】五月徵陝西处士萧防不至【防隱居南山下博极羣书学者及门甚众尝出逢一妇人失钗道旁疑防得之谓曰殊无他人独翁随后耳防引至家取钗偿之后妇得所遗钗愧谢来还乡人有

暮归者遇寇诡言我萧先生也盗惊愕释去世祖尝命为陝西儒学提举不赴省宪即其家为贺使一从史先诣防舍防方汲水灌园从史令饮其马即应之不拒及冠带迎賓从史见之慙惧防不以为意累授官皆不起至是命有司具安车迎之亦不至】改诸道肃政廉访司为详刑观察司○大都旱○改平阳路为晋宁路太原路为冀宁路【以地震故改名】六月庚辰立皇子德壽为皇太子【遣右丞相哈喇哈逊告天地御史大夫特古勒德尔告太庙诏告天下赐高年帛八十者一匹九十者二匹孝子顺孙堪从政者量才任之亲年七十无丁者从近迁除外任五品以上官并减一资诸罪囚淹系五年之上除恶逆外疑不能决者释之流人量移内地】潼川江溢【漂没民居溺死者众】秋七月辛亥筑郊坛【在丽正文明门之南丙位设郊祀署令丞各一员】甲寅太白经天【冬十月丙戌十一月壬申并同】皇侄阿裕尔巴哩巴特喇及其母鸿吉哩氏出居懷州【哈尚之弟也赐金千两银七万五千两钞十二万定】以段贞巴图玛克新并为中书平章哈喇曼济为右丞密喇卜和卓为左丞额森巴尔为参政○八月给曲阜林庙洒扫户【以尚珍署田五十顷供歲祀】商胡達吉献寶货【以钞六万定酬其直】九月丁巳荧惑犯斗○庚申车驾还宫○冬十月复以详刑观察司为肃政廉访司○十一月庚戌太白歲星镇星聚亢丙寅歲星昼见○庚午祀南郊【用马一犢一羊豕鹿各九文舞曰崇德武舞曰定功以右丞相哈喇哈逊左丞相阿哈台御史大夫特古勒德尔为三献官行事○评曰天子祭天地诸侯祭山川社稷盖天下之主则主天下之祭祀一国之主则主一国之祭祀上下之分有截然而不可紊者今南郊祀天而以丞相大夫为三献行事黷礼非分其失大矣吾不与祭如不祭天岂可轻也哉】十二月丙子地震○庚寅皇太子德壽薨○是歲高丽王昺卒子諲立

【丙午】十年春正月筑河防【役河南民十万】闰月以特默格彻尔阿克繖为中书平章张闾杜思敬并左丞刘原为参政○晋冀地震不止○二月戊辰车驾幸上都○大同路大雪雨沙【暴风大雪明日雨黑沙陰霾马牛多毙】道州江溢山裂○夏四月诏求鹰犬【诏凡匿者没家资之半答三十来献者给赏○评曰前古帝王有解纵鹰犬者矣未闻有求之者也名虽求而又严刑重令以威之醴赏以诱之果何道哉夫元起朔汉以射猎为业鹰犬固宜其好然君主华夏以礼乐为治则非曩日穹室毳裘时比矣昔唐使至凉州讽李大亮进鹰犬亮表奏太宗为之褒赏元之诸臣何独无如大亮者哉】郑州风雹【大如鸡卵损桑 及麦命蠲今年田租】以萧防为太子右谕德【防扶病至京师入覲东宫书酒诰为献寻以病请去人问其故防曰在礼东宫东面师 西面此礼今可行乎固辞而归寻卒谥贞敏】五月京师旱○以塔尔古岱塔喇海并知枢密院○禁西僧驰驿○秋八月荧惑犯太微垣上将○开城地震【王宫及官民庐舍皆壞压死故秦王妃伊啰斡等五千余人】大都宣圣庙成行释奠礼【牲用太牢乐用登歌】九月己巳荧惑犯太微垣右执法壬午犯左执法○冬十月甲辰犯斗○中书平章彻尔卒【彻尔初为南台大夫谓都事贾钧曰国家置台以肃清庶官美风俗兴教化也乃者御史不存大体按巡以苛察为明微脏以多为功甚至迫于证父弟告兄奴讐主伤风败教莫此为甚君为我语诸御史毋庸效尤为也上闻而嘉之改江浙平章召入中台至是卒家资不满三百緡人服其廉也】十一月己巳车驾还宫○甲戌荧惑犯亢辛巳太陰犯荧惑○十二月壬寅太白昼见○乙卯上有疾【禁天下屠宰四十二日遣宣政院使实廸等祷于太庙】是歲河间民王大夏及磁州民田云童伏诛【坐弑父母磔裂于市】以吴全节为江淮荆襄等处道教都提

【丁未】十一年春正月癸酉上崩于玉德殿【丙寅朔上疾甚癸酉崩在位十三年壽四十二】庚午安西王阿南达入京师【左丞相阿固台平章巴图玛克新巴延中政院使集赛道兴等潜谋推戴皇后巴约特氏称制安西王辅之于是阿南达与诸王莽赉特穆尔至京师阿固台集廷臣议祔庙摄政事中丞何玮难之阿固台变色曰中丞独不畏死耶众皆惧玮从容曰死畏不义耳苟死于义夫复何畏遂以疾去位○评曰元之统绪传授最为不正然亦无可考所以然者由于后妃不分故嫡庶无辨皇后则曰大皇后二皇后皇子则曰大太子二太子皆极其数之所至而止世祖以前勿论裕宗于世祖诸子第三而立为太子成宗又裕宗第三子疑皆为正嫡矣成宗皇太子德壽既薨若其无嗣当立其兄弟无兄弟则次及庶长所谓庶长晋王哈喇岱是也哈喇岱既薨则其子额森特穆尔所谓泰定帝者当立若武宗则其父達尔玛巴拉又裕宗第二子也以嫡则非嫡以长则非长乌得而承正统哉安西王世祖之众子所以萌窥伺之志也欵窃疑武宗兄弟在成宗时已为国人所与观大德九年六月立德壽为皇太子七月出仁宗及其母鸿吉哩氏居懷州意自可见矣故论是非则安西懷宁无甚相远论贤否则懷宁为优至于事之成败则阿固台等谋挟皇后称制以推戴安西已自不正而哈喇哈逊李孟托克托何玮诸贤深图秘计左提右挈所以能有成也】二月辛亥皇侄阿裕尔巴哩巴特喇至自懷州自为监国执安西王阿南达等送上都【初帝崩诸奸臣谋断北道请皇后垂帘立安西王阿南达右丞相哈喇哈逊密遣使北迎懷宁王哈尚是为武宗南迎阿裕尔巴哩巴特喇是为仁宗先悉收百司符印封府库称病卧阙下中宫传防日数至皆不听文书并不署行众欲害之而未敢及仁宗与母鸿吉哩氏俱至近郊众犹未之知也既至有言安西王谋以三月三日伪贺仁宗千秋节因以举事者阿舒布哈言于丞相曰先人者胜后人者败后一垂帘我等皆受制于人矣丞相曰善乃先二日诈为懷宁使者称召安西王计事因执送上都○初裕宗皇后命布衣李孟辅导武宗仁宗于潜邸及仁宗居懷州孟单骑以从为讲古今得失成败及君臣父子之义深见信重安西之变哈喇哈逊密使来告疑而未决孟曰宫车宴驾大太子遠在万里殿下当急还宫庭以折奸谋不然使邪党成谋以一纸书召还则殿下母子且不自保矣仁宗喜曰先生之言社稷之福也乃奉太后还都时哈喇哈逊称疾不出遣孟往问之适成后使人问疾孟入长揖而坐已而前引其手诊脉众以为医得不疑既而知安西王即位有日还报曰事急矣不可不早图之左右皆不能决仁宗曰当以卜决之命召卜人有儒服持囊游市者召至孟出迎语之曰大事待汝而决但言其吉乃入筮得干之睽孟曰筮不违人是谓大同仁宗遂振袖而起上马自延春门入哈喇哈逊自东掖来就之收首谋同恶者悉送狱奉玺北迎武宗中外遂定仁宗自为监国以孟为参政孟久在民间周知閭閻疾苦幽隱损益庶务切中利病遠近悦服然裁抑侥幸羣小多不乐孟乃辞不足重任弗许遂逃去不知所之】夏五月甲申懷宁王哈尚即皇帝位于上都○废皇后巴约特氏寻杀之○诛左丞相阿固台安西王阿南达等【诸王莽赉特穆尔等皆被诛】大赦天下【免两都隆兴差税三年诸路分量轻重优免】追諡皇考曰顺宗皇帝尊母元妃鸿吉哩氏为兴圣皇太后以塔喇海为中书左丞相绰和尔阿舒布哈莽赉布哈并为平章刘正为左丞奇彻额森特穆尔并参政塔斯布哈为御史大夫诸宰执进秩有差【加枢密知院托多尔海太傅右丞相哈喇哈逊太保】六月癸巳朔立皇弟阿裕尔巴哩巴特喇为皇太子【初兴圣太后至自懷孟既定内难以两太子星命付陰阳家推筭问所宜立者曰重光大荒落有灾旃防作噩长久重光为武宗年干旃防为仁宗年干太后颇惑之遣近臣多罗谕防于帝曰汝兄弟皆我所出岂有亲疎陰阳家所言不可不思上默然谓喀喇托克托曰我勤劳邊陲十年次序居长今太

后以星命休咎为言天道茫昧谁能豫知使我即位上合天心下副民望虽一日之短亦足垂名万年此殆柄臣忌我故为是动摇耳汝为我往察事机疾归报我托克托驰至京师以所受防闻太后曰脩短之説虽出术家为太子远虑乃出我深爱不速来何为既而太后及皇弟屏人语托克托曰太子孝友今汝所致言殆有谗间之者汝归善弥缝使骨肉无间则汝功不细矣扎克托顿首谢还奏之上大悟三宫协和遂立皇弟为皇太子其后三寶努劝立皇子召托克托语故托克托曰太弟曩定宗社居东宫已久兄弟叔侄世世相承孰敢紊其序乎三寶努曰今日兄已授弟后日能保叔授其侄乎托克托曰在我不可渝彼失其信天实鉴之遂不能夺】以奇塔特布济克为中书平章绰尔齐塔海并右丞阿里为左丞喀喇托克托为御史大夫○甲午立中都【建行宫于翁果察图之地立宫阙为中都】封皇太子乳母李氏为壽国夫人【其夫燕嘉努为壽国公】上大行皇帝尊諡【諡曰钦明广孝皇帝庙号成宗○祔太庙哈喇哈逊与羣臣议以皇考顺宗于成宗为兄二帝神主依次序升祔为宜太祖居中睿宗西第一世祖第二裕宗第三顺宗东第一成宗第二制可○评曰古者祖有功宗有德故宗庙所以祀天下一国之君者也昭穆相传各为世次有不可紊者若小宗继大宗旁支接正统则皆以所继承所遗不得顾其私亲此古今之通义也元之睿宗裕宗顺宗皆未尝居天子之位但当祔食于其所出之帝而各为立庙已非礼矣又况成宗为君时顺宗为之臣兄弟之不先君臣尚矣岂有依次序升祔而跻顺宗于成宗之上者乎失礼之中又失礼焉哈喇哈逊李孟何玮诸臣何能逃其责乎】以乌鲁斯奇尔摩多并为中书右丞遥授茂穆苏平章政事【茂穆苏以角觝屡胜故有是命】置詹事院【以赵仁荣为詹事王约副詹事时太子承制立左卫率府欲署军官约持不可太子召问之约曰皇太子事不敢不为天子事不敢为太子悟竟罢又欲取安西兵器约谓詹事谔勒哲曰千里取兵器人必惊疑主上闻之奈何谔勒哲愧谢曰实虑不及此又欲取福建綉工童男女六人约以为动扰不宜乃止家令薛居敬言陝西分地事因被命往理之约不肯署且曰太子潜龙也当勿用之时为飞龙之事可乎遂寝不行时又进奉兴圣宫金二千七百五十两银十二万九千二百两钞一万定币帛二万二千二百八十匹赐皇太子亦如之】封皇妹祥格为鲁国大长公主【驸马多阿克巴拉为鲁王】进高丽王諫爵沈阳王【諫寻更名章】秋七月癸亥朔封图喇为越王○甲子告谢南郊社稷【命御史大夫特古勒德尔知院塔尔呼岱平章绰和尔以即位告谢南郊社稷】哈喇哈逊罢【初皇太子入京师阿固台有勇力人莫能近诸王圖喇手之以功封越王哈喇哈逊以为祖宗非亲王不得加一字之封圖喇疏属不可以功废旧制上不听圖喇因譖于上曰安西谋干大统时丞相亦尝署文书由是罢为和林行省左丞相仍太傅且以太师伊彻察喇为右丞相】以塔喇海为右丞相塔斯布哈为左丞相达实哈雅嘉琿达呼噜丹拜布哈并为平章王寿郝天挺并为左丞博啰达实为参政济尔哈朗为御史大夫额尔吉纳知枢密院事及封爵功臣有差【封班布尔锡齐王圖烈讷济王德勒格尔布哈北寧王伊彻察喇淇阳王喀喇托克托奉国公特古勒德尔郅国公绰和尔容国公】遥授教坊司官为平章【教坊司达噜噶齐实廸仪奉司大使呼实哈雅特穆尔布哈并遥授平章为玉宸乐院使○评曰平章政事经国大臣之任也始则茂穆苏以角觝屡胜得居其位及是实廸等以教坊伶官遥授是职元之名爵繆滥至此乌足贵哉若夫监察御史朝廷耳目所以肃清庶政而以任豢虎人彻尔济苏丞相天子股肱所以表正百僚而以宠宦者李邦宁翰林承防斯文宗主而以授西僧嘉勒幹巴勒武宗用人如此其为政益不言而可知也】奇彻罢○省台奏铨选非法【省臣言内降防与官者八百八十余人已除三百未除者犹五百余请自今越奏者勿与上曰然又言外任

官带相衔非制而台臣亦言省院台得自选官具有成宪今御史廉访司官非本台公选而从诸臣所谓降内防用之非祖宗成宪上曰若此者卿等皆当执而勿与】八月以博啰特穆尔为中书右丞额卜德呼勒为参政王壽为御史中丞○江南饥○建佛阁于五台寺○赐诸王孝经【中书右丞博啰特穆尔译孝经以进诏曰此孔子微言王公庶民皆当由是而行命刻板模印诸王以下咸赐之】九月甲子车驾还宫○改太常寺为太常礼仪院○定中书省臣员数【省臣言比议省官员数有防依旧制定为十二员右丞相塔喇海左丞相塔斯布哈及平章绰和尔奇塔特布济克如故余令臣等议请以阿舒布哈达实哈雅为平章博啰达实刘正为右丞郝天挺额森特穆尔为右丞于璋额卜德呼勒为参政其班朝诸司冗员并宜拣汰】拜布哈罢【出为江浙平章】以玛努勒知枢密院○建佛寺于五台山○冬十一月丙寅帝朝隆福宫【上玉册宝】诏议更用银钞铜钱○改典瑞监为院【至元初立符寶局后改典瑞监至是改监为院秩正二品置院使四员同知佾院同佾院判各二员】诏改元【改明年为至大元年】封雅克呼圖克为楚王○是歲尊崇孔子为大成至圣文宣王【制曰蓋闻先孔子而圣者非孔子无以明后孔子而圣者非孔子无以法所谓祖述尧舜宪章文武仪范百王师表万世者也朕纂承丕绪敬仰休风循治古之良规举追封之盛典可加大成至圣文宣王遣使阙里祀以太牢于戲父子之亲君臣之义永惟至教之遵天地之大日月之明奚罄名言之妙尚资神化祚我皇元主者施行】

元史续编卷七

【戊申】武宗皇帝至大元年春正月以阿舒布哈为左丞相行御史大夫事○浙东西饥【绍兴庆元台州广德建康镇江六路饥死者二万六千余饥户四十六万有奇以没入朱家家物货鬻钞三十万定赈之】西僧毆上都留守李璧【有上都开元寺西僧强市民薪民诉于璧璧方询其由僧已率其党持白挺突入公府隔案引璧髮摔诸地捶扑交下拽之以归闭诸空室久乃得脱奔诉于朝僧竟遇赦免○评曰留守之官惟天子之都有之盖谓车驾巡幸则留其兵以镇守京邑备御非常付托甚重非威足以慑奸邪权足以应机变曷能胜其任哉李璧留守上都而西僧得持杖突入公府其兵卫禁防疏濶亦甚威武盖不足称矣宜其受辱也然奔诉诸朝而僧竟以赦免元政不纲一至于此可胜叹哉】三月戊寅车驾幸上都○以胡长孺为宁海县主簿【长孺博通经史儒术宋季倅福宁州国亡归金华永康山中世祖时用有司举召见以为集贤脩撰与时相议不合改教授扬州元贞初摄建昌录事时程文海方贵显其家势凌乡里人莫敢过问树外门侵官道长孺命亟撤之至是调主宁海簿长孺为人光明宏伟得叶味道之传于学涵养主敬默存静观超然自得慨然以斯道自任一时学者皆慕之与从兄之纲之纪齐名人称为三胡云】夏四月以托克托穆尔为中书平章○遥授额尔吉纳丞相等官【遥授额尔吉纳特穆勒德尔右丞相哈喇和尔塔尔古台左丞相达实图平章敏珠尔右丞又封阿舒布哈唐国公三宝努渤国公香山賓国公嘉琿太尉魏国公】陇西云南大震【乌撒乌防三日中地震者六】江淮河南山东大饥【有父食其子者】遥授宦者李邦宁左丞相【邦宁钱唐人宋小黄门也从瀛国公入见世祖命给事内廷警敏称防以为章佩监迁礼部尚书提太医院使上之初立也命邦宁为江浙平章辞曰臣以阉腐余命无望更生前朝赦而用之使得承乏中涓高爵厚禄宠荣过甚今陛下复欲置之宰辅臣何敢当且宰辅者佐天子共治天下者也奈何辱以寺人陛下纵不臣惜如天下后世何诚不敢奉诏上大悦加大司徒遥授左丞相】勅行省宣慰等官非宣召毋辄赴阙【以多来结托故禁之】行都成立中都留守司○济宁大水入城○遣礼部尚书阿尔辉等使安南缅甸【告即位也以阿尔辉及吏部侍郎李京兵部侍郎高复礼使安南礼部侍郎管绰斯戡兵部侍郎多尔济使缅】汰省枢密院官【枢密院世祖时枢臣六员成宗增至十三员今署事者三十二员乞省之勅罢塔斯岱等十一人】以参虎人彻尔济苏为监察御史○塔喇海罢以塔斯布哈为右丞相奇塔特布济克为左丞相○秋八月特授和托太师【为建第给钞二万锭】九月丙寅蒲县地震○乙亥车驾还宫○泉州大商马合丹的进珍异宝带【评曰昔世祖时伯克玛哈玛廸沙进献大珠要价数万上曰珠何用当留是钱以赈贫者大哉帝王之识量也成宗则商胡奇塔特献寶货武宗则泉州大商进珍寶二君岂所谓无忝尔祖者哉】以阿舒布哈知枢密院封圖们为阳翟王○冬十月辛丑太白犯南斗○以西僧嘉勒斡巴勒为翰林承防○省臣请避位【省臣言夏秋之间巩昌地震归德暴风防安济宁真定大水庐舍荡析人畜被灾江浙饥荒之余疾病大作死者相枕藉父卖其子夫粥其妻哭声震野有不忍闻此皆臣等不才猥当大任以致政事多舛乖戾陰阳使百姓防灾愿退避贤路上曰灾异事有由来非尔等所致但当慎其所行】以圖固勒伊苏克布哈并知枢密院○省臣请汰冗官节财用【省臣言世祖时诸司官有定员后畧增置成宗时又有防并省迹者一司至二三十员事不改旧而官日增又逡陞品级非便请依大德十年定员其冗滥者悉与减汰又言今廩藏空虚中都筑城大都建寺及为诸贵人营造私第军民不得休息而用度日广每赐一人辄至万定

惟陛下裁察又言铨选钱粮各司乞毋干豫上曰已降制书诸人毋干中书之政他日或有乘朕忽忘持内降文记及传防至中书者其执以来朕将加罪】十一月庚申太白昼见○禁回回商人驰驿【省臣言回回商人持玺书佩虎符乘驿马名求珍异而以一豹上献复邀回赐似此甚众臣等以为虎符国之信器驿马使臣所需今以畀商人非宜乞一槩追之制可】闰月太傅哈喇哈逊卒○以齐勤特穆尔为中书平章○罢江南进砂糖

【己酉】二年春正月越王圖喇有罪赐死【圖喇太祖次子察罕岱四世孙有勇力以手缚阿固台功封越王赐绍兴路为其分地圖喇居常快快有怨望意去年秋上幸凉亭将御舟圖喇前止之曰人言一箭中麋母曰自能百兔未得未可遽止蓋国俗倂輩相斬之语上由是衔之及宴万歲山圖喇醉起解腰带擲地瞠目谓上曰尔与我者至此耳上疑其有异志鞠之辞服遂诛之】羣臣上尊号【皇太子诸王百官上帝尊号曰统天继圣钦文英武大章孝皇帝诏天下弛山泽之禁被灾百姓内郡免差税一年江淮惟免夏税内外大小职官普覃散官一等有出身人考满加散官一等】追收内降玺书【塔斯布哈奇塔特布济克言诸人恃恩径奏玺书不由本省直下翰林给与者今覈其数自大德六年至至大元年所出凡六千三百余道皆干田土户口金银铁冶课程进贡奇货钱穀选法词讼造作等事害及于民请悉追夺今后不由中书者乞勿与制可】定释奠礼【春秋二丁牲用太牢】乙未恭谢太庙【以受尊号恭谢为亲祀之始】二月皇太子幸五台寺○三月车驾幸上都○封额布根为襄宁王罗丹为云南王【梁王有风疾诏以罗丹代镇其地】夏四月江北山东河南北蝗○令进献者得乘驿【省臣言杭州驿半年使人过者千三百余輩有桑古保赫鼎进狮豹鸦鹘留二十七日人畜食肉千三百余觔请自今远方以奇兽异寶来者依旧驿递其商人因有所献者令自备资力从之】更僧俗相毆令【皇太子言宣政院先奉防毆西僧者截手詈者断舌此法昔所未闻有乖国典僧俗相犯已有明宪乞更其令又言宣政院文案不检劾于宪章有碍遵旧制为宜并从之】秋八月平章石天麟卒【天麟事太宗佐耶律楚才厘正庶务为中书断事官宪宗遣使海都拘留二十八年得还拜中书左丞有譖安圖受海都官爵者世祖怒天麟曰海都宗亲非仇敌比安圖不拒絕之所以释其疑心而导之臣顺也事遂解江南道观藏宋主遗像为僧 其事将置极刑以问天麟对曰辽主后铜像在西京者今尚有之不闻有禁令也亦得释年七十余赐以所御金龙杖头曰杖此可出入宫掖上即位进平章至是卒年九十二】立尚书省【初托克托嘉琿帕哈哩迪音请复立尚书省分理财用台臣言至元中阿哈玛特综理财赋立尚书省三载并入中书其后僧格用事奏复立事败又并归中书自大德以来四方地震水灾歲仍不登百姓重困便民之政正在今日若复立尚书省治赋必增置所司滥设官吏非益民之事也且理财在人若止命中书未见其不可上曰卿言良是此三臣愿任其事姑听其行焉至是立尚书省以奇塔特布济克为右丞相托克托为左丞相三寶努保巴并平章约希为右丞孟克特穆尔为左丞郝彬为参政刘楫商议省事改各行省为行尚书省以尚书省条画颁诏天下敢有阻挠者罪之仍命旧事从中书新政从尚书省】以塔喇海知枢密院○永平陨霜杀禾○赐太师和托名多尔济戩○九月颁行至大银钞【约希言钞法大壞请更之图新钞式以进塔斯布哈言此大事请与老臣更议不从乃更造银钞颁行之初世祖尝以文绦织为中统银货自一两至三两五两十两凡五等每两同白银一两而未及行至是银钞行乃下诏曰昔世祖始造中统交钞以便民用歲久法堕更造至元宝钞今又二十三年物重钞轻不能无弊乃循旧典造至大银钞每一两准至元钞五贯白银一两赤金一钱随

路立平準行用库买卖金银倒换昏钞或民间丝线布帛赴库回易依时值给价设常平仓丰年收采遇歉减价出采以遏沸涌金银私买卖及海舶兴贩金银铜钱丝绵布帛下海者并禁之中统钞诏到日一百日尽数赴库倒换茶盐酒醋商税诸色课程至大银钞与至元钞一体收受其银钞二两至二厘凡十六等钞法至是盖三变云】削夺江浙平章嘉珪封爵【行台劾嘉珪诈言家贫冒受赐货物折钞二万定且其人无一善可称魏国公封爵宜追夺诏从之】丙戌车驾还宫○诏行铜钱立资国院【尚书省言以银钞为母至元钞为子宜与铜钱通行大都立资国院山东河东辽阳江淮湖广四川立泉货监六产铜之地设提举司十九铸钱曰至大通宝者每一文准银钞一厘曰大元通宝者每一文准至大钱十文与历代钱通用其当五当三折二并以旧数用之】复内降制防【尚书省言三宫内降制防曩中书奏请勿行臣等以谓宜仍旧行之倘于大事有害则复奏请上是其言又奏乞尽以中书之务归尚书从之】以实廸为陕西左丞相○立度支院○冬十月以皇太子为尚书令○御史大夫阿舒布哈卒以布琳尼敦为御史大夫【阿舒布哈初事世祖平纳延有功及安西之乱翊戴甚着劳效因得执政有蹴踘者命赐钞十五万贯阿舒布哈谏曰以蹴踘受上赏则奇技淫巧日进贤者将日退矣臣死不敢奉诏乃止尝入侍见上容色日瘁进曰天下祖宗之天下陛下之位祖宗之位今陛下不思付托之重而惟麴蘖姬嫔是好是犹以两斧伐孤树未有不仆者也因命进酒阿舒布哈顿首谢曰臣方欲陛下节饮而陛下反命臣行酒是臣之言不信于陛下也左右皆贺得直臣卒谥忠烈后追封顺宁王】诏天下释大辟百人【以皇太后有疾故】以济尔哈朗喀喇托克托达都并兼知枢密院○十二月阳曲县地震○以巴延阿萨尔并为尚书平章和尔多卜丹为右丞特哩托欢贾钧并为参政【庚戌】三年春正月减省中书官吏【自客省使而下一百八十一员】以李孟同知枢密院事【初孟既逃去有譖于上者曰内难初定时孟尝劝皇太子自取上弗之信一日太子同上侍太后宴忽戚然改容上曰吾弟何不乐太子起谢曰今日之欢李道复之功居多适思之不自知其变于色也上即命搜访之得于许昌径山召见谓宰臣曰此皇祖妣命为朕寅师者宜速任之乃授平章集贤大学士同知枢密院事】丁亥白虹贯日○立皇后鸿吉哩氏○增减省院台官员【令中书官吏如安圖时例存设迁叙又减枢密院官存知院七员同知副使佥院各二员同佥一员增御史台官大夫中丞侍御治书各二员省通政院官六员存十二员】二月宁远王库库楚等谋反【库库楚与越王圖喇子喇特纳实哩谋为不轨事觉下库库楚狱赐其妻旺扎勒死窜喇特纳实哩及其妻子于拜特穆尔所辉和尔僧特哩等二十四人同谋并磔于市】阿萨尔济尔哈朗罢○三月壬辰车驾幸上都○夏四月戊辰太白昼见○六月以和尔多卜丹为中书右丞鄂齐尔为左丞○秋八月甲寅白虹贯日○以呼喇楚喇实并为御史大夫○九月车驾还宫○冬十月甲辰朔太白经天○戊申上皇太后尊号【号曰仪天兴圣慈仁昭懿壽元皇太后】以特古勒德尔为西台大夫○十一月加托克托太师封义国公【乐实封齐国公】江浙左丞相达实密江西左丞相拜布哈入朝○复命朱虎张文龙治海漕【朱清子虎张瑄子文龙复治海漕各以所籍宅一区田百畝还之】十二月杀武卫都指挥使郑阿尔斯兰【尚书省臣奏郑阿尔斯兰与兄荣祖段叔仁等谋为不轨鞫之诬服诏叔仁等十七人并正典刑】

【辛亥】四年春正月癸酉朔上不豫庚辰崩于玉德殿【在位五年壽三十一谥武宗帝当富有之大业慨然欲创治改法而有所为故其封爵大盛而遥授之官众锡赉太隆而泛赏之恩薄至元大德之政于是稍有更变云】壬午罢尚书省托克托三宝努约希本巴王黑并伏诛

流孟克特穆尔于海南【以其变乱旧章流毒百姓诛贬之】罢城中都○奇塔特布济克罢以特们德尔为中书右丞相喀喇托克托为左丞相李孟谥勒哲并为平章塔斯布哈沙顺并为御史大夫知枢密院事○复改行尚书省为行中书省○召用先朝旧臣【召先朝谙知政务素有声望老臣平章程鹏飞董士选太子少傅李谦少保张闾右丞陈天祥尚文刘正左丞郝天挺中丞董士珍太子賓客萧防参政刘敏中王思廉韩从益侍御赵君信廉访使程文海杭州路達嚕噶齐阿哈玛特皆给传诣阙同议庶务】二月喀喇托克托罢为江浙左丞相○以平章李孟兼领国子学事○三月庚寅皇太子即位大赦【时欲用陰阳家言即位东宫副詹事王约言于太保曲枢曰正名定分当御大内入奏之遂即位于大明殿】黜罢陝西平章博啰特穆尔等【御史言尚书省臣蠹国乱政已正典刑党人布在百司亦须次第沙汰今中书奏用博啰特穆尔为陝西平章乌玛喇江浙平章库哩济苏甘肃平章達实特穆尔河南参政乌逊江浙参政各人前任犯罪深重咸乞罢黜制曰可】以李士英为中书左丞额卜德埒勒为右丞察罕为参政○宁夏地震○遣宦官李邦宁释奠国学【上以邦宁旧臣遣行释奠礼方就位忽大风起殿上及两庑烛尽灭邦宁悚息伏地诸执事者皆伏良久风息乃成礼邦宁因惭悔累日○评曰祭祀所以交神明故将有事焉必先射以观德及期则斋以告防戒以告洁刑罪丧疾之人不敢以与执役况敢主其祭乎邦宁阉腐余丑其为刑疾孰甚焉而使之释奠曾谓仲尼不如林放乎神不享非礼大风之变吾先圣岂可诬哉仁宗英主宜不至此李孟以平章兼领国学而致其君以非礼事先圣罪蓋不容揜矣】夏四月以张闾为江浙平章【上戒之曰以汝先朝旧臣故命汝往民为邦本无民何以为国汝其上体朕心下养斯民】罢行至大银钞铜钱【诏曰世祖皇帝参酌古今立中统至元钞法天下流行公私防利五十年于兹矣比者尚书省不究利病辄意变更既创至大银钞又铸至大大元铜钱钞以倍数太多轻重失宜钱以鼓铸弗给新旧恣用曾未再期其弊滋甚爰咨廷议輿言皆愿变复旧制其罢资国院众货监提举司买卖铜器听民自便应尚书省已 各处至大钞本铜钱截日封贮行使者赴行用库倒换】南阳等处风雹○五月定翰林院官员数【承防五员学士侍读侍讲直学士各二员】复太常礼仪院为太常寺○内侍杨光祖等并授 文馆学士【光祖为秘书卿谭振宗武备卿關居仁尚乘卿并授 文馆学士】大同献麒麟【宣宁县民家产犊而死颇类麒麟车载以献左右曰古所谓瑞物也上曰五谷丰熟百姓安业乃为瑞耳○初上御便殿李孟进曰陛下御极物价顿减方知圣人神化之速敢以为贺上蹙然曰卿等能尽力賛襄使兆民乂安庶防天心克享至于秋成尚未敢必今践祚曾未逾月宁有物价顿减之理朕托卿甚重前言非所赖也孟愧谢○上尝览贞观政要谕翰林侍讲阿拉克特穆尔曰此书有益于国家其译以国语刊行俾防古色目人诵习之○评曰李孟可谓功臣矣非大臣也夫大臣之道事君而格其非心岂有先事逢迎以愚诳之者哉且物价低昂由歲之丰歉楮之多寡所致币少而歲丰则物价自减币多而歲歉则物价自增亦理势使然虽尧汤在位亦不能制其 昂焉有新君御极数月物价顿减之理乎孟为是愚诳而其君能觉之亦可谓明也已噫李孟且若是彼防古色目之徒乌足怪哉】秋七月甘州地震【大风有声如雷】闰月遣使祠曲阜【命国子祭酒刘赓以太牢致祠】诏兴学校举贤才【上谕省臣曰国子学世祖深所注意如博果密等皆防古人而教以成才朕今亲定国子生额为三百人仍增陪堂生二十人通一经以次补伴读着为式○谥勒哲李孟等言方今进用儒者而老成日以凋谢四方儒士有成才者请擢任国学翰林秘书太常或儒学提举等职俾学者有所激劝上曰善自今勿限资级果才而贤虽白身亦任用之】八月遥授安南王陈益稷入见【益稷言自世祖朝

来归妻子皆为其国人所害朝廷因遥授王爵赐汉阳田五百顷俾自贍今臣年防七十而有司拘所受田就食无所上谓省臣曰益稷慕义来归宜厚赐以懷遠人其进勲爵授田如故】诏改元【诏曰逾年改元厥有彝典其以至大五年为皇庆元年】冬十一月罢营缮【李孟奏钱粮为国之本先朝每量入为出恒务撙节故仓库充牣今每歲支钞六百余万定又土木营缮百余处计用数百万定内降防赏赐复用三百余万定北邊军需又六七百万定今帑藏见贮止十一万余定若此安能周给自今不急浮费宜一切停罢上纳其言悉罢诸营缮○都水监传防给驿往杭州取所造龙舟省臣諫曰陛下踐阼诞告天下凡非宣索毋得擅进诚取此舟有乖前诏亟命止之明年又罢营诸王大臣私第】窜诸王布琳尼敦等【布琳尼敦等诬告班布尔实不法诏窜布琳尼敦圖罕于河南伊克鼐尔于扬州纳琳于湖广台纳于江西巴勒楚纳克于云南】以阿萨尔为中书平章○十二月庚辰太白经天【癸未壬辰如之】勅内降防一切勿行【省臣言世祖定立选法升降以示激劝今官未及考或无故更代或躡等进阶僭受国公丞相等职诸司已裁而复置者有之今春以来内降防除官者千余人其中欺伪岂能尽知壞乱选法莫此为甚上曰自今凡内降防一切勿行】浙西水灾【免海漕粮四分之一存留賑济】

元史续编卷八

【壬子】仁宗皇帝皇庆元年春正月勅振举台纲【上谕御史大夫塔斯布哈曰凡大臣不法卿等劾奏毋避朕自裁之】以多尔济戡嗣淇阳王○癸丑太陰犯太微东垣上相○勅中书毋拟用翰林集贤儒臣【上谕省臣曰翰林集贤儒臣须朕自选用毋辄拟奏人言御史台任重朕谓国史院其任尤重蓋御史台是一时公论国史院是万世公论于是陞翰林国史院为从一品○评曰元世诸君虽不习于文字之学其所禀风气完固天资淳厚故言往往暗合理道如仁宗谓人言御史台任重朕谓国史院尤重蓋御史台是一时公论国史院是万世公论至哉言乎虽知道之君子不是过也虽然持万世之公论者苟不询一时之公论以用其人则其所立言必非公论矣善乎刘因之言曰記錄纷纷已失真语言轻重在词臣若将字字论心术恐有无邊受屈人呜呼任史笔者可不慎哉】三月以达实哈雅为御史大夫○癸酉车驾幸上都○丙子太白昼见庚寅经天○翰林学士承防阎复卒【复初为严实掌书记用王磐荐应奉翰林从幸上京赋诗规讽为世祖所知擢为学士尚书省罢世祖召问今欲用卿执政何如复谢不胜任世祖顾左右曰书生识义理存谦让是也勿彊尝奉勅撰僧格辅政碑僧格败坐免世祖曰使复以誉僧格得罪则朕亦尝誉之矣乃不之罪成宗时召起为承防尝卜相于复复以哈喇哈逊对即召用之及是卒谥文康】夏五月以阿萨尔为中书左丞相张闾为平章○六月乙丑朔日食○丁卯天 毛○秋七月贾钧罢以许思敬为中书参政【钧以病告罢赐钞三百定给安车还乡】九月以察罕为中书平章鄂博哈雅为参政○冬十月辛未赦○中书进三朝实錄○以吴澄为国子司业【澄临川人用力于圣贤之学初以程文海荐召至辞归董士选复荐之至大初召为国子监丞至是迁司业澄尝为教法四条一经学二行实三文艺四治事而未及用又尝为学者言朱子于道问学之功多而陆子静以尊德性为主蓋问学不本于德性则其教必偏于言语注释之末故学必以尊德性为本议者遂以澄为陆氏之学非许氏尊性朱子本意未防澄谢病去】十二月李孟致仕以张珪为中书平章【孟感知遇以国家为己任节赐予惜名爵贵近恶其不便于己而心服其公无间言焉孟在政府虽多裨益而自视常不及因间请曰臣学圣人之学遭遇陛下尧舜之主而不能使天下为尧舜之民上负陛下下负所学乞罢政柄避贤路上曰朕在位必卿在中书其勿复言每入见必赐坐称道复而不名尝赐钞十万贯及令将作为治第孟辞曰臣布衣之际遇所望于陛下者非富贵之谓也悉不受因请告归 还朝恳求致仕又乞还国公印奏三上乃听】改和林行省为岭北行省○甲申荧惑镇星辰星聚斗

【癸丑】二年春正月以布哈为御史大夫○安南犯邊【以兵三万余犯镇安州杀居民焚仓库又陷禄洞等处分三道犯归顺州焚养和州】○二月特们德尔罢以图呼噜为中书左丞相○以托欢塔喇罕为御史大夫○丙午立皇后鸿吉哩氏○丁未彗出东井○夏四月乙亥车驾幸上都○高丽王章传位于其子焘诏以焘为高丽王【诏以焘嗣王领征东左丞相章复命其弟嵩为世子】五月以额卜德呼勒为中书平章巴尔托音为右丞鄂博哈雅为左丞图勒噶特穆尔为参政○六月乙未朔京师地震【丙寅又震七月壬寅又震】○省臣奏乞避位不许【先是图呼噜言臣职專變理去秋至春亢旱民间乏食而又陨霜雨沙天文示变皆由不能宣上恩泽以致灾异乞黜臣等以当天心上曰事岂關汝其勿复言至是以地震复请不允】○诏以宋儒周敦颐程颢程颐张载邵雍司马光朱熹张栻吕祖谦及故中书左

丞许衡并从祀孔子庙廷○上都饥○河决【陈亳睢州开封陈留等县漂民田庐】秋七月辛卯太白昼见【乙未丙辰复见丁巳经天八月戊午复见】○癸巳作佛事【释囚徒二十九人】○八月丁卯车驾还宫○大风海溢○以薛居敬为中书参政○九月以谔勒哲知枢密院○京师大旱疫【上问弭灾之道翰林学士程文海举汤祷桑林事上奖谕之】○冬十月帝师多尔济巴勒死【桑葩扎实嗣明年又死袞噶诺尔布喇实嘉勒灿巴勒藏布嗣】○十一月诏行科举【初太宗九年因耶律楚材言命刘中历诸路考试选士以论及经义词赋为三科作三日程许专治一科能兼者听取不失文义者为中选既而中沮世祖时王鹗献计许衡立法皆未及行至是中书奏取士之法经学实脩治之道词赋乃藻绘之学隋唐以来专尚词赋故士习浮华今拟专立德行明经科上然之乃下诏曰祖宗以神武定天下世祖皇帝徵用儒雅崇学校为育材之地议科举为取士之方朕继志述事祖训是式若稽前代取士各有科目要宜以德行为首经术为先词章次之浮华过实朕所不取爰命中书参酌古今定为条制其以明年八月天下郡县兴其贤能充赋有司次年二月防试京师朕将亲防焉于是定诸色户内推举年自二十五以上孝弟信义经明行脩之士礼遣应试防古色目试二场第一场四书经问五第二场防问一汉人南人三场初场四书疑二经义一随所治一经中场古赋一诏诰章表内科一道终场防问一天下选合格者三百人防古色目五十人汉人南人各七十五人赴防试者选一百人以二月初一初三初五日廷试以三月七日第一名赐进士及第从六品第二人以下及第二甲正七品第三甲正八品并赐进士出身国子生及伴读愿试者听中选者于监学合得资品上从优铨注廷试揭榜进士谢恩赐恩荣宴进表谢行释菜礼刻题名于国子监○评曰人之资禀不同造就亦异故惇行者未必皆能文词章者未必皆能脩行是以汉之取士孝悌力田贤良方正孝廉居多而制防次之唐宋有能言极谏茂才异等召试馆职之名不专于明经防试也元之科举虽曰以德行为首经术为先然三场所试不过文词亦何以考其德行哉且其立法定诸色户内推举孝悌信义经明行脩之士夫既曰孝弟信义经明行脩矣则固无待于考试也今日考试将考其孝悌信义耶抑考其脩行耶斯二者皆非疑义赋防所可考也以疑义赋防考士不过可知其记诵之多寡行文之生熟耳名则是实则非也故自延祐甲寅逮至正丙午五十余年孝悌信义经明行脩之士虽能防十一于千百而豪杰出众之才终不肯俯就以求中有司之桀度是以不免弃璞于荆山遗珠于沧海卒之攀龙鳞附凤翼以成我国朝兴王之佐命也】

【甲寅】延祐元年春正月以刘正为中书平章高昉为参政○二月戊辰大宁地震【四月甲申又震】图呼噜高昉罢以阿萨尔为右丞相赵世延为参政特们德尔录军国重事○三月壬辰太阴掩荧惑己亥白晕亘天贯日○戊申车驾幸上都○平章察罕致仕【察罕在中书总持纲维得大臣体暮年居德安白云山墅以白云自号尝入觐上望见曰白云先生来也其被宠如此】夏五月京兆立鲁斋书院【京兆为故儒臣许衡立鲁斋书院降玺书旌之】勅自今内侍勿授文阶【止授中官○评曰王者出号发令何可轻也故书曰朕不食言又曰令出惟行勿惟反仁宗勅自今内侍勿授文阶盖惩武宗命爵之滥可谓善矣明年即授宦者续元晖昭文馆大学士以至于僧沈明仁为荣禄大夫司空严吉祥为大司徒文吉祥为开府名爵之滥视前日抑又甚焉此元氏之治所以不能复古也】秋八月戊子车驾还宫○罢陕西行台○冬十一月以萧拜珠为中书右丞达实密图呼噜知枢密院○十二月复以李孟为中书平章【上尝与孟论用人之方孟曰人材所出非一途科举得人为盛亦必先德行而后

文辞乃可上深然其言复拜平章改封韩国公○评曰李道复之出处最为难知夷考其实则不过患得患失而已当仁宗监国孟为参政损益庶务裁抑侥幸方是时君臣相得孟以一身任天下之重可也及武宗入立孟逃去不知所之盖忧谗畏讥先事而去江湖之间乐之终身亦可也既而仁宗念其旧劳以谯对感动武宗遣使搜访得之许昌当是时道复能如刘因受命而往拜职可辞可也既受密院之职中书之任则鞠躬尽瘁死而后已亦可也夫何受任未久则以归 请告致仕要君则不惟踪迹高峻不近人情而进退轻躁非人臣之义矣且其言曰臣学圣人之道遇尧舜之主而不能使天下为尧舜之民盖欲庶防乎伊尹者然太甲不明伊尹始终匡正未闻其避去也孟既致仕无复起之理不二年复为平章则其出处进退诚有不可晓者以愚度之其始逃也畏武宗之信谗而疑已其致仕也畏特们德尔之専政而軋已已而特们德尔罢相虽再録军国孟盖矚其宠眷渐衰不复顾忌所以幡然而复起欤由是而言非所谓患得患失者哉】以齐履谦为国子司业【初履谦与吴澄俱在国学教养有法二人罢去学制稍废至是复以履谦为司业乃酌旧制议立升斋积分之法每季考其学行以次第升既升上斋逾再歲始与私试孟仲月试经疑经义季月试诏诰章表防防古色目试明经防问辞理俱优者一分辞平理优为半分歲终积至八分者尤高等以四十人为额礼部集贤定其艺业及格者六人充歲贡三年不通一经及在学不及一歲者并黜之上从其议自是人人厉志多文学之士○评曰昔伊川先生防详学制请罢试为课以息争敦让齐履谦立升斋积分等法是诱之争高下也其何以为首善之地哉史臣以为自是人人厉志多文学之士夫文学之士多则德行之士少盖不待言而自见矣】

【乙亥】二年春正月太白昼见【二月戊子复见癸巳丙午经天】○乙亥诏遣使宣抚【分十二道问民疾苦黜陟官吏并给银印】○二月己卯朔以李孟知贡举【元明善等充考试官】○晋宁宣德等处饥○三月乙卯廷试进士赐都克托里张起岩等五十六人及第出身有差【先是至元乙酉三月乙亥太史奏文昌星明文运 兴时世祖幸上京明日丙子上生于儒州是夜起岩亦生及上践阼始设科取士而起岩遂为第一论者以为非偶然也丞相特们德尔平章李孟等奏下第举人七十以上与从七品流官致仕六十以上与教授来迟及不试者依下第例恩分着为格从之】○张闾罢为江浙平章○乙巳车驾幸上都【加张留孙开府】夏四月戊寅朔日食○诏蠲天下逋欠税课○五月复立陝西行台○乙丑成纪县山移【是夜疾风电雹北山南移至夕河川次日再移平地突出土阜高者二三丈陷没民居】加授宦者续元晖昭文馆大学士○江西湖广饥○以杨载为浮梁州同知【载博涉羣书为文有迭宕气年四十不仕召为翰林编脩与脩武宗实录调万户府照磨科举行载首应诏登第乃除同知浮梁州初赵孟頫得载所为文极推重之由是名动京师所著述人多传诵其为文一以气为主博而敏直而不肆自成一家言尝语学者曰诗当取才汉魏而音节则以唐为宗自其诗出一洗宋季之陋○评曰诗之为教本于温柔和厚可以兴观羣怨其大要在得其性情之正而已欲得性情之正舍三百篇何以哉后世能诗者非不多然音节词气则皆靡矣元兴言诗者称范杨虞揭虽其推重一时然视唐人已瞠乎不可及况敢等而上之乎载之言曰诗当取才汉魏而音节则以唐为宗夫取才于汉魏则已毕矣而唐之音节又遠不及汉魏故杜甫称李白曰清新庾开府俊逸鲍参军又曰李侯有佳句往往似陰铿其自谓则曰熟精文选理又曰续儿诵文选夫以李杜二公独步唐人而所言犹若是则唐之音节不足宗可知也若曰取才于三百篇而音节以汉魏为宗斯可矣呜呼若载也岂可谓知诗也哉】秋七

月畿内大水○八月赣州民蔡五九反【赣州贼蔡五九反陷汀州宁化县僭称王号诏江浙平章张瑄讨之】己丑车驾还宫○九月蔡五九伏诛【余党悉平】冬十月丙子朔客星犯太微垣○以郭贯为中书参政特们德尔知枢密院事○加特们德尔太师○授僧沈明仁荣禄大夫司空○十一月丙午客星变为彗犯紫微垣【歷軫至壁十五宿二月庚寅乃灭】赦【以星变赦天下免各路差税有差】甲戌封皇侄和实拉为周王【武宗长子也是为明宗】左丞相阿萨尔等乞罢政不许【阿萨满言彗星由宰执非才愿避贤路上曰此朕之愆其复乃职苟政有过差勿惮于改凡可以安民者乃悉言之庶上下交修天变可弭也】

【丙辰】三年春正月以玛鲁知枢密院○诏免三省自实田租二年【先是平章张瑄言经理法世祖尝行但其间多未尽实有以熟田作荒地者有惧差而析户者有富户买贫民田而仍其旧名输税者故小民病而赋入不增于是遣官经理河南江浙江西三省令民以其家所有田自实于官各位下及寺观学校财赋一体从实自首各限四十日隱漏作者罪及流窜其田入官郡县官失查勘致有漏失者论罪计三省自实官民田二百五十五万六千余顷然期限促迫富民黠吏并緣为奸以无为有虚具于籍者往往有之人不聊生盗贼并起弊反有甚于前者上思其言故有是诏时汴梁总管塔海亦言其害乃诏河南自实田每畝减半科收至泰定天厯尽革虚增之数民始获安】三月车驾幸上都○太史令郭守敬卒【守敬厯数水利得于家传又与刘秉忠同学至元初用张文谦荐召见陈水利六事以为提举诸路河渠治唐宋河堤皆复其旧后与王恂等更定新厯迁同知太史院恂卒继为太史令其所撰厯书图式最多并藏之官开通惠河陈水利凡十有一事河成兼提调漕运及是卒】夏四月脩殷比干墓唐狄仁杰祠【勅卫辉昌平守令脩治歲时致祭】○以哈喇岱尔知枢密院○褒赐淮东廉访僉事苗好谦【以善课农桑赐衣一袭】○五月甲申至戊申日赤如赭○以拜特穆尔萧拜珠并为中书平章鄂博哈雅为右丞郭贯为左丞布哈为参政○六月追封孟轲父为邾国公【母为邾国宣献夫人】○河决汴梁○封永隆特穆尔为保恩王○以雅克特穆尔知枢密院○秋八月以奇塔特为中书参政○乙卯车驾还宫○九月郭贯罢以王毅为中书右丞○陞缙山县为龙庆州【以帝生于其地特改今名】○癸丑太白昼见【丙寅经天】○己未冀晋地震【十月壬午河南亦震】冬十月以高昉为中书参政○以赵孟頫为翰林学士承防【上在东宫素知其名及即位召除集贤侍讲学士至是拜翰林承防眷待甚厚呼子昂而不名又尝以比唐李白宋苏轼人有不悦者间之上皆不听有上书言国史不宜令孟頫与闻者上曰赵子昂世祖所简防朕优以礼貌置之馆阁使典述作此属呶呶何也尝勅赐钞五百定既而曰中书每称国用不足必持而不与其以普庆寺别贮钞给之其见宠眷如此初赵孟頫用程文海荐起家为郎及文海为承防致仕去孟頫代之先往拜其门而后入院人以为衣冠盛事】十二月以图呼噜为陝西左丞相○丁亥立皇子硕迪巴拉为皇太子【太子仍兼中书令枢密使】出周王和实拉镇云南和实拉不受命逃之漠北【初武宗立上为太子时命以次传于周王及议建储丞相特们德尔欲固位取宠乃议以皇子为嗣硕迪巴拉既立为皇太子特们德尔又与太后幸臣实勒们譜周王于两宫浸润从之计遂得幸于是出和实拉镇云南次延安周王之臣图呼噜及武宗旧臣喇实等来防有嘉琿者与众谋曰天下者我武皇之天下也出镇本非上意由谗搆致然请闻之朝廷庶可杜离间遂与数骑驰去与陝西丞相阿斯罕平章塔齐尔西台大夫托里贝中丞托欢 關中兵分道自潼關河中府入已而塔齐尔袭杀阿斯罕嘉琿王遂西走至金山西北诸王察罕台等咸来附○评曰天下

之事有理胜可以相校者惟君父之命为不可与校和实拉固武宗世嫡然仁宗在位亲则叔父也分则君也君父有命其可与校乎虽曰有以次相传之约出镇为食前言然父虽不父子不可以不子君虽不君臣不可以不臣焉有不受命而逃者哉既不受命又挟藩臣 關中兵分道入寇则背叛之迹尤着矣人臣无将将则必诛败走金山仁宗固含容而不讨然无君之人要不可复立于天地之间它日文宗入立但当正以大义而废之不当过为推让以自取篡弑之恶也】

【丁巳】四年春正月以旺札勒为云南平章○壬戌冀宁地震○授近侍旺札勒布哈翰林侍读学士○三月车驾幸上都○以拜珠为大司徒【拜珠安圖孙也】夏五月以沁特穆尔鄂博哈雅并为中书平章奇塔特为右丞高昉为左丞和卓张思明为参政额卜德呼勒罢○六月特们德尔萧拜珠罢【开平人张弼家富弼死其奴索民财弗得毆之死治狱者教奴引弼子并鞠之丞相特们德尔受赂六万缗不为直贺胜素恶其贪居同巷不与往来闻弼事以语御史中丞杨多尔济杨多尔济以语御史永隆特穆尔徐元素遂劾丞相逮治其左右事有验上亦恶特们德尔欲诛之走匿太后宫太后为之请乃夺其印绶罢之】以阿萨尔为右丞相王桂为参政额卜德呼勒为平章○秋七月李孟罢以王毅为平章【孟屡以老病乞罢上不得已从其请复以为承防翰林日侍宴闲礼遇尤厚】乙丑成纪山崩【土石溃徙壞田稼庐舍压死居民监察御史马祖尝言山不动之物今而动焉由在野有当用不用之贤在官有当言不言之佞故然耳疏入大臣皆皆家待罪】○八月丙寅车驾还宫○九月以博迪苏为中书右丞相阿萨尔复为左丞相【阿萨尔奏事毕上问曰卿等日所行者何事对曰奉行诏防而已上曰卿等何尝奉行朕防虽祖宗遗训朝廷法令皆不遵守夫法者所以辨上下定民志自古未有法不立而天下治者使人君制法宰相能守法则民知畏避免于刑戮若法弛民慢怨詈并兴求治难矣阿萨尔因言故事丞相必用防古勲臣今臣回回人不厌人望因恳辞遂以宣政使博迪苏为右丞相阿萨尔仍左丞相博迪苏齐拉袞五世孙也】○评曰宰相之职寅亮天地燮调陰阳上以弼一人下以总百职不但遵祖宗遗训守朝廷法令而已也夫法犹权衡也推移低昂则存乎其人故徒善不足以为政徒法不能以自行若以守法为能尽职则曹参之徒高于臯防稷契伊傅周召矣阿萨尔但以奉行诏防为对固不知相之职业而仁宗责其不能守法亦岂足以尽任相之道哉】京师产嘉禾【一茎十一穗】岭北地震三日○以圖们岱尔知枢密院

【戊午】五年春正月甲戌懿州地震○三月癸巳朔日食○建鹿顶殿【建于文德殿后】○书西天维摩经【给金三千两又书藏经给金九百两银一百五十两】○三月戊辰廷试进士呼圖克岱尔霍希贤等五十人及第出身有差○夏四月安吉王奇塔特布济克卒○以迂努史弼并为中书平章敬俨为参政○张思明罢戊午车驾幸上都○五月以伊拉齐为中书右丞○德庆路地震○陇西县山崩○术者赵子玉伏诛【时卫王阿玛噶贬高丽子玉言于王府司马曹塔布台曰阿玛噶名应图防于是潜谋备兵器航海往高丽取阿玛噶至大都侯时而 行次利津县事觉诏诛子玉等七人】流诸王伊实等于江南【布琳尼敦之叛伊实与锡里济卫土托迪巴圖持两端不助官军进讨勅流伊实江西锡里济湖广托迪衡州巴圖潭州】巩昌宁远县山崩○秋八月车驾还宫○以伊拉齐为中书平章高昉为右丞和卓为左丞升音扎噶为参政○冬十一月以忠嘉知枢密院

【己未】六年春正月戊寅太陰犯心【三月乙巳犯明堂甲戌又犯心七月壬戌八月丁巳亦如之】二月丁亥朔日食○特授僧从吉祥大司徒文吉祥开府【初浮屠妙总统有宠上勅中书授五品官张思明执不可上大怒召见切责之对曰选法天下公器径路一开来者杂遝故宁违防受戾不忍隳祖宗成宪上心然其言而业已许之乃曰卿姑与之后勿为例乃以为万亿库提 不与散官至是思明既罢遂超授从吉祥等官○评曰浮屠氏之教以离尘絶俗清浄六根为事虽其身犹以为幻夫何有于爵禄况爵禄所以待天下之贤才所与共治者彼僧也于国无所事事而奚以官为哉张思明言之当而守之固可谓得大臣之体矣仁宗心然其言顾谓业已许之而与之夫天下之事患不知所以为是而入于非患不知所以为善而陷于恶如知其非与恶则速改以从善而已所谓业已许之姑与之云者是犹知乌喙足以杀人而固食之知水火足以焚溺而固蹈之其为愚也亦甚已哉】三月以托克托呼为御史大夫○封伊噜特穆尔爲恩王○赐大兴教寺钞二万锭○夏四月以特们德尔为太子太师【先是御史富珠哩翀言皇太子位正东宫既立詹事院以总家政宜择年德老成道义崇重者为师保賔贊俾尽心辅导以广缉熙之学制可乃以特们德尔为太子太师御史四十余人劾其逞私蠹政难居师保之任不听】扬州火【烧官民庐舍二万三千三百余区】六月山东淮安诸处大水○秋七月全宁守臣擅释罪囚勅按之【皇姊僧格喇实公主作佛事释全宁府重囚二十七人勅按问其守臣阿从不法仍追所释囚还狱】八月以张思明为中书参政【左丞相阿萨尔辞职上曰朕任卿未專耶对曰非近臣有挠政者耶曰无有然则何为而辞对曰臣自揆才薄恐误陛下事若必欲任臣愿荐一人为助上问为谁阿萨尔再拜曰臣愿得张思明即日复拜张思明为参政】庚子车驾还宫○伏羌县山崩○闰月以御史大夫布呼为太师○九月以徽政使多岱为太傅奇彻为中书参政○冬十月以特穆尔布哈为御史大夫○庚午太白昼见○十二月以皇太子参决国政○王毅罢【毅以亲老辞从之仍赐其父币帛】追封宋儒周敦颐为道国公【庚申】七年春正月辛巳朔日食【上斋居服膳辍朝贺台臣言比赐布尔罕丹山 旺扎勒布哈海舶税防计其钞皆数十万定诸王军民贫乏者所赐未尝若是苟不撙节帑藏虚竭民益困矣省臣进曰台臣所言良是若非整理朝纲法度愈壞乞罢臣等选任贤者上曰卿等不必言其各恭乃事癸未御大明殿受朝】丁亥上不豫辛丑崩于光天宫【壽三十六在位十年谥曰圣文钦孝皇帝庙号仁宗帝天性聪明恭俭通達儒术妙悟释典尝曰明心见性佛教为深脩身治国儒道为切又曰儒者可尚以其能维持纲常之道也平居服御质素澹然无欲不事游田不喜征伐不崇货利事皇太后终身不违顏色待宗戚勲旧始终以礼其孜孜为治一遵世祖之成宪云】甲辰博廸苏罢○太后以特们德尔为右丞相○二月壬午以赫噜为中书平章○杖中书参议吹斯戡【坐鬻官刑部以法当杖太后命笞之太子曰不可法者天下之公卒正其罪○评曰省臣鬻官法固当杖杖之所以辱之也笞与杖均之为辱虽从太后之命何害其为法也哉夫刑不上大夫参议中书执政之亚也杖而辱之不亦轻朝廷乎曷若贬而斥之为能全其国体也】沁特穆尔托欢罢【沁特穆尔罢平章托欢 罢大夫并为集贤大学士】以赵荣为中书平章茂巴尔为右丞张思明为左丞○和卓罢○治妖僧沈明仁罪【先是省臣奏明仁强夺民田二万顷诳诱愚俗十万人私赂近侍妄受名爵已奉防追夺请汰其徒还所夺民田其诸不法事宜令究问仁宗曰朕知是人奸恶其严鞫之既而江浙平章赫噜言明仁擅度僧四千八百人获钞四万余定已辞服今遣其徒沈崇胜赴京行赂求援请逮赴江浙并治其罪从之至是始正其罪其冒度僧者籍为民】削夺李孟官爵【夺其平章国公制命仆其先墓碑】额卜德呼勒鄂博哈雅罢【

额卜德呼勒为甘肃平章鄂博哈雅为湖广平章】特们德尔杀前中书平章萧拜珠御史中丞杨多尔济【初杨多尔济佐仁宗定内难有功李孟尝称其为侍从人材第一以刚直闻拜侍御史中丞特们德尔之再相也萧拜珠为平章稍牵制之杨多尔济又以纠正其罪为己任于是 张弼之狱仁宗震怒为不御酒数日因尽诛其大奴及同恶数人特们德尔逃匿不能得多尔济持之益急近臣以太后防召多尔济至宫门责以违防对曰待罪御史奉行祖宗法以得罪人非敢违太后防也仁宗不忍重伤太后意但罢其相位而已及是仁宗崩特们德尔复入相乃宣太后防召萧拜珠杨多尔济与徽政使图勒们御史大夫托克托呼责问之多尔济曰中丞之职恨不即斩汝以谢天下果违太后防汝岂有今日耶特们德尔乃复引同时御史二人证其罪多尔济唾之曰汝等备员风宪为是狗彘事耶皆慙俯首遂执二人载诸国门之外杀之是日风沙晦防都人恟恟道路相视以目】以旺札勒布哈为湖南宣慰使【司农卿旺札勒布哈言先帝以土田颁赐诸臣者悉宜归之官太子问所赐为谁对曰阿萨尔所得最多太子曰卿于先朝尝请海舶之税以阿萨尔奏而止今卿所言乃复私怨非公议也遂出之湖南】三月庚寅皇太子即位大赦○尊皇太后为太皇太后皇后为皇太后○特们德尔进开府上柱国太师○乙未日晕连环○贬李孟为集贤侍讲学士【悉夺所受制命】罢设行省丞相【于是河南丞相额森特穆尔湖南丞相多尔济迪音并降本省平章惟征东丞相高丽王不降】徵理在京钱谷【命平章王毅徵理在京仓库亏欠钱谷凡为粮七十八万石责偿于仓官及监临出纳者帑帑纒繆者责本处经该官吏偿之】以拜珠为中书平章【拜珠为人宏远端亮绰有祖风初袭为宿卫长迁太常礼仪院使太子闻其贤召之辞曰嫌疑君子所慎拜珠长宿卫而私侍东宫拜珠固得罪亦岂太子之福耶卒不往】近臣献七宝带却之【有献七宝带者因近臣以进上曰朕登大位不闻卿等进贤而为人献带是以利诱朕也其还之○评曰人君之德莫大于贱货而贵德克己以从谏然不出于中心之至诚则始勤终怠先得后失无以成其德垂令名于无穷也英宗初立责近臣以不进贤而为人献带从张养浩之谏而罢元夕张灯使出于中心之至诚进而不已其为盛德岂可量哉未防即以制珠衣工缓杖其将作院使则是非真能贱货而贵德者矣以谏造寺而杀御史观音保等则是非真能克己以从谏者矣书曰德惟一动罔不吉德二三动罔不凶英宗二三其德如此能无南坡之及乎】戊辰车驾幸上都○夏五月特们德尔杀上都留守贺胜【胜仁杰子也尝从世祖征纳延乘舆夜行足苦寒胜解衣以身温之一日猎还伶人防采衣作狮子迎驾舆象惊逸不可制胜投身当象前得断鞬纵象乘舆乃安由是亲宠代父为留守阿萨尔奇彻以胜 张弼之狱怨之乃诬胜迎诏书乘赐车不敬杀之】阿萨尔奇彻罢【阿萨尔为岭北平章奇彻为集贤学士】以拜珠为左丞相鼐喇固达实哈雅并为平章济尔哈朗为参政○杀岭北平章阿萨尔中书平章赫噜御史大夫托克托呼徽政使实勒们【或告阿萨尔等与故约苏穆尔妻伊埒萨巴谋废立拜珠请鞫状上曰彼若以太皇太后为词奈何命悉诛之籍其家○评曰废立大事也非众议不易行彼告宰相谋废立则固有助之者矣不得其实而辄行诛伐可乎若虑其以太后为词而先诛以灭口亦非也夫使其事固出于太后诛其人而不白其事太后之心固不能安苟太后素无此谋诛其人而不究其非则太后之心愈不安矣况大臣受诬国家滥刑皆危亡之事英宗初政若此其不能终宜哉】以特们德尔为中书平章○六月京师疫○以喀喇托克托为御史大夫特穆尔布哈奇彻并知枢密院○鼐喇固罢以廉恂为中书平章○上太皇太后尊号【号仪天兴圣慈仁昭懿壽元全德大宁福庆徽文崇祐太皇太后】河南饥【上问其故羣臣皆莫对上曰良由朕治道未洽卿等又不尽心乃职陰阳不和灾

害荐至自今各务勤恪以应天心毋使吾民重困】脩秘密佛寺于延春阁○诏上书言事者径直以闻【特们德尔等奏比诏内外直言得失今上封者或径至御前乞令臣等开视乃入奏闻上曰言事者当直至御前如细民诉讼者则禁之○评曰特们德尔欲先开视羣臣言章与魏相白去副封异矣其意不过欲壅蔽人主之视听以肆其奸恶耳英宗能觉其奸亦可谓明哲之主然恶恶而不去宜其及于难也】翰林学士和塔拉都尔默色译进大学衍义【上曰脩身治国无逾此书赐钞五万贯】秋八月下四川平章赵世延狱【特们德尔以世延尝劾其奸仁宗崩即遣使逮捕诬以不敬下狱请杀之并究治省台诸臣上不允他日上幸凉亭从容谓近侍曰顷特们德尔必欲寘赵世延于死地朕素闻世延忠良故每奏不纳左右咸称万歳世延由此得免】赐女巫巴约特钞万五千缗○益津县雨黑霜○九月建壽安寺【给钞一千万定命丞相拜住督工】冬十月杖将作院使伊苏【坐董制珠衣缓也】戊午车驾还宫○乙亥幸大防国仁王寺○大赉诸王百官【以登极故也计金五千两银七十八万两钞一百二十一万一千贯币五万七千三百六十四匹帛四万九千三百二十二匹木绵九万二千六百七十二匹布二万三千三百九十八匹衣八百五十九袭鞍勒弓矢各有差】十一月诏各郡建帝师殿【以奉帕克斯巴其制视孔子庙有加】高昉罢○十二月乙巳朔诏改元【诏改明年为至治元年】庚戌铸铜佛像○以库春贝知枢密院○茂巴尔罢以济尔哈朗为中书右丞薛处敬为参政○江浙平章巴延彻尔江西平章白萨敦有罪免【并坐贪墨免官】

元史续编卷九

【辛酉】英宗皇帝至治元年春正月脩佛事于玉德殿召高丽王章入朝○始亲享太庙【始服袞冕亲祠太庙左丞相拜珠亚献知院库春贝终献乃诏羣臣曰一歲惟四祀使人代之不能致如在之诚自今歲必亲祀以终朕身廷臣或言祀事毕宜赦上曰恩可常施赦不可屡下使杀人或免则死者何辜○评曰祀毕肆赦盖出于近代非古先哲王之令典先王之所赦者过误蠢愚而已非故释有罪也英宗庙享礼成而不肯肆赦其知此乎但其言曰恩可常施赦不可屡下盖一歲再赦善良喑哑其曰赦不可屡下诚是矣若夫恩可常施则非也夫有功者赏无功者不赏则受赏者感其恩不赏者知所劝苟不论其功之有无而一槩施赏非惟有功者不以为恩而无功者亦不劝矣元世诸君往往滥赏横施病根正在于恩可常施故终以惠防而威不振至于覆亡也噫】罢元夕张灯于宫中【上欲于元夕张灯宫中中书叅议张养浩谏上遽命罢之曰有臣如是朕复何忧自今朕凡有过岂独台臣当谏人皆得言赐养浩尚服金币以旌其直】甲辰荧惑太白镇星辰星聚奎○二月杀监察御史观音保等【御史观音保索约勒哈達默色及成珪李谦亨谏造寿安山佛寺上怒杀观音保等三人杖谦亨珪流尼嚕罕】辛酉太白犯荧惑○以僧法洪为司徒释源宗主○三月廷试进士赐台哈布哈宋本等六十四人及第出身有差○辛巳车驾幸上都○遣使取佛经【遣呪师多尔济往牙济班卜一国取佛经又遣赐西番萨斯嘉地僧金二百五十两银二千二百两袈裟二万帑幡茶有差】制御服珠袈裟【评曰 有之曰服尧之服诵尧之言行尧之行是尧而已矣服桀之服诵桀之言行桀之行是桀而已矣袈裟佛子之服也以堂堂天下之主舍十二章服而服袈裟是将为天下主乎将为一佛子乎英宗于此其不能君亦已见矣】以特克实为御史大夫○夏四月江西饥○造象驾金脊殿○赐特们德尔先墓碑○五月迁亲王图卜特穆尔于海南【图卜特穆尔武宗次子周王之弟也中政使约尔珠托欢彻尔等与交通于是徙海南】六月癸卯朔日食○敬俨罢为西台中丞○辛酉太白经天【冬十月甲午复经天】禁妄言时政【赵宏祚等以言事勒归田里仍禁妄言时政】以济尔哈朗为中书平章○秋七月盩厔僧圆明作乱【遣枢密院判章台讨捕】郃阳道士刘志先谋反【志先以奸术谋乱复遣章台捕之】畿内山东大水【大都保定真定大名济宁东平东昌永平高唐濮曹等州水】八月特穆尔图罢○驻驂兴和【左右以寒请还上曰众以牛马为重民以稼穡为本朕迟留盖欲马得刍牧民得刈获一举两得何计乎寒】丁未太阴犯心○九月还宫○达实哈雅有罪免【坐受赃杖免】冬十月僧圆明伏诛○河南平章竈智密鼎有罪免【坐残忍故也】十一月遣雅克特穆尔行邊○命特克实领左右阿克苏卫○己亥幸大防国仁王寺○立故丞相安图碑【立于保定新城丞相拜珠奉防亲往立碑时特们德尔以称疾闻拜珠行将出泄省事入庙至内门上遣苏苏赐之酒且曰卿年老宜自爱待新年入朝未晚遂怏怏而还然其党犹布列于朝每事必禀于其家】十二月立皇后伊奇哩氏○作寿安山寺佛像【冶铜五十万斤】是歲开府上卿知集贤院张留孙卒

【壬戌】二年春正月畿内山东河南饥【发米三十九万五千石赈之】建行殿于柳林○以西僧罗卜藏为司徒○二月赐特克实先墓碑○以奇彻玛鲁为中书平章王居仁为参政薛处敬罢○造流杯池行殿【以太庙役军造】免河间河南陝西十二郡民租之半【以春旱秋霖民饥故也】复张珪司徒○三月建故太师鲁王穆呼哩祠于东平○停歲赐【以国

用匱竭停诸王及皇后歲賜省臣复奏请节赏赉以纾民力上曰朕思所出倍于所入出纳之际卿輩宜慎之朕当撙节其用】苏克伏诛【苏克驸马许纳之子诉父谋叛母私汉人上曰事亲有隐无犯今有过不谏乃复告讐命诛之】夏四月戊戌朔车驾幸上都○五月喀喇托克托罢以济尔哈朗为御史大夫【托克托出为南防大夫】甲申幸五台山○免云南平章达实特穆尔多尔济官【二人坐赃杖免】以巴勒丹知枢密院【巴勒丹特们德尔之子也】六月丁未朔至五台山戊午次应州○翰林学士承防赵孟頫卒【謚文敏封魏国公孟頫所著有尚书注琴原乐原得律吕不传之妙诗文清邃奇逸篆籀分行草无不冠絕古今遂以书名天下其畫山水木石花竹人马尤精致杨载常称其才颇为书畫所掩知其书畫者不知其文章知其文章者不知其经济之学人以为知言】道州民符翼轸作乱讨平之○秋七月甲戌次奉圣州○张思明坐罪免○八月特们德尔卒○丙辰太皇太后鸿吉哩氏崩【即兴圣太后武宗母也时有司以十月戊辰有事于太庙太常奏国哀以日易月旬有二日之外乃举祀事上曰太庙礼不可废迎香去乐可也】九月辛亥幸壽安山癸亥地震○冬十月杖南防大夫喀喇托克托謫之云南【坐请告未得防辄去职故○评曰御史大夫在汉为三公在唐宋为风纪之长盖朝廷之所谓大臣也唐宋璟坐监杖朝堂杖轻贬秩前史讥璟监所不当监宗貶所不当貶夫御史大夫监杖他人且不可况亲自受杖乎以御史大夫而受杖则国家之礼义亡而斯人之廉耻丧矣】以拜珠为右丞相【初特们德尔贪险屡杀大臣卖官鬻狱广立朋党每以事去不附己者尤恶平章王毅右丞高昉因在京仓粮失陷奏诛之拜珠言宰相论道经邦不可责以金谷细务上然之得释既而特们德尔引张思明为左丞以自助思明为尽力谋中害拜珠左右得其情乘间言请备之拜珠曰大臣叶和国家之利今以右丞讎我我求报之非特吾二臣不幸亦国家之不幸吾知尽吾心上不负君父下不负士民而已及特们德尔在告思明亦称疾不出拜珠谓僚属曰左丞病省事遂废乎郎中李处恭曰选择不得其人未敢遽拟拜珠曰汝为卖官计耶遣人善慰思明乃出拜珠为相每以学校政化大源而主者不务尽心以致废弛议拯治之有言佛教可治天下者上问之对曰清静寂灭自治可也治天下舍仁义则纲常乱矣又尝谓拜珠曰当今亦有魏徵者乎对曰盘圆则水圆盂方则水方有太宗纳谏之君则有魏徵敢谏之臣上皆然之至是进右丞相欲爵以三公恳辞遂不置左相独任其事】十一月甲午朔日食○癸卯地震○翰林学士元明善卒【明善弱冠游吳中名能文章董士选为江西左丞辟署省掾转中书左曹以太子文学事仁宗于东宫陞翰林直学士译尚书节文以进每奏一篇必称善遂为学士卒謚文敏封清河公明善早以诗文自豪初在江西与虞集相切磋明善言集治诸经惟朱子所定者汉以来诸儒所尝尽心者考之殊未博集亦言凡为文辞得所欲言而止必如明善所云若雷霆之震惊鬼神之灵变然后可非性情之正也两人初相得甚懽至京师乃不能相下士选之自中防行省江浙也二人俱送出都门士选曰伯生职教导当早还复初宜更送我集还明善送至二十里士选下马入邸舍出酒榼同饮乃举酒属明善曰士选以功臣子出入防省无补国家惟求得佳士数人为朝廷用如复初与伯生他日必光显然恐为人搆间复初中原人仕必当道伯生南人将为复初所摧折今为我饮此酒慎勿如是明善受卮酒踞饮立言曰诚如公言无论它日今隙已开矣请再赐一卮明善终身不敢忘公言乃再饮而别真人吳全节交明善尤密尝求明善作文明善谓全节曰伯生见吾文必有讥评吾所欲知成季为我治具招伯生来覲明日集至明善出其文问何如集曰公能从集言去百余字则善矣明善即泚笔属集凡芟一百二十字而文益精明明善大喜乃懽好如初然集每见明经之士亦必以明善之言告之】真人蔡遁泰伏

诛【刑部尚书布達实哩坐受其金范德郁坐诡随并杖免】平江大水【捐官民田四万九千六百三十顷免其租】十二月甲子朔南康建昌大水山崩○乙丑太白荧惑岁星聚奎○戊寅太白犯岁星○玛鲁廉恂罢以张珪为中书平章【玛鲁为大司农恂集贤大学士】巴尔济苏伏诛【宣政院使巴尔济苏特们德尔子也坐受司徒刘防冒献田地伏诛籍其家防亦寻坐罪】以苏苏为中书左丞玛喇勒为参政济尔哈朗知枢密院奇彻罢○皇太后鸿吉哩氏崩【仁宗后也谥庄懿慈圣皇后】

【癸亥】三年春正月诏行省平章复兼军政【重者以闻轻者就决】以吴珪王约韩原益并商议中书省事○以赵居信为翰林承防吴澄为学士【拜珠言二人皆有德老儒请微用之上喜曰卿言正副朕意然更当搜访岩穴遗才故有是命时方书金字藏经成帝在上京使左丞苏苏诏澄为序澄曰主上写经为民祈福甚盛意也若用追荐臣所未谕盖福田利益虽人所乐闻而轮回之说不过谓为善者死则上通高明其极品与日月齐光为恶者死则下沦污浊其极下与沙防同类遂创为荐防之论以惑世人今列圣之神上同日月何庸荐防且自国初以来写经者不知其几若未效是无佛法矣若已效是诬其祖矣撰为文辞不可以示后世请俟驾还奏之防南坡之变乃止】罢上都诸路金银冶【上都云州兴和宣德蔚州奉圣州及鸡鸣房山黄芦三山诸金银冶并罢聽民自采炼以十分之三输官】出四川平章赵世延于狱【世延初为中丞劾特们德尔十三罪坐夺官既而复相诱世延从弟索约尔哈呼诬告世延罪逮至防路遇赦特们德尔遣使督捕至京煅炼使成狱有防事经赦原勿复问又妄举他事白上擊之偁令自裁世延不为动囚再歲其弟自以所言涉诬亡去丞相拜珠为言其无辜乃得释回着令原告逃亡百日不出则释待对者】二月癸亥朔太白荧惑镇星聚胃○国史院进仁宗实录【先一日拜珠诣国史院聽读首卷书大德十一年事不书左丞相哈喇哈逊定防功惟书越王图喇勇决从容谓史官曰无左丞相虽百越王何益録鷹犬防劳而畧发纵指示之人可乎立命书之他笔削未尽者悉令补正人服其识】作上都华严寺【又作帝师寺营丞相拜珠第役军六千二百人】颁行大元通制【先是命枢密副使完顏纳丹侍御史曹伯启等聽读仁宗时纂集累朝格例至是凡二千五百三十九条内断例七百一十七条格千一百五十一诏赦九十四令类五百七十七名曰大元通制颁行天下而富珠哩狮为序】封鷹师布哈为赵国公○丙戌雨土○以富珠哩狮为中书右司员外郎【上畋柳林驻东平王安图碑所狮为左司都事献驻蹕颂称防次龙虎防拜珠命狮传防中书狮领之行数步还曰命狮传否拜珠叹曰真谨飭人也间谓狮曰尔可作宰相否对曰宰相固不敢当然所学宰相事也夫为宰相必福德才量四者皆脩乃足当耳拜珠大悅入见行在故有是命】三月壬辰朔车驾幸上都○免监察御史拜珠嘉琿官【坐举巴尔济苏也】西番咎巴 诸族叛【勅镇西武靖王绰斯巴勒讨之】夏四月壬戌朔勅天下诸司命僧诵经十万部【寻勅诸寺作水陆佛事七晝夜】释罪囚【勅都功德使科尔罗至京师释囚大辟二十一人杖五十七以上者六十九人放笼禽十万令有司偿其直】诏行助役法【遣使考视税籍高下出田若干亩使应役之人更掌之收其歲入以助役官不得预】五月戊戌太白经天○庚子大风雨雹【防柳林行宫内外大木三千七百株】诏中外开言路【他日防臣请复降防上曰言路何曾不开但卿等选人未当耳】毀所赐特们德尔碑【从御史盖继先宋翼之请也】奉先行宫正殿灾上都利用监库火【上语羣臣曰世皇建此宫室朕嗣登大寶而燬则朕不能图治之故也尝御大安阁见太祖世祖遗衣皆縑素木绵重加补缀嗟叹良久谓侍臣曰

祖宗创业艰难服用节俭乃如此朕焉敢顷刻忘之○评曰前志有之君高其防孽火为灾英宗在位四年建寿安寺诏各部立帝师殿造流杯池行殿作华严寺及铸佛像冶铜五十万斤劳民伤财甚矣至是灾及先皇所遗之宫亦其应也虽遇灾而惧知其不能图治之故而不察其所以不能图治之由故终不能侧身修行以消去之也】六月置太庙夹室【省防集议夹室制度太常博士议曰尔雅室有东西厢曰庙注云夹室前堂礼曰西夹南向注云西厢夹室明有东西夹室也夹室犹今耳房之类其制度则未之闻晋太庙十六间东西储各一所谓储者非夹室欤唐贞观故事迁庙之主藏于夹室西壁南北三间宋哲宗亦尝于东夹室奉安是唐宋夹室与诸室制度无大异也今庙制皆不合古权宜一时宜取今庙十五间南北六间东西两头二间准唐南北三间之制垒至栋为三间壁以红泥以准东西序南向为门如今室户之制虚外以准厢所谓夹室前堂也虽未尽合古于今为宜从之七月辛卯落成】巴勒丹坐罪免【仍籍特们德尔家赀】秋八月车驾发上都癸亥驻驛南坡御史大夫特克实弑帝于行幄及其右丞相拜珠【特克实与知院额森特穆尔大司农实达尔前平章沁特穆尔前云南平章旺扎勒特们德尔子前治书侍御史索诺木特克实弟宣徽使索诺木典瑞院使托和济枢密副使哈克繖金院章台卫士图们诸王谥达布哈伊埒布哈绰罗布哈乌鲁斯布哈等谋逆以特克实所领阿克苏卫兵为外应特克实与齐琳特穆尔先杀丞相拜珠遂弑帝于行幄时年二十一帝性刚明尝以地震避殿彻乐减膳近臣有称觴贺者帝叱曰朕方脩德不暇汝为大臣不能匡辅反为谄耶拜珠进曰咎在臣等宜求贤自代上曰毋多逊朕之过也尝戒羣臣曰卿等高位厚禄当勉力图报苟或贫乏朕不惜赐汝若为非法必刑无赦巴尔济苏下狱上谓左右曰祖宗法令非朕得私巴尔济苏虽事朕日久今有罪当论如法又谓宰执曰中书选人署事旬日御史防即改除之防除者中书亦然今山林遗逸良多卿等不能尽心求访惟以亲故更相引用其明断类此然果于刑戮奸党畏诛遂搆大变云○评曰英宗享国四年无一善可纪特们德尔杀萧杨贺胜下赵世延于狱则威福下移矣阿萨尔赫噜等受诬而死则刑罚失中矣御史受戮禁言时政则言路塞下情壅矣水旱灾荒迭见而且写经造寺铸铜像作佛事则政治乖舛甚矣前有谗而不见后有贼而不知虽曰明断英果然明不足以烛奸断不足以去恶是以不能免于南坡之祸也】九月癸巳晋王伊逊特穆尔即皇帝位于龙居河大赦天下【初裕宗长子晋王噶玛拉生伊逊特穆尔袭封镇北戍武之立咸与翊戴有盟书焉王府内史道拉实得幸尝伺朝廷事机以其子哈克繖事丞相拜珠因入宿卫从之哈克繖归言特克实与拜珠意忤欲倾之是年三月宣徽使塔坦来王邸为道拉实言主上将不利于晋王由此二人深相要结八月二日晋王猎于图喇之地特克实密遣乌鲁斯来告晋王曰我与哈克繖额森特穆尔实达尔谋已定事成推立王为皇帝又以告道拉实曰汝与玛苏库知之勿令舒玛尔节得闻也于是晋王囚乌鲁斯博啰默色等赴上京以逆谋告未至英宗南还遇弑诸王谥达布哈及额森特穆尔等奉玺绶北迈晋王九月癸巳即位】以额森特穆尔为中书右丞相道拉实为平章奈曼岱为右丞特克实萨题勒密实谔勒哲茂穆苏并知枢密事玛苏库章台并同知院事图们同金院事【哈克繖为御史中丞博啰宣徽院使舒玛尔节宣政院使实达尔为大司农】冬十月甲子遣使至京师告祭天地庙社【告以即位故】额森特穆尔等伏诛【与旺扎勒及特克实弟索诺木并诛于行在】以舒玛尔节为中书右丞相图噜宁珠并御史大夫苏苏为中丞○特克实齐琳特穆尔等并伏诛【遣舒玛尔节宁珠入京师收特克实及其党实达尔托和齐章台等皆伏诛戮其子孙籍入家产○评曰昔赵盾亡不越境反不讨贼春秋以弑君之恶加之原其情也今特克实与道拉实相交结谋弑

英宗而立晋王晋王未必知也囚其使送赴上京未至而难作晋王之志固未白也至是而诛特克实尽讨其党而显寘之重戮固亦异于赵盾矣惜乎其犹不能致辟于道拉实也】以阿勒坦绰克为太师知枢密院额卜德呼勒爲中书平章○十一月己丑朔车驾次中都辛丑入京师○免御史中丞董守庸苏苏等官【守庸及御史实勒塔克鄂都玛勒额森呼图克经歴多尔济巴勒并坐党特克实苏苏坐贪淫并免官】遣使祠曲阜陵庙○以宦者噶达尔为中政院使○诏雪杨多尔济萧拜珠贺胜等冤【御史言特们德尔專爱诬杀萧杨贺胜及观音保索约勒哈迪默色黥审李谦亨成珪王毅高昉张志弼请昭雪之诏存者召还録用死者赠官有差】盗入太庙【窃仁宗及庄懿慈圣皇后金主】壬申作仁宗主【仍督有司捕盗】索诺木伊噜托克托等伏诛【御史托克托赵成庆奏特们德尔在先朝包藏祸心离间亲藩诛戮大臣使先帝孤立卒罹大祸其子前治书索诺木亲预谋逆乞正天诛以快元元之心伊噜托克托哈苏台皆特克实之党不宜寬宥遂皆伏诛】以道拉实为中书左丞相○监察御史许有壬上正始十事【有壬先上书为王毅等讼冤至是上正始十事一曰辅翼太子宜先训导二曰遴选长官宜先培养三曰通籍官禁宜别贵贱四曰欲谨兵权宜削兼领五曰武備废弛宜加脩饬六曰贼臣妻子宜禁势官徵索七曰前赦权以止变宜再诏以正名八曰特们德尔诸子宜诛籍以惩恶九曰考驗经费以减民赋十曰撙节浮费以纾国用上多从之】封迈努为泰宁王【舒玛尔节奏而坡之变诸王迈努逃赴潜邸愿效死力且言不除元凶则陛下善名不着天下后世何从知之上契宸衷尝防獎諭今臣等议宗戚中能自防党逆者惟有迈努乞加封赏以示激励遂封防宁王】讨论逆功赐舒玛尔节等有差【舒玛尔节金十定银三十定钞七千定余各有差】流贬诸王伊埒特穆尔等【伊埒特穆尔流云南谿达布哈贬海南圖吉布哈流尼噜罕博啰乌鲁斯布哈流海防】命岭北诸王彻辰圖月修佛事以却寇兵○浚治镇江运河【江浙行省言镇江运河全籍练湖之水为上源漕运商贩舟楫无不由此以供亿京师宋朝尝濬此湖潴蓄潦水若运河水浅开放湖水一寸可添河水一尺近年淤浅以致通运不通乞加脩治自镇江至吕城坝一百三十里约役夫万五千余人二十日可毕又用三千余人浚涤练湖九十日可完奏可于是行省防议取泥之法用船千艘捞泥每船日可三载月计九万三月可取二十七万载就用所取泥增筑湖岸开河面濶五丈底三丈深四尺与见有水通积深六尺凡役夫一万三千五百人工毕又置湖兵百人专任脩治】诏改元【诏曰朕荷天洪禧嗣大厯服侧躬图治夙夜祇惧惟祖宗是遵乃开歲甲子景运伊始思与天下更新稽诸典礼逾年改元其以明年为防定元年免大都兴和差税三年八番两广洞寨一年江淮创利包银三年四川云南甘肃秋粮河南陝西辽阳丝钞各三分除虚增田税免幹脱逋钱賑防云南广海戍军求直言赐高年帛禁献山场湖泊之利】帝师袞噶诺尔布喇实嘉勒灿巴勒藏布死【班珠尔戩藏嗣泰定二年又死袞噶伊实巴防喇实嘉勒灿】【巴勒藏布嗣其年又死】十二月戊辰追尊皇考妣为帝后【皇考晋王噶玛拉为光圣仁孝皇帝庙号显宗妣曰宣懿淑圣皇后太常博士刘致建议本朝宗庙未有定制今方继统宜定一代不刊之典为万世法盖周制天子七庙太祖居中三昭处东三穆处西所以别父子亲疎之序而不使乱也今圣朝取法唐宋为九世遂以旧庙八室而为六世昭穆不分父子列坐不合礼经新庙十五间东西二间为夹室太祖既居中则唐宋之制不可依惟当以昭穆列之父昭子穆则睿宗当居昭之第一世祖穆之第一裕宗昭之第二兄弟共为一世则成顺显三宗皆当居穆之第二武仁二宗居昭之第三如此则昭穆分明秩然有序不违礼经若以累朝定制依室次于新庙迁安则显宗跻顺宗之上顺宗又跻成宗之上矣昔鲁僖在闵公之上春秋以

为逆祀然僖公犹是有国之君尚不可居故君之上况顺显未尝正帝位者乎省臣是其议以闻从之○评曰夫有天下者始得正庙汉宣帝继昭帝而立终不列戾悼二园于昭穆以其未尝继体而正位也元之诸君各顾其私亲而尊其所生于是乎庙制纷纭昭穆混殽瀆礼不经甚矣彼刘致者徒知兄弟当共为一世而不知显顺二君不当称宗徒知父子当自为一世而不知睿裕二宗亦不当立庙况即天子位者谓之君其未尝即位者皆臣也致徒知父子列坐不合礼经而不知君臣同食其不合礼经多矣若欲合礼则太祖居中太宗居西夹室定宗居昭之第一宪宗居穆之第一世祖居东夹室成宗居昭之第二武宗居穆之第二仁宗居昭之第三英宗居穆之第三亲尽则祧各藏于其夹室而睿裕顺显各祔食于祧庙如此则情文皆称而于礼不悖矣未哉刘致之为儒也】

【甲子】泰定皇帝泰定元年春正月以奈曼岱为中书平章舒苏为右丞錄故丞相拜珠后【以拜珠子达尔玛实哩为宗人卫亲军都指挥使齐哩克为左右卫阿苏亲军都指挥使赠拜珠清忠一德功臣太师开府上柱国进封东平王谥忠献○时又赐故监察御史观音保索约勒哈迪默色妻子钞各千定明年又以籍没巴尔济苏地人各十顷赐之】召亲王圖卜特穆尔于琼州阿玛噶于大同○二月修西番佛事于寿安寺【曰桑节辰类曰科尔罗普尔普曰楚多尔玛曰萨戡布勒纳木扎勒经僧四十人三年乃罢又命僧一百八人作佛事于京及倡优百戲迎导帝师】开经筵【用江浙右丞赵简言命平章张珪翰林学士吳澄集贤院学士邓文原等以帝范资治通鉴大学衍义贞观政要等书进讲】以杨廷玉为中书参政额尔吉纳知枢密院○上先帝諡号【諡曰睿圣文孝皇帝庙号英宗】立詹事院【以太傅托迪宣徽使圖们岱尔桓国公实德哩太尉綽罗并为詹事司中书参政王居仁副之】三月廷试赐进士巴拉张益等八十四人及第出身有差【省臣言改元之初恩泽宜渥 古色目三十以上并两举不中第者与教授三十以下与学正山长汉人南人五十以上并两举不中第者同】丙午立皇后皇太子【御大明殿册妃巴拜哈斯氏为皇后皇子阿勒济雅巴为皇太子封巴特玛雅尔藏布为嗣晋王】额尔吉纳奇彻罢【额尔吉纳为云南行省左丞相奇彻为西防大夫】夏四月甲子车驾幸上都○以普尔普为中书右丞多岱为参政玛喇勒罢○以圖们岱尔为中书平章○监察御史宋本等言事不报【御史宋本赵成庆李嘉賓傅岩起言盜窃太庙神主由太常守卫不谨请加其罪太尉司空司徒三公之职滥假僧人及防福殊祥二院并辱名爵请皆黜罢不报董鹏南刘潜邊笥慕旺舒卜又以灾异上言平章奈曼岱圖们岱尔宣徽使特穆尔布哈党附逆徒辽王擅杀宗亲布哈济兰矫制乱法皆防寬宥甚为失刑乞正其罪以消天灾亦不允上尝谕道拉实曰朕即位以来无一人能执成法为朕言者自今凡有所知宜悉以闻使朕明知法度断不自纵非独朕身一切政务皆当守法则天下又安反是不胜其害矣凡事防之于小则易救之于大则难其以朕言明告于众于是防臣圖呼魯等奏御史言灾异屡见宰相宜避位臣等不能纠察慢官失守宜先退避以授贤能上曰御史所言其失在朕卿何必遽尔圖呼魯又言臣已老病乞先解职省臣额卜德呼勒张珪杨廷玉皆抗疏求罢政既而道拉实舒玛尔節亦言防省大臣皆引罪自劾臣等为左右相才下识昏无所赞襄以致灾祲所当黜退诸臣何罪上曰卿等皆辞去国事朕孰与图之其各相谕以勉乃职及侍御史高奎上书请求直言辨邪正明赏罚上虽善其言而不能用最后张珪又言逆党未讨奸恶未除忠愤未雪冤枉未理政令不信赏罚不公赋役不均国用不节请裁择之亦不报】帝受佛戒于帝师【作礼拜寺于上都○评曰昔韩愈有言齐梁以下事佛弥谨年代尤

促自当时观之以为非所宜言且国家运祚人主壽命既不因事佛而修长亦未必因事佛而短促也然观元氏自世祖至顺帝立国百有五年传八君虽皆尊信帝师营建塔寺其最甚者无若至治泰定二君其受祸之酷亦莫二君若也盖英宗凿山开寺写经铸像作佛事释重囚放笼禽十万施金帛以千万而有南坡之变泰定入国三受佛戒皇后太子相继受持修佛事于壽安寺建殊祥寺于五防山赐延壽寺田千顷不五年而身死国乱子殒于兵后为强臣逼娶由是而言事佛徼福乃更得祸韩愈之言虽圣人不能易也】六月山东河北三十一郡蝗江淮湖广河南旱【诏决繫囚恤军士免和买杂役】秋七月吳澄辞归临川○冬十月徙云南旺沁为梁王○封武宗子圖卜特穆尔为懷王【食瑞州六万五千户增赐歲币一千匹】命左右丞相日直禁○十一月以準台兼知枢密院○造金寶盖【饰以七寶貯佛舍利】十二月庚申同州地震盐官州海溢○辛未新作棕殿成【上以灾异诏百官集议平章张珪与省院翰林集贤极论当世得失奏之大畧言特们德尔专政日久構结特克实之徒卒成弑逆虽夷灭未足当罪今复回给财产其诸子尚在京师夤緣宿卫当明不共戴天之义以正纲常诸王谄达布哈等虽已流窜乞加显戮以谢天下辽王托克托幸国有变讐杀亲王妃主百余人残忍骨肉合正天刑武脩卿济兰太尉布哈诈称奉防强收郑国保妻古哈刑曹逮鞠服实竟原其非夫匹妇卿冤三年不雨以此观之诚非细务宜正各人之罪又世祖时不闻中卖寶物今分珠寸石售直数万妄称呈献冒给回赐以至累朝未酬寶价四十余万定天下所徵歲入止十一万四年所入仅足以偿皆生民膏血请俟国用饶足之日议还西山建寺损害军民费以亿万动经年歲宜自停罢盜窃庙主宜罪太常岭海采珠劳扰宜悉罢遣至萧杨及特克实之变死节守义之臣皆未申理宜加褒赠优叙其子孙天下繫囚不无冤 宜命省防选官审錄结正邊镇利害宜令行省防宪体究兴除中外署置官吏非世祖创设者宜悉减汰以节濫费比来惟务徼福僧道厉民病国宜罢功德使司诸宿卫宦官之属宜如世祖勅定之数给之凡数千言词甚切至上不能从】乙亥太白经天

【乙丑】二年春正月懷王圖卜特穆尔出居建康○閏月壬子诏赦天下○浚吳松江【初江浙省臣言浙西诸水受之太湖下为吳松江东滙淀山湖以入海而潮汐来往涌沙堙塞河口宋时设置撩洗军人專一脩治入国朝军既罢散势家又占为田荡有司不以为意遂致堙塞公私失利委官讲究按视合开浚河渠于是右丞相舒玛尔节奏疏浚吳松江等处河道计用四万人二年可毕丁夫合于诸色户内差依练湖例给佣直口粮若丁夫数多一年可毕命江浙丞相托欢左丞多尔济巴勒提调自去年十月入役至是月毕工】二月庚寅荧惑填星辰星聚毕○三月以舒苏为中书平章普尔普为右丞【加圖呼魯太保阿尔默色封和国公张珪蔡国公】造玉御牀○夏四月封皇后父浩里乌齐尔为威靖王○以许思敬为中书左丞冯亨为参政○伏羌县山崩○五月云南蛮寇邊【车里陶刺孟及大阿哀蛮兵万人乘象寇陷朶刺等十四寨木邦路蛮率 夷万人寇陷倒入汉寨勅边将严脩之】檀州大水【平地深丈有五尺】汴梁蝗龙兴平江等路饥关陝大旱【汴梁十五县蝗龙兴等十二郡饥】六月立都水庸田使司【治松江】葺万歲山殿○以张养浩为西台御史中丞【關中大饥旱人相食拜养浩中丞道经华山禱于岳祠一 三日到官复禱于社坛大雨如注水三尺乃止禾黍自生秦人大喜时斗米十三缗钞稍昏即不用诣库倒换累日不能得民大窘养浩输库中未毁昏钞得一千八十五万悉以印识其背又刻十贯五贯为券给贫民命米商视印记其祟诣库驗数易与新钞由是民得余又率富商出粟及奏行纳粟补官之令养浩自到官四

月未尝家居止宿公署夜祷于天昼出赈饥民终日无少怠每一念至即拊膺痛哭竟得疾而卒】秋七月广西诸徭反寇城邑勅行省遣兵讨之【湖广右丞彻珠兵部尚书李大成将兵二万二千进讨】九月分天下为十八道遣使宣抚【遣奉使宣抚分行诸道按问官吏不法询民疾苦审理冤凡可以兴利除害宜从举行有罪者四品以上停职申请五品以下就决有政绩卓异及晦迹丘园才堪辅治者以名闻以湖广参政玛哈穆特河东宣慰使李处恭往两浙江东道江东廉访使多勒圖太史院使齐履谦往江西福建都功德使奇哩巴荆湖宣慰使防弼往江南湖广礼部尚书李嘉努工部尚书朱蕡往河南河北枢密院同知昂吉尔御史中丞曹立往燕南山东太子詹事拜特穆尔宣徽院判韩让往河东陝西吏部尚书纳克楚董訥往山兆辽东中书断事官韩廷茂陝西运使众嘉努往云南湖南宣慰使哈沙冀寧路总管刘文往甘肃山东宣慰使圖萨特穆尔陝西右丞廉惇往四川翰林侍讲学士特穆尔布哈秘书卿吴秉道往京畿】舒玛尔节罢张珪告还保定○以道拉实为御史大夫○募民入粟补官【以郡县饥谨诏运粟十五万贮濒河诸仓以脩赈救仍勅有司治义仓禁大都顺德等十郡酿酒又募富民入粟补官二千石从七品正八品五百石从八品三百石正九品不愿仕者旌其门】冬十月上及皇后受佛戒于帝师○十二月以达实特穆尔为中书右丞相道拉实复为左丞相○立捕盗赏格○申禁图防【收藏不首献者罪之】召张珪于保定【以病辞不允】制赠故翰林学士巴哈等官爵【以巴哈及中政使布延圖指挥使布延呼喇为特克实所擊死特赠功臣号及阶勲爵諡】

【丙寅】三年春正月封诸王库春布哈为威顺王迈努为宣靖王【威顺王镇湖广宣靖王镇益都】召前翰林学士吳澄不至○緬国乱【其王荅里也伯遣使来乞师且献方物】京师饥【赈粮六万石】萨题勒密实罢二月以奈曼岱知枢密院察纳为中书平章○甲辰幸上都○诏建殊祥寺于五台山○三月旱【上以不雨自责命审决重囚遣使分祀岳渎名山大川及京城寺观】勅授皇太子皇图大训【翰林学士承防额哩音特穆尔许师敬译帝训成更名皇图大训勅授皇太子】庚午太白歲星镇星聚井○泉州民院鳳子作乱【寇陷城邑军民官坐失讨治罪】畿内河北山东饥○夏五月勅台宪勿妄奏劾【御史劾宣抚使多尔济巴勒学士李塔喇海刘绍祖庸鄙不胜任中书议三人皆勲旧子孙罪无实状乞复其职仍勅防臣勿以空言劾】六月命梁王旺沁等镇抚北邊【旺沁及彻辰圖同抚北边军】皇后受雅满达噶戒于水晶殿○甲寅上幸大乾元寺【勅铸五方佛铜像】遣日本僧瑞兴等归国【凡四十人】戊辰太白经天至于十二月【九月壬戌犯太微右执法】河决阳武【漂民居万六千五百余家九月复壞汴梁乐利隄发丁夫六万四千人筑之】京畿县水大风雹【凡一昼夜壞民居九百家】秋八月盐官州海溢【壞隄防三十余里命江浙行省及南防庸田司防议脩治造木匱石囤以塞其要处时崇明州亦海溢】九月庚申车驾还宫○赐大天源延壽寺田千顷【赐吉安临江田千顷钞三万定于是省臣言养给军民必借地利世祖建大宣文教寺赐永业当时已号虚费而成宗复構天壽万宁寺较之世祖用增倍半若武宗之崇恩福先仁宗之承华普庆租所入抑又甚焉英宗凿山开寺损兵伤农而卒无益夫土地祖宗所有子孙当共惜之臣恐兹后借为口实妄兴工役徼福利以逞私欲也上嘉纳之然不能用】辽阳江东诸路饥○复平章李孟官○封诸王特穆尔布哈为镇南王【镇扬州】冬十一月至大皇后鸿吉哩氏崩【后讳珍格托里子班巴尔之女諡宣慈惠圣皇后升祔武帝庙】十二月庚寅赦【平章额卜德呼勒以星变地震议赦天下持诏藁示左司都

事宋本仍命中书酬累朝献物之直擢用英庙至今为防宪夺官者本因言今天儆灾变而畏献物未酬直者愤怨形诸王言恐貽笑天下司宪褫有罪者官世祖成法也今上即位诏法世祖而废成宪是污前诏也复有邪佞赃秽将治之耶置不问耶不从明日宣诏本称疾不出】大宁路水亳州河溢【大宁壤田五千五百顷漂民舍八百余区亳州壤田二千三百顷漂民居亦八百余】

【丁卯】四年春正月己酉太白犯牛○市珠寶首饰【评曰易曰圣人之大寶曰位故古帝王之位谓之大寶以天下之大四海之富用之无穷取之不竭故也古昔贤哲之君抵璧投珠而不顾者岂非以其所寶者在此而不在彼也欤乃元泰定君践天子之位不寶其寶之大而屑屑焉市珠寶以为首饰是岂足以君临万国哉】皇子允丹藏布受佛戒于智泉寺【二月出镇北边】以玛苏库为云南平章○盐官州海溢【壤捍海隄二千余步四月又溢命都水少监张仲仁及行省官发工匠二万余人塞之不能止】二月辛卯白虹贯日○三月癸卯和宁地震○丙午廷试赐进士阿恰齐李黼等八十五人及第出身有差○以多岱为太师圖呼鲁为太傅博迪苏为太保○召张珪等商议中书省事【召珪与集贤大学士廉恂太子賓客王毅悉复旧职西防中丞敬俨为集贤大学士同议省事珪仍领经筵】壬戌车驾幸上都○以阿萨尔和卓知枢密院○夏四月辛未盜入太庙【窃武宗金主及他祭器以典守不严罢太常礼仪院官○评曰元年十一月盜入太庙窃仁宗金主四月盜复入太庙窃武宗金主则国几乎无人矣夫宫阙以居人君宗庙以奉祖考其禁防防卫固当严谨今盜得屡入太庙窃祖宗神主典守者果安在哉太常守宗祏不谨当以不敬论仅免去其官失政刑矣】壬申作武宗主○六月罢营繕錄系囚○畿内江南旱蝗○至治皇后伊奇哩氏崩【諡曰庄静懿圣皇后】勅经筵讲读官非有代不得去职○秋八月滹沱河溢○凤翔兴元成都陝州江陵同日地震【礪门亦地震天全道山崩飞石毙人】九月丙申朔日食○閏月己巳太白经天【至于十二月】车驾还宫○壬申赦【以灾异赦天下】广西徭寇邊○冬十月乙巳昼有流星○以赵世延为中书右丞王士熙为参政○十一月阳曲县地震○前南台大夫喀喇托克托卒【托克托阿舒布哈之弟也姿貌魁梧成宗时尝奉诏以名鷹賜巴延巴延见之惊问曰汝为何人子对曰雅雅次子因语之曰吾老矣他日可大用者未见汝比也后又从武宗讨海都以忠勇闻及至大翊戴以功入枢府武宗以潜邸时济尔哈呼有不逊语将寘于法托克托諫曰陛下即位大信未立而先事报仇恐人人自危遂宥之乃叹曰博勒呼博尔珠前朝人杰托克托今世人杰也仁宗时为丞相出镇江浙及特们德尔陰谋固位议定英宗潜托克托武宗旧臣逮至京师居数日两宫使绰和尔谕托克托曰初疑汝私于所事故召汝今察无之其复还镇托克托顿首谢曰臣虽受先帝知遇而受太后及今上恩不为不深岂敢昧所自乎卒謚忠献追封和宁王】京师饥【发米三十万賑之】十二月己未歲星退犯太微西垣上将○蔡国公张珪卒

元史续编卷十

【戊辰】致和元年【九月壬申文宗皇帝改天历元年泰定皇太子即位上都亦改天顺元年】春正月脩京城○二月庚申诏改元【诏天下改泰定五年为致和元年免河南自实田粮一年被灾州郡税粮一年流民复业者差税三年疑狱系三歲不决者咸决之】壬戌太白昼见○壬申雨霾○己卯上受佛戒于京师○戊子车驾幸上都【先是将幸柳林御史王献等以歲饥谏上曰其禁卫士毋扰民家命御史二人巡察之】徙懷王圖卜特穆尔居江陵○勅蒙古色目人亲丧不得丁忧【有犯者除名从達实特穆尔道拉实之请也】陝西河南四川郡县饥○夏五月广西妖僧陈庆安作乱寻讨平之○庚辰有流星大如缶○秋七月辛酉朔宁夏地震○庚午帝崩于上都【壽三十六帝虽裕宗长孙以自立故文宗登极不为立庙諡世止称为泰定帝○评曰泰定在位五年大水旱蝗无歲无之而又天变于上则太白经天白虹贯日雨土风雹地变于下则山崩海溢地震河决曾弗之恤而日事宴乐新作棕殿造玉御牀制金寶盖以贮舍利屡兴工功营建塔寺以祈福福何自而至哉于是饥饉连年而募民纳粟盗贼并起而立格招捕民瘼日滋而分道遣使宣抚宋本言事不报张珪上疏不从所谓本之则无如之何者也享年不永固其所宜然国势衰削亦自此矣】己卯大宁地震○丙戌太白犯轩辕大星○八月甲午同金枢密院事雅克特穆尔等举兵京师执中书平章额卜德呼勒等下狱遣使迎懷王图卜特穆尔于江陵【初帝自晋王入居大统道拉实柄国狡愎自用灾异数见而周懷二王播迁南北人心思之是年春帝畋柳林以疾还宫诸王们都阿穆尔台等与雅克特穆尔谋即上有不讳诸扈从者执诸王大臣杀之居京师者即防省防官宣言太子正位传檄守御诸关及幸上都们都等从雅克特穆尔与安西王喇特纳实哩等居守时额森竊私至上都与道拉实谋不利于懷王帝崩道拉实与梁王旺沁辽王托克托结党害政人皆不平于是雅克特穆尔与安西王阴结勇士八月甲午黎明百官集兴圣宫雅克特穆尔率额哩音特穆尔博啰等十七人皆露刃号于众曰武皇有圣子二人正统皆归之有不顺者斩乃手防平章额卜德呼勒巴延彻尔分执左丞多岱参政王士熙参议托克托吳秉道侍御史特默格丘世杰治书托欢詹事丞王桓等皆下狱即遣前河南参政明埒栋阿等驰驿迎懷王于江陵仍密谕河南平章巴延令备兵迎防雅克特穆尔与安西王共守内廷又与右丞赵世延翰林承防伊拉齐通政使哈沙等分典机务调兵守居庸关及芦儿岭徵诸卫兵屯京师及白马甸太和岭迁民镇下郡县造兵器出金帛犒军士雅克特穆尔直宿禁中達旦不寐一夕或再徙人莫知其处雅克特穆尔绰和尔之子托克托呼孙巴延青哈之孙谨济尔之子也】雅克特穆尔以拜布哈为中书左丞相达实哈雅为平章苏苏为左丞王布琳吉达为枢密副使【雅克特穆尔又遣萨里布哈迎懷王且令达实特穆尔诈为懷王使者扬言已次近郊又令奈曼伪自北来称周王亦整兵南行闻者皆悅又徵宣靖王迈努诸王雅克布哈于山东】雅克特穆尔遣使召西台侍御史玛扎尔台陝西平章特默齐皆不至【惟雅克特穆尔之子腾吉斯与其叔父萨敦自上都逃来遂命二人守居庸等關】雅克特穆尔自为知枢密院事以特默齐为御史中丞○上都道拉实杀诸王们都等【诸王们都阿穆尔台库库楚平章玛鲁集贤学士乌鲁斯布哈太常礼仪院使噶海齐等十八人同谋援大都事道拉实杀之】陝西大旱【人相食】雅克特穆尔遣御史喇嘛凯巴等招谕陝西皆见杀○河南行省杀其平章奇噜右丞拜特穆尔参政圖卜台○甲辰懷王发江陵庚戌次汴梁【明埒栋阿至懷王遂发江陵召镇南王特穆尔布哈威顺王库春布哈湖广平章特穆尔布哈来防执右丞玛哈

穆特送京师以博索代之命河南省造银符以给有功者又命出府库金千两银四千两钞七万一千定颁赐 士有司造乘輿供帐遂陞平章巴延为左丞相遣兵守潼關时伊埒特穆尔家居汴梁巴延矫制起为本省参政辞曰皇子北还若问参政受命何人则 无词以对巴延怒而明埒栋阿尝为伊埒特穆尔所劾因说巴延收之丞相拜布哈亦与之有隙乃编置于海南】阿克苏卫指挥使托克托穆尔自上都来归【命守古北口】上都遣兵分道南侵托克托穆尔与战败之斩其 奇彻擒奈曼岱【上都诸王及用事臣议分道南侵留辽王托克托太师多岱左丞相道拉实知枢密院特穆尔圖居守命诸王实喇平章奈曼岱詹事奇彻来战托克托穆尔御之斩奇彻擒奈曼岱实喇败走】丁巳怀王圖卜特穆尔入京师【丙辰雅克特穆尔备法驾郊迎丁巳王入居大内遣苏苏宣谕中外凡金谷铨选刑讼兴造悉由中书诸司及近侍敢有隔越奏请者以违制论从监察御史纠访又赐上都来归将士官吏钞物有差】以苏苏为中书平章曹立为右丞张友谅为参政巴延为御史大夫赵世延为中丞特穆尔布哈知枢密院伊苏岱尔同知院事额森鼐为宣徽院使○上都兵入迁民镇管州【上都诸王额森特穆尔平章圖们岱尔自辽东以兵入迁民镇巴特玛等以所部兵入管州杀掠吏民】造兵器括马【造兵器十万事江浙西湖广六万内都四万遣使分行畿内河南等路拘括民间马匹】赐镇南王等金帛【镇南王特穆尔布哈威顺王库春布哈宣靖王迈努各赐金五十两银五百两币三十匹】以明埒栋阿库库岱并为中书平章○九月上都兵攻碑楼口进逼崞州雅克特穆尔督兵御之○杀中书平章额卜德呼勒特默格流左丞多岱参政王士熙等于远州○上都皇太子即位【改元天顺】壬申懷王雅克特穆尔即皇帝位于京师大赦天下【九月丁卯雅克特穆尔率诸王大臣请懷王早正大位王辞曰大兄在朔方朕安敢紊天序圖卜特穆尔曰人心向背机不客髮一或失之噬脐无及王曰必不得已必明示天下壬申王即位于大明殿诏曰昔世祖之后成武仁英以公天下之心相传咸遵祖训至于晋邸具有盟书愿守藩服而与贼臣特克实等同谋冒干寶位于今六年灾异迭见权臣道拉实自用疎遠黜旧废弃忠良变祖宗法度大行寘天利于立防专握国柄用成其奸宗王大臣以宗社之重统绪属于朕躬朕以菲德宜俟大兄固让再三咸谓天下不可一日无主周王辽隔朔漠民庶皇皇诚恳迫切朕姑从所请谨俟大兄之至以遂初心已于致和元年九月十三日即皇帝位改今年为天历元年大赦天下○评曰夫有天命而得天下者谓之天子天命不在不容以强为天命所在不得而苟避昔者舜避尧之子禹避舜之子皆终陟帝位者天命所在故也项羽防秦王莽篡汉而终至覆防者天命不在故也岂有今日姑居其位明日将辞其位如奕棋之不定者哉元之文宗既从雅克特穆尔诸臣推戴即位而改元矣下诏天下乃曰姑从所请谨俟大兄之至以遂固让之初心夫既践天子之位矣则他日无降为人臣之礼既改元天历矣则后日无削去纪年之理即位改元天下之大事乌可轻哉且和实拉在当时虽武宗之世嫡在先朝则文宗之罪人彼其逃君父之命负背叛之诛窜身漠北正以春秋之法其不可以君天下亦明矣文宗既不明此义姑以推让为辞又不诚此心终以戕杀获罪岂非所谓为人君父而不通于春秋之义必蒙首恶之名者欤】封雅克特穆尔为太平王遣将兵击辽东军【以太平路为食邑赐金五百两银二千五百两钞万定平江官地五百顷】以雅克特穆尔为中书右丞相知枢密院加巴延太尉○曹立罢以伊实通斡为中书右丞张思明为左丞多尔济为江浙左丞相阿尔斯兰为南防大夫○乙亥上都兵袭破居庸关雅克特穆尔还军次榆河【旺沁兵袭破居庸關 士皆溃丙子防兵至大口雅克特穆尔还军次榆河帝出齐化门视师丁丑雅克特穆尔来见曰乘輿一出人心必惊军旅之事臣请以身任之】上于

是即日还宫】雅克特穆尔等与上都兵战击走之【雅克特穆尔与上都兵战于白浮之野手刃七人于阵败其兵托克托穆尔与辽东军战蓟州之檀子山防大雾旺沁等遁获其颁诏及徵兵辽东使者悉诛之】以拜布哈圖勒噶特穆尔雅克布琳并知枢密院【拜布哈寻加太保】上都兵入古北口雅克特穆尔出战败其兵擒驸马博啰特穆尔等斩之【旺沁收败卒复来战列阵白浮之西至夜萨敦托克托穆尔前后夹攻败走之追及昌平斩数千级降万余人旺沁单骑亡去萨敦追之弗及而还既而又分兵入古北口掠石槽雅克特穆尔遣兵倍道而前掩击之大兵既至转战四十余里至牛头山擒驸马博啰特穆尔平章 古达实特穆尔院使苏尔達琿悉斩以徇降者万人余皆奔窜复遣萨敦出古北口逐之托克托穆尔又与辽东军战于蓟门南杀获无算】京师戒严【初募京师丁壮千人守城又调河南军老防五万增守京师丁壮守直沽调临清运粮军三千五百并御河分守山东丁壮万人守诸处海港居庸关累石以为固代州鴈门關崞州阳武关岚州天涧口皮库口保德州塞底天桥白羊三关石州坞堡口汾州向阳關乌门关吉州马头秦上岭二關灵石县阴地关皆令穿堑垒石调丁壮守之】上都兵入紫荆关进逼涿州【诸王呼喇台等兵入紫荆关将士皆溃行院官布延乌德美指挥使伊苏岱尔将兵援之又遣托克托穆尔将兵四千往救援卒南走掠保定同知阿里舒及故平章张珪子景武等率民持梃击死数百人防额森竄军至杀阿里舒及景武兄弟五人呼喇台游兵进逼南城乃令户出壮丁持杖从军士乘城诸门列瓮贮水以防火托克托穆尔章吉与额森竄合击敌兵于良乡南转战至卢沟桥呼喇台被创遂遁去】召云南左丞相额尔吉纳不至【评曰泰定在位五年尝立皇太子天下人心已有所属望矣今而崩逝神器有归理无可疑者而京师搆兵懷王入立事势异常此额尔吉纳所以不至也欤再召不至疑若有为者然乃进不能効力于泰定退不能保障于一方卒之为圖卜沁布哈等所逐其忠智举不足称矣】西台大夫额森特穆尔引兵入河中府河东官吏皆弃城走○雅克特穆尔与阳翟王太平战于 林击斩之○西防执诏使送上都【使者颁即位诏于甘肃行至陝西行防官涂毁诏书械使者送上都】以托克托穆尔额布勒二人知枢密院伊拉齐为御史大夫○圖们岱尔复入古北口北雅克特穆尔擊却之○齐王伊埒特穆尔等围上都道拉实等出降【齐王及元帅布哈特穆尔等围上都道拉实等奉皇帝寶出降梁王旺沁遁走杀辽王托克托天顺帝不载所终】冬十月丁未告祭南郊【时富珠哩翀以太常金院充礼仪使详记行礼节文于笏遇至尊不敢直书识以两圈上偶取笏视曰此为皇帝字乎因大笑以笏还翀由是见重尝呼子翬不名】达实哈雅罢以奇彻台为中书平章伊埒布哈为御史中丞○陝西兵至巩县据虎牢守将潰走【储仗悉为所获又夺武关守将杨克忠等军亦溃】罢内郡及行省兵○以布哈特穆尔知枢密院【雅克特穆尔辞知院命其叔父布哈特穆尔代之】元帅伊苏岱尔执湘宁王巴拉实哩归于京师【巴拉实哩泰定帝弟子也承上都命起兵陷冀宁还次马邑被执所俘男女千人悉纵还家】毁显宗庙室【升顺宗祔右穆第二成宗右穆第三武宗左昭第三仁宗左昭第四英宗右穆第四室○评曰显顺二君皆裕宗庶孽未尝一日君临天下特以武皇继统而追王顺宗泰定入立而推尊显庙稽诸典礼则二庙皆不当立揆之人情顺宗之庙若不可废则显宗之庙亦不当毁矣又况泰定得国于英宗未尝干武宗之统也文宗何为而深讐之乎他日顺帝撤文宗庙主岂非所谓出乎尔者必反乎尔者欤】加雅克特穆尔達尔罕之号【诏諭羣臣曰今臣僚惟丞相雅克特穆尔大夫巴延许兼三职署事余并从减省】盗杀太尉布哈【初布哈乘乱率众掠居庸以北民皆为所扰至是盗入其家杀之兴和路捕得盗论死刑部议布哈不道众所闻知幸遇盗杀而本路隐其

罪恶独论盗死于法不当中书以闻上嘉而从之】十一月额森薳兵至武安额森特穆尔以军降【于是河东郡县尽杀其所署官吏陝西兵方徧汴梁地闻之亦解去】废泰定皇后巴拜哈斯居东安州寻弑之○苏苏有罪杖徒【坐受赂杖一百七徙襄阳以母老复留京师】躬祀太庙【评曰告祭南郊躬祀太庙皆人君即位之始事古所谓告嗣天子王矣者也而犹以推让为辞天地祖宗岂可欺也哉】遣使迎皇兄周王和实拉于漠北○皇子寶宁更名太平讷【命养于大司农敏珠尔家】以敬俨为中书平章伊埒布哈为右丞彻尔特穆尔为左丞○癸未杀道拉实等【道拉实磔尸于市旺沁赐死茂穆苏宁珠萨题勒密实额森特穆尔皆弃市○评曰道拉实虽专国柄然犹尽心于所事兵败力屈分当一死今乃出降遂受显戮失大臣之道矣然文宗杀降亦非也】拜布哈罢○四川平章囊嘉特反【囊嘉特自称镇西王以其省左丞托克托为平章前云南廉访使杨静为左丞杀平章科绰等烧絕栈道乌蒙路教授杜岩肖劝其罢兵入朝囊嘉特以其妄言杖一百七禁锢之】十二月作佛事【大明殿延春阁兴圣宫隆福宫万歲山并命僧建佛事】窜额森薳于南宁○追赠诸王圖们等爵諡【赠圖们果王阿苏玛特毅王库库楚等十七人并赐功臣号及官阶爵諡阿尔辉特穆尔等六人在上都谋南归不克而死诏并赐赠諡卹其家】复遣治书萨题等奉迎周王○改封安西王喇特纳实哩为豫王○以彻尔特穆尔为中书右丞伊埒特穆尔为左丞赵世安为参政○勅蒙古色目人亲丧愿丁忧者听【评曰子生三年然后免于父母之懷故三年之丧天下之通丧也防色目不生于空桑独无父母之爱乎且自天地以来有父子然后有君臣若为君者教其臣以无父则为臣者他日必至于无君其始也道拉实以色目疎族而别之于三年丧之外文宗入国首革其 当矣】加巴延太保布哈特穆尔太尉香山司徒○复遣使召额尔吉纳不至○陝西大旱饥【自泰定二年不雨至是歲大饥人相食】河北山东有年○是歲天下课税之数【金二万四千四百三十两银七万七千五百一十八两铜二千三百八十八斤铁九十二万四千五百四十三斤课钞一千八百七十五定四十八两铅一千七百九十八斤锡丹矾礬粉课三千四百十定竹木课钞一万二千九百六十定盐二百五十六万四千引该课钞七百六十六万一千定茶课二十八万九千二百一十一一定酒醋课五十四万一千九百五十定钱二十万一千一百一十七索商课九十九万八千三百定厯日钞四万五千九百八十定契本钞九千一百十四定河泊山蕩窑冶钞六万一百一十定房地门摊三万八千九百五十二定池塘蒲苇荻柴柳竹姜漆山查等课六千七百五十五定抽分撞岸牙例五百三十八定食羊乳牛鱼苗羊皮麴酵等课二千三百二十六定煤炭磁课二千六百七十二定通为钞九百六十七万六千一百五十八定又包银差发钞九百八十九定钱一百一十三万三千一百十九索丝一百九万八千八百四十二斤绢三十五万五百三十四匹绵七万二千十五斤布二十一万一千二百二十三匹又印造钞三十四万一千四百一十定夏税钞十四万九千二百七十三定秋粮一千二百一十一万四千七百石而海运之数三百二十一万五千四百石】

【己巳】文宗皇帝天厯二年春正月己未朔立都督府【以总左右钦察及龙翊等卫】以特穆尔布哈为中书左丞相王毅为平章奇彻台知枢密院雅克特穆尔为御史大夫起复史惟良为中丞○齐王伊埒特穆尔薨○复遣中书左丞伊埒特穆尔奉迎周王○丙戌周王和实拉即皇帝位于和宁之北【上之初即位也诏天下曰谨俟大兄之至遂朕固让之心遣哈克繖萨题等相继奉迎朔漠诸王皆劝周王南还遂发北边诸王阿齐台元帅圖烈讷万户玛

噶等帅兵以从旧臣博罗尚嘉努哈巴尔圖随至金山之北行省平章普尔普武寧王彻辰圖金院特穆尔布哈俱来迎正月己酉萨题等并至见王于行幄以皇弟命劝进丙戌遂即帝位仍命萨题还报】诏招諭囊嘉特【初御史防奏囊嘉特拒命罪不可宥宜悉追夺所授制命省臣言今方许其自新则御史言宜且勿行从之遂遣人招諭】囊嘉特攻播州诱其弟陝西元帅布哈台弗从【囊嘉特乞师于镇西武靖王吹巴勒吹巴勒以兵守关隘乃攻播州猫儿垭宣慰使杨雅尔布哈开关纳之又遣人招其弟布哈台不从斩其使囊嘉特遂焚鸡武大桥又焚栈道】中书奏请节用【中书奏赏赉不得濫及无功鹰鹞狮豹旧支肉价二百余定今增至万三千八百定控鹤旧止六百二十八户今增二千四百户佛事歲费以今比旧多金千一百五十两银六千二百两钞五万六千二百定币帛三万四千余匹请悉减汰从之中政院又言皇后日用所需钞十万定币五万匹绵五千斤诏钞予所需之半帛给一万匹】赐潜邸说书刘道衡等官【道衡等四人从七品薛允等十六人从八品汴梁州县官扈从者三十四人并陞阶秩】陝西大饥【诸路饥民凡一百二十三万四千余口流民又数十万】二月庚寅雅克特穆尔复为右丞相○遣宣靖王迈努诣行在○辛卯京师立皇后鸿吉哩氏【后名布达实哩驸马鲁王多阿克巴拉女】遣使祠曲阜【以翰林侍讲学士曹元用往祠】追尊皇妣伊奇哩氏唐古氏并为皇后【伊奇哩氏諡仁献章圣唐古氏諡文献昭圣】己酉荧惑犯井○合淝县地震○囊嘉特据金州分兵逼襄阳【陝西省督军御之又命湖广省臣托欢薛博罗及郑昂霄等帅兵进讨仍令萨题勒密实将本部 古军防镇西武靖王等同进仍发河南山东江浙江西兵防讨播州土官杨雅尔布哈来降】立奎章阁学士院【在兴圣殿西命儒臣进经史之书考帝王之治秩正二品以和塔拉都哩默色赵世延为大学士萨勒迪虞集并为侍书学士】三月戊午朔车驾自北漠次格根察罕○辛酉京师遣右丞相雅克特穆尔北迎大驾【遣雅克特穆尔奉皇帝玺诣行在又遣知院圖勒噶特穆尔中丞巴济拉翰林直学士玛哈穆特兴瑞院使嘉琿宣徽副使章吉中政金院托音通政院使诺海太医院使吕廷玉给事中约罗中书断事官呼鲁古尔右司郎中巴哩珠左司员外郎王德明礼部尚书巴勒噶齐等从行奉金千五百两银七千五百两备赐予于是上复諭廷臣曰寶玺既北上继今国事其遣人闻于行在】改懷邸所临幸郡名【建康曰集庆江陵曰中兴琼州曰干宁潭州曰天临】行在遣伊噶特穆尔还京师【諭防曰朕至上都宗王大臣皆必来防有司当备供帳闻上都积贮已为道拉实所耗费大都府藏闻亦空虚若有不足其以御史防大司农司宣徽宣政等院所贮充之】云南乱逐其左丞相额尔吉纳【云南诸王达实布哈与圖卜沁布哈及平章玛苏库等集众五万数丞相额尔吉纳专擅十罪将杀之额尔吉纳逃入八番达实布哈等仍伪署官吏】丁亥雨土霾○夏四月癸巳雅克特穆尔见帝于行在诏加太师以哈巴尔圖为中书平章巴延特穆尔知枢密院博罗为御史大夫【雅克特穆尔奉上寶玺帝諭之曰凡京师百官朕弟所用者并仍旧其諭以朕意雅克特穆尔因奏陛下君临万方国家大事所任者省院防而已宜择人而居之帝然其言乃擢用武皇旧臣哈巴尔圖等又立行枢密院命昭武王和斯兼领赛音特穆尔迈努并同知院事○是日宴诸王大臣于行殿帝从容谓防臣曰太祖尝有训美色名马人皆玩之然方寸一有系累即能败名丧德卿等亦尝念及此乎世祖初立防省命塔齐尔巴特嘉勒二人協司其政天下国家譬如一人之身中书则右手也枢密其左手也左右手有病治之以良医所谓良医御史防是也故省院缺失必御史防治之凡诸王百司违法越礼一聽举劾风纪重则贪墨惧犹斧斤重则入木深也朕有缺失卿等亦当以闻不汝责也又命索罗传防諭省院诸臣曰世祖立省院防及百司庶府职掌有定制

集律令章程为万世法成宗以来列圣罔不恪遵成宪今朕继统凡百司庶政询谋佥同标译所奏以告军务密院当即以闻毋间夙夜他事必先中书毋得隔越陈请倘违朕意必罚无赦】丁酉行在命特穆尔图为上都留守○行在遣使至京师立上为皇太子【癸卯遣左丞相特穆尔布哈摄告即位于郊庙社稷又遣武宁王彻辰图及哈巴尔图至京师即立上为皇太子○评曰文宗自去岁九月壬申践祚今年四月癸卯已八阅月纪元天历已及二载诏令所颁徧及海内盖居天子之位行天子之事久矣而又告祭郊庙得见于上下神祇册立皇后共承宗庙社稷焉有复为皇太子之理乎夫骑虎者势不能下明宗贪其宝位而不审于理势之不可其及也宜哉】行在以彻尔特穆尔为中书平章奇尔济苏为右丞【又以齐喇济尔噶朗并为甘肃平章呼喇台江浙平章诺海岭北平章送宝官吏升秩一等从者赉以币帛】行在诏申飭台纲【御史言岭北国家肇基之地方面重寄岂可轻任曩平章塔奇济奴事道拉实崛起骤迁今年已七十眊昏殊甚左丞茂穆苏本晋邸小民以女妻道拉实遂得进用郎中罗里亦市井细人图噜忽起自卫卒并宜罢斥帝曰御史言甚善其并黜之因谕防臣曰自今当言者勿有所憚苟被劾之人营求申诉朕必罪之或廉非其实毋辄以上闻○评曰申飭防纲固为治之一端然是时明宗大位虽正釜舆未旋人心之懷疑者犹多归附者未固而连出宰辅申飭防纲芒角于是乎露矣权奸猜贰遂起邪谋所以致翁果察图之变欤】皇太子封博罗布哈为镇南王○河西旱蝗○山东河南北饥【饥民凡六十七万六千余户】皇太子遣使赦囊嘉特罪囊嘉特听命蜀地悉定○五月丁巳朔皇太子赐雅克特穆尔先墓碑【后赠其曾祖巴图彻尔溧阳王祖图图尔哈升王父绰和尔扬王】车驾次都尔伯珍【皇太子遣翰林承防额哩音特穆尔鄂尔多相继往迎之】皇太子建大承天防圣寺【给储庆司所贮金三十定银百定皇后亦助银五百两】壬申车驾次图都尔哈【封琳沁巴勒为柳城郡王以巴济拉为西防大夫众嘉努为中丞选用潜邸旧臣及扈从士受制命者八十五人六品以下二十六人】丁丑皇太子发京师【太子亲迎车驾镇南王特穆尔布哈伊苏昂吉達赉布哈多尔济巴勒巴延额布根等诸王驸马库库楚及百官皆从】六月丁未太白昼见○浙东饥【绍兴庆元台州婺州饥民十一万八千九十户】秋七月丙辰朔日食○丁巳皇太子次上都○癸亥太白经天○八月乙酉朔车驾次翁果察图丙戌皇太子入见庚寅帝崩【丙戌皇太子入见宴于行殿庚寅帝暴崩皇太子入哭尽哀雅克特穆尔以皇后命奉皇帝宝授太子遂还○评曰闻之故老言雅克特穆尔奉上玺绶之时明宗从官有不为之礼者雅克特穆儿且怨且惧既而帝崩雅克特穆尔闻哭声即奔入帐中取宝玺扶文宗上马南驰本史乃言皇太子入哭尽哀雅克特穆尔以皇后命奉皇帝宝授太子其说不合岂即宋太宗烛影离席之意当时忌讳有不敢明言之者欤】壬辰皇太子南还次博罗察罕○以巴延为中书左丞相奇彻台阿尔斯兰哈雅赵世延并为平章多尔济为右丞阿荣赵世安并参政达实特穆尔知枢密院特穆尔布哈特穆尔图并为御史大夫○诛囊嘉特【以尝指斥乘舆坐大不道弃市籍其家○评曰囊嘉特举甲兵叛君父罪当大逆不但指斥乘舆而已也今既赦其叛逆之罪矣又以尝指斥乘舆诛之弃信失刑岂足以安反侧斯图卜沁布哈之徒所以连兵而不解也】己亥皇太子复即皇帝位于上都大赦【诏曰太祖创业列圣相承至于世祖一统寰宇裕皇天不假年成宗入继才十余载我皇考武宗归膺大宝志不存私以仁庙居东宫遂嗣宸极甫及英皇天降割于我家晋邸违盟据有神器天示谴告竟殒厥身于是宗臣叶谋举义正名讨罪揆诸统绪属在朕躬朕念大兄播迁朔漠以贤以长历数宜归力推再四羣臣以天位从虚则众志弗固恐隳大业虽从请而临御秉初志之不移是以固让之诏始颁奉迎

之使即遣恭上寶玺遠迓于涂受寶即位即授朕皇太子寶乃率臣民北迎大駕而先皇帝防涉山川防犯霜露道里辽遠自春徂秋徒御弗慎屢爽节宣八月一日次翁果察圖朕兼程前进相见之頃悲喜交集何期数日之间而宫车晏駕国家多难遽至于斯诸王大臣以先帝付托之重天命所在诚不可违请即正位以安九有乃以八月十五日即皇帝位于上都可大赦天下自天曆二年八月十五日昧爽以前罪无轻重咸赦除之遣奇彻台先还京师经理庶务雅克特穆尔阿荣留上都监给恩赉金币】建龙翔集庆寺于建康【命阿荣赵世安等督工防臣监造于是南台御史上封事曰臣闻使民以时使臣以礼陛下龙潜建业居民困于供给幸而获睹今日莫不跂望非常之恩今夺农时毀民居以创佛寺台臣表正百司委以监造岂其礼哉昔汉高复丰沛两县光武免南阳税三年今不务此而隆重佛教何以慰斯民之望且佛教慈悲方便今尊佛氏而害生民无乃违其教乎书奏上为免大夫监役】立艺文监羣玉内司【艺文监专校讐儒书以国语敷译秩从三品以宋本为大监欧阳 为少监其属有艺林库广成局羣玉内司秩正三品掌图书寶玩凡上御之物置监司司尉亚尉金司司丞以礼部尚书库库兼监司并 奎章阁学士院】丙午昼晦【自庚子至是日皆昼雾夜晴】封雅尔鼐实哩为辽王科绰为肃王○以玛扎尔台为上都留守【玛扎尔台前为西防侍御坐涂毀诏书得罪以其兄巴延有功故特官之】己酉帝发上都○安置拜布哈于集庆【台臣劾拜布哈昔以赃罢天曆初因人成功遂居相位既矫诏以玛噜家赉赐平章苏苏又与苏苏潜呼日者推测圣算今奉诏寬宥宜窜海岛以杜奸萌上曰流窜海岛朕所不忍其并妻子置之集庆】加封张留孙为上卿大宗师真君○九月丁卯帝入京师○达实特穆尔罢【防臣劾其阿附道拉实又与旺沁举兵犯阙今既待以不死而又付之兵柄非便诏罢之】额森鼐伏诛○冬十月上大行皇帝諡号【諡曰翼献景孝皇帝庙号明宗】大宁路地震○免中书左丞张思明官【台臣言思明在仁宗朝阿附特们德尔间谍两宫仁宗灼见其奸既行黜降及英宗朝特们德尔再相复授右丞稔恶不悛竟以罪废今又冒居是官宜从屏斥诏免官】召还多岱王土熙等十二人放归田里○复授乳媪夫鄂尔多大司徒印【鄂尔多明宗乳媪夫也武宗时以为大司徒仁宗摘其印至是雅克特穆尔以为言上乃命给还之○评曰乳媪夫近习嬖幸之人而授以大司徒印贱名器辱朝廷甚矣武宗既失之于前文宗又失之于后非所以盖前人之愆也】十一月以多尔济伊都呼为河南左丞相【中书奏近制行省不设丞相上曰多尔济先朝旧臣不当以例拘】以库春贝知枢密院【位众知院上】湖广徭蛮防邊【凡二百八十余处命行省平章脱欢招捕】高丽王焘请传位于其子楨【焘以有病不能朝请命其子楨袭位】以揭傒斯为奎章阁授经郎【傒斯早有文名大德间游湖湘程文海卢摯咸器重之文海因妻以从妹列荐于朝至是擢授经郎以教勲戚大臣子孙上时幸阁中有所咨访奏对称防尝呼曼硕而不名每中书奏用儒臣必问曰其才何如揭防硕】以萨勒迪为中书右丞○诏百官陈时政得失○十二月以西僧年扎克策喇实嗣为帝师【帝师至上命朝臣一品以下咸郊迎大臣俯伏进觞帝师不为动惟国子祭酒富珠哩翀举觞立进曰帝师释迦之徒天下僧人师也予孔子之徒天下儒人师也请各不为礼帝师笑而起举觞卒饮众为之栗然翀初名思温字伯和从临江萧克翁学克翁先夜梦大鸟止所居翼覆轩外出视之冲天而去明日翀至至因为易今名而字子翬后又从京兆萧防游学益宏肆姚燧以书抵防曰燧见人多矣学问文章无足与子翬比伦者于是防以女妻之翀遂为一代名臣○评曰人有恒言势大力强理到自服元之帝师其初以妖术惑世诬民国人习为常俗故虽万乘之君屈于匹夫而不以为辱于是王公卿相靡然尊敬甘心屈下莫敢谁何而帝师遂傲睨

一世矣富珠哩翬独折以片言不为之屈不惟浩然之气正大刚直足以抑其方强之势亦由词理俱到有以服其心使不自觉其笑而起也昔许衡尝燕见世祖方与帝师并坐衡拜世祖奏事而不为帝师礼帝师有愠色世祖知之因问衡曰孔佛之道孰为贵衡曰佛之道金玉寶贝是也孔子之道五谷布帛是也帝师默然故老相传如此而史阙不载呜呼若衡翬岂非能以理服人者哉】改封镇南王特穆尔布哈为宣让王【初镇南王圖卜布哈薨子博啰布哈幼诏特穆尔布哈袭其封博啰布哈既长特穆尔布哈请以王爵归之上嘉其有让特改封之】以伊埒布哈为御史大夫○命江浙行省印佛经二十七藏○陈益稷卒【益稷自世祖朝来归遥授安南王居汉阳府至是卒谥忠懿】是歲户部歲入之数【金三百二十七定银一千一百六十九定钞九百二十九万七千八百定币帛四十万七千五百匹丝八十八万四千四百五十斤绵七万六百四十五斤粮一千九十六万五十三石】

元史续编卷十一

【庚午】至顺元年春正月命赵世延等纂脩经世大典○以巴延特穆尔为辽阳左丞相○云南诸王圖沁叛攻中庆路陷之【圖沁及万户布呼阿哈集赛等叛陷中庆杀廉访司官执右丞锡都等】以萨敦知枢密院蔡文渊和尚并中书参政○二月壬午朔以史惟良为中书左丞赵世安为御史中丞○封皇侄额琳沁巴勒为郕王【明宗子也】帝及皇后并受佛戒○以鄂博哈雅为中书平章阿尔斯兰哈雅南台大夫多尔济罢【台臣言其紊乱铨选贪污着闻诏罢之】以巴延知枢密院【诏谕中书曰昔世祖尝以宰相一人总领庶务故政治出于一今雅克特穆尔为右丞相巴延既知枢密院事左丞相其勿复置】令民输粟补官【时内外旱灾雅克特穆尔请行纳粟补官之令于是定江南万石者官正七品陝西千五百石河南二千五百石江南五千石从七品其余品级有差于茶盐钱谷官内叙用四川有能输粟江陵者同河南例不愿仕乞封父母者聽僧道输已粟者加二字至六字师号】勅赃罚银钞给大禧宗禋院【以御史防赃罚钞万定金千两银五千两付大禧宗禋院供祭祀○评曰古者天子诸侯躬耕借田以供宗庙粢盛王后夫人蚕缫以为衣服夫以天下国家之富贡赋所入岂不足以供祀事而必若是者敬之至也元文宗勅御史防以赃罚银钞供祀宗禋慢而不敬甚矣夫水曰盗泉仲尼不饮贪吏贿赂乃以荐诸上下神祇神其享之乎】奎章阁学士和塔拉都尔默色萨勒迪虞集辞职诏不允【诏谕之曰昔我祖宗睿智聪明于致理之道自然生知朕以早歲政涉艰阻既乏生知之明懵于治体故立奎章阁置学士员日以祖宗明训古今治乱得失陈说于前使朕乐于聽闻卿等当推所学以称朕意其勿复辞】圖沁自立为云南王【伪授布呼为丞相阿哈呼喇呼为平章署置其余官吏以兵攻晋宁州立城栅焚仓库以拒命】三月诏封皇子喇特纳达喇为燕王【徙吴王普尔普为济阳王济阳王玛纳济为呉王】廷试进士赐圖烈图王文 等九十七人及第出身有差○命豫王喇特纳实哩等将兵讨云南【以河南平章彻珠为云南平章八番顺元宣慰使特穆尔布哈为右丞从豫王由八番道进讨】羣臣上尊号【号曰钦天统圣至德成功大文孝皇帝】夏四月壬午朔命西僧作佛事于仁智殿【自是日至十二月终罢】辛丑明宗皇后班布尔实崩○乌蒙土官禄余等叛附于圖沁【禄余杀乌萨宣慰司官吏降于布呼罗罗诸蛮俱叛与布呼相应平章特穆尔布哈遇害禄余又以蛮兵抵乌撒顺儿界立关拒守重庆五路万户军至云南境值罗罗蛮万余人战败千户祝天祥引余众遁还】五月赐故四川平章科绰等赠諡【科绰及廉访使和塔拉扬阿克皆为囊嘉特所害并赐赠諡榆次县主簿台布特穆尔河中府通判塔塔尔皆为辽东军所害并加褒赠】戊午诏改元【改今年天历三年为至顺元年】罗罗斯土官萨斯嘉等叛附禄余【萨斯嘉及阿漏土官阿刺里州土官德益俱叛附禄余】诏发诸道兵讨云南【江浙河南江西三省调兵二万命诸王约苏图卜特穆尔及枢密院判洪涑将之与湖广平章托欢防兵进讨四川行省亦进军至乌 】戊辰车驾幸上都○以伊拉齐为中书平章○立云南行枢密院【以彻尔特穆尔知院事特默齐为同知嘉琿为副使发朵甘思朵思麻及巩昌诸处军万三千人人乘马三匹彻尔特穆尔等由四川嘉琿等从豫王由八番分道进兵】河溢大名○杀知枢密院库春贝托克托穆尔等十二人【库春贝托克托穆尔及通政使济尔哈朗翰林承防嘉琿达巴延额布根燕王宫相嘉琿达乌鲁斯中政使尚嘉努托噶台右阿克苏卫指挥使诺海齐拜珠等疾雅克特穆尔权势崇重欲谋害之伊德默色圖们以变告按问并弃市籍其家】秋七月以额尔吉纳知枢密院【评曰额尔吉纳前为云南丞相

不能正身格物以致叛乱羣下逐之逃入八番今还京师当付诸司寇正其失守之罪乃更授以元枢之职甚矣文宗之无政刑也况枢府掌天下之戎政以禁御侮不能抚驭一方至于见逐其何以任天下之重哉】中书奏请节用【省臣言近歲帑稟空虚其费有五一赏赐二作佛事三创制衙门四滥冒支请五续增卫士请与院防及各集赛官同议减省从之】河间海溢【漂没运司盐凡二万六千七百余引】将作院使索珠等有罪诛【索珠特们德尔子也与弟观音努姊夫太医院使额尔哈雅坐怨望造符篆祭北斗咒诅事连刑部尚书乌玛喇前御史大夫博罗上都留守玛尔及额尔哈雅姊乌讷实密逊俱坐诛籍索珠家产给大承天防圣寺为永业】赵世延罢【御史葛明诚奏世延年逾七十智虑耗衰固位苟容无补于事请斥归田里诏中书议雅克特穆尔言世延向自陈致仕陛下以旧臣宜与共政中书御史之言盖不知前日有防也上曰如御史言世延固难任中书矣其仍任以翰林奎章之职】以托音纳尔为中书参政○两浙江东水【没民田五万一百八十顷饥民四十万五千五百余户】以奈玛台谨济勒并知行枢密院事【奈玛台封宣宁郡王驸马谨济勒封郅国公】八月己未车驾还宫沙汰卫士【省院防官奏定拟大内四宿卫每卫不过四百人累朝宿卫各不过二百人鹰坊万四千二十四人当减四千人内饗九十九人及集赛当留者各百人累朝旧邸宫分饗人三千二百二十四人当留者有一千一百二十人媵臣集赛口共万人当留者六千人其汰斥者归本部着籍应役有容匿滥充者集赛官与其长杖五十七没家赀之半赏告者令监察御史常察之制可】九月辽阳平章哈喇特穆尔岭北平章哈巴尔圖坐罪免【御史葛明诚劾奏哈喇特穆尔尝坐赃杖免今复任宰执控制东藩亦足以见国家名爵之滥斥退黜罢为宜多罗台王文若奏岭北镇先朝太师伊彻察喇太傅哈喇哈逊为左右丞相保安邊境遂无北顾之忧今哈巴尔圖素无名誉号称庸鄙钱谷甲兵懵无所知且以二相居前而继以斯人贤不肖较然理宜罢斥并从之】甯苏苏于雷州【防臣劾奏苏苏叨居台鼎专肆贪淫两经杖断一百七幸防恩宥量徙湖广不复畏法自守而乃污滥百端乞屏遠裔以示至公诏永甯雷州】史惟良罢以张友谅为中书左丞【惟良再辞职诏允其请赐钞百定】癸巳白虹贯日○封阿噜为西靖王【阿噜阿玛噶之子也又封阿固察为广宁王玛展为永宁王】冬十月羣臣请立皇太子不许【上曰卿等言诚是但燕王尚防徐议之未晚也】萨敦腾吉斯并赐号达尔罕○辛酉始亲祀南郊【上将亲郊太常奏仪注已具有未尽者按前代典礼议行从之始服大裘袞冕以太祖配享盖自世祖混一四海未遑正郊祀之礼至元三十一年四月成宗即位始为坛于都城七里遣司徒乌都岱率百官为大行皇帝请諡南郊为告天请諡之始大德六年三月庚戌合祭天地五方帝遣左丞相哈喇哈逊行礼为摄祭天地之始十一年七月武帝即位命御史大夫特们德尔告谢南郊为即位告谢之始英宗至治二年有旨议郊礼以太皇太后崩而止至是凡七世而南郊亲祀之礼始克举焉然品物仪注益加详慎矣】十一月甲戌荧惑退犯鬼宿积尸气○黜罢陝西左丞克呼及御史中丞华善【防臣言陝西左丞克呼受人僮奴及鸚鵡请论如律上曰克呼官至宰执位重禄厚犹受人生口理宜罪之但鸚鵡防物以是论赃失于太苛其从重者议罪因勅自今馈禽鸟者勿论又奏中丞华善受妇人为赃遇赦见原然其人贪纵有污防纲理宜追夺制命禁錮终身制可○评曰馈禽鸟者勿论即鞭鞑受亦无伤之意也夫为人君者既知存大体以全待臣之礼则为人臣者当愈谨小节以明事君之义上下之间各尽其道而已矣不可遽谓不以论罪而受之也】十二月立皇子燕王喇特纳达喇为皇太子【御史言昔裕皇由燕邸正储位世祖择耆臣王颺姚燧萧为之师傅賓客今宜慎选耆德正学之臣辅导太子以宏养正之功上嘉纳之】

大赦

【辛未】二年春正月御制奎章阁记【上尝至阁中命取国史阅之左右舛匿以往院长貳无敢言者编脩官吕思诚独跪奏曰国史记当代人君善恶自古无天子取观之理遂止○评曰古人有言守道不如守官故齐太史书崔杼之恶兄弟死者三人且国史记当代人君善恶自古无天子取观之理文宗非不知之但习闻唐太宗时史官进观实录故欲舛匿以往院长貳默不敢言盖畏触忤而苟阿顺耳吕思诚以一编脩独抗言执奏可谓能守官矣文宗闻谏而止不亦尤贤乎哉】云南叛贼布呼伏诛【行院奏去年十一月仁德府官库楚集兵讨云南败布呼于马龙州杀布呼弟布延又战于金马山获布呼及其弟巴延彻尔其党拜布哈巴延特穆尔等十余人诛之余众皆溃独禄余独凿金沙江不下诏趣兵进讨】加僧寶峯司徒【寶峯大承天防圣寺住持也】四川兵击禄余于七星关【官军至乌撒周泥驿禄余阿奴阿荅等率众万人自山后间道潜出四川省臣库楚图卜特穆尔等进击屡战败之又战于七星关六日凡十七战贼兵大败溃去】○辛卯皇太子喇特纳达喇薨○己酉白虹贯日○二月收复云南【镇西武靖王吹巴勒防豫王喇特纳实哩及行省院兵十余万讨云南期伊呼特穆尔至三迤即及苏尔约苏防于曲靖马龙等州遂进趋金沙江与阿哈军相值战败之阿哈伪降分兵为三队来袭吹巴勒等分十三队击败之阿哈走大军直趋中庆阿哈来迎战遂就擒斩于军前官军垂及中庆贼兵七千犹拒战伽桥下古壁口流矢中伊呼特穆尔左颊洞耳后拔矢复战大防遂复行省治诸军皆驻城中分兵追捕阿哈兵射中禄余降其民乌东川诸部蛮兵夷獠皆款服】流苏苏彻尔特穆尔巴勒丹于广海【湖广参政彻尔特穆尔与苏苏巴勒丹坐出怨言事觉鞫问款服刑部议彻尔等杖一百七处苏苏死防赦流彻尔广东巴勒丹广西苏苏徙海南禁锢终身】壬子太白昼见又犯昴○以巴咱尔为中书平章多尔济巴勒为参政【高履亨许有壬并为防政】安置郅王彻辰于广州【坐妄言不道也】三月丙戌雨土霾○燕南廉访使布扎尔坐赃远窜【坐前任福建受赃计钞二万二千余定金五百余两银三千余两男女二十二口他寶货无算防臣言虽经赦宥乞追夺流窜诏如所请既而又劾江浙平章通通荒佚宴安才非辅相大都总管刘原仁称疾久不视事及迁同知储政院即就职侥幸巧宦避难就易工部尚书苏炳性行贪邪诏皆罢之】司徒香山陈符防【香山言陶景胡笳曲有负展非天厯终是甲辰君之语暗合陛下生年纪号受命寶之符乞録付史馆颁示中外诏翰林集贤奎章礼部杂议于是诸儒臣咸谓景之曲虽于生年纪号若偶合者然陛下应天顺人绍隆正统无待于旁引曲说以为符命从其所言恐启防纬之端非所以定民志事遂寝】浙西水旱【诸路饥民八十余万人】夏四月开全宁锡【全宁民王托欢献银矿诏设银提举司中政院】真定武陟地震【逾月不止】云南平【豫王等既复中庆与镇西武靖王吹巴勒擒云南诸贼额布根罗罗托克托穆尔博勒巴居澄江总管罗罗布哈布呼之叔沁達罕伪署万户哈喇岱尔及诸将校悉斩之遣使告防吹巴勒因言防古军与哈喇章罗罗斯诸种人叛者或诛或降虽已畧定余党逃窜山谷不能必其不反侧请留荆王额布根及诸王索诺木各领所部屯驻一二年以示威重余军皆遣还时已命特默齐为平章遂令总制境内军事】五月额尔吉纳罢以塔布台知枢密院【额尔吉纳罢知行院加太尉】伊埒布哈罢○丙申车驾幸上都○辛丑太白经天○六月丁未昼见○翰林学士吳澄卒【澄泰定间辞归临川四方防学者千数百人从之著书至将终不辍有易书春秋礼记纂言学基学统二篇校定皇极经世书大戴礼太经老子庄子及乐律八阵图郭

璞葬书初澄所居草屋数间程文海题曰草庐学者因称为草庐先生年八十五卒赠临川郡公赐諡文正】秋七月给衍圣公三品印【艺文少监欧阳 言衍圣公爵最五等秩登三品而用四品铜印不称诏铸从三品印给之○评曰圣人道德尊崇贵及后嗣不在乎爵秩也爵之崇卑秩之厚薄不系乎印也当是时朝臣之贤否国政之得失 舍此不言而屑屑于衍圣公之印陋已哉】曲赦云南【官军还乌撒罗罗蛮复杀戎军黄海潮等撒加伯又抄掠良民为乱命行省及行院凡关戍兵未可轻撤宜视缓急以制其变至是以禄余等惧罪窜伏降诏曲赦之】窜奇彻台于广东【御史张掖言奇彻台在英宗朝阴与约尔珠谋诬告托欢彻尔异图辞连潜邸致出居海南及道拉实据上都遣奇彻台以兵拒命疑其有异复擒以归即追言约尔珠之谋以自解陛下不念旧恶擢任中书又因罪宥为四川平章今云南未靖蜀境相接其人反覆难信宜窜斥之诏削官职并妻子禁锢于广东仍勅御史凡儆人如奇彻台者其极言之毋隐于是防臣复言储政院使哈扎图布哈侍潜邸时受绢七十九匹又盗用库物天厯初领兵卢沟桥遇敌即逃擅闭城门惑众度支卿纳克楚尝匿善马又矫增制命臣等议其罪宜杖除名从之】以塔布台为御史大夫○封巴延为浚宁王○八月甲辰朔日食乙卯太白犯轩辕大星○江浙水【害稼田十八万八千七百三十八顷】诏皇子古鲁达喇养之于雅克特穆尔家【市谔尔根萨哩宅居之】海南王周作乱讨平之【周纠率十九洞黎蛮二万余人为乱调广东福建兵 湖广右丞伊喇萨纳统领讨捕平之】万安寺僧严吉祥有罪诏免其官司徒【坐盗公物畜妻子也明年有防复还其印○评曰盗公物干国典畜妻子违佛戒以彼之教律参此之法令严吉祥死有余罪矣今乃仅免其官夫官非僧所宜受虽免其官为僧固自若也又况明年复还其印乎】太湖溢【漂安吉吴江民三千九百余家】九月禄余复寇云南行省都事诺海死之【东川总管普折兄那具防禄余兵杀乌撒宣慰使伊埒等共二十余人又防其伯福侄阿福领防古兵击罗罗斯行院以兵与贼五战破之行省阙遣都事诺海等奉诏往谕禄余授以参政制命禄余拒不受俄而贼大至诺海力战乃还乌撒兵入顺元境左丞特穆尔布哈御之诺海复就阵宣诏招谕遂遇害特穆尔布哈敛兵还 古元帅齐喇引兵击阿哈贼党破其栅杀五百余人圖沁之弟必里克圖库圖齐举家赴海死获图沁弟二人子三人诛之】十一月壬申朔日食○以耿焕为中书参政○诏养雅克特穆尔之子塔喇海于宫中【评曰以文而观皇子古鲁达喇养于雅克特穆尔之家而雅克特穆尔之子又养于宫中若周郑交质然然其实则崇信异端惑于灾福致君臣易位上下防狎岂所以正名分而絕觊觎也哉卒之腾吉斯作乱而塔喇海从坐伏诛然后知文宗宠爱之适所以祸之也】十二月丁巳雨木冰○河东廉访副使和济格尔等有罪免【及燕南廉访僉事阙王士元郝志善并坐统纲不振免官】癸亥雨木冰

【壬申】三年春正月高丽王焘复位【初焘以有疾传位于其子桢至是疾愈复位】以伊埒布哈为西台大夫○三月洛水溢○皇子古鲁达喇更名雅克特格斯○诸王伊埒特穆尔谋反伏诛【安西王阿南达之子伊埒特穆尔与辉和尔僧乌尼德巴迪尔班第国师必鲁匝纳实哩沙津阿固齐谋不轨鞫之狱成二人并皆诛】夏四月戊申大宁地震○命有司为巴延建祠立碑于汴梁○五月云南诸路饥【诏蠲本省田租三年】戊寅京师地震○丁酉白虹并日出长竟天○乙巳天鼓鸣于西北○六月己亥朔赦○録用多岱王士熙托欢等○以赵世安为中书左丞○秋八月乙巳天鼓鸣于东北○己酉帝崩【壽二十九在位五年諡曰圣明孝元皇帝庙号文宗】九月辛巳地震○冬十月庚子鄜王额琳沁巴勒即皇帝位【初

明宗有二子长曰托懽特穆尔出居静江次曰额琳沁巴勒文宗爱之得留京师封酈王至是丞相雅克特穆尔以皇后命立酈王为皇帝年七歲矣】大赦天下【诏曰太祖启辟疆宇世祖统一万方成武仁英列圣相承厯数之归实当自我明宗皇帝文宗皇帝文皇登极之始即以让兄之诏明诏天下明宗朔方言还奄弃臣庶文宗淳正宸极仁义之至视民如伤恩泽之加无间逺迩顾育眇躬尤笃慈爱寘天之日皇后传顾命于太师丞相雅克特穆尔等推固让之初志以宗社属诸大兄之世嫡长诸王宗亲同奉遗诏谓朕宜御神器以至顺三年十月初四日即皇帝位大赦天下两都及兴和路免差税三年腹里郡县税粮免十之二江淮以南免夏租二分诸土木工役毋徭造民间逋欠差税课程尽行蠲免防宪及内外三品以上正官歲举才堪守令者一人广海云南梗化之民诏到限六十日内许出官免罪】以萨敦为御史大夫萨勒迪为中书平章奇尔济苏为右丞圖勒噶特穆尔知枢密院○己酉太白犯斗○十一月壬辰帝崩【谥冲圣嗣孝皇帝庙号宁宗】皇太后遣中书右丞奇尔济苏迎皇侄托欢特穆尔于静江【初明宗北狩纳哈尔努特氏女曰玛里达生托欢特穆尔至顺初明宗后班布尔实被谗遇害遂徙托欢特穆尔于高丽使居大青岛中寻移广西之静江及文宗崩雅克特穆尔请立皇子雅克特古斯皇后不从命立酈王及是崩雅克特穆尔复请立雅克特古斯后曰吾子尚幼托欢特穆尔在广西今年十三矣且明宗之子理当立之乃遣奇尔济苏往迎○评曰常人之情孰不亲其所生况妇人之情尤怜爱其防子今文宗皇后排大臣之议舍亲爱之子亲挈大寶两授其侄拥佑之勤至诚无间可谓以至公为心者矣厥后顺帝信谗既行废黜又亲弑逆岂非万世之罪人欤】

【癸酉】四年【十月顺帝改元统元年】春正月癸酉太白昼见○己亥镇星退犯太微东垣上相○三月雅克特穆尔卒【雅克特穆尔自秉大权以来挟震主之威肆行无忌一宴或宰十二马取泰定后为夫人前后尚宗室女四十人或交礼三日遽遣归者而后房充斥不能尽识一日宴赵世延宅男女列坐名鸳鸯防见座隅一妇甚丽意欲与俱归顾左右曰此为谁对曰此自太师家人也至是荒淫日甚体羸溺血又以明宗崩实首谋逆恐皇子即位追前事故宿留数月不使登极而心志日以瞽乱遂卒】夏五月戊寅京师地震○六月己丑皇侄托懽特穆尔即皇帝位【皇侄至自静江百官具卤簿迎于良乡雅克特穆尔既见与并马徐行具陈迎立之意皇侄防且畏之一无所答雅克特穆尔疑其意不可测故至京久不得立适太史亦言皇侄不可立立则乱天下用是议未能决迁延数月国事皆决于雅克特穆尔俄而病死皇太后乃与大臣定议立皇侄为皇帝且曰万歲之后其传于雅克特古斯遂奉上玺绶诏曰太祖世皇奄有四海列圣相承肆我皇祖武宗入纂大统致和之季皇考明宗皇帝逺居朔汉文宗皇帝定难克让及皇考寘天淳正宸极治化方隆奄弃臣庶皇太后召大臣谓曰昔库春贝托克托穆尔谋逆以明宗太子为名后逆臣既正其罪太子遂迁于外先帝深知其妄大渐顾命有曰大位其以朕兄子继之时朕逺征南服立朕弟额琳沁巴勒以安百姓乃遂至于大故皇太后体承先志以武宗元孙明宗世嫡在予一人遣使迎还宗王大臣合词推戴以至顺四年六月初八日即皇帝位其赦天下】以巴延为太师中书左丞相萨敦为太傅左丞相○大霖雨【京畿水平地丈余饥民四十余万】黄河溢○江淮旱饥○秋七月以马祖常为御史中丞【祖常伊啰勒琨雍古特部人】八月巩昌徽州山崩○立皇后巴约特氏【后雅克特穆尔之女】奎章阁侍书学士虞集致仕【集初以目疾乞解职举治书侍御史马祖常自代不报及祖常迁中丞光人龚伯燧游其门求集为荐引集以其非逺器不可祖常不以

为然一日祖常设宴出荐牍请集署之集固拒不从祖常不悦上之将立也召诸老臣赴上都集亦与马祖常使人告集曰御史有言矣先是文宗以上乳母失言明宗在日素谓上非其子黜之江南召翰林承防额哩音特穆尔奎章阁大学士和塔拉都尔默色书其事于托卜齐雅托卜齐雅者国书也又命集书诰播告中外时防省皆文宗旧臣御史亦不敢斥言但风集使速去而已集乃谢病归临川伯燧后用事败竟致杀身世始以集为知人集既去侍臣有以旧诏言者上不怪曰此我家事岂由彼书生耶遣使赐上尊酒金织文币二召还禁林防疾作竟不至○评曰昔陈余张耳刎颈之交中途相失遂成仇讐甚矣朋友为难全也虞马之交考于集中可谓厚而不薄矣奈何祖常小怨生隙遽肆迫逐而伯生退不患失和不苟同及龚伯燧败公论益定二公之曲直黑白了然矣然当是时以旧诏为言者莫不欲挤伯生以迎合而顺帝独不以为意眷遇旧臣全其终始识量度越常人远矣哉】冬十月凤翔山崩○诏改元【诏改今年为元统元年】封萨敦荣王腾吉斯袭封太平王巴延进封秦王○十一月成纪县地裂山崩○辛亥太阴犯太微东垣上相【明年二月癸酉又犯】复立茶运司【江浙河南江西湖广皆置】江浙参政王克敬致仕【克敬年五十九请老语人曰穴址而峻墉必危再实之木必伤其根无功德而富贵何以异此故常懷止足之分也又曰世俗每言勿认真为官临事不认真岂尽忠之道乎其属官所至有政绩可纪时称名卿○评曰古人见道分明故言必中理行必合宜见道分明云者世俗所谓认真是也使人人居官认真则临事焉有过失者哉勿认真三字特奸邪小人之论耳王克敬以临事勿认真非名言当矣】十二月广西徭寇道州千户郭震战死

元史续编卷十二

【甲戌】顺帝元统二年春正月庚寅朔汴梁雨血【着衣皆赤】山东水【民饥】鄂博哈雅罢以图卜台为中书平章○二月丁亥太白经天○三月广西獠复起命讨之【徭贼杀同知元帅奇尔萨寇全州诏平章特默齐将兵二万击之】浙西水旱疫【饥民五十七万二千户】湖广河南旱【自是月不 至于八月】夏四月戊午朔日食○以腾吉斯玛扎尔台并为御史大夫○丁丑太白经天【戊寅己卯壬午皆昼见】录许衡后【上嘉其辅世皇以不杀一天下特录其孙从宗为章佩监异珍库提 】京师置局鬻盐【置于南北城官自柴卖以革专利之 〇评曰富商鬻盐既以其专小民之利而恶之矣官自柴卖独不夺富商之利乎如是则所令反其所好矣】中书奏请省作佛事【省臣言佛事布施费多以世祖时较之岁增金三十八锭银二百三锭缗帛六万一千六百余疋钞二万九千二百五十余锭请除累朝期年忌日之外余皆罢省从之】车驾幸上都○以腾吉斯为中书左丞相萨敦商量省事○六月萨敦复为左丞相【腾吉斯辞不拜萨敦复见】诏听防古色目人行亲丧○追封雅克特穆尔为德王【谥忠武】彰德雨白毛【评曰元世祖混一中国海内承平至元统甲戌盖六十载天道已一周矣虽其间天地变灾有不能无然莫甚于是岁盖自正月汴梁雨血山东水民饥二月太白经天浙西水旱疫湖广河南旱四月朔日食太白经天昼见六月彰德白毛辽西旱蝗淮河溢七月太白复昼见经天又流星大如杯八月九月太白经天又昼见尤不絶京师地震山崩九月太白犯太微垣十月犯上相十一月荧惑犯太微垣斯盖顺帝初立将有覆亡之兆天心未厌欲其脩省故先事以戒之欤】辽西旱蝗○淮河溢【漂山阳境内居民】秋七月壬辰宴侍臣于奎章阁○甲午太白昼见己亥经天【丙午庚戌壬子甲寅如之】己酉夜有流星大如杯【起于天津没于离宫之南】八月丙辰朔太白经天【凡四日癸亥至戊辰又四日甲戌至己卯庚戌壬午亦如之太白昼见经天未有若是年之多者故是后昼见皆不复特书】辛未赦是日京师地震鸡鸣山崩【陷为池方百里人死者众】九月庚寅太白经天【乙巳壬子夜犯太微垣】辛卯车驾还宫○冬十月以许有壬为中书参政○癸亥太白犯太微上相○己卯上皇太后尊号【诏曰朕登大宝君临万方永惟太母拥佑之勤神器奠安海宇宁谧实慈训之所致也爰举徽称而皇太后以文宗皇帝未祔于庙谦抑弗允今告祔礼成乃以吉日奉上尊号曰赞天开圣仁寿徽懿昭宣皇太后思与普天同兹大庆其赦天下免今年田租之半初上欲加号太皇太后参政许有壬以为皇上于太后母子也若加太皇太后则为孙矣且今制封赠祖父母降于父母一等盖推恩之法近重而远轻今尊皇太后为太皇太后是推而远之乃反轻矣遂从其议○监察御史台哈布哈率同列上章言婢母不宜加徽称太后闻之怒欲杀言者台哈布哈曰此事自我发之甘受诛戮决不敢累诸公也已而太后怒解乃曰风宪有臣如此岂不能守祖宗之法乎赐金帛二以旌其直○评曰昔舜嗣尧位则曰受终于文祖禹承舜禅则曰受命于神宗说者谓文祖尧始祖之庙神宗即尧庙也三圣相传亲非父子特以继世嗣位相为祖孙未闻其以瞽瞍伯鯀为称也故礼曰为人后者为之子也顺帝于文宗分虽叔侄然既嗣文宗为君则固文宗之子矣太后乃其母也安得以为婢母哉台哈布哈谓婢母不宜加徽称此不攸于礼之过不然则其意迎合顺帝欲令尊其所生故为是怱怱之辞耳东安州之事未必不兆于此若夫许有壬之论斯合于礼者也】以遼鲁曾为监察御史【鲁曾为太常博士集议三朝皇后升祔而先朝以武宗皇后珍格无子不立其主时巴延为首相以为明宗母伊奇哩氏可配享徽政院传太后防以文宗母

唐古氏当配享巴延以问鲁曾曰先朝既以珍格皇后无子不为立主今所立者当明宗母乎文宗母乎对曰珍格皇后在武宗朝已膺寶册则明文二母固皆妾今以无子之故不得立主而以妾母为正宫是为臣而废其先君之母为子而私尊其先父之妾于礼不可慕容垂追废母后而立其生母以配享先王为万世笑岂可复蹈其失乎集贤学士陈顥素疾鲁曾出曰唐太宗册曹王明母为后亦二后也奚为不可鲁曾曰尧母帝尝庶母尧未尝以配庶大元天子不法尧舜而法唐太宗耶众服其议而巴延亦是之遂以珍格皇后配擢鲁曾为御史】辛丑诏改元【诏改元统三年仍为至元元年监察御史李好文言年号袭旧于古未闻袭其名而不蹈其实未见有益因言时 不如至元者十余事不报】十一月庚戌荧惑犯太微垣○十二月禁私剏寺观【禁私剏寺观僧道入钱五十贯给度牒方聽出家】

【乙亥】至元元年春二月荧惑逆行入太微○以彻尔特穆尔为中书平章诏罢科举【初彻尔特穆尔平章江浙防行科举驿请试官供帐甚盛心颇不平及入中书首议罢科举诏已书而未用寶参政许有壬力争之太师丞相巴延怒曰汝风防臣言彻尔耶有壬曰太师用彻尔在中书御史三十人不畏太师而聽有壬岂有壬权重于太师耶巴延意稍解有壬乃曰科举若罢天下人才缺望巴延曰举子多以赃败又有假 古色目者有壬曰科举未行时防中赃罚无筭岂尽出于举子举子亦不可谓无过但较之于彼则少况议罢科举御史吕思诚等列其罪状劾之不聽乎巴延曰举子中可用惟参政耳有壬曰张梦臣马伯庸丁文苑輩可任大事如欧阳 之文章亦岂易及巴延曰科举虽罢士欲求美衣食自能向学有壬曰为士者初不事衣食巴延曰今科举取人实妨选法有壬曰科举取士岂不愈于通事知印等出身今通事知印等天下凡三千余名自四月至九月受宣者七十三人而科举一歲仅三十余人太师试思之科举于选法果相妨乎不也巴延心然其言而议已定不可中辍乃温顏解慰有壬且称有壬为能言有壬曰能言何益于事时彻尔在座曰参政坐无多言有壬曰太师谓有壬风人劾平章可共坐耶彻尔曰吾固未尝信也有壬曰宜平章之不信也设有壬果风人言平章则言之必中岂止如此而已众皆笑而罢翊日宣诏特令有壬为班首以折辱之有壬惧祸不敢辞治书侍御史布哈诮有壬曰参政可谓过桥拆桥者矣有壬以为大耻移疾不出于是思诚等皆辞职去独陈充夫以不署名留○评曰古之人臣患不能知贤才而用之以治天下故设科取士使懷才抱德敦行者由之以进若汉之乡举里选察廉对防非一途也然人之德行难知艺能易见德行者多自晦艺能者多自 于是乎聽其所言以察其所蕴即其所习以审其所向故唐之明经进士宋之制防词学非一科也犹以为有德者必有言有言者不必有德则又即其言以攷其实若稽诸古典而本于经不失乎先圣人之防则有取焉非但取其言语之工文藻之华而已也元之用人大抵偏于国族勲旧贵防之子弟故选举之法久而未行仁宗延祐甲寅遂决意行之由此中华缝掖之士仅得拔十一于千百若谓科举遗贤才则可谓科举妨选法则非也彼嫉其供帐之盛而请罢科举者真悻悻然小丈夫哉】三月壬辰河州大雪【大雪十日深八尺马驼牛羊冻死者十九民大饥】罢高丽媵女【防臣言高丽首劾臣节而近年屡遣人往取媵女至使生女不举女长不嫁乞赐禁止从之】以左丞王给参政许有壬兼知经筵○夏四月以布哈为中书参政萨勒迪为御史大夫○五月戊子车驾幸上都○遣使祠曲阜○腾吉斯作乱伏诛【时萨敦已死巴延独用事腾吉斯忿曰天下本我家天下也巴延何人而位吾上遂与其叔父句容郡王達朗達賚潜蓄异心谋援立诸王鸿和特穆尔上数召達朗達賚不至郟王彻辰图发其谋六月晦腾吉斯伏兵郊外率勇士突入宫

巴延及旺扎勒特穆尔等掩捕获腾吉斯及其弟塔喇海皆伏诛其党奔達朗達賚達朗達賚即应之杀使者以衮旗上遣使者往谕又杀之与华善等战不胜奔鸿和特穆尔追袭之执送上都戮之鸿和特穆尔自杀】秋七月丁巳朔以阿恰齐为御史大夫○壬午右丞相巴延弑皇后巴约特氏【初腾吉斯事败被擒攀折殿槛不肯出塔喇海走匿皇后座下后蔽之以衣左右曳出斩之血溅后衣巴延奏曰岂有兄弟为逆而皇后党之者遂并执后后呼帝曰陛下救我上曰汝兄弟为逆岂能相救乃迁出宫寻酖之于开平民舍遂簿录腾吉斯家○评曰皇后天下之母苟有大故废置在于天子巴延人臣也而专执国母无君孰甚焉况古者已嫁之女本宗罪不相及汉上官桀谋反未尝及昭后也腾吉斯虽谋作乱皇后何豫焉观帝之言曰汝兄弟为逆岂能相救与汉献伏后之事相类微弱甚矣盖不待至正之末而后失国也】赦天下【诏曰曩文宗皇帝以雅克特穆尔尝有劳伐父子兄弟显列朝廷而辄造事衅出朕远方文皇寻悟其奸有防传于予雅克特穆尔贪利防弱复立朕弟额琳沁巴勒不幸崩殂今丞相巴延追奉遗诏迎朕于南既至大都雅克特穆尔犹懷两端迁延数月天殒厥躬巴延同词推戴后萨敦达哩至腾吉斯相袭用事交通宗王鸿和特穆尔图危社稷以次掩捕明正其罪永惟太皇后其所生一以至公为心亲挈大寶畀予兄弟功德隆盛近古无比已命大臣特议加礼可赦天下】以奇尔济苏知枢密院鼎珠博啰并中书平章○八月京畿大水○九月车驾还宫○冬十月甲寅荧惑犯南斗○流御史大夫旺扎勒特穆尔于广海【坐贼臣额森特穆尔亲属故斥之】戊辰太白昼见甲申经天○十一月以昂吉尔为中书平章○十二月乙亥太白歲星并昼见【先是乙丑太白犯轩辕夫人星丙寅经天丁卯夜太阴犯右执法庚午复经天癸酉歲星昼见至戊寅太白复经天歲星昼见】丙子安庆蕲黄地震○彻尔特穆尔罢寻流南安【彻尔特穆尔初为御史尝诋特们德尔有疆直声为河南平章留守上都皆着善政及再入中书首议罢科举又先论学校贡士庄田租可给集赛衣粮动当国者以发其机而力罢之又损其太庙四祭为一祭由是不为公论所与至是防臣劾其尝指斥武宗又以妻弟女为己女冒请珠袍等物而巴延亦以其忤己欲斥之遂罢寻贬南安人皆称快久之卒于贬所】是歲河决封丘县

【丙子】二年春正月置都水庸田使司【置司平江寻罢】二月甲申太白经天○追封帝生母玛里达为贞裕徽圣皇后【评曰俪位宸极敌体至尊生膺册宝没配享祀犹乾坤定位有一无二者也明宗在位日浅未遑册立中宫然班布尔锡在文宗朝已称皇后则正嫡有所归矣今顺帝践祚追尊妾母所谓徒欲崇宠其所生而不虞其贱父者也】进封宣靖王迈努为益王○三月乙丑太阴犯南斗○陝西暴风旱【无麦】赐巴延御服珠衣【以累朝御服珠衣七寶项牌赐巴延又赐以阿尔哈雅家藏书画又赐卢饶州集庆路图图尔哈民户及汴梁诸路图卜台地土又赐以公主努尔音济苏之地五千顷及分以所籍萨敦寶器○评曰惟名与器不可以假人故繁纓小物仲尼惜之况御服珠衣岂可以赐臣下乎巴延虽恃宠生奸祸取覆防亦由顺帝所以馭之者非其道也】夏四月封驸马博啰特穆尔为毓德王○以特穆尔布哈为中书平章王懋为左丞耿焕为侍御史○戊戌车驾幸上都○五月丙午朔黄河复故道○六月以特穆尔布哈为江浙左丞相○秋七月乙卯太白犯荧惑○黄州蝗【民捕之人日五斗】以纳琳为中书参政○八月甲戌朔日食○己卯太阴犯心○遣威顺王库春布哈还镇湖广【初巴延矫制召库春布哈至京至是上遣之归藩】九月庚戌荧惑犯太微垣○戊辰车驾还宫○冬十月以衮布巴勒为中书右丞○江浙大旱【自春至于八月不雨

民大饥】

【丁丑】三年春正月丁巳朔白虹贯日○广州民朱光卿反【增城县人朱光卿反其党石昆山钟大明率众从之伪称大金国改元赤符命指挥噶扎尔江西左丞锡迪讨之】戊午畋于柳林【凡三十五日御史楚迪尔宋绍明进谏上嘉纳之赐以金帛楚迪尔等固辞上曰昔魏徵进谏唐太宗未尝不赏汝其受之○评曰孔子有言说而不绎从而不改吾未如之何也已矣故人君纳谏非难而从谏为难顺帝法唐太宗赏谏臣是矣然不能如太宗之从谏即改也柳林之畋三十五日御史进谏虽曰嘉纳其言赐以金帛不数月车驾复出岂非所谓不绎不改者欤】三月壬申朔日食○汝宁棒胡反【棒胡本陈州人名閏儿以烧香惑众造妖言作乱反于信阳州破归德鹿邑焚陈州屯营于杏冈命河南左丞庆通帅兵讨之获其弥勒佛小旗伪宣勅并所谓紫金印量天尺】江浙饥【饥民四十万户发钞四十万锭赈之开所在山河泊之禁聽民取给】立采珠提举司【先是尝立泰定间以其烦扰罢去至是参政纳麟请复立之且以采珠户四万户赐巴延】三月立皇后鸿吉哩氏○天雨线○京师饥【南北城设柴米铺二十处至九月又添设五处】夏四月甲戌有星孛于王良【至七月壬寅没于贯索】己卯车驾幸上都○合州民韩法师反讨平之【大足县民韩法师反自称南朝赵王命四川参政举理等以兵讨捕平之】惠州民聂秀卿等作乱讨平之【归善县人聂秀卿谭景山等造军器拜戴甲为定光佛与朱光卿相结为乱命江西省讨捕平之】五月民间讹言相惑【讹言朝廷拘括童男女一时嫁娶殆尽○评曰人必好色也然后疑其淫人必贪财也然后疑其盗讹言虽起于閭閻之小人亦必在上者露其机括故因以发之耳当是时顺帝端拱盈成志荒而欲纵声色之好不待哈玛尔进秘密而后肆也讹言其必有所自矣】西番盗起杀镇西王子丹巴【立行宣政院以额森特穆尔为院使往讨】丁卯彗星见东北【大如天船色白长尺余彗指西南六月丁丑扫上丞己卯入圜卫壬午扫华盖扛星乙酉扫勾陈大星及天皇大帝丙戌贯四辅经枢心天纪甲午出圜卫丁酉出紫微垣戊戌犯贯索七月庚子扫河间癸卯经郑晋入天市丙午扫列肆己酉出天市垣扫梁星辛酉在房宿键闭之上罚星中星正西自昴至房凡歷一十五宿至八月庚子始防】赠故丞相安圖为东平忠宪王【于所封内建祠官为致祭】六月京师大霖雨【自辛巳至癸巳不止御河沁河浑河水皆溢没人畜田庐甚众壬辰彰德亦大水深一丈七月漳河溢至广平城下】癸卯车驾出猎太白经天○丙午幸实喇鄂尔多太白复经天○江西左丞锡迪讨朱光卿擒斩之【锡迪及噶扎尔擒光卿寻追获石昆山钟大明悉斩之遂平】秋八月壬午京师地大震【太庙梁柱裂各室墙壁壞压损仪物文宗神主及御床尽碎西湖寺神御殿壁仆压损祭器自是屡震至丁亥方止】癸未白虹贯日○河南地震○车驾还宫○九月己亥荧惑犯斗甲辰太白犯斗○立行枢密院寻罢之【四川湖广及江西江浙各置行院以镇遏好乱之民从巴延之请至明年二月罢】冬十二月以玛扎尔台为太保○巴延请杀五姓汉人不许【巴延请杀张王刘李赵五姓汉人上不从○评曰五姓皆先朝佐命立功族属蕃衍何罪而欲尽杀其人哉且所贵夫君人者为其保世滋大休养而生息之也郑弃其师春秋所恶以大臣四方是维天子是毗而请杀无罪岂理也哉巴延至是盖肆行而无忌矣顺帝能不之从则威福犹不至下移也】许有壬罢○东阳处士许谦卒【初兰溪金履祥事王栢登何基之门得承朱熹之传讲贯造詣益深以密东阳许谦又得传其学博极羣书洞究底蕴居九华山闭门讲学遠而幽冀齐鲁近而荆扬吳越皆来受业其教人至诚淳悉尝曰已有知使人亦知之岂不快哉由是及门之

士皆随才成就但不使学科举之文曰此义利之所由分也笃于孝友有绝人之行而不胶于古不流于俗不出闾里四十年而四方之士以不及门为耻宪臣论荐郡以遗逸应诏中外名臣列其名义章凡数十上有司请主文衡皆莫能致世称为白云先生卒谥文懿同时徽之休宁有陈栎定宇婺源有胡一桂庭芳九江有黄泽楚望绍兴之山阴有韩性明善皆与谦齐名元世遗逸名儒必以此数公为称首】分枢密院镇北边【以宗王奈玛岱知院事】

【戊寅】四年春正月丙申赦【以地震故】庚申太阴入南斗太白犯牛○二月庚午败于柳林○乙酉奉圣州地震【七月己酉复大震】三月以国王多尔济为辽阳左丞相○夏四月辛未京师天雨红沙昼雾○以特默齐珠尔噶岱为中书平章托克托为御史大夫【托克托巴延弟玛扎尔台之子也】己卯车驾幸上都【癸巳次八里塘 雹大如拳其状有小儿环玦狮豹 等物之形】河南兵获棒胡诏诛之○六月袁州民周子旺作乱伏诛【子旺反僭称周王伪改年号擒获伏诛】信州灵山裂○漳州民李志甫反【志甫反围漳州守城将绰斯戩与战失利诏江浙平章伯勒齐尔布哈总闽浙江广兵讨之伯勒齐尔布哈阿固台之子也】秋七月诏立巴延生祠于涿州○八月癸亥朔日食○丙子京师地震【日二三次至乙酉乃止】丁丑白虹亘天车驾还宫○九月癸酉奔星大如杯【色白起自右旗之下西南行没于近囑】庚寅太白犯斗○冬十一月立绍熙府军民都总使司【以御史大夫巴延兼充使治书吉達布为副使世袭其职本府原领六州二十县一百五十二镇国初以其地荒而废之至是居民二十余万故立府领之】四川散毛洞蛮叛○十二月以伯勒齐尔布哈为御史大夫傅岩起为中书参政

【己卯】五年春二月庚寅信州雨土○三月昂吉尔袭布巴勒罢【昂吉尔为辽阳平章 袭布巴勒为甘肃平章】夏四月车驾幸上都○六月甲辰荧惑退入南斗○汀州大水【平地深三尺没民居八百余区溺死八千余人】

达勒达民饥【鸿和尔布拉克赛音图布拉克尼格德呼苏赛音布拉克等六爱满大风雪民饥宗王托欢特穆尔】【托罗该图各爱满并饥各赈之】秋七月壬戌荧惑犯南斗○九月车驾还宫○冬十月禁倡优盛服【许男子裹青巾妇女服紫衣不许戴笠乘马】诏以巴延为大丞相【加元德上辅功臣之号赐七宝玉书龙虎金符巴延自诛驸吉斯之后独秉国钧专权纵恣变乱祖法虐害天下渐有邪谋以至擅爵赏赦死罪收诸卫之精兵为己用府库听其出纳上深患之巴延又欲以其侄托克托宿卫伺起居惧涉物议乃以知枢密院汪嘉努翰林承旨实喇卜同侍禁近实为属意托克托而托克托虽防养于巴延见其势焰熏灼尝忧其祸私请于其父玛扎尔台曰伯父骄纵已甚万一天子震怒则吾族赤矣玛扎尔台亦以为然托克托复怀疑久未能决质于其师浦江吴直方直方曰传有之大义防亲大夫但知忠于国家耳余复何顾时上左右皆巴延之党与独沙克嘉巴勒为上心腹托克托与二人深相结纳每乘间自陈上犹未之信阿鲁等日与反覆论难益知其心靡他于是始信无疑也○评曰吴直方之言大义防亲是矣然未深知春秋之义也盖所谓大义可以防亲者如周公之于管蔡石碣之于厚者耳君子之于其父如楚弃疾之于子南唐李璠之于怀光则大义虽当伸而至亲终不可防也托克托巴延之犹子防养于伯父则未知其果有父命而继体承重乎使果有父命而为之子则大义灭亲非托克托所得行者矣盖至尊者君至亲者父无父是无君也

君之义既不可背则父之亲亦不得而防如可得而防则天下之人皆无父矣然则如之何父母有过下气怡色柔声以谏諫若不入起敬起孝其终不从也则有继之以死而已圣人之经如权衡然随物之轻重而低昂之也若权不推移衡不平直而欲求铢两之真误矣呜呼世教衰而彝伦斃皆俗儒谬于说经之过也予故不得不辨】十一月开封人范孟作乱杀河南平章伊埒特穆尔等官军捕得诛之【 县人范孟伪称上旨杀伊埒特穆尔左丞齐喇廉访使旺扎勒布哈已而官军捕得孟伏诛初孟既杀省宪官召官属去位者署用以段辅为左丞使汴梁人归 北守黄河口 力拒不从贼怒系之于狱贼败污贼者咸得罪 独免同里有呉炳者常以翰林侍制徵不起贼召之使司卯酉歷炳不敢辞时人为之语曰归 出角呉炳无光】十二月复立都水庸田使司○工部产芝【 梁上产芝草一本七茎】

【庚辰】六年春正月察罕诺尔等处马灾○二月己亥大丞相巴延有罪黜免【初范孟矫杀河南省臣事连廉访使段辅巴延风防臣言汉人不可为廉访使时伯勒齐尔布哈与托克托并为御史大夫畏公议托疾不出章未上巴延促之急托克托曰伯勒齐尔布哈位吾上且掌印吾安敢专伯勒齐尔布哈闻之惧将出托克托度不能遏谋于呉直方先入以告章上帝不允巴延知之大怒告于帝曰托克托虽臣之子其心专佑汉人必当治之上曰此皆朕意非托克托罪及巴延擅贬宣让威顺二王上不胜其怒决意逐之一日泣语托克托托克托亦泣下归与直方谋直方曰此大事议论之际左右为谁曰阿鲁及托克托穆尔直方曰此輩苟利富贵其语一泄则主危身戮矣托克托乃与二人谋欲 巴延入朝擒之增卫士严宫门出入螭蚺皆为置兵巴延见之大惊召托克托责之对曰天子所居防御不得不尔然遂疑托克托亦增兵自卫及是巴延以所领兵卫请帝出田托克托劝帝称疾不往巴延固请太子雅克特穆尔出次柳林托克托遂与阿鲁等议白上怒拘门钥戊戌上夜御玉德殿召省院大臣先后入见出五门聽命夜二鼓遣集赛伊克察喇率三十骑抵太子营取之入城又召杨瑀入草诏数巴延罪状命中书平章珠尔噶岱赍赴柳林诏畧曰朕践祚以来命巴延为太师秦王中书大丞相而巴延不能安分专权自恣欺朕年防轻视太皇太后及朕弟雅克特古斯变乱祖宪虐害天下加以极刑允合舆论朕念先朝之政尚存闵恤今出巴延为河南左丞相原领诸军亲军并集赛台人等诏书到时即许散还明日巴延遣骑士至城下问故托克托倨城上宣言有旨黜丞相一人诸从官皆无罪巴延奏乞陛辞不许道出真定父老奉觴酒以进巴延问曰尔曾见子杀父事乎对曰不曾见子杀父惟闻有臣弑君巴延俛首有惭色○评曰托克托之谋黜巴延有三失焉其幸而成者元运未终天固相之也夫汉人不得为廉使其事未大害于政治乃抑其谋以激其怒可乎况巴延独秉国钧已非一日号令赏罚无敢违忤一旦沮遏邪虑必萌此一失也嫌隙既开势不相下如欲取之必匿形伏机审而后 顾乃戒卫士严宫门出入螭蚺皆为置兵无乃速其变乎此再失也当是时巴延势倾朝野左右前后皆其党与故虽知朝廷见忌而不以为虑然增兵自卫请帝出田应叵测也决计讨之当如疾雷不及掩耳虽皇弟在彼亦不得顾夫何夜已二鼓遣三十骑取雅克特古斯入城则机露而谋泄矣使巴延先 诏使其能入柳林乎此三失也或曰雅克特古斯文宗之嫡巴延若挟之为嗣以号令天下则人心动摇矣既虑其若此则于其固请出田之时勿许可也坚忍持重使皇弟还宫而后 亦可也轻举而寡谋盖天厌巴延非托克托所能为功也】以玛扎尔台为太师中书右丞相塔斯哈雅为太傅知枢密院特默齐为太保御史大夫○以托克托知枢密院汪嘉努为中书平章傅岩起为左丞【诏托克托之外诸王侯不得悬带弓箭及环刀辄入内府○评曰

托克托持大义灭亲之说以讨巴延知有君而不知有伯父似矣然遂以为功则非也况父总中书子掌枢密何异牵牛蹊人之田而夺之牛者乎当是时为托克托者若曰臣志存邦国不顾骨肉事非得已若赏臣之功是臣卖亲以徼利禄死无以见伯父于地下矣如此而奉身以退则可也】罢广东采珠提举司○己酉彗星见【自是月至三月庚辰凡三十二日】京畿大水【凡五州十一县诏每户赈米两月】三月漳州义士陈君用讨杀李志甫诏以君用为漳州路同知【龙岩尉黄佐才获志甫余党郑子箕佐才因与贼战其妻子四十余口皆被害诏授佐才为龙岩县尹○评曰李志甫阻兵三年守将失利邻道奔走幸而讨杀余党尚存黄佐才一龙岩尉耳能与贼战家属死者四十人而仅偿县尹何足以激劝人心哉】以揭傒斯为奎章阁供奉学士【寻改翰林直学士再升侍讲学士时新格超迁不越二等独傒斯超四等进九阶盖异数也】赐史惟良等上尊束帛【诏赐南防中丞史惟良御史中丞耿焕江东廉访使张友谅中书左丞许有壬上尊束帛】窜巴延于南恩州道卒【诏安置于南恩州阳春县行次江西隆兴之驿舍病死】以特穆尔达实为中书右丞【特穆尔达实喀喇托克托之子也】以归 为监察御史【拜御史防臣奏曰此即河南抗贼者也上曰好事卿宜数为之赐以上尊】封玛扎尔台为忠王固辞许之【诏封忠王赐号達尔罕玛扎尔台固辞御史请许之以劝廉讓上从之】夏六月诏毁文宗皇帝庙主废皇太后鸿吉哩氏出居东安州放皇弟雅克特古斯于高丽【诏曰昔皇祖武宗升遐祖母太皇太后惑于憊慝俾皇考出封云南英宗遇害正统浸偏我皇考以武宗之嫡逃居朔汉宗王大臣同心翊戴于时以地近先迎文宗暂总机务知天理人伦所在假让位之名以寶玺来上皇考推诚不疑即立为皇太子而乃当躬迓之际与其臣伊埒布哈阿哩雅明埒栋阿等谋为不 归而再御宸极欲自解于天下乃谓夫何数日之间宫车晏驾海内闻之靡不切齿又私图传子嫁祸于班布尔锡皇后谓朕非明宗之子出居遐陬上天不佑随降陨罚叔婶布達实哩怙其势焰舍长嫡而立次防奄复不年诸王大臣以贤以长扶朕践祚赖天之灵权奸屏黜永惟鞠育罔极之恩忍防不共戴天之义既往之义不可胜诛其命太常撤去图卜特穆尔在庙之主布達实哩削太皇太后之号徙东安州安置雅克特古斯放诸高丽当时贼臣伊埒布哈阿哩雅明埒栋阿等明正典刑○监察御史崔敬上书言文皇既撤庙主叔母亦削鸿名尽孝正名斯亦足矣惟念皇弟雅克特古斯年防播迁天理人情有所不忍方明皇上賓皇弟尚在襁褓未有知识义当矜闵盖武宗视明文皆亲子陛下与皇弟皆嫡孙若以武皇之心为心则固无亲疎以陛下之心为心则未免有彼此臣请以世俗喻之常人有一百金之产尚置义田以收养宗族陛下富有四海乃以同气之人置之度外貽笑他邦取辱后世倘生他变关系非轻臣愿杀身以赎皇弟之罪伏望陛下归迎太后母子以尽骨肉之义则天意回人心悅宗社幸甚书奏不报○评曰至元元年诏赦天下有曰永惟太皇太后后其所生一以至公为心亲挈大寶畀予兄弟功德隆盛近古罕比今诏乃曰叔婶布達实哩怙其势焰舍长嫡而立次防何前后之矛盾邪且夫宁宗之母托果斯顺帝之母玛哩达均之妾母也顺帝可谓长矣何名为嫡哉王者出言何可轻也况天下之人亦有公论乎】帝弑故太后鸿吉哩氏杀皇弟雅克特古斯【太后崩雅克特古斯遇害于中道○评曰古人有言言不激切不足以感动人主然过于激切不足以回人主之意适足以重其过而赞其决也崔敬之谏可谓激切矣但其言曰倘生他变关繫非轻则反有以启顺帝之疑而雅克特古斯中道之毙未必不由此也呜呼凡为人臣进谏其君何可容易乎哉】秦州成纪县山崩地坼○删脩大元通制【以翰林承旨達罕奎章阁学士库库监脩】達勒達地大风雪【羊马皆死赈钞一百万余錠】秋七月庚申太阴犯心【犯心距星又犯

中央大星】八月以额琳沁巴勒额森特穆尔并为御史大夫○衛辉大水【漂民居千余家】九月丁卯荧惑犯歲星○冬十月丁酉太白入南斗○玛扎尔台罢以托克托为中书右丞相特穆尔布哈为左丞相许有壬为参政汪嘉努知枢密院○十一月以孔克坚袭封衍圣公○处婺州饥○十二月诏复行科举【初天历二年防士大廷阿荣为奎章阁大学士语其僚虞集曰更一科后科举当辍辍两科而复复则人才大出荣不及见之矣公犹及见集曰得士之多幸如存初言今文治方兴未必有中辍之理荣叹曰数当然耳集问何以知之弗答至是果如其言】罢奎章阁【及大禧宗禋等院】

元史续编卷十三

【辛巳】至正元年春正月己酉朔诏改元【诏以至元七年为至正元年】以陈旅为国子监丞【旅莆田人笃志于学无书不读马祖常使鄱南一见奇之曰子馆阁器也相与勉游京师虞集见其所为文叹曰此所谓我老将休付子斯文者矣因交口延誉于诸公间赵世延力荐之以为国子助教出提举江浙儒学至是入应奉翰林迁国子监丞】二月汴梁地震○三月车驾幸上都○夏四月道州贼蒋丙等作乱【攻破江华等诸县】以特穆尔达实为中书平章阿鲁为右丞许有壬为左丞【初有壬论帝当亲祠母后虚位徽政院当罢命相改元当合为一诏冗职当沙汰钱粮当裁节如此类者不一而足时论黜之迁为左丞】复封玛扎尔台为忠王○辛丑冀宁路地震裂○六月复旧奎章阁为宣文阁【时大臣议悉罢先朝所置阁监官属翰林承防库库言于上曰民有千金之产尚设家塾以延馆客堂堂天朝富有四海一学房乃不能容邪上然之即日改奎章阁为宣文阁艺文监为崇文监设官如初就令库库董治因请置检讨等官十六员以备进讲达官有不喜儒者谓曰儒有何好君酷爱之库库曰昔世祖以儒足以致治命裕宗学于赞善王恂今秘书所藏仿书当时裕宗于学生之下亲署御名习书谨呈其敬重若此世祖尝暮召我先人坐寝榻下陈说四书及古史治乱至丙夜不寐喜曰朕令卿徒许仲平学正欲以嘉言入告朕耳其向学又如此今汝不好儒宁不念圣祖神宗笃好之意乎且儒者之道君仁臣忠父慈子孝从之则人伦咸得国家咸治违之则失则乱尔欲乱而家吾不汝禁慎勿以斯言乱我家国也达官有慙色库库喀喇氏博果密之子也】○评曰昔汤之于伊尹学焉而后臣之高宗亦曰台小子旧学于甘盘古之人君其隆师重道如是元世祖统一区夏天性忠实合节前圣一王恂为赞善而令裕宗于学生之下亲署御名习书谨呈其尊敬师 奚让于前王哉呜呼贤矣】济南水○秋八月车驾还宫○九月许有壬进讲明仁殿【上悦赐酒宣文阁仍赐貂裘金织纹币】冬十一月道州民何仁甫等反【连徭贼寇遣诏湖广平章巩卜班讨之】以伯勒齐尔布哈为江浙左丞相○是岁通泰崇明等州海溢

【壬午】二年春正月开京师金口河【托克托用参议博罗特穆尔都水监 佐言于都城外开河置闸放金口水为河深五十尺广一百五十尺役夫十万欲引通州船入城廷臣多言不可而托克托排羣议不纳左丞许有壬条陈其利害畧曰大德二年浑河溢都水监将金口下闭闸板五年浑河水势浩大郭太史将金口上河身尽行堵塞至顺初有言引金口水过京城至通州者工部及提举司大都路合属官民相视议拟水由二城中间窒碍又卢沟河自桥至合流处从来未尝有渔船此不可行船之明驗也且通州去城四十里卢沟止二十里若可行船当时何不于卢沟立马头百事近便却于四十里外为之又西山水势高峻金时在城北流入郊野纵有冲决为害亦轻今则在都城西南若霖潦涨溢加以此水性急宗社所在岂容侥幸设使成功一时亦不能保其永无冲决之患且金时此河未必通行今其河道遗迹安知非作而复辍之地又郭太史作通惠河时何不用此水而远取白浮之水盖白浮水清而此水浑浊不可用用之易淤若不作闸地形高下不同必致走泄滯滞作闸以节之则浑流必致淤塞用人挑洗无有已时此议方兴万口一词以为不可若以为成大事者不谋于众人则是商鞅王安石之法恐当今不宜有此议上丞相终不聽河成果水急泥壅不可行费用不貲而卒以无功台臣劾建言者博罗特穆尔傅佐俱坐诛○评曰古先哲王有所兴作必谋及乃心谋

及卿士谋及庶人又谋及卜筮询谋僉同夫然后行未有排羣议而妄兴作者也托克托当国议开金口河役夫十万工不为小矣乃偏聽独断力排羣议而为之虽许有壬条陈利害辞达理明终不为之止其坚忍执愎一至此哉夫偏聽成奸独断生辞他日汝中栢龚伯璉之徒交搆谗谄卒至祸败其所從來久矣】三月廷试进士赐拜珠陈祖仁等七十八人及第出身有差【下第者悉授教官又增乡试备榜亦授以学录教谕】大同饥【人相食】以额木奇塔特为中书平章○夏四月冀宁地震○车驾幸上都○五月甲申太白经天○东平 雹【大如马首】六月济南山崩汾河溢○以贺惟一为中书右丞【惟一仁杰孙胜子也初胜以非罪死惟一尚防而资性开朗正大师事赵孟頫吕弼袭父职为宿衛长文宗召为上都留守上初即位迁御史中丞时中书参议佛家闾憊人也惟一劾其罪时宰庇之寢不行惟一乃辞病去及是起为参政进右丞防御史祈君璧复劾佛家闾黜之乃就职○评曰贺惟一可谓明人臣之义矣人臣之义有官守者不得其职则去有言责者不得其言则去中丞言官也不得其言则有去而已右丞与参议同省一薰一莸十年犹臭必憊邪斥而后就职其进退有道矣噫若惟一者岂非贤哉】秋七月惠州罗浮山崩【凡二十七处】庆远民莫八等反讨平之【攻陷南丹左右两江等处命托克托济延讨平之】拂郎国献异马【长一丈一尺三寸高六尺四寸纯黑后二蹄白】八月庚子朔日食○以成遵为监察御史【遵初扈從上京言台察四事一曰差遣台臣越职问事二曰左迁御史杜塞言路三曰御史不尽言职惟循资求进四曰体覆廉访声迹不实贤不肖混淆上皆纳之谕台臣曰遵所言皆世祖风纪旧规也时有议赃吏遭丧不许归 须竟其狱者遵曰恶人固可怒然与人伦孰重国家方以孝理天下宁失罪人不可使天下有无亲之吏大夫是之议遂寢是歲遵言事及举劾凡七十余章皆指讐时弊执政恶之寻改除都事】九月袞布巴勒讨何仁甫平之【复平溪峒堡寨二百余处】辛未车驾还宫○冬十一月辛卯歲星荧惑太白聚尾○十二月命右丞贺惟一等兼知经筵【惟一与中丞张起岩枢密副使姚庸并以本官兼知】乙酉京师地震○诛阿魯圖們【坐谋害宰相图為叛逆癸未】三年春正月许有壬罢○二月新郑密县地震○巩昌山崩【成纪宁遠伏 等县山崩水涌出溺死人无算】三月诏修辽金宋三史【以右丞相托克托都總裁平章特穆尔达实右丞贺惟一中丞张起岩翰林学士欧阳 侍御史吕思诚翰林侍讲学士揭傒斯为总裁官丞相问修史以何为本傒斯曰用人为本有文学而不知史事者不可与有文学知史事而心术不正者不可与用人之道又当以心术为本傒斯又言作史之法须求作史之意政事得失人才贤否一律以是非之公至于物论不齐必反复辩论求归于至当而后可】诏振举风宪【诏内外官有不法者從内台行台监察御史纠劾歲以八月终出巡至次年四月终乃还】夏四月丙申朔日食○两都桑果叶皆黄【生龙缺】车驾幸上都○五月河决白茅口【又决金隄并河羣邑民居漂溺壮者流离上甚患之遣使体量命大臣访求治河方畧】六月勅经筵官月三进讲○回回拉里反掠解吉隰等州○秋七月汴梁大水【中牟扶沟尉氏洧州郑州荥阳汜水河陰凡一州七县】八月晋宁进嘉禾【一茎八穗】山东盗起【掠兗州】车驾还宫○九月蒋丙攻陷连桂州【袞布巴勒禽獠贼酋唐太二蒋仁五送京师诛之蒋丙复攻破连桂州自称顺天王】冬十月躬祀太庙【上行礼至宁宗室问曰朕宁宗兄也理当拜否博士刘闻对曰宁宗虽弟其为帝时陛下为之臣春秋时僖公闵公兄也闵公先为君宗庙之祭未闻僖公不拜陛下当拜乃下拜○评曰刘闻之对据礼合经可谓善矣顺帝闻善即服不以为难不亦美乎】己酉郊【上亲祀圜丘以太祖配右丞相托克托为亚献太尉知院阿魯圖們为终献御史大夫巴咱尔与司徒汪嘉努充大礼使平章伊实

特穆尔特穆尔达实充侍中御史大夫伊实特穆尔右丞贺惟一充门下侍郎宣徽使达实特穆尔太常院周知李好文充礼仪使】以韩元善为中书参政○大赦【以郊祀礼成大赦天下文官并减一资武官陞散官一等蠲民租五分赐高年帛有差】十二月以伯勒齐尔布哈为中书左丞相特穆尔布哈罢○诏写金字藏经○徵处士托音巴延张瑾杜本本辞不至【巴延等皆授以官独本辞不至本清江人初上救荒防于江浙丞相呼喇布丞相奇之入为御史大夫言于武宗召至京师辞归隐武夷山中文宗朝徵之不起至是右丞相托克托荐之于上诏以为翰林待制赐金币上尊使者致君相之意促之行至杭州称疾固辞且致书丞相曰以万事合为一理以万民合为一心以千载合为一日以四海合为一家则可以言制礼作乐而跻五帝三王之盛矣遂不至○评曰阴阳之气合则生万物圣贤之道合则成万事故易泰卦之象曰天地交而万物通也上下交而志同也元兴至是已七十载海宇晏安民物蕃膺君臣契和若可以为泰矣而杜本常见其不合独忧其非泰何哉盖邪正混淆则万事不可合为一理上骄下慢则万民不可合为一心昔是今非则千载不可合为一日内外重轻则四海不可合为一家人徒见上下诺诺声应气和以为合不知其适所以乖也庙堂巍巍垂拱无事以为泰孰知其将否也况当是时顺帝以方壮之年抚盈成之运不亲政治惟务逸乐而脱脱刚愎自用伯勒齐尔布哈奸佞恃害一相既不合矣各树私党以相仇敌岂足与为治乎易白君子见几而作不俟终日杜本有焉】

【甲申】四年春正月诏定守令黜陟之法【六事备者升一等四事备者减一资三事备者平迁六事不备者降一等】庚寅河决曹州【雇夫万五千八百修筑是月又决汴梁】以贺惟一为中书平章赵德壽吹斯戡并为参政○以纳琳为中书平章姚庸为左丞○车驾幸上都○夏四月托克托罢【托克托辞职遂罢相封郑王食邑安丰赐金印海青文豹等又赐金十锭银五十锭钞万锭帛一百疋悉辞不受】霖雨河溢【决白茅金隄曹濮济袞皆被灾】五月以阿鲁图为中书右丞相【托克托辞相位上问谁可代者以阿鲁图对遂用之右司郎中陈思谦建言储事阿鲁图曰左右司所以赞助宰相即郎中有所建明当众议而行之何必别为文字自有所陈耶思谦慙服他日议除一人为刑部尚书或难之曰此人柔软非刑部所可用阿鲁图曰庙堂即今选佞子邪若选佞子须用强壮人尚书详谏刑狱若不枉人不壞法即是好刑官何必求强壮者众皆莫能对其为治知大体如此○评曰尚书详谏刑狱不枉人不壞法盖其职分之所当为不论人之刚柔皆当以此为务但柔弱之人或畏权势则有时而失所守刚强之士无所挠屈庶不至于阿徇耳谓柔软不可任刑部亦非过也然阿鲁图之言则可谓知大体矣】六月伊洛溢○秋七月温州地震海溢○蒙阴地震○滦河溢○益都民郭和尼齐作乱【益都盐徒郭和尼齐作乱遂上太行由陵川入壶关至广平杀兵马指挥复还益都】八月车驾还宫○九月丁亥朔日食○冬十月复令民纳粟补官【备赈济也有匿奸罪而输粟得七品杂流者为怨家所告有司议输粟例无有过不与之文中书右司郎中成遵以为卖官鬻爵已非令典况又卖官与奸淫之人其何以为治必夺其勅还其粟着为令乃可从之】

【乙酉】五年春正月蓟州地震○三月廷试进士赐布延布哈张士坚等七十八人及第出身有差○夏四月车驾幸上都○丹阳雨红雾【草木叶人衣裳皆濡成红色】五月辛卯中书平章库库卒【库库风神凝邃制行峻洁博通羣书以翰林学士知经筵日劝上就学上欲

宠以师礼固辞不可上尝欲观画画库即取郭忠恕比干图以进一日上览宋徽宗画称善库进曰徽宗多能惟一事不能上问曰何谓所不能者一事对曰独不能为君耳身辱国破皆由不能为君所致凡为人主贵能为君他非所尚也其随事规谏裨益皆此类已而平章江浙复以承防召还防中书平章缺近臣拟进上曰平章已有其人今行半途至矣至京师七日感疾卒赐谥文忠库善书当世以之亚于赵孟頫云○评曰六艺居三物之一而书居六艺之一盖学者之末节也况画又书之余事且为学者所不必能岂人君所当务乎宋徽宗承八业之基有四海之富不务修六德慎六行游六艺而拳拳留神于禽鸟竹石以极夫模写之工与画史争高下于錙铢卒使宗社失守殒身北廷为万世笑其画之存于世者正后王之鉴也以其所能校其所不能得失了然矣其后顺帝造龙船制刻漏皆自制其样精巧出人意表前代所未尝有库于此岂亦微见其端故因事而切讽之欤惜哉帝之不悟也】秋七月以伊苏特穆尔特穆尔达实并为御史大夫袞布巴勒为中书平章○河决济阴【漂官民庐舍殆尽】八月车驾还宫○九月以吹斯戡为中书右丞多尔济巴勒为参政【多尔济巴勒东平王拜珠从子元统初为御史首请亲祠宗庙及不宜数赦又陈时政九事一杜侥幸二省财用三停佛事四省冗官五均公田六铸钱币七罢山东田赋官八蠲河南自实粮九禁取海外姬妾及正旦纠正班次斥教坊司不得入多尔济巴勒传防多尔济巴勒执不从萨勒迪曰御史不奉诏邪对曰事不可行大夫宜覆奏西僧作佛事内殿醉酒失火多尔济巴勒劾之萨勒迪传诏免罪又执不可一日凡八传防乃已巴延腾吉斯嘉努怙势为民害多尔济巴勒因巡歷捕致于法民大悦及还腾吉斯怒曰御史辱我家人我何面目见人耶多尔济巴勒曰我知奉法他不知也迁大宗正宗王有杀其大母者力请正其罪时相难之遂出为江西左丞至是召为参政○评曰万物本乎天人人本乎祖故父子至亲而祖父母则愈尊矣百骸九窍受形气于父母而大母则又父之自出者也周礼有都宗人家宗人统治宗姓后世为大宗正焉有宗王杀其大母而无罪者乎当是时大宗正能守法致辟而阿鲁图伯勒齐尔布哈并居相位党庇大逆绝人伦灭天理甚矣欲不危亡得乎】冬十月赐贺惟一国姓更名太平以为御史大夫【故事台端非国姓不得授惟一固辞诏特赐姓蒙古而更其名为太平】遣奉使宣抚巡行天下【诏曰朕自践祚以来今十余年托身亿兆之上端居九重耳目所及岂能周知故虽夙夜忧勤冀安黎庶而和气未臻灾时作声教未洽风俗未淳吏弊未祛民瘼滋甚岂承宣之寄纠劾之司奉行有未至欤爰稽先朝成宪遣官分道奉使宣抚布朕德意询民疾苦疏涤冤滞蠲除烦苛体察官民贤否明加黜陟民间一切兴利除害之事悉听举行命江西左丞呼勒图迪音吏部尚书何执礼巡两浙江东前云南右丞萨克繖将作院使王士巡江西福建大都路达鲁噶齐巴克实江浙参政秦德巡江南湖广吏部尚书达繖宣政院魏景道巡河南江北资政院使曼济兵部尚书李猷巡燕南山东兵部尚书布哈枢密院判靳义巡河东陕西宣政院同知伯嘉努宣徽院王伊苏岱尔巡山北辽东湖北宣慰使阿齐拉两淮运使杜德远巡云南上都留守阿雅噶齐陕西左丞王绅巡甘肃大都留守达尔玛实哩河南参政王守诚巡四川前西台中丞鼎鼎集贤侍讲学士苏天爵巡京畿平江路达鲁噶齐尊达实哩及都水监贾惟贞巡广海】辽金宋三史成【右丞相阿鲁图进三史上曰史既成书前人善者足法恶者取戒岂止为君者人臣亦当知之卿等其体朕心以前代善恶交相戒勉】韩元善罢以吕思诚为中书参政○十二月至正条格成【先是至元四年二月命修至正条格以平章昂吉儿监修至是始成书】奉元人陈望叔谋作乱伏诛【望叔伪称雅克特古斯太子事觉伏诛】以都梭特穆尔知枢密院冯思温为御史中丞

【丙戌】六年春正月以伊埒哲伯为御史大夫【伊埒哲伯初为南台大夫时巴延居相位擅权疾其论事不阿因杀其子达尔玛而谪之海南巴延败乃得召还至是复拜中台尽选中外廉能之士置诸风宪时号得人】二月辛未兴国雨雹【大如马首】山东地震【凡七日乃止】三月京畿山东盗起【盗扼李开务之闸河劫商旅船两淮运使宋文瓚言世皇开会通河千余里岁运米至京者五百万石今骑贼不过四十人劫船三百艘而莫能捕恐运道阻塞乞选壮勇千骑捕之不听诏中书参政索诺木巴勒至东平镇遏】夏四月辽阳沃济部人及硕达勒达叛【为捕海东青烦扰也万户迈珠讨之遇害】车驾幸上都○以吕思诚为中书左丞魏中立为参政○五月陕西饥○象州盗起○盗窃太庙神主○立河南山东行都水监【以河决故】汀州民罗天麟反讨杀之【天麟及陈积万叛陷长汀命江浙右丞呼图克布哈江西右丞图噜合兵进讨其徒罗德用杀天麟积万来降余党悉平】秋七月以巴咱尔为辽阳左丞相【沃济野人等未靖命太保巴咱尔往镇抚之】以额图珙为云南平章【云南贼死可伐盗据一方侵夺路甸命额图珙出镇且使讨之仍降诏招谕】以多尔济巴勒为中书右丞达尔玛索诺木巴勒参政【有以善音乐得幸者帝命为崇文监丞参政多尔济巴勒他拟一人以进帝怒曰选法书由中书耶多尔济巴勒顿首曰用幸臣居清选恐后世议陛下今选他人臣实有罪他省臣无与焉帝悦陞右丞】黜御史实巴尔等【奉使宣抚鼎鼎等奏实巴尔等罪杖而黜之时诸道奉使皆与台宪互相揜蔽惟鼎鼎苏天爵与湖广道巴克实纠举无所避京畿道凡兴除者七百八十三事纠劾九百四十九人都人称天爵为包拯天爵竟以忤时相罢○评曰御史纠正百司肃清庶政者也而为奉使宣抚所奏黜台纲陵夷可知矣夫台宪不足任于是乎有奉使宣抚犹汉世绣衣直指之类耳今诸道奉使又与台宪互相掩蔽则天下庶官举不足任矣其何以为国哉举京畿道兴除者七百八十三事纠劾者九百四十九人而诸道无闻焉吏之多民瘼之滋又不言而可知也】八月车驾还宫○九月邵武地震【有声如鼓】靖州猺贼吴天保寇陷黔阳沅州○冬闰十月诏赦天下【免差税三分水旱地方全免】以济兰巴尔为太尉○山东河南盗起○河决【尚书李防请躬祀郊庙近正逵邪以崇阳抑阴不听】以特默格为中书平章○阿噜图罢【先是伯勒齐尔布哈尝与阿噜图谋挤托克托阿噜图曰我辈亦当有退休之日人将谓我何伯勒齐尔布哈屡以为言终不从乃风御史劾奏阿噜图不宜居相位阿噜图闻之即辞避出城所亲为之不平请曰丞相所行皆善而御史言者无理何不见上自陈上必辨焉阿噜图曰我博尔济世裔岂以丞相为难得邪但上命我不敢辞今御史劾我我即宜去盖御史台乃世祖所建我若与御史抗即与世祖抗矣汝等勿复言阿噜图博尔济四世孙也○评曰阿噜图之不校即去善矣若其言则未尽当也盖宰相任天下之重苟能致君尧舜安辑华夏德被生民功施社稷尊荣其身于当世而垂誉于无穷岂非旷百世所难得者彼四集赛世裔乌足贵哉况为士者当养廉远耻大臣被劾去位思过亦礼之常抗章自辨如廉耻何若曰与御史抗即与世祖抗则非也】

【丁亥】七年春正月甲辰朔日食【是日大风寒朝官仆者数人已而日食】以伯勒齐尔布哈为中书右丞相寻罢○以章巴延为湖广左丞【以讨猺獠有功】以索诺木巴勒为右丞多通盖苗并参政昂吉尔知枢密院苗寻罢【时大臣以两京驰道狭隘奏毁民田庐广之已遣使督治苗言驰道创自至元初何今日独以为狭力辩其不可乃止又欲出宿卫士为郡长官俾以养廉苗曰郡长所以牧民岂养廉之地哉果不能自存赐之钱可也若任郡守必择贤而后可以议遂寝又欲与角觝者万贯苗曰诸处告饥不蒙赈防力戯何功获此重赏乎于是

丞相谓僚佐曰所以引盖君至此欲其相助也乃每事沮抗如此后有公务毋白参政苗闻之乃自引去除甘肃左丞】以宦者拜特穆尔为司徒○二月己卯山东地震【壞城郭三月东平又震河水动摇】三月集贤大学士呉直方免【御史王士 劾其濫进官阶坐夺宣命】修上都大乾元寺○夏四月复以伯勒齐尔布哈为中书右丞相特穆尔达实为左丞相鼎鼎为右丞【评曰甚矣小人之易进而难退也盖君子秉德阳刚若火之然人不得而狎故去之易小人赋质阴柔如泉之达人不见其可畏故斥之难伯勒齐尔布哈奸邪忮害不厌人望而为御史大夫者五年居相位者又五年斥而复用岂非所谓尸位固宠者欤】通州盗起【临清广平滦州诸处盗起御史言通州密迩京师而盗贼蜂起宜增兵讨之以杜其源不听】河东大旱【地坼泉涌山崩城陷压伤居民歲复大旱】五月呉天保陷武冈遣湖广左丞善巴勒讨之○伯勒齐尔布哈罢【以灾异迭见罢为太保就第】六月安置太师玛扎尔台于西宁州【伯勒齐尔布哈以宿憾潜玛扎尔台诏徙西寧州其子托克托力请与俱行在道则阅骑乘庐帐食则视其品物之精粗玛扎尔台安之】以太平为中书平章福壽为参政魏中立罢○秋七月诏处士旺扎勒圖济尔噶朗董立李孝光张枢枢辞不至【以旺扎勒圖济尔噶朗为翰林待制枢立为修撰孝光为著作郎初枢以丞相纳琳荐召修三史史成托欢辟枢为本府长史辞弗就至是再召复辞不至明年卒于家】以纳琳为御史大夫托欢为中书右丞孔思立为参政【纳琳诬孔思立受赇事或欲连中吕思诚纳琳曰吕左丞素有廉声难以及之遂止】八月复徙玛扎尔台于甘肃【玛扎尔台与其子托克托谪居在外时相欲倾之噤人告变且扳台臣同上奏御史大夫亦怜真班曰凡为相者孰无闲退之日况托克托父子在官无大咎过奈何迫之于险终不徙】九月车驾还宫○中书左丞相特穆尔达实卒【特穆尔达实天性忠亮学术正大上嘗问为治何先对曰法祖宗又问王文统奇才恨不得如斯人者用之对曰世祖有尧舜之资文统不告以王道而乃尚霸术要近利世祖之罪人也使今有文统正当遠之又何足取乎初巴延议罢科举特穆尔达实在参议府讫不署奏及入中书乃议复行之徵用防士待以不次之擢或疑其太优特穆尔达实曰隱士无求于朝廷朝廷有求于隱士区区名爵何足吝惜识者诵之○评曰尊德乐义故隱士无求于朝廷济世安民故朝廷有求于隱士特穆尔达实之言当矣若谓不吝名爵为足以求隱士则非也夫伊尹耕莘汤三聘之而后起孔明居隆中昭烈三顾之而后许以周旋斯二人者岂名爵所可致哉道足以拯天下时足以行其志感知遇之深于是乎为之用不然千驷万钟何加焉亦终老于耕钓而已矣故欲以名爵致隱士者不能以得隱士而为名爵所致者亦非所谓隱士也】以多尔济为中书左丞相○呉天保寇陷寶庆杀其湖广右丞善巴勒【天保陷溱浦诸县焚掠无遗又陷寶庆杀湖广右丞实巴尔于军中复寇沅饶州兵击走之又寇靖州命平章格尔领兵威顺王库春布哈镇南王博啰布哈合江西湖广兵同进讨之】冬十月西番盗起【凡二百余所陷哈喇和卓】沿江盗起【两淮盐运使宋文瓚言江阴通泰为江海之门户而镇江真州次之国初设万户以镇其地今戍将非人致贼舰往来无常集庆花山贼才三十六人官军万数不能进讨反为所败后竟假手盐徒虽能成功岂不貽笑遠近宜亟选智勇以图后功不然则东南五省财赋恐非国家之有不聽】赐大承天防圣寺田业【赐山东地土十六万二千余顷为永业户部奏各防水旱田禾不收湖广云南盗贼蜂起兵费不给而各位集赛冗食甚多乞赐分拣帝牵于众请令三年后减之○评曰古者方里而井井九百亩十六万二千余顷为地方百七十里视古侯伯两国矣不以给民而以资僧寺是犹剝牛马以豢虎豹他日欲耕欲战得乎】以呼图克布哈为中书右丞○十一月以多尔济为中书右丞相太平为左丞相韩

加讷为西台大夫【时留守司将致贺礼于二相多尔济家人先在鸿禧观察知其致左相者特丰白其事请却之多尔济曰彼縱不送我又何怪焉命受之多尔济穆呼哩六世孙托克托子也】前太师玛扎尔台卒于甘肃【玛扎尔台卒召其子托克托还京师】以归旻为中书右司都事【顺江酋长乐孙求内附请立宣抚司及置郡县 以既设郡县有事不救则辜来附之意救之则疲中国而事外夷所谓获虚名而受实祸也与左丞吕思诚抗辨甚力左丞相太平笑曰归都事善戇如此然其防果安出 曰可授其酋长宣抚勿责其贡税使者赐金帛遣归足矣卒徙 言京师苦寒有丐诉丞相马前者索皮服予之因核在官皮服欲悉给贫民 曰宰相当以广惠天下为心皮服能几何丞相悟而止湖广左丞善巴勒卒其子实迪掾中书请奔丧丞相以实迪有兄弟不许 曰孝者人之同情以有兄弟而沮其谋非所谓以孝治天下也遂许之广猺入寇诏遣将统思州杨元帅兵往讨 言易军而将不谙教令恐不能胜不如命 就统彼悦于恩命必能自效此谓之以夷攻夷也上不徙竟无成功○评曰百亩之田无夺其时则数口之家可以无饥矣五亩之宅树墙下以桑则五十者可以衣帛矣故善养民者在制其常产使得以用天之时因地之利而已归 谓宰相当以广惠天下为心是矣谓皮服能几何莫若择饥寒者赈之则非也夫民失常产而徵敛无艺君不节用而费出无经民之饥寒者常多而上之所畜积者不足安得人人而赈之哉又况赈之于一时而无以贍其终身亦终于饥寒而已矣】选用守令【以连年水旱民多失业选台阁名臣二十六人出为守令许民间利害实封呈省】置中书议事平章四人○以韩镛为饶州路總管【时慎选守令魏中立荐镛于上上为署镛姓名特授饶州路總管饶俗尚鬼有觉山庙自昔为妖以祸福人为盗贼者必祷而卜焉事之尤谨镛至即撤其祠沈土偶人于江凡境内淫祠悉毁之人初大骇已而皆叹服选民俊秀入学求尊宿有学行者为五经师朔望幅巾深衣以谒先圣每月考课以示劝勉由是人人自力于学而饶人以科第进者视他郡为多】以韩加讷为中书平章【戊子】八年春正月戊戌朔以额森特穆尔知枢密院○二月纳琳致仕以新济为南台大夫○以贾惟贞为永平總管【奉使宣抚穰职故有是命】立行都水监于郅城【以贾鲁为大监循行河道考察地形往复数千里备得要害为图上奏二防其一议修筑北隄以制横溃则用功省其二议疏塞并举挽河东行使复故道其工数倍防鲁迁中书右司郎中议未及竟明年又立山东河南等处行都水监】三月廷试进士赐阿尔辉特穆尔王宗哲等七十八人及第出身有差○京畿民饥○赐徽州守臣金帛【徽州路达噜噶齐哈喇布哈以政绩着闻赐金帛以旌之】幸国子学○赐衍圣公银印○车驾幸上都○以托克托为太傅○辽阳乌延博尔欢等作乱讨平之【与索和尔俱称大金子孙官军讨斩之董哈喇复作乱镇抚奇彻擒之】夏五月丁酉朔大霖雨京城崩○广西山崩漓江溢○四川旱饥○遣使祠曲阜○以刘恒为山东宣慰使【恒守九江有政绩故特陞之】以阿拉克布哈为大司徒○秋八月车驾还宫○奎章阁侍书学士致仕虞集卒【集宋相允文五世孙也父汲母杨氏宋国子祭酒文仲女文仲守衡汲以甥馆徙时未有子为祷于南岳一日文仲晨起衣冠坐而假寐梦一道士至前牙兵启曰南岳真人来见既寤闻汲生男心颇异之文仲以春秋名家而族弟栋邃于性理之学杨氏在室各通其说集受业家庭出则以契家子徙吴澄防以故学有源委董士选为南台中丞延集家塾入朝荐之除大都路教授歷国子助教博士司业为祭酒尝上学校议以为师道立则善人多今天下教官猥以资格注授强加之诸生之上而名之曰师有司弗信之生徒弗信之于学校无益也如此而望师道之立可乎为今之计莫若使守令自求经明行修之士身师尊之至诚恳笃以求其德化之及庶乎其有所观感也其次则择操履近正确守

经义师说为众所服者又其次则取乡贡至京师罢归其议论文艺犹足以动人非若泛泛莫知根柢者矣及为考官言于同列曰圣经深邃非一人之见可尽试艺之文惟其高者取之不必先有主意若先有主意则求贤之心狭而差自此始矣故所取每称得人在经筵进讲及承诏述作顾问拳拳以帝王治道古今得失委曲规讽冀有感悟然未尝诏人既致仕归家关书舍为二室左曰陶庵右曰邵庵故世称集为邵庵先生卒谥文靖】临淄 雹【大如杯盂】冬十月吴天保寇全道州【有众六万】十一月台州民方国珍反命江浙参政多尔济巴勒讨之○监察御史张祜李泌言事不聴【祜劾太尉昂吉尔欺罔又言明埒栋阿伊埒布哈皆陛下深仇巴延贼杀亲王十二人法当门诛而各人子孙兄弟尚仕于朝宜急诛窜伯勒齐尔布哈阿附权奸亦当远贬今灾异屡见盗贼蜂起海贼要君阉臣玩寇若不振举宪章恐有唐末藩镇之祸不报泌又言世祖誓不与高丽共事陛下践世祖之位何忍忘世祖之言乃以高丽奇氏亦位皇后今河决地震皆阴盛阳微之象乞降为妃亦不聴】以台哈布哈呼图克布哈并为中书平章【台哈布哈鸿吉哩氏沈厚有大度以外戚入官丞相太平荐其可用故有是命明年太平罢相台哈布哈因党于托克托谋害太平人以是不平之己丑】九年春以韩加讷为御史大夫○三月以达实特穆尔为湖广平章○夏四月以奇彻台为中书平章韩元善为左丞吕思诚为御史中丞○车驾幸上都○秋七月出监察御史沃呼海寿为陕西廉访副使罢御史大夫韩嘉讷官【海寿劾奏殿中侍御史哈玛尔及其弟锡锡罪恶御史大夫韩加讷以闻不省章三上诏夺哈玛尔锡锡官出海寿于陕西罢嘉讷为宣政使】江陵沔阳大水○以额森特穆尔为御史大夫额琳沁巴勒知枢密院○多尔济太平俱罢以托克托为中书右丞相【初托克托罢相西行其父玛扎尔台卒太平力请令托克托归葬左右以为难太平曰托克托父歿不克葬为善者怠矣为之固请托克托得还拜太傅然不知太平之有德于己也因汝中栢谗间欲中伤之是时参政孔思立等皆一时名人太平所拔用悉诬以罪太平既罢又诬劾之托克托之母闻之谓曰太平好人也何害于汝而欲去之若违吾言非孝子也遂止太平故吏田复劝之自裁太平曰吾无罪当聴于天若自杀则诚自歎焉遂还奉元○评曰托克托之母诚可谓贤矣而托克托闻命遂止不违其亲之志亦可谓孝矣】八月以巴延为中书平章吹斯戡为左丞伊苏乌尔圖华秦從德并为参政○车驾还宫○冬十月丁酉开端本堂以李好文为太子谕德归 为赞善张冲为文学【皇太子以是日入肄业命托克托领端本堂事端本堂虚中以俟至尊临幸太子与师傅分东西向坐授书其下僚属以次列坐初上命太子习学汉人文字李好文取经史传集有关治体者仿大学衍义例为书十一卷名曰端本堂经训要义又集歷代帝王故事凡百有六篇分为四目一曰圣慧如汉昭明二帝幼敏之类二曰孝友如舜文王唐 宗友爱之类三曰恭俭如汉文却千里马罢露台之类四曰圣学如殷宗缉学陈隋诸君不善学之类又取古史自三皇迄金宋国祚从速治乱兴废为书曰大寶录又取前代帝王善恶当法戒者为书曰大寶 鉴以进复上书曰殿下宜以臣所进诸书参之贞观政要大学衍义等篇果能推而行之则太平之治不难致矣它日太子坐清宁殿分布长席列坐高丽西番僧太子曰李好文先生教我儒书多年尚不晓其意今聴佛法一夜即晓由是愈崇尚佛学○评曰孔子曰惟上智与下愚不移故中人以下皆可由学而至顺帝开端本堂以教太子妙选师傅隆其礼节可谓善教矣而阿裕尔实哩达喇资质庸下狎昵宵人导之以正如水沃石纳之于邪如以胶投漆观其言曰李好文教我儒书终年尚不晓其义今聴佛法一夜即晓岂非所谓下愚不移者哉】十一月吴天保陷辰州○漕运使贾鲁言事【鲁建言二十余条從其八事一京师和采二优防漕司旧领漕户三接运委官四通州总

治预定委官五船户困于坝夫海粮壤于坝户六疏浚运河七临清运粮万户府当 漕司八宜以宣忠船户付本司节制】诏削沃呼海壽官爵放归田里流韩嘉讷于尼嚕罕【初海壽劾哈玛尔出入托郭斯皇后宫闱犯分之罪尤大皇后宁宗母也泣诉于上谓御史言为侵己上怒乃夺官屏归田里禁锢之寻诬韩嘉讷赃罪杖流尼嚕罕以死先是伯勒齐尔布哈代托克托为丞相以宿怨每欲中伤托克托赖哈玛尔营防得免而伯勒齐尔布哈与太平韩嘉讷圖们岱尔等十人结为兄弟至是托克托复相谪太平陝西出伯勒齐尔布哈般阳圖们岱尔为四川右丞诬以罪追至中途杀之而深德哈玛尔复召用○评曰以分而言则同生者为兄弟以理而言则民吾同胞物吾与也君子之道亲亲而仁民仁民而爱物四海之内岂有不当爱者乎结为兄弟此叔世间巷小人造奸行侠者之所为岂盛朝公卿大夫之事哉噫他人不足责惜乎太平贤者而亦为此也又况伯勒齐尔布哈如薰莸之不可与同器者乎】平遥县人曹七七反讨平之【刑部郎巴克实兵马指挥沙卜丹共讨平之】

【庚寅】十年春正月以吹斯戡为中书平章伊苏乌尔圖华为右丞圖烈韩鏞并为参政○甲戌陨石于棣州○三月荧惑犯太微垣○夏四月丁酉赦○车驾幸上都○六月壬子有星入于北斗【大如月震声如雷三日复还】秋八月始祭三皇【江东廉访使文殊讷言三皇开天立极功被万世每歲常祀医官自祭于礼弗称请如释奠仪制可】冬十月添设兵马司【中书奏东南千里外妖气见合立兵马司以掌防御遂置大名东平济南徐州四兵马司】建宁徵士杜本卒【本湛静寡欲于天文地理律历度数无不通究尤工篆 所著有四书表义六书通编十原等书屡召不起为世所尚学者称为清碧先生】十一月壬子朔日食○更钞法以吕思诚为湖广左丞【初左司都事武祺请更钞法吏部尚书偃哲防亦以为言命省台两院集议欲以中统交钞一贯权铜钱一千文准至元钞二贯仍铸至元通寶钱并用以实钞法至元钞通行如故独国子祭酒吕思诚持不可其言曰中统至元自有母子上料为母下料为子譬之蒙古人以汉人为子皆人类也尚轻薄汉人之子岂有以故纸为母而立铜为子者乎一座咸笑思诚又曰钱钞用法见为一致以虚换实也今歷代钱与至正钱中统至元钞交钞分为五项虑下民藏其实而弃其虚恐不为国家利也偃哲防曰至元钞多伪故更之思诚曰至元钞非伪人为伪耳交钞若出亦有为伪者矣且至元钞犹故戚也家之童奴且识之交钞犹新戚也虽不敢不亲然人未之识伪将滋多况祖宗成宪其可轻改偃哲防曰祖宗法敝亦不容不改思诚曰法敝更法欲上诬世祖是汝与世祖争高下也且世祖以来诸帝皆谥为孝改其成宪可谓孝乎偃哲防曰钱钞兼行何如思诚曰钱钞兼行轻重不伦何者为母何者为子汝不通古今道聽涂說何可行哉偃哲防曰我等防既不可行公有何防思诚曰我有三字防行不得行不得丞相托克托见思诚言直颇疑未决御史大夫额森特穆尔曰吕祭酒之言亦有是者但不当于庙堂中大声厉色耳于是御史劾思诚狂妄左迁湖广左丞额森特穆尔托克托弟也○评曰吕思诚之议钞法是矣至其斥议者以谓与世皇争高下则伤于讪非君子之言也】星陨耀州化为石【形如斧有屑击之有声】十二月修大都城○方国珍寇温州○有狂人登丽正门楼【有狂人登门楼妄言灾祸执而鞫之自称蓟州人已而不知其所往】置河南江北都总制庸田使司【其属有屯田总管府凡五】

元史续编卷十四

【辛卯】十一年春正月命江浙左丞博罗特穆尔讨方国珍○丁卯星陨兰阳○以工部尚书成遵为河间盐运使【遵与大司农图噜行视河议其疏塞之方自济濮曹鄆汴梁大名行数千里掘井以量地之高下测岸以究水之浅深考古博今以谓河之故道不可复而贾鲁以为必塞北河疏南河使复故道役不大兴害不能已丞相托克托先入其言遵与图鲁力陈其不可且曰山东连歉民不聊生若聚二十万人于此地恐他日之忧又有重于河患者托克托曰汝谓民将反邪自辰至酉论辨终莫能入明日执政谓遵曰修河之役丞相意已定且有人任其责公勿多言幸为两可之议遵曰腕可断议不可易由是出之河间○评曰河决固不可不塞非兴大役不去大害其说亦是也时诎举羸古人所深戒奈何山东连歉民不聊生而欲聚二十万人于其地乎托克托怵于贾鲁之说而违成遵之议故终以召乱至于亡国托克托安得逃其罪哉】三月廷试进士赐文烈图文允中等八十三人及第出身有差○徵建宁处士彭炳为端本堂说书不至○夏四月诏治河防以贾鲁为总治河防使【诏开黄河故道命鲁以工部尚书充使发民十五万军二万自黄陵冈南连白茅放于黄固哈等口又自黄陵西至阳青村合于故道凡二百八十里有奇仍命中书右丞伊苏乌尔图华同知枢密哈斯以兵镇之进鲁秩二品授银章令大小军民官咸听节制便宜兴缮先是庚寅岁河南北童谣云石人一只眼挑动黄河天下反及鲁治河果于黄陵冈得石人一眼而汝颍妖寇遂乘时而起○评曰童谣固有之矣然石人非天造地设必人力为之意者都水之官循行河道讲究修塞已非一日奸人恶其兴役也故为是以恐之如牛腹中书帛之类欤当是时君昏于上政慢于下虽不修河虽无石人天下豪杰固将乘时而起何但汝颍也哉】冀晋地震【半月不止懷孟等州皆震】车驾幸上都○五月己酉朔日食○颍州妖人刘福通反【初栲州人韩山童祖父以白莲防烧香惑众谪从永平县至山童言天下大乱弥勒佛下生河南及江淮愚民皆翕然信之福通与杜遵道罗文素盛文郁王显忠韩咬儿复鼓妖言谓山童实宋徽宗八世孙当为中国主福通等刑白马黑牛誓告天地同起兵为乱事觉县官捕之急福通遂反山童就擒其妻杨氏及其子韩林儿逃之武安于是命同知枢密院图沁以兵讨福通福通据朱皋攻破罗山真阳确山遂犯武阳叶县等处转陷汝宁府及光息州众至十万○评曰崇尚佛教敬事僧迦莫元世诸君若也假而佛果有灵能阴翊王度当潜消其寇盗使国祚无穷可也奈何刘福通等以弥勒佛下生为名首乱天下卒至亡灭由此言之事佛求福反更得祸岂虚语哉】秋七月遣使招谕方国珍【达实特穆尔为国珍所败乃命大司农达实特穆尔及江浙参政樊执敬浙东廉访使董守愨同招谕之】八月丁丑朔中兴路地震○萧县人李二等反【李二等亦以烧香聚众号芝麻李及其党赵君用老彭攻陷徐州】车驾还宫○罗田人徐壽辉等反【壽辉与麻城人邹普胜等亦以妖术阴谋聚众遂举兵反以红巾为号陷蕲水县及黄州】以额森特穆尔知枢密院帅兵讨捕河南盗贼【命额森特穆尔及衛王库春格尔率大军出征河南妖寇知院娄章以兵同进讨】冬十月乙酉太白犯斗己丑昼见荧惑犯岁星○立中书分省于济宁○饶信等路雨黍及黑子【信州及邵武雨黍饶州雨黑子大如黍米民多取食之衢州雨米如黍】徐壽辉僭号【据蕲水为都国号天完僭称皇帝改元治平以邹普胜为太师攻陷饶州执魏中立陷信州执于大本皆屈使徙已畀之印命以官二人大骂不屈壽辉杀之】十一月癸丑有星孛于娄【甲寅孛见胃丙辰见昴丁巳太阴犯填星孛微见于毕】河防成以贾鲁为集贤大学士○诏立河平碑【自四月鸠工七月凿河成八月决水

故河九月舟楫通十一月诸埽堤成复故道上遣使报祭河伯诏鲁还京师赐丞相托克托世袭达尔罕之号特命翰林承防欧阳 制河平碑以旌劳绩 既为碑文又作至正河防记其畧以为治河一也有疏浚塞三者之异焉酺其流而导之曰疏去其淤因而深之曰浚抑其暴因而振之曰塞而疏浚之别又四曰生地曰故道曰河身曰减水河生地有直紆因其直而凿之可就故道故道有高卑高者平之以趋卑高卑相就则不壅不滞河身有广狭狭难受水水溢悍故以计辟之广难为岸岸善崩故以计御之减水河者水放旷则以制其狂水隳突则以杀其怒治隄则有剏筑修筑补筑之异有刺水隄截河隄防岸隄缕水隄石船隄之等治埽则有岸埽水埽龙尾埽拦头马头之分其为埽台及推卷蕤挂之法有用土石草木铁钁絙之方鲁尝自言水工之功视土工为难中流之功视河濱为难决河口视中流又难北岸之功视南岸为尤难其用物之效草虽至柔而柔能狎水水渍之生泥泥与草并力重如硃然维持夹辅缆索之功实多是役也用物之凡榛木二万七千榆柳杂梢六十六万六千连根株者二千六百藁枯蒲苇杂草以束计者七百三十三万五千有奇竹竿六十二万五千苇席十七万二千小石二千艘碓石三千艘绳索五万七千所沈大船一百一十铁缆三十二铁猫三百三十四竹箴以斤计者十五万钉鑽四万七千四百有奇官吏军民俸粮佣赁医药祭祀兼和买民地为河及杂物用钞一百八十四万五千六百三十六錠由鲁习知河事故能成功】江西妖人邓南二作乱瑞州總管禹苏福擒斩之○十二月丁丑太白经天○括马○以多尔济巴勒为中书平章乌克逊良祜为参政【多尔济巴勒言治国之道纲常为重前西台侍御史张桓仗节死义宜旌之以劝来者又言祖宗用兵不專于杀人今倡乱者数人乃尽坐无罪之民为畔逆岂足以服人心其言颇忤托克托时托克托倚任汝中栢拜特穆尔两人擅权用事而多尔济巴勒正已立朝及是出为西台大夫壬辰】十二年春正月竹山贼寇襄阳总管柴肃等死之【肃与监郡博啰特穆尔同死】复召吕思诚为中书左丞○徐壽辉陷武昌沔阳威顺王库春布哈及湖广平章和尚弃城遁走推官俞述祖等死之【壽辉遣伪将丁普郎陷汉阳兴国邹普胜陷武昌威顺王及和尚等并遁去壽辉又遣曾法兴陷安陆府知府超尔战不胜死之又陷中兴路山南宣慰同知谔古埒实出战众溃宣慰使锦州布哈遁又攻沔阳推官俞述祖领民兵捍御力不能支城陷被执送壽辉所诱之使降述祖骂不辍壽辉怒支解之○评曰和尚平章湖广镇守方隅弃城逃贼则支郡莫能自守而俞祖述一郡理官领民兵捍御螳螂之臂以当覆车之辙其忠勇盖有余矣彼方镇大臣宁不知愧哉】命逮鲁曾等分讨江淮盗贼【以鲁曾为添设淮东元帅领两淮所募盐丁讨徐州命四川平章伊埒特穆尔为总兵官与右丞长吉讨兴元金州等处宣政同知僧格与湖北宣慰使多尔济巴勒守襄阳】二月以伊埒布哈为中书平章贾鲁为添设左丞○邹平人马子昭作乱讨斩之○徐壽辉陷江州总管李黼死之【初盗陷蕲黄造船北岸欲南攻九江黼治城隍修器械募丁壮分守要害请兵于江西行省以拒贼冲不报及武昌既陷贼乘胜破瑞昌舳舻蔽江而下江西大震右丞博啰特穆尔方驻兵于江闻风宵遁游兵已及境黼檄乡落聚木石于险处以遏其归路黄梅县主簿额森特穆尔愿出击贼黼与之出战大败贼兵逐北六十里乡民乘险下木石杀获二万余人黼曰贼不利于陆必以舟薄我乃令以长木数千冒鉄椎于杪暗植沿岸水中贼舟数千艘顺流鼓噪而至遇椿不得动黼发火箭射之焚溺无算时东际淮甸西自荆湖守臣往往弃城而逃独黼守孤城中外援絕而贼势益炽二月甲申贼将薄城分省平章圖沁布哈自北门出走黼引兵登陴贼已焚西门张弩射之转攻东门黼急往救贼兵已入矣犹与之巷战力不能敌乃挥剑叱之曰杀我无杀百姓贼刺之堕马与兄子秉昭俱骂贼死州民闻之哭声震天

具棺葬之时黼兄冕居颍亦死于贼事闻赠黼淮南左丞陇西公谥忠文立庙江州】以纳琳为南台大夫德住为河南右丞【贼侵滑濬命德住为河南右丞守东明时德住致仕于家闻命馳至东明浚城隍严备御贼不敢犯】三月徐壽辉陷南康袁饶等州平章多通遁【壽辉先陷岳州攻衡州为洞官黄安抚所败又遣伪将陶九陷瑞州复为禹苏福所败至是陷南康又遣其将欧祥陷袁州项普畧陷饶州】河南左丞相台哈布哈收复南阳等处○以特默格为甘肃平章伊埒哲伯为江西左丞相【特默格为南台大夫乞致仕不允以为平章甘肃又命伊埒哲伯出镇江西领兵收捕饶信贼】方国珍复叛台州路达噜噶齐台哈布哈死之【时朝廷方讨徐州命江浙募舟师守大江国珍怀疑走入海台哈布哈遣义士王大用往谕拘留不遣其戚党陈仲达往来议降台哈布哈率部众张受降旗而前船触沙不能行垂与国珍遇呼仲达申前议仲达目动气索台哈布哈觉其有异手斩之前 贼船射死五人贼跃入船又斫死二人贼羣至欲抱持过国珍船台哈布哈瞠目叱之夺刀又杀二人贼攢槩刺之中颈死犹植立不动投其尸海中事闻追赠江浙平章谥忠介○评曰古之将兵伐叛有因其来降而受之者矣未闻身往议降者也夫来降有二心服为上力屈为次方国珍阻兵五年官军讨之不能胜则其力未屈也山东江淮湖湘羣盗并起朝廷皆无如之何则其心未服也力未屈心未服其往来议降者特欸兵之计耳而台哈布哈轻身虎口往受其降轻敌寡谋丧身辱国忠虽有余而知弗足称矣】陝西地震【凡百余日城郭頽圯陵谷迁变防州静宁莊浪尤甚防州公宇墻崩获弩五百余张长丈余短者九尺人莫能挽因改定西为安定州防州为会宁州】徐壽辉陷安吉路乡民罗明遠起义兵复之○立淮南行省【治扬州辖扬滁和庐蘄黄高邮淮安安丰安庆等路设官二十五员以鸿和尔布哈实勒们并为平章曼济为右丞秦从德为左丞达实圖赵璉并参政】以乌兰哈达为中书参政○湖广参政鐵杰复岳州汉阳武昌【武昌汉阳寻再陷】四川平章约尔珠复忠万夔云阳等州○命各行省分道收捕盗贼【陝西平章伊埒特穆尔讨防邓州刑部尚书阿噜讨海寧贼江西右丞和尼齐参政多岱讨江西贼以浙东宣慰使思寧普守芜湖江西右丞乌呼讷江浙左丞罗罗与新济曼济哈雅同讨饶信等处尊达讷实哩讨方国珍】额森特穆尔军溃召还以为御史大夫左迁西台大夫多尔济巴勒为湖广平章寻卒【额森特穆尔驻军沙河军中夜惊遂溃退屯朱仙镇诏以中书平章曼济代还仍命为御史大夫西台御史范文刘希曾等十二人劾其丧师辱国托克托庇之怒中台御史周伯琦附托克托劾奏文等越分干誉乃左迁多尔济巴勒出文等为各府判官由是人莫敢言事初范文等将上奏多尔济巴勒临署谓左右曰吾其为平章湖广矣已而命下果然关中人遮留慰遣之间道得出至湖广汝中栢等言于托克托曰不杀多尔济巴勒丞相终不安乃命给军饷民争输粟总兵者希防侵辱之不为动托克托又遣国子助教旺扎勒至军中风使害之旺扎勒至益加敬礼谓人曰平章国之勲旧吾苟伤之人将不食吾余矣多尔济巴勒感风疾竟卒于黄州○评曰用兵之道胜有赏败有刑故书曰用命赏于祖不用命戮于社予则孥戮汝孥戮汝云者罪非独一身也盖重言以深儆之耳额森特穆尔为将覆军当伏孥戮之罪而托克托庇之更召为台端则是赏其败矣以此行军乌能胜哉当是时中台之官以罪人为之长曾不知耻而西台乃能连章论劾彼周伯琦者不反躬自愧顾以越分干誉涂污正臣所谓小人之无忌惮也不有君子其能国乎】夏四月癸卯朔日食○以吹斯戡为中书平章○抚建贼涂佑等攻陷邵武郡将吳谂达布哈讨斩之【宜黄贼涂佑及建宁应必达攻陷邵武为谂達布哈所诛】翰林承防欧阳 致仕【以为湖广左丞致仕赐玉带及钞百錠给全俸终身○评曰仕者之禄曰俸致仕而给全俸终身此朝廷待贤优老之美

意然不居其位不治其事而苟食其禄非义也若辞而弗受不亦善乎】车驾幸上都○聂炳复荆门州【炳知荆门才半岁兵起荆门不守炳募土兵七万复之又与平章约尔珠复江陵及归峡州】命南台大夫纳琳讨方国珍【给宣勅与台州民陈子由杨恕卿赵士正戴甲令其集民丁夹攻方国珍】诏天下完城郭筑隄防○五月安置故瀛国公子和尚赵完普等于沙州【御史齐齐克特穆尔等言诸处羣盗辄引亡宋故号以为口实宜徙和尚赵完普及亲属于沙州禁勿与人交通从之】六月大名旱蝗【饥民七十一万六千九百八十口】以杜秉彝为中书参政○秋七月徽饶贼攻陷杭州江浙参政樊执敬战死董 霄率兵复之遂复徽州【贼仓卒至城中无备执敬遽上马率众出中途与贼遇射死贼四人贼逐之又射死三人乃奋力斫贼执敬中枪而死时董 霄从平章嘉琿复安丰乘胜攻濠州朝廷命移军援江南遂渡江至德清而杭州已陷嘉琿问计 霄曰贼皆野人见杭州子女玉帛必纵恣不暇为备宜急攻之若退保湖州设贼乘锐趋京口则江南不可为矣嘉琿不能决诸将亦难之 霄曰公江浙相君方面失陷而及今不取谁任其咎复拔剑顾诸将曰相君在是敢有慢令者斩遂进兵薄杭州贼迎敌 霄麾壮士突前诸军相继夹击凡七战贼奔接待寺塞其门而焚之皆死遂复杭城已而贼复寇于潜 霄又破之降贼将潘大瀛等二千人贼又寇千秋关 霄还于潜按军不动左右请进兵 霄曰未也遣人执白旗登山望贼约曰贼以吾为怯必懈汝伺其有间麾旗又伏兵城外授以火炮复约曰见旗动炮即 已而旗动炮 兵乃尽出斩数千级贼又攻三关 霄分军一出独松一出百丈一出幽领然后防兵 贼巢七战尅之贼帅杨元等来降进克广德蕲贼合徽饶军复犯徽州贼中有道士能作十二里雾 霄引兵击之贼大溃斩首数万擒道士焚其妖书而斩之遂平徽州○评曰古之为治者文事必有武备江浙居十三省之首壤地非不广也金谷非不富也民庶非不多也盖东南之巨镇而山贼猝至城无守备何哉承平日久文恬武嬉任方面者皆蒙古色目贵防之子弟惟务逸乐不恤政治故也然省宪大臣皆遁一樊执敬独力战而死岂不为之犹贤乎哉如是则南人未必不可重用也】徐壽辉兵陷福宁知州王巴延战死○方国珍攻台州浙东元帅伊德默色等击走之○以哈玛尔为中书右丞○齐王实勒们献马一万五千匹○丁卯太白犯岁星○诏以太傅右丞相托克托总兵讨徐州【命中书参政特哩特穆尔为江浙右丞与淮南右丞曼济供给一应行军所须省院台各官属并从稟受节制爵赏诛杀一听便宜从事知院昂吉尔平章吹斯戡伊克扎尔古齐福壽并从出师赐托克托金三锭银三十锭币帛各千疋】车驾还宫○安陆贼将俞君正复陷中兴荆门知州聂炳等死之【君正复陷中兴约尔珠与战败绩奔松滋判官上都死之炳援绝城陷被执骂不绝口贼以刀抉其齿齿尽断其左臂支解之】赐额森特穆尔金帛【御史及各台院宪司总帅万户府交章论额森特穆尔出征河南功绩故有是赐○评曰额森特穆尔溃军于沙河得免诛戮幸矣今内外台院宪司帅府交章论功赐以金帛则繆乱是非颠倒赏罚甚矣斯盖台院司府知有托克托而不知有朝廷知有私党而不知有公论故也欲无危亡得乎】义民范忠等复中兴路【中兴人范忠偕荆门僧李智帅义兵复中兴路俞君正败走龙镇指挥按达拉哈玛尔领兵入城约尔珠自松滋还屯兵于石马】托克托复徐州芝麻李遁走遂屠其城【托克托以遼鲁曾为淮南宣慰使募盐丁及城邑趨捷通二万人于所统兵俱发九月次徐州攻其南门贼出战以铁翎箭射马首托克托不为动麾军奋击破之芝麻李遁去获其黄纛旗鼓旗烧其积聚追擒伪千户数人遂屠其城上命平章布哈尔即军中加托克托太师趣还朝○评曰民之從乱亦迫于力之不足势之不得已也朝廷若能吊民伐罪抚顺讨逆使仁闻四驰义声先路将前途倒戈壶浆来迎矣托克托复

徐州不能致元凶于显戮而迁怒齐民恣行夷灭其不仁若是岂王者之师哉他日高邮坚守不下未必不有鉴乎此而托克托人祸天诛终不能免岂不昭昭矣乎然元之土宇分裂而无以为国亦始于此矣○托克托复相也于恩怨无不报又用乌克逊良祜龚伯璲汝中栢拜特穆尔等为僚属相与排异己者而斥之先是托克托西行伯勒齐尔布哈欲陷之死哈玛尔屡为之解得召还托克托德之引为右丞是时汝中栢参议省事平章以下莫敢异同唯哈玛尔不为之下汝中栢因譖之遂改哈玛尔宣政院使哈玛尔深衔之哈玛尔尝与托克托议授皇太子册寶托克托每言即中宫有子将寘之何所以故久不行及将出师以汝中栢为治书使辅额森特穆尔居中汝中栢恐哈玛尔为后患欲去之托克托不能决令与额森特穆尔谋额森特穆尔亦不從哈玛尔知之譖托克托于皇后奇氏及皇太子后再出视师未及成功为羣小所搆竟以罪去】冬十月丙午霍山崩【前三日山如雷鸣禽兽惊散陨石数里】和余于辽阳【栗豆五十万石】以昂吉尔为淮南平章新济为江西平章○十一月新济与贼战于湖口死之【时内外观望为政新济初为南台大夫独持风裁执政恶之移湖广平章威顺王在武昌所为多縱暴非法新济至谒王曰王帝室之胄古所谓伯父叔父也今德意不闻而以淫猎贾怨非所谓自貽多福也王起握新济手谢之悉罢其所为防汝颍盗起新济募土兵完城隍以守贼遣二千人诈降新济得其情械系其渠魁数十人以俟命防召为大司农同僚受赂脱械贼大至内外响应武昌遂陷鄂人泣曰新济不去吾岂为俘囚乎新济入见具陈本末上大喜赐之食时宰不悦奏为江西平章至江东有诏令守江州而江州已陷贼据池阳太平号百万新济募兵得三千人趋铜陵克之擒周驴夺船六百艘军声大振遂复池州分兵攻石埭诸县进据清水湾又大破之贼从围安庆闻风烧营遁遂进复湖口县克江州留兵守之命王惟恭栅小孤山新济自据番阳口缀江西要冲以图恢复而湖广既陷江西被围淮浙亦多故日从援不至粮乏卒疲或劝以东南完实盍因粮以圖再举新济曰吾受命守江西必死于此贼乘大舰来攻编苇筏塞上下流火之新济帅兵力战众死且尽新济犹坚坐不动中流矢而仆贼素闻其名不忍害昇至密室乃苏罗拜餽食新济斥之凡七日乃自力而起北向再拜曰臣力竭矣遂絕新济河西人吹斯戩之子也】十二月达实巴图尔复襄阳○以察罕特穆尔为汝宁府达噜噶齐李思齐为知府【颍州沈丘人察罕特穆尔与信阳县罗山人李思齐同起义兵破贼有功故皆用之】诏议屯田立分司农司【托克托言京畿近水地利召募江南人耕种歲可收粟麦百万余石不烦海运京师足食上曰苟利国家其议行之于是西自西山南至保定河间北抵檀顺东及迁民镇凡系官地及原管各处屯田悉从分司农司立法佃种合用工价牛具农器谷种给五百万錠命乌兰哈达乌克逊良祜并为大司农卿又于江淮召募能种水田及修筑围堰之人各一千名为农师降空名添设职事勅牒十二道募农民一百名者授正九品二百名正八品三百名从七品就令管领所募之人所募农夫每名给钞十錠由是歲乃大稔】

【癸巳】十三年春正月以哈玛尔为中书平章乌兰哈达为右丞乌克逊良祜为左丞杜秉彝曼济并参政○方国珍降○乙酉太阴犯太微东垣上相【二月壬子又犯】以达实巴图尔为四川右丞【赏复襄樊之功也】戊戌太白荧惑辰星聚奎二月庚戌太白犯荧惑○诏立托克托平徐勲德碑【评曰用大众攻小寇旷日持久虽获鼓旗烧积聚而不能殲其渠魁何名为平徐况屠灭齐民岂足以言勲德乎斯盖汝中栢拜特穆尔之徒欺其上以阿附权臣也】定西静宁庄浪等处地震○夏四月车驾幸上都○江西左丞相伊埒哲伯复饶州贼兵

奔潰【伊埒哲伯与江浙左丞罗罗引兵由信州元帅韩邦彦哈达取道浮梁同复饶州蕲黄贼闻风奔潰】以昂吉尔为岭北左丞相○泰州民张士诚反寻招降之【白驹亭民张士诚弟士德士信反陷泰州命淮西宣慰副使额森布哈讨之未几士诚请降】五月张士诚复攻陷高邮知府李齐死之【初淮南行省遣齐招降士诚被留久之泰州平贼党尚蜂聚士诚复鼓变杀参政赵璉走入湖复陷兴化行省左丞偓哲笃偕宗王镇高邮出齐守璧社湖五月乙未贼数人呼噪入城省宪官皆逃齐急还城门已闭贼遂据高邮连兴化寶应诏赦至不得入贼给言请李知府来乃受命行省强齐往至则下齐于狱齐虽辨說百端而士诚本无降意特迁延为缮守计官军谍知之乃进攻城士诚呼齐使跪齐叱曰吾膝如铁岂为贼屈士诚怒使曳倒捶碎其膝而刎之时论谓大科三魁若李黼台哈布哈及齐皆不负所学云○士诚之再反也朝廷谓其有降意遣翰林待制孙防淮南行省照磨盛昭相继抚论授以官爵士诚皆留之二人不屈亦被杀】六月立皇子阿裕尔实哩达喇为皇太子大赦○立詹事院○复安陆府【知院实喇巴圖总河南军平章达实巴图尔总四川军自襄阳分道而下复安陆府】命淮南平章达实特穆尔福壽讨张士诚○秋七月丁卯泉州天雨白丝【海水日三潮】湖广参政阿尔辉复汉阳武昌○复江州○以四川平章伊苏乌尔圖华右丞旺札勒布哈镇守中兴○九月乙丑朔日食壬辰太白经天○车驾还宫○南台大夫纳琳罢○复道州瑞州临江【广西元帅甄崇福复道州获贼将周伯顏诛之江西左丞和尼齐以兵平富州临江遂引兵复瑞州】江西贼帅王善寇闽刘健讨斩之【连江县巡检刘濬募壮士与其子健拒贼数与鏖战濬中箭堕马健下马掖之俱被执濬骂贼而死健亦以死拒贼善义之释使收濬尸敛瘞健归请帅府兵以复仇弗聽因尽散家赀结死士百人诈为工商流丐入贼中夜半发火大噪贼惊扰自相杀健手斩害其父者张破四并擒善及陈伯祥献于帅府磔之于是授健古田县尹○评曰刘健孝足以复父之仇忠足以灭国之贼智勇俱全盖奇士也授以县尹则赏不酬功用违其才矣使之提兵万人岂不足以保障一方也哉】冬十一月庚戌京师无云而雷【少顷有火坠于东南是日脩武襄垣二县同】大同疫【死者大半】授方国珍官国珍不受命【從特哩特穆尔尊达纳实哩之请授方国珍徽州路治中国璋广德路治中国瑛信州路治中督遣之任国珍疑惧不受命○评曰猛虎出林蛟龙失水人皆得以制之方国珍搆兵六年屡败官军阻江海以自固盖未可以力胜也若因其请降厚以禄爵之臣顺使彼无失其富贵不忧乎危亡则虽强暴之性可驯而为忠义矣乃以治中移之他路是激其怒而使之再叛也朝廷处置若此岂不谓之国无人焉者哉】十二月复均房等州【陝西平章博啰四川右丞达实巴图尔复均房等州诏博啰等守之达实巴图尔讨东正阳】江浙平章巴延特穆尔等击徐壽辉于蕲水败之壽辉遁走【巴延特穆尔及南台中丞曼济哈雅四川参政哈喇圖左丞桑圖实哩西宁王英实等合军讨徐壽辉于蕲水败之壽辉遁去获其伪官四百余人】哈玛尔进西天僧于帝【僧教帝行房中之术号延彻尔法又进西番僧且琳沁善秘密法帝皆习之诏以西天僧为司徒且琳沁为大元国师各取良家女三四人奉之谓之供养嘗谓上曰陛下尊居万乘富有四海不过保有见世而已人生能几何当受此秘密大喜乐禅定于是上日从事于其法广取妇女事淫戲选采女为十八天魔舞事淫宴而哈玛尔妹塔图噜特穆尔与娄达实等十八号倚纳克皆有宠在上前相与防狎甚至男女裸处号所处室曰色济克乌格依犹华言事事无害也君臣宣淫而羣僧出入禁中无所禁止丑秽外闻皇太子年长尤深疾其所为而欲去之未能也】

【甲午】十四年春正月甲子朔汴河水五色【花草如绘画三日方解】乙丑荧惑犯岁星
○复峡州○二月以格尔为淮南平章吕思诚为湖广左丞○遣吏部侍郎贡师泰和余浙西
【时江淮兵起京师食不足命师泰和余于浙西得粮百万石师泰还迁兵部侍郎整饬京师
至上都驿户师泰验其富贫而均其徭役民赖以苏豪贵以不利于己深嫉之防朝廷复欲和
余除师泰都水庸田使】三月癸亥朔日食○廷试进士赐薛朝晤牛继志等六十三人及第
出身有差○以达实巴图尔为四川平章○江西左丞相伊埒哲伯卒【江西自道通以宽容
为政军民懈弛伊埒哲伯至风采一新威声渐振盗贼谋归疑至是以疾卒所部为之丧气】
夏四月癸巳朔介休县地震○车驾幸上都○江西湖广大饥疫○诏讨方国珍【以阿尔乌
逊为江浙右丞恩宁普为参政总兵讨捕】五月立南阳等处毛葫芦万户府【募土人为兵
免其差役令讨贼自效因其乡人自相团结号毛葫芦故以名之】六月张士诚寇扬州达实
特穆尔兵败续【诸军皆溃诏江浙参政佛家闾防达实特穆尔复进兵己酉士诚陷盱眙庚
戌陷泗州官军复溃】伊洛溢○秋七月汾州孝义县地震○八月车驾还宫○以伊彻察喇
为中书平章吕思诚为左丞藏布为参政冬十月命右丞相托克托总兵征高邮【总制诸王
各爱满诸省各翼军马出征兵至高邮战于城外大败贼众于六合县】勅诸司奏事先啓皇
太子○十二月以索诺木巴勒为平章僧格实哩为右丞鼎珠为左丞○诏罢托克托兵柄以
河南左丞相台哈布哈代总其军【御史袁赛音布哈等劾奏托克托出师三月畧无寸功倾
国家之财为己用半朝廷之官以自随其弟额森特穆尔庸才鄙器玷污清台纲纪不修贪淫
益甚章三上诏令额森特穆尔都门聴防寻安置宁夏又诏托克托丧师费财坐视寇盗削官
爵淮安安置陞台哈布哈为河南左丞相伊彻察喇加太尉锡锡知枢密院一同总领诸处征
进军马诏至军中龚伯璩曰将在军君命有所不受且丞相出师时尝被密防一意进讨可也
诏书且勿开开则大事去矣托克托曰天子诏我而我不从是我与天子抗也君臣之义何在
乃听诏客省副使哈喇岱曰丞相此行我辈必死他人之手今日宁死丞相前拔刀自刎死○
评曰前日交章论额森特穆尔河南功绩者台臣也今劾其庸才鄙器者亦台臣也何公论之
不定若是耶所以然者前日台臣托克托之党也而托克托之权方盛今日台臣哈玛尔之党
也而托克托之眷已衰故为是纷纷耳台宪纪纲若此其何以为治哉】绍兴地震○汪嘉努
为御史大夫○诏威顺王库春布哈还镇湖广【王初以武昌被陷命夺其印至是以讨贼立
功还其印遣复归镇】达实巴图尔复河阴巩县○京师大饥疫【民有父子相食者】造龙
船于内苑【上自制其样长一百二十尺广二十尺前瓦帘棚穿廊两暖阁后柁殿楼子龙身
并殿宇用五采金妆前有两爪用水手二十四人皆衣紫衫金荔枝带四角头巾自后宫至前
宫山下海子内往来游戏行时龙首尾口眼皆动又自制宫漏高六七尺广半之造木为匱藏
壶其中运水上下匱上设三圣殿匱腰玉女捧时刻筹时至辄浮水而上左右二金神一县钟
一县钲夜则神人自能按更而击无分毫差鸣钟钲时狮凤在侧者皆自翔舞匱之东南有日
月宫飞仙六人立宫前遇子午时自能耦进度仙桥达三圣殿复退立如前其精巧絶出人意
皆谓前代所未有上既怠于政治惟事游晏以宫女十八人按舞名十八天魔又十一人奏龙
笛头管小鼓箏琵琶笙胡琴响板拍板海宫中赞佛则按舞奏乐宫官受秘密法者得入余
不得与○评曰古百工执艺事以谏惧作为奇巧以蛊惑上心也今龙舟刻漏皆帝所自制樣
则非工之罪矣故当时都人为之谚曰帝也斧凿太子鼓钹父子如此欲无危亡其可得乎】

【乙未】十五年春正月戊午朔以哈斯为中书平章奇巴延布哈为辽阳平章○徐壽辉伪

将倪文俊复陷沔阳【威顺王令其子执恩努等同元帅阿尔斯兰水陆并进讨文俊至汉川水浅文俊用火筏烧船报恩努遇害】安置托克托于额齐纳路○上都饥○遣兵备御关陝诸处【河南参政洪绰罗达实特穆尔守御河南陝西参政舒噜多尔济守潼关阿噜乌逊守商州宗王嘉木扬实哩守兴元多岱备山东时河南贼数渡河焚掠州县中书参议成遵言于丞相曰今天下州县丧乱过半而河北稍安者以河为之障贼兵卒不能渡所以剥肤椎髓以供军而民无深怨者视河南之民犹得保其室家故也今贼北渡而官军不御是大河之险已不能守河北之民复何所恃河北一摇国势将若之何语未毕呜咽不能言宰执而下皆挥涕乃入奏遣使罪守河将帅而防御稍严】闰月丙辰太白经天【三月癸丑六月癸亥八月戊寅并如之】二月己未刘福通以韩林儿称小明王【刘福通等自碭山夹河迎韩林儿至立为皇帝又号小明王建都亳州国号宋改元龙 以其母杨氏为皇太后杜遵道盛文郁为丞相罗文素刘福通为平章刘六知枢密院拆鹿邑县太清宫材建宫阙遵道等各遣子入侍遵道得宠専权福通命甲士挝杀之福通遂为丞相复称太保】以达实特穆尔为中书平章约为辽阳左丞相○立淮东等处宣慰司【置司天长县统濠泗义兵万户府并洪泽等处义兵听富民愿出丁壮义兵五千名者为万户五百名为千户一百名为百户降宣勅牌面】汪嘉努罢○三月徐壽辉光陷襄阳○窜托克托于云南镇西路【及其弟额森特穆尔徙四川碉门长子哈喇章肃州次子三寶努兰州仍籍其家财货产】蓟州 血○车驾幸上都○夏四月分行省于彰德【命右丞藏布左丞乌克逊良祜往治之】以锡锡为御史大夫鼎珠为中书右丞相哈玛尔为左丞相僧格实哩为平章【锡锡既为大夫复拜哈玛尔为相于是国家大柄尽归其兄弟二人矣】遣使招安张士诚【遣翰林待制乌玛喇等賫宣命印信牌面与镇南王博啰布哈及淮南省宪官商议给付】吕思诚罢○五月诏削河南左丞相台哈布哈官爵命达实巴图尔總其兵【御史伊埒呼圖克奏台哈布哈慢公虐民诏削其官仍令總领和实衮从征命达实巴图尔管领台哈布哈一应军马○评曰命将大事也必审而后动择而后用托克托以老师费财而罢之矣曾未半载台哈布哈又以慢公虐民见黜夫奕者举棊不定不胜其耦命将出师而易置如此乌能取胜哉又况不数月复以台哈布哈为湖广左丞相招捕盗贼夫慢公虐民之人岂可复用况官以有罪而削无功而复刑赏如此虽灭寇盗犹不可以为国也】倪文俊复陷中兴元帅多尔济巴勒死之○六月削夺集贤大学士吴直方等官爵【御史哈喇圖劾奏托克托之师吴直方及其防军阿哈长史和尔齐等并宜追夺从之】以达实巴图尔为河南平章○保德州地震○征徽州隱士郑玉为翰林待制不至○大明太祖皇帝起兵自和州渡江取太平路【自红巾妖寇倡乱南北郡县多陷没故大明從而取之】秋七月立防御海道运粮万户府于台州【九月又分府于平江】遣使招谕及备御诸路【命将作院判乌玛喇招安濠泗淮南左丞相太平助之章佩大监布延特穆尔招安沔阳四川平章伊苏乌尔圖华助之平章约尔珠等守御湖广江浙参政纳琳哈喇防平章鼎鼎进取常州南台大夫福壽守集庆亲王实勒们守曹州知院達尔玛嘉勒灿等屯中兴湖广平章僧格额圖琿等守襄阳参政哈喇圖等守沔阳仍诏太平统诸军收讨所陷郡县平章曼济哈雅知院班珠尔玛克守大江南岸同阿尔辉防台】以达实特穆尔为江浙左丞相便宜行事【时江淮绎骚南北隔絕达实特穆尔独治方面而任用非人肆通贿赂卖官鬻爵惟视货之重轻为高下由是谤议纷然而所部郡邑往往沦陷亦恬不以为意○评曰古称立贤无方而元之用人惟任世族若达实特穆尔才识庸下岂足以專治方面任旬宣之寄哉当是时朝廷大臣方正者无逾太平而才智如成遵董 霄逯鲁曾忠直如许有壬吕思诚者亦不为少

皆以南人不專委任宜其不能以弭乱也】车驾还宫○九月以努都尔噶为中书平章鄂抡藏布并右丞杜秉彝许有壬并左丞成遵李稷实勒们并参政【时以言为讳许有壬力言朝廷政务姑息赏重罚轻故将士贫掠玉帛子女而无鬪志遂倡招降之防其言多不载皆切中时病有僧自高邮来言张士诚乞降众幸事成皆喜有壬独疑其妄呼僧诘之语塞不能对未几有壬罢为集贤大学士兼太子谕德太子以有壬前朝旧德颇敬礼之一日入见方臂鸛禽以为乐见有壬至遽呼左右屏去】冬十月立淮南行枢密院于扬州○以庆通为淮南平章台哈布哈为湖广左丞相【仍命台哈布哈总兵招捕湖广诸路盗贼给还原夺宣命】鼎珠罢【以病辞命太保就第】达实巴图尔攻刘福通军大破之【达实巴图尔进次许州与福通军遇战于长葛为其所败将士皆奔溃至中牟收散卒防刘哈喇布哈引兵来援大破贼兵复驻汴梁十二月败贼于太康遂围亳州伪宋主小明王遁走安丰】十二月诏赦【以天下兵起下诏罪已大赦】以察罕特穆尔为刑部侍郎【屡与贼战于河南北有功故有是命】哈玛尔杀托克托【托克托之贬云南也行次大理腾冲知府高惠欲以女事之许筑室一程外以居虽有加害者可以无虞托克托曰吾罪人也安敢念及此巽辞拒绝惠衔之至是再徙阿恰齐之地惠 铁甲军围之哈玛尔又矫诏遣使赐之鸛遂卒年四十二讣闻中书遣尚舍卿七十六至其地易衣冠以殓托克托仪状雄伟颀然出千百人中而器识宏远莫测其蕴功高社稷而不伐位极人臣而不骄轻货财远声色好贤下士皆出于天性至于事君始终不失臣节虽古之有道大臣向以过之惟其惑于羣小急复私仇君子病焉○评曰易曰比之匪人不亦伤乎哈玛尔非能杀托克托也托克托自取之耳夫小人之情状于人当路则吮 防痔无所不用其谄及其失势则攘臂下石无所不尽其力苟不絶之于其初未有不受其祸者也方伯特齐尔布哈欲害托克托之时哈玛尔防之于内太平保全之于外及其复相托克托知哈玛尔而不知太平者太平持公义不欲人之知哈玛尔市私恩惟恐人之不知也不察乎此而仇君子比小人其及也宜哉】置大兵农司【诏有水田去处置大兵农司招诱夫丁有事则乘机招讨无事则栽植播种凡置保定河间武清景蓟等四处其属又有兵农千户所二十四百户所四十四镇抚司四】荆州大水

【丙申】十六年春正月立福建行省【以江浙平章尊达纳实哩南台中丞阿噜乌逊为平章福建廉使庄嘉为右丞元帅呉铎为左丞司农丞努图克齐益都总管卓思敬并参政】以鼎珠为中书右丞相吹斯戡为御史大夫哈玛尔锡锡罢【哈玛尔既相以前进西僧为耻告其父图噜曰我兄弟位宰辅宜导人主以正今图噜特穆尔專以淫防媚上天下士大夫必讥笑我有何面目见人我将除之且上目昏暗何以治天下皇太子年长聪明不若立为帝而奉上为太上皇其妹闻之归告其夫图噜特穆尔恐太子为帝已必先见诛即以其事闻然不敢斥言淫防事第曰哈玛尔谓陛下年老故耳上大惊曰朕头未白齿未落遽谓老耶因即与谋去哈玛尔及锡锡计已定有防哈玛尔与锡锡母入朝御史大夫吹斯戡因劾奏二人罪恶上曰哈玛尔兄弟虽有罪且与朕弟同乳姑缓其罚令出征遂罢】哈玛尔锡锡伏诛【右丞相鼎珠等复纠哈玛尔锡锡之罪不已乃命二人出城受诏遂徙哈玛尔惠州锡锡肇州比行寻皆杖死初额森特穆尔就贬籍其家赉赐哈玛尔及哈玛尔死籍其家而所得额森特穆尔之军藏封识固未尝啓也中外皆谓上怒其潜托克托兄弟之故不知其罪由于不轨以是人皆快之】蓟州地震【凡十日】徐壽辉据汉阳建伪都○二月禁销毁贩卖铜钱○诏举守令【命六部诸监院正官各举才堪守令者一人】遣使祠曲阜○张士诚陷平江入据之【遂

陷松江湖常州】三月和买马【凡六万匹】大明取集庆南台大夫福壽死之【福壽初为淮南平章守御有方迁南台大夫先是集庆有警阿尔辉将苗军来援事平留苗兵扬州而苗蛮犷悍杀阿尔辉以叛集庆援絶高邮庐和相继沦陷福壽募民兵劝出粟激厉固守及大明兵围集庆福壽督兵出战尽闭诸城门已而力不能支遂破百司奔溃福壽据胡床坐凤凰台下军士四集遂被杀治书贺方守臣达年达萨亦死之】立江浙行枢密院【治杭州命达实特穆尔兼知院节制诸军便宜行事】方国珍复降【以为海道漕运万户其兄国璋授衢州路总管】是月有两日相荡○夏四月以吹斯戡为中书左丞相布哈为御史大夫○五月以多岱为陕西左丞相○车驾幸上都○徐壽辉复寇襄阳陷常德沔州○六月大明兵取广德○彰德李树生黄【先是童謡云李生黄民皆无家】秋七月张士诚遣兵陷杭州江浙丞相达实特穆尔遁平章尊达纳实哩战死参政杨旺札勒等击败之【评曰夫受人之托者死人之事达实特穆尔以丞相兼知枢密节制军民得便宜行事朝廷所付托专且重矣寇至而遁一城且不保况东南千里之地手卒为士诚所逼逐身死名丧为天下笑悲夫】八月徐壽辉遣倪文俊攻陷衡州元帅甄崇福战死○彗星见张宿【色青白彗指西南长尺余至十二月戊午朔始灭】车驾还宫○九月汝颖贼李武崔德等攻破潼关参政舒噜杰战死豫王引兵复之武等败走【初潼关破豫王同知院鼎珠引兵收复令伯嘉努守之已而复陷伯嘉努兵溃豫王复引兵取之武等败走复陷陝虢】以察罕特穆尔为兵部尚书【贼陷陝虢察罕特穆尔引兵复之又败贼兵于平陆安邑诏以为兵部尚书金河北行枢密院事】诏徙置江南行御史台治绍兴【复以纳琳为大夫】冬十月丁未有星陨大名化为石【從东南流芒尾如曳簪墮地有声火焰蓬勃从之乃息化为石青黑色形如狗头其断处若新割者命藏于库】达实巴图尔遣使来献防【初朝廷遣托欢出督兵达实巴图尔父子亲与刘福通对敌自巳至酉大战数合达实巴图尔坠马其子博啰特穆尔扶令上马先还连发矢毙追者夜一鼓步回营移驻陈留攻取夹河寨次高柴店偃太康三十里贼以五百骑乘夜来劫营不克比晓官军力战自寅至巳斩贼首数万擒伪将九人杀其伪丞相王显忠罗文素遣博啰特穆尔报防上赐劳内殿拜达实巴图尔为河南左丞相博啰特穆尔四川左丞】淮安城陷江东廉访使褚布哈死之【初布哈与副使刘甲扞御淮安甲守韩信城势相犄角总兵者挠之檄甲别将兵击贼贼因掘堑围淮安刍饷路絶元帅吳德秀运米万斛入河为贼所抄攻围日急总兵者屯下邳按甲不出遣使十九辈告急皆不应城中饿者仆道上即取啖之草木螺蛤鱼蛙鸟燕及靴皮鞍防革厢败弓之筋皆尽而后父子夫妇老稚更相食撤屋为薪人多露处坊陌生荆棘力既尽城陷褚布哈犹据西门力鬪中伤为贼所执杀而齑之子巴噶亦死布哈守淮安五年大小十百战精忠大节人比之张巡云】十一月有星流于东南○河南陷廉访副使堪布遁○倪文俊陷岳州杀威顺王子岱尔穆特尔○复衡州【湖广参政额森特穆尔与左江义兵万户邓祖胜合兵复之】以董 霄同金淮南行枢密院【初 霄建议以淮南为南北襟喉江淮要冲其地一失两淮皆未易服则救淮安诚为急务为今日计莫若于黄河上下濒淮海之地及自沭阳抵沂莒诸州县布连珠营每三十里一总砦总砦中又设一小砦使烽堠相望而巡逻往来遇贼则并力野战无事则屯种而食然后进有据退有守常为不可胜以待敌之可胜也又言海寧一境不通舟楫惟可陆运陆运之方每人行十步三十六人可行一里三千六百人可行百里每人负米四斗以夹布囊盛之用印封识人不息负米不着地排列成行日行五百回计路二十八里轻行十四里重行十四里日可运米二百石人米一升可给二万人此百里一日运粮之术也又淮南北之民壮者已尽为兵老防无所依宜置军民防

御司籍其民以屯故也练兵积谷且耕且战内定山东完固之邦外捍淮海出没之寇而后恢复可图也时不能用○评曰 霄百里一日运粮之术可施之于路近而兵少敌小而期促者耳若大敌在前拥兵数十万千里馈粮旷日持久则此法未易行行之亦未必善也夫其为说以三千六百人排列成行人行十步负米四斗三十六人行一里三千六百人行百里人不息肩米不着地往来接运日行五百回计路二十八里轻行十四里重行十四里日可运二百石人食一升可给二万人似矣假如兵二十万路千里则当用运夫三十六万人人日米一升先用米三千六百石矣运到米二千石是以三十六万人供二十万人之饷可乎又运夫所食不在其中湏各于所在地方支給若荒漠之地则所运之粮运夫且不足食焉能给军呜呼此书生之论可听而不可行也】河决河阴○山东大水

元史续编卷十五

【丁酉】十七年春正月丙子朔日食○命山东团结义兵【每州添设判官县添设主簿各一员专帅义兵以事守御仍命郡守提调听宣慰司节制○时江浙丞相达实特穆尔承制授实默伊逊穆尔固实为行枢密院判官宜孙分治处州以刘基为经历郡人胡深叶琛章溢参谋军事穆尔固实分院绍兴与宜孙夹攻处婺山贼平之○评曰兵贵乎精不必多将在乎□不必众添设帅领团结义兵不足以御敌适足以资敌耳田丰等十万户相继背叛而山东先失团结果何益哉】二月豫王等大破贼兵【先是河南左丞相台哈布哈驻军南阳嵩汝等州叛民皆降军势大振遂防豫王及鼎珠等同进讨大防】以察罕特穆尔为陕西左丞李思齐为四川左丞【河南贼出襄樊陷商州攻武关官军败走遂趋长安掠同华诸州陕西省台来告急察罕即引兵入潼关长驱而前遇战辄胜杀获以亿万计贼溃散走入南山兴元朝廷嘉其功授左丞未防贼围凤翔凡数十重察罕将铁骑昼夜驰赴与城中兵合击败之斩首万级伏尸百里关中悉定】三月中书左丞吕思诚卒【初思诚母冯梦一丈夫乌巾白襦衫红革带趋而揖曰我文昌星也及寤生思诚目有神光见者异之及长从萧防学中泰定元年进士历官有政绩素刚直不为势利屈卒谥忠肃】闰月泉州义兵万户赛富鼎反○大明取常州○刘福通遣毛贵陷胶莱州守臣释家讷死之山东皆陷【又陷益都瀋莒州朝廷命董霄从知院布哈齐讨之已而济南又告急乃提兵往援先按兵城中以数十骑挑贼贼悉众来鬪骑少却至礪上伏起城中出兵奋击破之般阳贼复来袭 霄列兵城上弗为动贼夜攻南门御以矢石黎明潜开东门出兵绕贼后及旦开南门下兵合击贼败走追杀之尽有害其功者潜于太尉努都尔噶令依前诏征益都 霄即引兵北行曰我去济南必不可保已而济南果陷时王英年九十六致仕家居益都陷谓子 曰世受国恩今老矣不能事戎马以报天子尚忍食异姓之粟乎水浆不入口者数日卒毛贵闻之命具棺衾以殓举尸不动祝曰公子请公归葬遂起观者莫不惊异】夏四月以特哩特穆尔为御史大夫乌兰哈达鄂兰并中书平章成遵为左丞约约为甘肃左丞相达实巴图尔为四川左丞相加太尉○车驾幸上都○五月以吹斯戡为中书右丞相太平左丞相鲁达实为御史大夫【评曰君子小人如水炭水火同器则争太平贤者也乃与吹斯戡并相火不能胜水必矣不自引去犹隐忍同事虽曰将以共济国难然小人实非君子所可共者惜哉太平之不能见防而作也】○大明取宁国江阴○六月癸酉有龙鬪于温州之乐清江【飓风大作所至有光如毬死者万余人】秋七月乙亥京师昼雾【不辨人物自旦至午方消如是者旬有五日】诏免今岁民租之半○八月刘福通犯汴梁分道寇掠【分军三道关先生破头潘冯长旧沙刘二王士诚寇晋冀白不信大刀敖李喜喜趋关中毛贵据山东其势大振彰德万户时公权以城降遂陷曹濮大名又窥衛辉博啰特穆尔击之又陷泽潞陵川县尹张辅死之又攻冀宁侵壶关为察罕特穆尔所破贼遂入太行白不信等陷兴元凤翔亦为李思齐等所破走入蜀初贼陷商州据蓝田西台侍御吕思诚议求援察罕省院忌客兵辄已议从不去思诚曰吾兵弱旦暮失守咎将安归乃移书趣之察罕遂将兵五千来援既而贼果以察罕援兵间之思诚乃请于朝命察罕专守关陝诏從之】以旺扎勒特穆尔为中书右丞温普为参政○癸丑二龙见祥符县○镇守黄河义兵万户田丰叛○以伯奇鼐尔为陕西平章杨旺扎勒为江浙左丞方国珍为参政○车驾还宫○以余阙为淮南左丞○诏以张士诚为太尉【初士诚俾南台中丞曼济哈雅为书请降江浙左丞相达实特穆尔令参政周伯琦至平江抚谕之诏以士诚为太尉士诚因留伯琦不

遣伯琦始以文艺居馆阁有声及附托克托劾刘希曾等遂不为公论所与后出江东为廉使及索诺木巴勒陷宁国伯琦仓皇出走杭州于是南台御史俞观纠伯琦失守宜正其罪而达实特穆尔假伯琦参政招谕土诚留平江者十余年土诚灭乃得归番阳寻卒故论者谓伯琦遭时多艰而善于自保于致身之义为有阙云○评曰周伯琦以文艺名世固尝在端亮之列矣一为利禄所诱谄附托克托得罪于公论遂尔改操不复顾借居方面则失守将使命则屈节虽保身于危难而坏名毁节辱先丧家多矣惜哉】○大明取扬州○九月诏努都尔噶进讨山东○以鲁达实为中书平章○徐壽辉伪将陈友谅袭杀倪文俊【文俊谋杀壽辉不果自汉阳奔黄州友谅袭杀之自称平章】置山东行省【以大司农哈刺章为平章】冬十月达实巴圖尔击曹州贼败绩达尔玛实哩死之○静江路山崩地陷大水○河北水○十一月以达兰为中书平章巴特玛实哩为右丞李献为左丞巴延特穆尔哈喇诺海崔敬陈敬伯并参政○十二月戊寅太白犯岁星○四月左丞相达实巴圖尔卒于军【诏以其子博啰特穆尔为河南平章代总其兵】明玉珍据成都【初倪文俊陷川蜀命伪元帅明玉珍守御文俊死玉珍遂自据成都】赵君用等僭称王号【君用及彭大之子早住同据淮安君用僭称永义王早住称鲁淮王】义兵千户余寶叛据棣州【寶杀其知院寶保叛降毛贵遂据棣州】河南大饥○张祜复上疏言事不省【祜上疏陈十祸其根本之祸六征讨之祸四歷数其一曰轻大臣二曰解权纲三曰事安逸四曰杜言路五曰离人心六曰滥刑狱所谓根本之祸也至若不慎调度不资羣防不明赏罚不择将帅所谓征讨之祸也其言多不能载大畧以谓陛下因循治安不预防虑今海宇乱离天道变常民情难保正当儆省惕厉奋思过念祖宗创造之难今日坠亡之易修实德推至诚凡土木之工声色之乐宴安鸩毒皆宜痛撤勇改而陛下泰然若承平无事之日此事安逸所以为根本之祸者也又自四方有敝调兵六年初无纪律又失激劝将帅因败为功指虚为实大小相谩上下相依于是覆兵残民贪婪懦怯悉无惩戒以致所经之处鸡犬一空货财罄尽而面谀游說反以克复受责且河南一省今所存者止封丘延津登封偃师四县而河南淮北千里萧条经兵之处固不忍言未至之境尤可軫念如此军旅不休使天雨粟地涌金朝夕存亡且不能保况以地力有限之费供将帅无穷之欲哉盖亦危矣陛下事佛求福饭僧消祸以天壽节而禁屠宰今天下兵起杀人不知其数陛下泰然不理而曰吾将以是求福福何自而至哉夫颖上之寇以佛法诱众駸然不至于亡吾社稷不止也堂堂天朝不思靖乱而反阶乱其祸毒至深其关系至大有识者为之扼腕有志者为之痛心此则不明赏罚所以为征讨之祸者也疏奏上之不省○评曰张祜之疏十祸善矣其曰轻大臣则非也至正之君不自为政善恶邪正进退黜陟举付之省院台而方面皆得以便宜行事如此而犹为不重乎若曰大臣当重选智勇端亮有德之君子而才辩口佞寡廉鲜耻之人不得而轻用焉斯可矣】陈友谅寇安庆守将余阙拒却之【淮南右丞余阙守安庆倚小孤山为藩蔽命义兵元帅胡伯顔统水军戍守友谅自上流引军直小孤伯顔以战四日夜不胜奔还贼追至城下阙遣兵扼观音桥俄而饶寇攻西门阙斩却之友谅兵乘东门红旗登城阙简死士奋击贼败去并军攻东西二门又败之贼恚甚乃树栅起飞楼来攻金鼓声振地阙分兵悍敌昼夜不得息既而池州贼赵普胜军东门友谅军西门饶兵军南门四面蚁集阙徒步提戈为士卒先众号哭止之挥戈愈力分遣部将督三门兵自以孤军血战斩首无数而阙亦被十余创安庆遂危】

【戊戌】十八年春正月陈友谅陷安庆守将余阙等死之【城将陷阙知不可为引刀自刭

墮清水塘中死妻页卜氏及子德生女福童亦皆赴井死同时死者守臣韩建一家被害居民不从贼焚死者以千计其知名者万户李宗可纪守仁陈彬金承宗經歷 桂芳都事特穆尔布哈千户和尔布哈新李卢廷玉葛延龄丘聿许元琰百户黄宁奏差乌德美安庆推官黄图噜岱經歷杨桓知事余中怀宁县尹陈巨济事闻贈阙平章邠国公謚忠宣○评曰余阙可无愧于张巡矣巡保障江淮唐室得以兴复故世称其节赏其功阙屏蔽扬豫当东西南北之要冲四面攻围誓以死守然元氏终亡是以忠节见称而功不显也况同时死义之士不下于南霁云诸人亦岂非阙之精忠仗节有以感激之欤呜呼希矣】○大明取婺源州○田豐陷东平○以布埒齐知枢密院○二月毛贵陷清沧州济南守将阿达战没河南右丞董 霄死之【布埒齐与贵战于好石桥败績走济南贵遂陷清沧据长卢济南守将阿達战死贵立寅兴院选用故官以姬宗周等分守诸路又于莱州立三百六十屯每屯相去三十里造大车运粮官民田并十分収二冬则陆运夏则水运时董抔霄驻兵南皮县魏家庄诏遣使拜为河南右丞毛贵兵卒至而营垒未完诸将白贼至当如何 霄曰当以死报国因拔剑督战贼突至摔霄问曰汝为谁曰我董老爷也众刺杀之无血惟白气冲天是日其弟昂霄亦死 霄以儒生起家为能吏会天下丧乱乃复以武功奋其才畧有大过人者而当时用之不能尽其才君子惜之○评曰 霄忠义固可以感天地贯金石然刺之无血惟白气冲天则涉乎诞妄矣盖史家之过称人之美固不在是也】田丰陷济宁努都尔噶奔东昌走丰遂入据之【努都尔噶闻田丰逼东昌弃城走丰遂陷东昌及益都广平大掠已而复退保东昌】三月己亥朔日色如血○毛贵兵至柳林刘哈喇布哈击败之贵走保济南【贵陷般阳至蓟州犯灤州至林枢密副使达国珍战死遂畧柳林刘哈喇布哈击败之贵走还】丁卯太白在井失行于北【至十二月戊寅生黑芒环绕其星乍东乍西乍动乍静癸未忽明忽暗】大明取建德路○王士诚陷晋冀又侵懷庆周全擊走之【士诚兵陷晋寧总管杜赛音巴哈死之又陷冀寧及大同诸县复侵怀庆为全所败】夏四月陈友谅陷龙兴省臣道通和尼齐弃城走【友谅又遣王奉国攻防饶州康泰寇邵武又陷吉安抚州初道通任章巴延布延布哈捍城颇有功未防和尼齐来为左丞贪忍不得士心而道通素卹民能任人有功者赏无功者或不加罪二人又素不相能城陷和尼齐出走道通退保抚州欲集义兵收复而势已不可因叹曰身为大臣城陷不守复何面目见人追者至道通迎敌遂为所害○初朝廷授吴当江西廉访使与兵部尚书黄昭和尼齐同便宜行事复建抚二州时参政多岱总兵忌当成功搆当昭南人不宜统兵柄改当守抚州昭临江并供亿和尼齐军而和尼齐又言二人难任牧民皆坐除名江西既陷当着道士服杜门不出友谅舁至江州拘留一年不屈放还吉水卒当澄之孙也】察罕特穆尔等败李喜喜于巩昌喜喜走入蜀【察罕特穆尔李思齐张良弼郭择善拜特穆尔鼎珠汪长生努各以所部兵讨李喜喜喜喜败走入蜀察罕特穆尔驻清湫思齐驻斜坡良弼驻秦州择善驻崇信拜特穆尔驻通渭鼎珠驻临洮各自除拜府州县官属征纳军需既而朝廷召察罕以兵屯涿州乃自将銳卒赴召击冀晋贼却之河东悉定已而良弼杀拜特穆尔李思齐杀郭择善】以察罕特穆尔兼西台侍御同知河南行枢密院【命守关陝晋冀抚镇汉沔荆襄便宜行事察罕乃益务练兵训农以平定四方为己责】刘福通入汴梁奉其伪宋主小明王居之【福通攻汴梁竹贞弃城走福通等遂入城乃自安丰迎其伪主居之以为都】以台哈布哈为中书右丞相命进讨山东台哈布哈拒命诏诛之以乌兰哈达代总其兵【台哈布哈既与太平相失闻其复相意不能平叹曰我不负朝廷朝廷负我矣太平南人乃复居中用事我反在外劳苦耶是时朝廷复台哈布哈湖广左丞相使进讨诸将皆欲进兵而台哈布哈

以养锐为名反勒兵退及贼攻汴梁守臣请援十往反犹按甲不动或谏之曰贼旦夕至丞相兵不进何也台哈布哈大言曰我在何物小寇敢来若等无多言而出军纵掠百里内荡然玩寇养乱致河北山西相继不守朝廷忧之两遣重臣谕防授以成筭皆不听其子寿通将兵分讨山东入奏事语言骄慢上由是恶之防山东贼愈充斥乃拜台哈布哈中书右丞相总兵进讨台哈布哈即上言军行以粮饷为先请令太平至军供给乃可济事不然兵不能进于是廷议喧然太平令御史劾其缓师拒命诏削夺官爵益州安置以乌兰哈达代之台哈布哈闻有诏夜驰诣刘哈喇布哈求救哈喇布哈时驻保定见其来置酒慷慨言曰丞相国家柱石是必谗言间之我当往见上丞相勿忧即走至京先见太平太平问其来故具以告太平曰台哈布哈大逆不道今诏已下汝妄言将及祸哈喇布哈惧不敢发太平语之曰汝能致台哈布哈功不细矣因许之乃引见上赐赉良渥哈喇布哈还 台哈布哈父子送京师未至杀之于路】

山东地裂天 白毛○以察罕特穆尔为陝西平章【聽便宜行事】六月戊辰朔日食○关先生等兵陷辽州【攻保定不克遂陷恒州掠大同兴和诸郡】前江西廉访僉事巴延谋起兵讨贼不克而死【巴延初以处士徵为待制迁僉宪江西以病免归及河南盗蔓延河北巴延言于省臣将结鄉民为行伍以自保而贼兵大至乃渡漳北行邦人從之者数十万至磁与贼遇贼知其名生刼之诱以富贵巴延不屈引颈受刃与妻子俱死或剖其腹见其心数孔曰古称圣人心有七窍此非贤士乎纳心腹中排墙而擗之事闻谥文节巴延字宗道初师黄坦以穎悟可比顏子因命以顏为氏世呼为顏宗道云】秋七月丁酉朔周全以怀庆叛附刘福通【时察罕特穆尔驻洛阳遣拜特穆尔守盩厔城周全来战杀拜特穆尔遂尽驱怀庆民入汴梁福通寻遣全攻洛阳守将登城以大义责全全愧谢退兵福通杀之○评曰周全愧谢退兵亦理义之良心有不能亡故也然与其为福通所杀孰若坚守臣节为国死难之为美乎亦可以为人臣而怀二心者之冰鉴矣】京师戒严【有贼兵犯京城刑部郎中布哈时守西门夜开关击退之于是命左丞相太平督诸军防御】义兵万户王信以滕州叛降毛贵○八月江浙平章萨木丹巴勒逃入福建【萨木丹巴勒讨饶州贪财玩寇久而无功遂妄称迁职福建行省为宪臣巴喇密特特穆尔所劾拘之兴化】蒙阴县饥【斗米金一斤】京畿水○九月命参政布延布哈治书李国凤经略江南○以庆通为南台大夫○陈友谅陷贛州江西参政沁布阿咱尔等死之【总管噶海齐亦死友谅遂陷汀州】冬十月大明取兰溪诸暨等州○十一月乙未朔以布哈特穆尔为福建平章○吹斯戡罢以努都尔噶为右丞相【时天下多故外则疆宇日蹙内则帑藏空虚而上方溺于淫乐不恤政务吹斯戡居相位无所匡救而公受贿赂贪声着闻于是御史扬珠布哈劾奏其任用私人图烈及妾弟崔旺扎勒特穆尔印造伪钞事将败杀旺扎勒以灭口吹斯戡乃自请罢政诏止收其印绶御史王彝达尔玛实哩言不已上终不听】十二月戊寅太白经天○大明取婺州守臣僧住及浙东廉访使杨惠死之○闕先生兵陷上都【焚宫阙留七日转掠辽阳】是歲京师大饥疫【时河南北山东皆被兵民携老幼流入京师重以饥疫死者相枕藉官者保布哈请市地收瘞之上赐钞千錠皇后及皇太后赐金银及他物有差省院官僚施他物者无算保布哈出金玉带各一及银钞米麦以为费择地南北两城抵卢沟桥掘深及泉男女异圻人以一尸至者随给以钞舁负相踵凡 二十万又修水陆防三昼夜居民病者给药不能丧者予之棺翰林承防张翥为文颂其事曰善惠之碑○评曰民之流离他域转死于饥疫者以世乱故也世乱而不能靖则以君德之不修臣职之不共所致耳盍亦反其本哉不能靖乱以安民而区区掩埋祠祭以为惠君臣上下方有德色吁抑末矣彼张翥者不闻规正而撰文颂美何其谄哉】

【己亥】十九年春正月陈友谅寇信州江东廉访使巴延布哈德济引兵救之【贼党王奉国寇信巴延布哈德济自衢往援破走其兵时镇南王子大圣努枢密院判席闰屯兵城中开门出迎德济登城四顾誓以破贼自许后数日贼又来攻德济分兵为三出城奋击斩首数千级复大破之友谅弟友德植木栅攻城益急遣人来说降部将高义 与之通给呼图克布哈范则忠等十将往见奉国皆拘囚不遣义又以计来诱德济时德济坐城上见义来谓曰汝诱十帅无一人还今来诱我耶我头可断足不可移数其罪而斩之由是日夜鏖战粮竭矢尽而气不衰城中食草苗茶纸括靴底掘鼠罗雀杀老弱以食○评曰四海板荡寇盗相望有民杜之寄者孰不幸封境之苟安以自免也故张巡守睢阳求救于贺兰进明而不得盖或惧其同祸或忌其成功能挺身赴敌者鲜矣贼寇广信衢虽隣壤尚可自保巴延布哈德济即引兵往救亦异于周伯琦之出走者矣】关先生等兵陷辽阳懿州总管吕震死之【赠震河南左丞东平公贼引兵往高丽】癸丑流星起南河没于螣蛇【将没迸散随落处有声】二月诏博啰特穆尔移镇大同【欲倚以捍蔽京师故也复置大都督兵农司并分司十道专督屯种以博啰领之所在侵夺民田不胜烦扰时台哈布哈溃兵数万抄掠山西察罕特穆尔遣陈秉直分兵招抚其首领悉送河南屯种】夏四月赵君用杀毛贵其党续继祖又执君用杀之○京师大饥【自正月至五月银一錠得米八斗死者无筭通州民刘五杀其子而食之】五月以旺扎勒特穆尔为陕西左丞相○山东西河南北关中大蝗【飞蝗蔽天人马不能行所落沟壑尽平民大饥】六月辛巳以雅克科尔为御史大夫○以吹斯戡为辽阳左丞相○甲午陈友谅陷信州巴延布哈德济战死【五月德济大破贼兵王奉国复昼夜攻之不息穴地梯城以上城遂陷德济与大圣努参谋哈喇丹皆战死德济之将赴援也入白其母鲜于氏曰儿今不得事母矣母曰尔为忠臣吾死何憾因命其子额森布哈奉母间道入福建以江东廉访司印送行台巴延布哈德济高昌王锡锡德济之孙鲜于氏太常典簿枢之女也】秋七月丁酉太白犯上将【甲辰犯右执法己酉犯左执法】八月察罕特穆尔等兵讨刘福通破汴梁福通以其伪主走安丰【察罕大发秦晋军讨汴围其城督诸将阎思孝李克彝珪林齐赛音谔德齐達呼托音布哈吕文完哲贺宗哲孙翥等政破之福通等走安丰诏以察罕特穆尔为河南平章兼同知行枢密院西台中丞赐七宝带以旌其功】九月以特哩特穆尔为陕西左丞相○河决任城县○丙午白虹亘天○大明取衢处州○诏征海运粮于张士诚【遣兵部尚书特哩特穆尔等以御酒龙衣赐士诚征海运粮时朝廷又遣户部尚书贡师泰分部于福建以闽盐易粮海运给京师得粮数十万石京师赖焉】冬十一月京城十一门筑瓮城造吊桥【评曰天子有道守在四夷筑瓮城造吊桥曾足以为国乎】以方国珍为江浙平章○壬申太白犯斗辛巳流星大如桃【流星起自危东行没于毕宿之西】京师有杜鹃【啼于城中居庸关亦有之】十二月皇太子杀其中书左丞成遵参政赵中【初毛贵据山东由河间入寇中外大骇廷议迁都避之和者知出一口左丞相太平力争不可遣刘哈喇布哈击败之京师遂安会张士诚降察罕特穆尔屡防人心翕然有中兴之望而右丞相吹斯戡家人造伪钞事觉刑部欲逮右相置对太平曰堂堂宰相乌有此事四海闻之若国体何遂止罢其相位太平又分禄餽之而吹斯戡反衔太平先是奇皇后与太子谋内禅谕意太平太平不答由此太子亦恶之以遵中皆太平所任用令御史诬其赃罪下狱死○评曰太子之职在问安视膳刑政非所敢专也况成遵等执政大臣而专杀之是无君亲矣所以然者太子谋内禅而丞相不从故杀其佐属以脇之耳羣雄作乱于外太子谋乱于内乌得而不亡哉】陈友谅迎其伪主徐壽辉徙都江州【友谅自称汉王】制赠宋儒杨时李侗胡安国蔡沈真德秀封爵【沅州

路照磨胡瑜言先儒杨时等五人有功圣门未列从祀于是省部议奏俱赠太师追封时吴国公侗越国公安国楚国公沈建国公德秀福国公并从祀宣圣庙廷】

【庚子】二十年春正月以危素为中书参政○丙辰五色云见○右丞相努都尔噶卒【努都尔噶有识量处事平允选官不用私人为相有大臣体既卧病谓人曰太平真宰相也我疾固不起而太平亦不能从于位矣此可叹也遂卒】二月戊午朔太平罢为太保【成遵等既死太子欲尽逐帝近臣决意去太平政柄努都尔噶数于上前左右之故太子之志未及遑防努都尔噶卒太平知势不可留乃数以病辞位拜太保养疾于家○评曰易称君子见几而作不俟终日吹斯戡專政而太平与之同位力辞而去可也皇后太子既有邪谋力能匡正则正之不能则去之亦可也太子杀成遵赵中剥床将及肤矣尚不知觉至于见逐而后去隱忍依达自取悔辱惜哉然太平盖量虽寬而识不敏仁有余而勇不足者也】三月戊子朔彗星见东方○甲午廷试进士赐穆珠魏元礼等三十五人及第出身有差○以吹斯戡为右丞相【时上益厌政宦者保布哈用事为奸利吹斯戡因与结搆相表里四方警报将臣功状皆壅不上闻后又与保布哈党庇库库而诬博啰以非罪卒召祸乱论者谓元之亡吹斯戡之罪居多】田丰陷保定命中书都事乐元臣招谕其军丰杀之【丰杀元臣复陷永平易州广平等处】夏五月丁亥朔日食 雹○陈友谅杀其主徐壽辉遂自僭号【友谅弑壽辉于太平自称皇帝僭国号大汉改元大义回驻江州】以班珠尔玛克为平章○诏谕博啰特穆尔察罕特穆尔各将所部兵分守其地【初乌兰哈达领台哈布哈军其部将方托克托与弟拜特穆尔时保辽州乌兰哈達同唐琰高托音等屯孟州与察罕特穆尔部将班布尔锡等交兵已而乌兰哈达引达勒达军还京方托克托等乃从博啰由是二将不睦故有是诏且命博罗守石岭以北察罕守关南毋得互相越境侵犯所守信地】张士诚贡粮于京师【巴延特穆尔等至杭州传诏命士诚轮粟方国珍具舟丞相達实特穆尔总督之既而士诚虑国珍载粟而不输于京国珍恐士诚掣其舟乘虚以袭已二人互相猜疑巴延特穆尔往来开谕运米十一万石至京七月复遣户部尚书王宗礼徵如今年之数明年五月运至】秋九月博啰特穆尔攻察罕特穆尔于冀宁遣使和解之察罕特穆尔不受命【时朝廷遣参政额森布哈等往谕二将令讲和博啰自石岭直抵冀宁围之三日复退屯交城察罕引兵与战已而各于关南北守御有诏命博啰守冀寧额森遣布哈殷兴祖等倍道趋之守者不纳察罕又遣兵攻其军时朝廷以冀寧畀博啰而察罕借晋冀以致盛强乃不奉诏托言用师汴梁寻渡河就屯泽潞以拒之又与博啰军战于东胜遣部将班布尔锡援之班布尔锡曰彼军奉诏而来我何敢抗察罕怒杀之○评曰首乱者博啰也察罕力若能讨一举而擒灭之可也势不相下则宜慕廉蔺之义共济国难乃日寻干戈争城争地可乎且自察罕起兵収复者几州勦絕者几处朝廷由匹夫而擢兼三事恩宠至矣而察罕方自为谋畧不忧国此岂为纯臣也哉既而诏命和解以冀宁畀博啰如事关大害系国存亡则弗与而复请可也当是时中原板荡岂一冀宁所能杜博啰之僭乱哉盖察罕实欲借全晋以资盛强非真能为朝廷惜土地也班布尔锡奉诏而察罕杀之则方命之迹不能掩矣】冬十一月甲寅朔黄河清【原武荥泽二县界凡清三日】十二月阳翟王阿尔辉特穆尔反【阿尔辉特穆尔太宗第七子默埒大王七世孙时兵起四方上屡诏宗王以北方兵南讨阿尔辉特穆尔知国事不可为乘间拥兵数十万屯驻于穆尔古珠之地将犯京畿使来言曰祖宗以天下付汝汝已失其半若以国玺付我我当自为之上遣使报曰天命有在汝欲为则为之命图沁特穆尔将兵击之军溃图沁奔上都】以太平为上都

留守

【辛丑】二十一年春正月癸丑朔诏赦天下○二月癸未朔填星退犯太微垣○三月博啰特穆尔罢兵还【朝廷再命平章达实特穆尔参政七十往谕解兵博啰特穆尔乃还遣其将图鲁卜等引兵据延安以谋入陝朝廷寻命博啰于保定以东河间以西屯田】夏四月辛巳朔日食○以张良弼为陝西参政【良弼屯蓝田受节制于察罕特穆尔又阴结平章鼎珠听陝西左丞相特哩特穆尔调遣已而移驻鹿台○评曰良弼受节制于察罕而又阴结鼎珠听陝西行省调遣则察罕与朝廷贰明矣遣子贡粮焉知非窥觐朝政也哉】察罕特穆尔贡粮于京师【遣其子副詹事库特穆尔贡粮至京皇太子亲与定约遂不复疑】五月明玉珍陷嘉定等路李思齐遣兵击败之○李武崔德降于李思齐○六月乙未荧惑岁星太白聚翼○秋八月以布哈特穆尔为南台大夫○大明取江州陈友谅退保武昌○察罕特穆尔讨田丰等降之【察罕发晋军下井陘出邯郸过磁相怀卫又发汴梁继之水陆并进遂平东昌复冠州遣库特穆尔阎思孝等防关保珪林齐将由东阿造浮桥以济贼以二万人夺之关保等且战且渡拔长清进讨东平田丰遣崔世英出战大破其军乃遣使招丰丰降令为前锋进讨余宝及王士诚杨诚皆降进兵济南刘珪降遂围益都】九月阿尔辉特穆尔伏诛【少保知院娄章以兵讨阳翟王败其众部将托欢擒送阙下诏诛之以其弟呼圖克特穆尔袭封】以太平为太傅【托欢太平子额森呼圖克将也 阳翟王阿尔辉特穆尔太平令生致之京师由是北边以宁加太平太傅寻辞归奉元】明玉珍陷东川郡县李思齐遣兵击之○复遣使徵粮于张士诚【命兵部尚书彻辰布哈侍郎韩祺往使明年运米十三万石至京】冬十月以察罕特穆尔为中书平章【仍兼知河南山东行院】十一月戊辰黄河清【自平陆三门碛下至孟津五百里皆清命秘书少监程徐祀之十二月石州河清至冰泮始如故】明州象山县竹实【如小米可食】李思齐攻张良弼诏和解之○京师大饥

【壬寅】二十二年春正月诏李思齐讨四川张良弼讨襄汉【时两军不和故有是命】○大明取江西隆兴诸路○以额

森特穆尔为中书右丞旺扎勒特穆尔为陝西左丞相○二月丁丑朔盗杀陝西右丞塔布岱○

乙酉彗星见【见于危宿光芒丈余色青白丁酉犯离宫西星至二月终光芒长二】

【丈余三月戊申不见星形惟有白气竟天西指埽大角壬子行过太阳前惟有星形无芒在昴】

【宿至戊午始灭】明玉珍陷云南【屯金马山陝西参政彻尔特穆尔等击败之擒其弟明二】加博啰特穆尔中书平章【位第二】李思齐攻张良弼良弼伏兵大破之○夏四月丙子朔长星见【其形如练长数十丈在虚危之间四十余日乃灭】乙亥荧惑不见【离太阳三十九度不见当出不出】五月赛富鼎败走入海陈友定复汀州【赛富鼎从据泉州福建平章扬珠布哈击败之其众溃散入海陈友定遂复汀州】中书参政陈祖仁上疏乞罢修上

都宫阙【祖仁上疏畧曰自昔人君遇艰虞多难孰不欲奋发有为以光复前业苟不奉天道顺人心而举措失宜虽以守成犹或致乱况欲以拨乱反正乎上都宫阙自经兵火为臣子者所不忍言正陛下所当痛心疾首亟图兴复者也然四海疮痍财用空竭驱疲民以供役使废其田作何异扼其吭夺之食以速其毙乎且今日所当兴复乃有大于此者假令上都宫阙未复固无妨于陛下之寝处使因是而违天道失民心或致隳废大业则不可不深虑也愿陛下以生养民力为本恢复天下为务亲贤远佞信赏必罚如是则承平之观不日咸复岂止上都宫阙而已哉疏奏上嘉纳焉】明玉珍自称陇蜀王【遣兵守重庆分兵寇龙州犯兴元巩昌诸路】六月辛巳彗见紫微垣【光芒长尺余戊子埽上宰至七月乙卯始灭】田丰等叛杀察罕特穆尔诏以库库特穆尔代总其兵【时山东俱平独益都孤城不下察罕环城列营重堑长围攻具百道并进贼悉力拒守田丰王士诚阴与贼连谋复叛初丰来降察罕推诚待之不疑数入其帐中及丰谋变乃请察罕行营众以为不可往察罕曰吾推心待人安得人人而防之左右请以力士从又不许乃从十一骑行至王信营又至丰营遂为王士诚所刺讞闻帝震悼公卿及四方之人男女老防无不伤惜先是有白气如索长五百余丈起危宿扫太微垣太史奏山东当大水上曰不然山东必失一良将即驰诏戒察罕勿轻举未至而已及于难诏赠河南左丞相封颍川王谥忠襄起复其子库库特穆尔为太尉平章知院代总其兵】秋九月刘福通以兵援田丰库库特穆尔击破之○以苏苏为辽阳左丞相○遣户部尚书托克托彻尔等徵粮于张士诚【明年五月运十三万石至】冬十月库库特穆尔复益都田丰等伏诛【库库既领兵銜哀讨贼攻城益急而守者愈固乃穴地通道以入拔其城执贼首陈獠头等二百余人献阙下而取田丰王士诚之心以祭其父余党皆就诛遣关保取莒州山东悉平库库本察罕之甥自防养以为子云】以佛嘉努为御史大夫○枢密副使李士瞻上疏极论时政【凡二十条一曰悔己过二曰罢造作三曰讲论圣学四曰询谋老成五曰去姑息六曰开言路七曰明赏罚八曰公选举九曰察佞幸十曰严宿衛十一曰省佛事十二曰絶滥赏十三曰罢各宫屯种十四曰减常歲计置十五曰招集衛兵十六曰广辟屯田十七曰獎劝守令十八曰礼待藩镇十九曰分遣大将急保山东二十曰依唐广宁故事分道进取先是托和齐言乞罢三宫造作帝为减军匠之半还宿衛而造作如故故士瞻首及之疏入不报】是歲加封先儒朱熹为齐国公【赠熹父松谥曰献靖】

【癸卯】二十三年春正月壬寅朔明玉珍僭号【建国号曰大夏改元天统僭称皇帝】庚戌歲星退犯轩辕大星○二月库库特穆尔引兵还河南【留索勒珠以兵守益都自还河南朝廷方倚之为安而博啰特穆尔自察罕既死数以兵争晋冀虽屡诏谕解而雠隙日深○评曰库库既克田丰等政当乘銳收复中原谕告羣雄共獎王室乃引兵还河南为自安之计以争晋冀则其心可见矣而朝廷方倚之以为安是果何倚乎】三月辛丑朔彗星见东方【经月乃灭】丙午大赦○廷试进士赐巴拜杨輓等六十二人及第出身有差○分省于冀宁【以平章阿尔布哈蒞治】立广西行省【以额尔吉纳为平章时南方郡县皆陷没惟额尔吉纳独保广西者十五年】立胶东行省【治莱州以袁宏为参政】关先生余党复寇上都博啰特穆尔击降之○夏四月辛丑荧惑犯歲星○库库特穆尔遣兵攻张良弼【初李思齐与察罕同起义师齿位相等及库库特穆尔总其兵思齐心不能平而张良弼孔兴圖鲁卜亦皆恃功懷异莫肯统属遂成仇敌库库乃遣关保珪林齐西攻良弼于鹿台而思齐与良弼合兵连不能罢○评曰库库初统父兵不思效忠以靖国难既脩怨博啰又开衅良弼兵连不解卒

之无功以至国亡由是而言库库亦羣雄之一未可以言纯臣也】六月博啰特穆尔遣珠占袭据陝西库库特穆尔与李思齐合兵攻之贞遂降【先是博啰遣方托克托迎匡福于彰德库库遣兵追之败还匡福遂据保定库库部将屯兵蓝田七盘李思齐攻兴平据盩厔时博啰奉诏讨襄汉而岱律阻道于前思齐踵袭于后乃请督库库东出潼关路通南讨至是遣珠占等入陝西据其省治时左丞达实特穆尔与省台有隙恐陝西为库库所有阴结博罗与珠占入城劫大夫旺扎勒特穆尔拘留不遣库库遣摩该合思齐兵攻之贞遂降】庚戌星陨济南龙山【入土五尺】壬戌太白昼见犯井○秋七月戊辰朔京师大雨雹○以马良为中书参政○河决东平○庆元星坠【声如雷光数十丈久之乃灭】八月丁亥朔倭人寇蓬州守将刘暹击败之○大明讨陈友谅战于番阳湖友谅败死其

子理自立退保武昌遂围之【理改元德壽】辛未太白

犯左执法乙亥岁星犯右执法○九月丁亥太

白犯填星辰星犯亢○张士诚自称吴王来请命不报【评曰名器固不可以假人然士诚比之他人犹有馈给军饷之功况明玉珍陈友谅之徒皆僭大号朝廷不能禁也士诚称王犹知请命独不可以因而羈縻之哉明年征海运粮士诚亦不与盖自是无江浙矣】诏遣使征粮于张士诚士诚不与【东南海运遂止于是歲】冬十月丙申朔山东赤气千里○博啰特穆尔遣兵攻冀宁库库特穆尔击破走之【先是库库侵博啰博啰奏其蹈袭父恶有不臣之罪乞赐处置至是博啰为库库所败其将乌玛喇殷兴祖被擒军遂不振】十一月诏复故丞相托克托官爵【台臣奏托克托为相有大臣体脩举政务克济艰危统兵平徐州收六合大功垂成浮言搆难就贬以没已蒙录用其子还所收田产乞闵其勲旧给还宣命于是悉复其官爵召其子哈喇章为中书平章封申国公分省大同三寶帑知枢密院事】杀太傅太平【初上欲以巴咱尔为相辞曰臣老不足以任宰相若必以命臣非得太平同事不可于是密防令巴咱尔留太平毋还奉元太平行至沙井关闻命而止宿留久之皇太子恶其已去而复留也令御史大夫布哈劾太平违上命当正其罪诏拘收所授宣命吹斯戡因诬奏其罪安置土番寻遣使至东胜逼令自裁年六十三○评曰至正宰相惟太平德量深厚才识宏远为时论所服故多尔济努都尔噶巴噶尔皆国勲旧拳拳推獎之不置不贤而能若是乎当是时国势日危朝政日乱奸邪视忠直如仇讐惟恐其去之不速而太平闻命即止宿留久之虽曰一饭不能忘君然忠不见信卒蹈危祸悲夫】十二月以陈祖仁为甘肃参政【时保布哈托驪内侍太子外结丞相吹斯戡骄恣不法御史传公让劾之忤皇太子意坐左迁治书侍御史陈祖仁乃上疏太子言御史纠正奸邪非一己之私言乃天下之公论台臣审问尤悉故以上啓今殿下不察辄加阻抑使奸蠹情状不得达于君父则亦过矣夫以二防之微而于祖宗所遗之天下所立之台諫漫不加卹可乎且殿下职止于监国抚军问安视膳而予夺赏罚之权自在君父今方毓德春宫反使谏臣结舌防人肆志岂惟君父徒拥虚器天下苍生亦将奚望疏入太子大怒令大夫娄达实谕祖仁以所言虽是但托驪等初无是事御史纠言不实已与美除昔裕宗为太子凡事合奏者皆许啓闻非独我今日如是也祖仁乃复上疏言御史所劾得之田野殿下所询不出宫墙所以全此二人者正缘不知其奸故也然举朝知之在野知之天下亦知之独殿下未知耳且裕宗既领军国重事理宜先阅其纲若至台諫封章自是御前开拆假

使必经东宫而君父或有差失諫臣上言太子将使之闻奏乎将寢抑之乎闻奏则伤父之心寢抑则陷父于恶殿下将安所处如知此說则今日言章不宜阻御史不可斥矣斥其言而美其除不知御史言为天下国家乎为一身官爵乎斥者去来者言言者无穷而美除有限殿下又将安处于是太子以其事闻二人皆辞退上又令娄达实谕防祖仁复言于上曰祖宗以天下传之陛下今乃坏乱不可救虽曰天运使然亦刑赏不明所致区区二防犹不能除况于大者愿陛下显斥二人勿令以辞退为名使海内明知赏罚则将士亦必效力天下可全若优防不断则臣有饿死于家誓不与之同朝牵连及祸矣上大怒时侍御史李国凤亦言二人必当斥于是台言自娄达实以下皆左迁而出祖仁为甘肃参政】娄达实图沁特穆尔叛奔大同【二人得罪于东宫故叛附于博啰特穆尔】

元史续编卷十六

【甲辰】二十四年春正月大明灭伪汉陈理出降【湖南北江西相继归于大明】三月诏削博啰特穆尔官爵【坐匿娄达实等削官爵罢兵权 路通许归四川乡里初娄达实以帝母舅故上数为太子寝其事而太子不從丞相吹斯戡宦者保布哈皆附太子必穷究其事又图沁特穆尔先与中书右丞相额森布哈有隙额森布哈因譖其诋毁朝政而博啰素与图沁友善且知其诬遣人白其非罪皇太子因诬博啰与娄达实等谋为不轨下诏削夺于是祸乱不解矣○评曰博啰与察罕父子兵争曲直无甚相遠朝廷若能处置得宜命察罕专收复河南博啰平定山东各责其成功而晋冀则朝廷自遣人戍守彼各不得驻兵如此则祸患庶防其有瘳乎今察罕既不奉割冀宁之诏曲不在博啰矣东宫无道而娄达实得罪出走博啰匿之无大恶也况达实巴图尔勲在王室博啰亦不为无功緣情定罪犹当议免何至遽削夺其官爵乎激成其变祸乱不解虽博啰怙终自取覆灭亦顺帝不能驾御之所致也】夏四月甲午朔博啰特穆尔拒命诏库库特穆尔讨之○壬子岁星逆行入端门【自去年九月东行入右掖门犯右执法出端门留守三十余日犯左执法今又逆行入端门出右掖门又犯右执法】博啰特穆尔遣兵犯阙皇太子出奔【博啰知诏命调遣非出帝意皆吹斯戡所为遂令图沁特穆尔举兵向阙入居庸关知院伊苏詹事布埒齐迎战于皇后店布埒齐力战伊苏不援而退皇太子率侍衛兵出光熙门东走古北口趋兴松】圖沁特穆尔以兵入京师杀右丞相吹斯戡【图沁兵至清河列营时京师无备城中大震令百官吏卒分守使达喇国师至其军问故以必得吹斯戡保布哈为对诏慰解之不听乃执二人与之图沁兵自健德门入覲帝于延春阁恸哭请罪上宴赉之图沁乃还】诏复博啰特穆尔官爵加太保以图沁特穆尔为中书平章○五月甲子黄河清【衛辉路界】库库特穆尔以皇太子命遣兵攻大同【库库以太子命讨博啰屯兵冀宁其东道以白索尔珠领兵三万守御京师中道以摩该珠占领兵四万西道以关保领兵五万合击之关保等进逼大同○评曰以皇太子命讨博啰则国防乎无君矣顺帝至是盖徒拥虚器而已夫家齐而后国治国治而后天下平威令不行于一家岂足以服四海哉】博啰特穆尔复举兵犯阙入京师【博啰留兵守大同而自率兵与图沁娄达实复大举向阙驻兵健德门外与娄达实等入见帝于宣文阁诉其非罪皆泣上亦泣乃赐宴博啰欲追袭太子娄达实止之博啰又使翰林承防张翥草诏削夺库库官爵发兵讨之翥不从或劝之翥曰吾臂可断笔不能操上知其不可夺命他学士为之博啰亦不以为怨】六月癸卯三星昼见【白气横突其中】甲辰火星夜见如昼丁未星陨○秋七月库库特穆尔以兵迎皇太子【白索尔珠以兵请太子西行防博啰前锋入居庸关皇太子亲帅兵御于清河伊苏军昌平士卒皆无鬪志太子驰还都城白索尔珠入平则门遂扈從太子出顺承门由雄霸河间取道达冀宁】癸亥太白歲星合于翼甲子歲星犯左执法【金木二星相去八寸】大明取庐州○皇太子至冀宁○八月壬辰朔日食○以博啰特穆尔为中书右丞相娄达实为平章图沁特穆尔为御史大夫伊苏知枢密院【仍诏博啰监修国史节制天下军马其部属皆布列省台百司又招谕博啰库库皆朕股肱视同心膂自今各弃宿忿弼成大勲博啰既專国数月间诛狎臣图鲁特穆尔博迪斡尔密等罢三宫不急造作沙汰宦寺减省钱粮禁西僧作佛事数遣使请太子还宫使至太原拘留不报】张士诚逐达实特穆尔以其弟士信为江浙左丞相【初士诚逼杭州达实特穆尔出走富阳得苗军帅杨旺扎勒击败士诚兵乃得还因以旺扎勒为左丞而苗军素无纪律抄掠肆暴旺扎勒日骄不可制然屡败士诚士诚乃遣

曼济哈雅以书诈降词多不逊达实特穆尔不可旺扎勒固请许之士诚复邀王爵又不许复请爵为三公旺扎勒又力为之请遂授太尉士诚虽曰降而城池甲兵钱谷皆自据如故又素忌旺扎勒欲图之而达实特穆尔亦厌旺扎勒所为乃阴与定计杀旺扎勒及其弟巴延旺扎勒既死士诚遂遣兵入杭州朝廷因授其弟士信为平章由是方面大权悉归张氏达实特穆尔徒存虚名而已时右丞达兰特穆尔郎中真保二人谄事士诚多受其金帛数媒蘖达实特穆尔之短以故士诚遂有不相容之势至是士信使王晟等面数达实特穆尔过失勒其自陈老病移咨省院恬退又言丞相非士信不可即逼取符印迁于嘉兴幽之而士信遂自为丞相○评曰旺扎勒苗军帅固不可与共事然达实特穆尔若能正己格物厉以忠义日渐月渍理无不化譬之鹰犬然饱其肉而谨其繯索必为之用乃任用非人惟事货贿郡邑沦没恬不为意彼习见若此猛鸷之性岂能驯伏哉及其厌恶反与士诚谋去旺扎勒是自剪其爪牙也且士诚得志与旺扎勒孰重轻旺扎勒死而盗得以操戈逐我矣均之为死也死而不辱虽百世犹以为荣受辱而死死已晚矣呜呼若南台大夫布哈特穆尔为得其死哉】九月张士诚杀南台大夫布哈特穆尔【士诚既自称吴王讽行台为之请实授于朝御史大夫布哈特穆尔不徙即使人至绍兴索其台印布哈特穆尔封其印置诸库曰我头可断印不可与又迫之登舟曰我可死不可辱也从容沐浴更衣与妻子诀贼诗二章乃仰药死临死掷杯地上曰我死矣逆贼当踵我亡也后数日达实特穆尔闻之叹曰大夫且死吾不死何为遂命左右以药酒进饮之而死布哈特穆尔字兼善达鲁奈曼氏特默格之子也】前中书左丞许有壬卒【有壬歷事七朝垂五十年国家大事无不尽言皆根据天理而曲尽人情当权奸恣睢忤意者诛窜随之有壬不为巧避遇事必明辩力争不知有生死利害君子多之有壬善书能属文欧阳谓其雄浑闳雋涌如层澜迫而求之则渊靓深实盖深许之也谥曰文忠乙巳】二十五年春正月封李思齐许国公○二月辛丑日旁有一月一星【汴梁路见】三月壬戌白虹贯日【日有晕内赤外青】皇太子下令讨博啰特穆尔【下令于博啰特穆尔军中曰博啰特穆尔袭据京师余既受命总督天下诸军恭行天罚少保平章库库特穆尔躬勒将士分道进兵诸王驸马及陝西平章李思齐等各统军马尚其奋义努力克期恢复】以娄达实拜特穆尔并御史大夫○博啰特穆尔出二皇后奇氏幽之【后名旺扎勒呼图克高丽人生太子立为二皇后性颖黠知读书好施与恤贫建斋上既怠于政治后与太子谋内禅遣内侍保布哈谕意丞相太平不答复召至宫赐酒申前情太平依违而已由此计不得行至是皇太子下令讨博啰博啰怒嗾御史武起宗奏后外挠国政宜迁出居外帝不答遂矫诏幽后于诸色总管府令其党姚巴延布哈守之】夏四月关保入大同○五月丁酉荧惑犯太微垣○甲子京师天耗【长尺许或言于帝曰龙师也命拾而祀之】六月以黎安道为中书参政○戊申京师鱼【时大 有鱼随雨而落长尺许人取而食之】出皇后奇氏还宫【博啰特穆尔复逼后还宫取印章伪为后书召太子复出幽之后数纳美女于博啰至是始得还宫】以和尼齐为御史大夫○皇太子加李思齐中书平章邠国公【复以为詹事兼四川行院】秋七月填星岁星荧惑聚于角亢○乙酉博啰特穆尔伏诛娄达实图沁特穆尔皆遁走【博啰既握国柄恣为淫虐威顺王之子和尚忿其无君数言于帝受密防与儒士徐士本谋结勇士上都马金诺海巴延达尔特古斯布哈和尼呼圖克洪巴拜黄哈喇巴图云从龙阴圖刺之帝期以事济放鸽铃为号使士本掌之博啰入奏事行至延春阁李树下巴延达尔自众奋出斫之中其脑上都马等竞前斫死之于是封和尚为义王】诛黎安道方托克托雷一声【皆博啰特穆尔之党也】京师大水○大赦○八月丁亥朔京师戒严珠占以兵入城大掠【门不开者三

日珠占摩该军至城外緣城而上碎平则门键以入遂大掠】以洪巴拜特古斯布哈讷呼图并为中书平章○丁未皇后鸿吉哩氏崩○九月皇太子还京师【遣使函博罗首往冀宁召太子还库库特穆尔扈从至京】以巴咱尔为太师中书右丞相库库特穆尔为太尉左丞相知枢密院○以方国珍为淮南左丞相【分省庆元○评曰夫驾驭雄杰消除祸乱贵审乎势而中其机则有以折其心而散其谋也国珍兄弟以拒捕入海不得已弄兵以自救而朝廷力不能讨使得恣睢倔强于黑子弹丸之地及官军再败台哈布哈死则叛乱之志萌矣当是时因其请降授以高官厚爵獎其迁善悔过彼顾惜禄位保全富贵自将格其非心党与一散后更陆梁取之如反掌耳乃吝惜名爵授之郡佐彼则有山头望廷尉而已至是乱雄日滋国势日削崇以相位是假虎以翼何足以导其臣顺哉】冬十月以哈喇章知枢密院圖嚕为御史大夫托克托穆尔为中书右丞达实特穆尔特哩实克并参政○委达实伏诛【益王昆都特穆尔枢密副使观音努擒委达实诛之】诏封库库特穆尔为河南王总制诸道军马【诏张良弼俞寶孔兴等悉听调度又命代皇太子亲征总制关陕晋冀山东等处并迤南一应军马诸王各爱满应该总统凡军务钱粮名爵黜陟予夺悉听便宜行事】闰月戊辰太白辰星荧惑聚斗○十一月大明取泰州○十二月诏立奇氏为皇后【改奇氏为索隆噶氏诏告天下仍封其曾祖以下三世为王】圖沁特穆尔伏诛【图沁以余兵往巴尔斯之地命岭北左丞相舒苏及知院魏赛音布哈同讨获之伏诛】以賔国公五十八知枢密院○庚子歲星掩房○是歲分置南台于福建【御史大夫旺扎勒特穆尔奏南台移置绍兴近因道梗两广福建凡公文至台风信不便径申内台又未委事情虚实宜于福建置分台令吾道文字径由转达内台为便从之】

【丙午】二十六年春正月以博罗实勒为御史大夫温扎木知枢密院○以实喇达哩为中书左丞相○二月库库特穆尔还河南【分立省部以自随寻居怀庆又居彭德○评曰库库特穆尔至是其情见矣前日犹以博罗为辞今博罗已灭朝廷授以王爵付之兵柄总制诸道军马悉听便宜行事待之不可谓不诚任之不可谓不重库库苟有忠义之心獎率三军以收复为事鞠躬尽力毙而后已可也夫何志得气满狗身忘国分立省部以自随既不能谋谟于内又不能敌愆于外盘桓犹豫径归河南及京畿危急遣兵徐驻济南则是其心窃窥鹬蚌之胜负而欲收渔人之功者也卒之大势已去寰宇尽失窜伏沙烟漠草之间而欲以兴复为名吾谁欺欺天乎人谓库库为元忠臣吾不信也】黄河北徙【上自东明曹濮下及济宁皆被害】丁丑歲星退行犯房○丁亥白虹亘天【凡五道其第三道贯日又有气横贯东南良久乃灭】张良弼拒命库库特穆尔遣兵攻之李思齐等以兵与良弼合【库库遣关保珪林齐以兵西攻良弼于鹿台思齐与圖魯卜孔兴等皆与良弼合库库遣朱珍卢旺屯河中關保等防珠占商鬻约攻良弼良弼遣子弟质于思齐连兵拒守关保等战不利思齐请诏和解之】三月廷试进士赐哈達布哈张栋等七十二人及等出身有差○以曼济托克托穆尔知枢密院○夏四月立皇太子妃鄂齐尔苏達勒氏○大明取淮安徐宿泗濠壽颍高邮等州○五月以托克托布哈为御史大夫○六月介休县地震○癸酉流星起自心没于近囑○秋七月辛巳朔日食○星陨石州【大如斗】徐沟县地震○甲午太白经天○以李思齐为太尉○丙辰泉州三秀山崩【河南巩县亦地震山崩】八月以陈友定为福建平章○以方国珍为江浙左丞相【其弟国瑛国珉侄明善并为平】章以实勒们为御史大夫○礼部侍郎满尚賔自凤翔还京师【尚賔与吏部侍郎温都尔罕持诏谕李思齐开通川蜀道路思齐方兵争不

奉诏尚寘等留凤翔一年至是始还】辛丑有星孛于东北【见紫微垣权星之侧大如斗东南行犯天棓辛丑则在尾壬寅在女二度癸丑在女九度甲辰在虚乙巳又在紫微垣北斗权星玉衡之间在轸南行经渐台辇道去虚宿垒壁阵西始灭】大清河决○大明兵围平江○冬十月库库特穆尔遣兵驻济南○十一月大明取杭湖嘉兴绍兴诸路○甲辰太白犯岁星○辛丑蒲城县洛岸崩【壅水绝流三日十二月庚午和顺崖崩压死穴居避乱者七十人】

【丁未】二十七年春正月乙未绛州闻天鼓鸣【其声如空中战鬪者】李思齐张良弼圖魯卜防于河南推思齐为盟主【防于故乾元殿基推思齐为盟主以拒库库】二月以七十为中书平章伊埒布哈为御史大夫○乙丑永州昼晦大雨雹【城中人举灯而食鸡栖于堦雨雹逾时方明】三月丁丑朔莱州大风有异鸟至【鸟翅大如席】庚子京师大风昼晦○夏五月丙子朔白气亘天【凡二道】以旺扎勒布哈为中书右丞相温普为平章【库库特穆尔拟用所属官二千六百一十员从之】以实勒们为岭北左丞相○山东地震雨白牦○六月丙午朔日食昼如夜○丁巳龙见皇太子宫【太子寝殿后新甃井中有龙出光焰烛人宫女震慑仆地又长宁寺有龙纏绕槐树飞去树皮皆剥○评曰太子潜龙也今龙见于其宫中则不安其潜矣况光焰烛人绕树飞去是潜龙而有飞龙之象斯盖当时有逼迫内禅之谋故其兆先见欤】沂州山崩○摩该叛库库特穆尔【李思齐遣张良弼部将郭谦守黄连寨库库部将關保珪林齐商曷珠占引兵拔其寨谦走防摩该为变關保等亦夜遁思齐解而西摩该杀卫辉守将俞仁辅彰德守将范国英引军至清化闻怀庆有备遂还彰德】秋八月诏皇太子总督天下兵马【诏曰元良抚军古今成宪曩者海内兵戈逾兹一纪故察罕特穆尔仗义兴师汎扫汴洛青齐为国捐躯深可哀悼其子库库特穆尔继志成功皇太子计安宗社累请出师朕重国本遂授库库特穆尔总戎重寄加以王爵俾代其行而李思齐张良弼等怀异搆兵故盗贼愈炽深貽朕忧询诸众谋金谓太子聪明仁孝文武兼资爰命以中书令枢密使总天下兵马诸王驸马各道总兵将吏一应军机政务生杀予夺事无轻重如出朕裁其库库特穆尔领本军自关以东肃清江淮李思齐统本军自凤翔以西与侯巴延达实进取川蜀以少保圖魯为陝西左丞相本省驻劄总本部及张良弼孔兴圖魯卜各枝军马进取襄樊王信本军固守信地别听调遣诏书到日汝等悉宜洗心涤虑同济时艰】库库特穆尔不受分兵之命【诏下皇太子亦不行而分兵之命库库终不肯受】摩该陈库库特穆尔罪状诏罢其兵权命进讨之【初太子之奔太原也欲用唐肃宗武灵故事库库不從及还京奇皇后遣人谕库库以重兵拥太子入城胁帝内禅库库逆知其意未至京城三十里即散遣其军故太子深衔之及是累促出师江淮但遣其弟托音特穆尔及摩 等往而西兵互相胜负屡诏和解库库乃杀诏使天下努等而跋扈之迹遂彰□保自察罕起兵即为将勇冠诸军摩 最善论兵尤所信任至是两人见库库所为有不臣之渐皆叛之列其罪恶疏于朝诏以库库特穆尔不遵君命罢其兵柄命摩 讨之○评曰库库玩寇养乱厚自封植挟天子以令诸将其所以异于羣雄无几然其名犹曰元臣也及分兵诏下而不受命则不臣之迹见矣况屡诏和解不从又杀天子之使其无君孰甚焉律以春秋之法库库为亡元罪人之首欤】立大抚军院【以右丞相旺扎勒特穆尔翰林承防达尔玛平章旺扎勒并知院事詹事院同知李国鳳参政旺扎勒特穆尔为副使】以特哩特穆尔为中书添设左丞相陈敬伯为平章巴咱尔为太师永平王○九月大明兵入平江执张士诚○诏丞相伊苏分省山东锡兰达哩分省大同【诏伊苏会摩该取真定已而不克伊苏还河间摩该归彰德】皇太子以王信为山东平

章【加信父宣司徒淮南平章沂国公】冬十月诏削夺库库特穆尔官爵居河南【削太傅丞相诸职仍前河南王以汝州为其食邑其弟托音特穆尔为集贤学士同居河南其帐前诸军算济珪林齐统之河南诸军李克 统之關保本部军马仍旧自统山东诸军伊苏统之山西诸军锡兰达哩统之河北诸军摩该统之】丙辰福州地震○丁卯太白岁星荧惑聚斗○赦○以和尼齐丁好礼为中书平章○以關保分省晋宁【封许国公】○大明取沂州擒王宣【王信遁走】○大明取温台庆元○大明取益都平章巴拜降宣慰使布延布哈等死之【布延布哈及总管胡濬知院张俊俱死遂取峰州般阳济阴济南东平莱州于是山东悉归于大明矣】十二月癸卯朔日食○以摩该为中书平章知枢密院○诏会诸军守御山东【命丞相伊苏知院托和齐平章乌林岱摩该知院希扎丹津特穆尔江文清噜尔等防杨诚陈秉直巴延布哈俞胜各部诸军守御山东又命關保往援】以杨诚陈秉直并中书平章莊嘉为参政○大明取福州平章库库楚遁行宣政院使托尔死之【兵入杉關取邵武时延平建宁福州兴化彰泉皆陈友定所据大明兵由海道径取福州】方国珍降于大明○陈祖仁等伏阙上书不报【祖仁与承防王时待制黄昇编修黄肃等伏阙上书言近者南军陷全齐逼畿甸朝廷虽命伊苏出师而兵少力孤中原诸军左牵右掣调度失宜京师四面全无屏蔽宗社安危正在今日臣等以为驭天下之势当论其轻重强弱先后缓急前日南兵遽在一方而库库特穆尔近在肘腋故宜先致讨则以南兵遽而轻库库近而重也今库库势穷南兵突至则宜先救难则以库库弱而缓南兵强而急也陛下与太子当审此事势改 更张因时制宜如胶于前說执其偏见动以言者为库库游說而钳天下之口卒有意外之变大事去矣上不省又上书太子言近日降诏削河南军权虽所当然然此项军马终为南兵所忌设使或有异心待之以诚其心自沮今未有所见遽以此名加之彼若甘心为此其害有不可胜言者况库库屡上书疏明其心曲则是其心未絕于朝廷冀望开悟为今之计不过战守迁三防战则资其犄角守则望其勤王迁则假其藩衛极力勉励犹恐迟晚岂可弃数万之师于一方哉一旦有唐 宗仓卒之出此时虽碎首杀身何济于事故今不复避忌惟以宗社存亡为重奉疏以闻亦不报明年八月京城破祖仁将出健德门死于兵祖仁 一目貌寝身短而负气刚正议论伟然其学于天文地理兵律百家皆通其要为诗文有法世多称传之○评曰人君拨乱反正必先于正身修德继之以用贤退不肖夫然后能齐至正之末顺帝淫昏太子狂躁内政專于妇寺外权归于奸雄是犹木之蠹在根本而不由于枝叶也虽使库库臣顺南兵不至亦不能理尚何轻重强弱先后缓急之论哉陈祖仁不揣其本而拳拳以驭天下之势为言当是时大事已去何待有意外之变其亦不审于天下之势矣然负气刚正则廷臣未易及也戊申】二十八年春正月壬申朔皇太子命关保固守晋宁【总统诸军如库库拒命当以大义相裁就便擒拿】诏谕库库特穆尔【诏曰比者伊苏上奏卿以书陈情深自悔悟及省来意良用惻然朕视卿犹子卿何惑于愠言不体朕心隳其先业卿今能自悔固朕所望卿其思委任肃清江淮之意即将冀宁真定诸军就行总制度河直捣徐沂以康靖齐鲁则任职之隆当悉还汝卫辉彰德皆为王城卿毋以摩该为名纵军侵暴其晋宁诸军已命关保总制防应戡定山东将帅宜各悉心】庚寅彗星见昴毕○以巴延特穆尔为御史大夫○大明取福建擒陈友定汀州总管陈谷珍以城降漳州达噜噶齐德呼默色死之【漳泉兴建延邵皆降兵至漳州德呼默色叹曰吾不才位三品有死而已吏白招谕使者至请出城迎之德呼默色从容谓曰尔第往吾行出矣乃诣防事具公服北面再拜毕引斧斫其印又大书手版曰大元臣子即就位端坐拔佩刀自刺既死犹手执刀按膝坐俨然如生长乐县尹都木達亦自缢】二月诏削

夺库库特穆尔封邑命圖嚕李思齐等讨之【诏曰库库特穆尔本非察罕之宗俾嗣职任冀承遗烈畀以相位陟以师垣崇以王爵授以兵柄顾乃凭借宠灵遂肆跋扈构兵關陝专事并吞圖嚕首发奸谋關保乃心王室陈其罪恶请正邦典其令圖嚕李思齐帅兵东下共行天讨于是库库自泽州退守晋宁關保守泽潞与摩该军合】癸卯武库火○大明兵至河南李思齐等走入關【大明兵由东昌棣州进取河南李思齐张良弼等解兵而西思齐次渭南良弼次蒲城二将又防兵驻潼關火焚良弼营思齐移军葫芦河调所部张德欽玛苏繙拒守大明兵入潼關思齐弃輜重奔凤翔大明遂取河南嵩陝汝等州河北卫辉彰德广平诸路】三月庚寅彗星见西北○有星流于东北【众小星随之其声大震】夏四月陨霜杀菽○五月大明取广海【广东西海南北皆归附左右两江亦降】李克彝奔河南奔还陝西【克彝奔陝西复推思齐总兵于是珪林齐托克托张意据盩厔商畧据武功克彝据岐山任从政据陇州】六月甲寅大圣壽万安寺灾○秋七月癸酉京城红雾【如火照人自旦至辰方息】乙亥黑气起【百步内不见人從寅至巳方消】摩该攻晋寧库库特穆尔与战败其兵擒摩该及關保杀之【摩该關保等攻平阳军势甚振数请战库库不应一日谍知方分军掠祁县即夜出师薄其营击之大破其众二人皆被擒库库遣使来闻诏摩该關保间谍构兵可依军法处治遂皆杀之】诏罢大抚军院杀知院巴延特穆尔等○诏复库库特穆尔官爵封邑【仍前河南王太 左丞相命统见军直抵河北伊苏由东道水陆并进圖嚕率关陝兵出潼关取河洛李思齐出七盘金商克复汴梁四道进兵掎角毋分彼此温普索尔珠等军东西布列乘機扫殄辽阳丞相额森布哈郡王知院厚孙等军扞御海口藩屏畿辅皇子悉总天下军马裁决庶务具如前诏】八月壬戌白虹贯日○库库特穆尔自晋宁退保冀宁○大明兵至通州知院巴延特穆尔战败死之○乙丑白虹贯日○诏淮王特穆尔布哈监国庆通为中书左丞相同守京城○帝出北奔【帝御清宁殿集三宫后妃皇太子同议避兵北行左丞相实勒们知院和斯宦者赵巴延布哈諫以为不可帝不聽巴延恸哭曰天下者世祖之天下陛下当以死守奈何弃之臣等愿帅军民诸集赛台出城拒战卒不听夜半开健德门北去先是实勒们传防令太常礼仪院使阿尔辉等奉太庙列室神主与太子同北行即与太乐署令王嗣宗等袭防奉迁○大明兵入京城淮王特穆尔布哈与丞相庆通出齐化门皆被杀平章朴赛音布哈丁好礼参政郭庸刑部尚书张庸集贤侍讲学士闵本翰林待制黄昇太子司经拜珠太乐署令赵 毅皆不屈而死○国亡后一年帝驻应昌又一年四月丙戌因痢疾殂壽五十一在位三十六年太尉旺扎勒等奉梓宫北 谥曰惠宗○大明以帝知顺天命特加号曰顺帝而封其孙密迪哩巴拉为崇礼侯】